

საქართველოს სსრ მეცნიერებათა აკადემია
აკად. ს. ჯანაშიას სახ. საქართველოს სახელმწიფო მუზეუმი

მ ა ს ა ლ ე ბ ი
გურიის ეთნოგრაფიული
შესწავლისათვის



გამომცემლობა „მეცნიერება“
თბილისი
1980

წინამდებარე ნაშრომი წარმოადგენს გურიის რაიონებში შეკრებილი ეთნოგრაფიული მასალების საფუძველზე დამუშავებული ცალკეული საკითხების კრებულს. ნაშრომში თემების სახით წარმოდგენილია ძველი და ახალი საშეერთო კულტურები, მესაქონლეობასთან დაკავშირებული რწმენა-წარმოდგენები, შრომის ორგანიზაციის ფორმები, ტანსაცმელი, მღებრობა, ბავშვთა აღზრდის საკითხები, მიცვალებულის კულტი, ხელოსნობის დარგები და სხე.

რედაქტორისაბან

გურია, საქართველოს ერთ-ერთი უღამაზესი კუთხე, ზღვის სანაპირო ზოლით, რბილი კლიმატით, დაბალი მთაგორიანი მდებარეობით, უხვი მცენარეული საფარით, შესანიშნავი სამკურნალო წყლებით, ბახმაროს გამაჯანსაღებელი ჰაერით, ჩაისა და ციტრუსების უხვმოსავლიანი რაიონებით კეთილი და გამრჩე, შრომისა და ბრძოლაში შემმართებელი ხალხის ადგილსამყოფელია. სამი რაიონი განლაგებულია 2000 კვ. კმ ფართობზე. ზღვის სანაპირო ზოლში გაუღის მაგისტრალური რკინიგზის ხაზი და საავტომობილო გზა.

გურიის მოსასლეობა, თავისი მდებარეობისა და შინაგანი ვითარების წყალობით, ისტორიულ წარსულში მძიმე პირობებში ცხოვრობდა.

XIX საუკუნის მეორე ნახევარში საქართველოს კუთხეებიდან ყველაზე მეტად გურიაში იგრძნობოდა არსებული ცხოვრების საწინააღმდეგო მოძრაობა.

გურულ გლეხთა მოძრაობამ თავი გამოამჟღავნა 1905 წელს, როცა იგი რევოლუციურ გამოსვლებში გადაიზარდა.

საქართველოში სოციალისტური რევოლუციის გამაძრვებელი გურულ გლეხთა ახალი ცხოვრების დასაწყისს ჩაეყარა საფუძველი. ახალმა ცხოვრებამ თან მორტანა ცხოვრების ახალი წესი. შეიცვალა რა წარმოების ძველი წესი, დამყარდა ახალი საწარმოო ურთიერთობის ფორმები, რასაც მოჰყვა ცვლილებები საზოგადოებრივ და საოჯახო ყოფაში, ახალმა ცხოვრებამ ბევრი სიახლე მოიტანა, მაგრამ ეთნოგრაფიული თვალსაზრისით, ამ სიახლეთა შიგნით კიდევ დარჩა რალაც ელემენტები ძველი ყოფიდან, რომელთა შესწავლას დიდი მნიშვნელობა ენიჭება.

გურიაში სახალხო მეურნეობის ისეთმა რენტაბელურმა დარგებმა, როგორცაა ჩაი, ციტრუსები და ტექნიკური კულტურები, დიდი სამეურნეო გადატრიალება მოახდინა. ამას თან მოჰყვა მეურნეობის წარმოების ახალი სამეურნეო მანქანა-იარაღების დანერ-

გვა სამეურნეო საქმიანობაში, რამაც გააძლიერა ტექნიკური ინტელიგენციის ხვედრითი წონა სოფლის მეურნეობაში. ეს ხაზი აღმავალი გზით მიდის. ჩვენი თანამედროვე სოფელი სულ სხვა სახეს იღებს. ძველი გურული სოფლის ცენტრის ძირითად ობიექტს აქა-იქ ხის ეკლესია და საწვრილმანო ღუქანი წარმოადგენდა. ახლა სოფლების დაგეგმარება ქალაქური დასახლების ტენდენციებით-საყენ იხრება, ქალაქთან შედარებით უფრო შეუზღუდავი თავისუფალი არქიტექტურული ნაგებობებით (კულტურის სახლები, ადგილობრივი ხელისუფლების ადმინისტრაციული სახლები, კლუბები, მაღაზიები სკოლები და სხვ.) სოფელი ნაყოფიერი შრომისა და დოვლათის წარმოების ობიექტად იქცა.

გურულმა სოფელმა აშკარად დაკარგა თავისი ძველი იერ-სახე. გაქრა ისლით დახურული შუაეცეხლიანი სახლები, შეიცვალა დასახლების გურული ტიპი, სამეურნეო დანიშნულების მრავალი (ნალია, საქათმე, საღორე, ახორა, და სხვ.) ნაგებობები შეერწყა ახალი ტიპის ნაგებობათა ერთიანობას.

გურული საცხოვრებელი ნაგებობის განვითარება გარკვეული კანონზომიერებით მიმდინარეობდა, ისლით გადახურული ქუნხა სახლი, რომელიც მიწაზე იყო უშუალოდ დადგმული, შემდგომში მიწიდან ქვის ან ხის ბიჭგებზე შედგმული სახლით უნდა შეცვლილიყო. ამის შემდგომ ეტაპს წარმოადგენდა ორსართულიანი სახლი, რომელსაც გურიაში პალატიან სახლს უწოდებდნენ.

პალატიანი სახლის კედლები გურიაში წაბლის ხის ფიცრებისაგან შენდებოდა. კედლის შენება ორი წესით მიმდინარეობდა: კუთხეებში თუ ბოყვები იყო დასმული და ფიცარი ბოყვის ღარებში ლაგდებოდა, ასეთ სახლს ბოყვიანი ერქვა, ხოლო თუ ფიცრები ერთიმეორესთან ყელებით იყო გადაჭიმული, ასეთი წესით ნაგებ სახლს ყელიანი ეწოდებოდა, ყელიანი სახლები უკეთესად ითვლებოდა. გავიდა დრო, ხის მასალა შეცვალა აგურმა და ბლოკ-მა. თანამედროვე გურიაში გავრცელებული სახლი არაჩვეულებრივად დიდი მოცულობისაა. ტიპური დადგენილი გეგმა არ არსებობს, მაგრამ სახლის დაგეგმირებაში ბუხარს, როგორც შენობის ცენტრალურ ნაწილს, კვლავ დიდი მნიშვნელობა ენიჭება.

თანამედროვე ზოგიერთი საცხოვრებელი სახლი არაფრით არ განსხვავდება გურიის დაბა ქალაქებში არსებული სახლებისაგან. ასევე ავეჯი და შინაგანი განლაგება ყოველნაირად თანამედროვე მაღალი კულტურული დონის შესაბამისობაშია წარმოდგენილი.

გურიაში, როგორც წესი, ზედა სართულის ერთი ოთახი სტუმრებ-
ბისათვის არის გათვალისწინებული. სტუმარმა რომ არ მოიწყი-
ნოს, ოთახში თავის შესაქცევად დადგმულია რადიომიმღები, აქვეა-
ქადრაკი ან ნარდი, ჟურნალ-გაზეთები და სხვ. სტუმარ-მასპინ-
ძლობის უძველესი ტრადიცია გურიაში ყოველთვის იყო განსაკუ-
თრებული ყურადღების ცენტრში. დღევანდელ პირობებში მან
ახალი შინაარსი შეიძინა და ახალი საბჭოური ფორმები მიიღო.
სოფელში მოსული სტუმრის პატივისცემამ, მისადმი ყურადღება
მასპინძლის ოჯახის ფარგლებს სცილდება. სტუმარს ყურადღებას
აქცევს მთელი სოფელი. იწვევენ ყველა იმ მნიშვნელოვან ღონის-
ძიებაზე, რაც სოფელში ტარდება. სტუმრისადმი პატივისცემა
ბოლო წლებში სარაიონო მნიშვნელობის ზრუნვის საგანიც გახ-
და. მაგ., 1977 წლის ზაფხულში ლანჩხუთის პარტიის რაიონულმა
კომიტეტმა იმ დროს სტუმრად ჩამოსულთათვის სათანადო მოსა-
წვევები დაგზავნა: „ძვირფასო მეგობარო! რაიონში ჩამოსული
სტუმრების კულტურული დასვენების მიზნით, შემუშავებულ ღო-
ნისძიებათა გეგმის შესაბამისად, მიმდინარე წლის 7 აგვისტოს
თქვენთვის დაგეგმილია ღონისძიებანი შემდეგი პროგრამით:

1. 8 საათზე შეკრება პარტიის რაიკომში.
2. 9 საათზე — ქალაქის ახალმშენებლობის დათვალიერება.
3. 11 საათზე ნინოშვილის სახლმუზეუმის დათვალიერება.
4. 12 საათიდან 17 საათამდე გრიგოლეთის ბოგვერაძის კუნ-
ძული.

5. 18 საათზე დასწრება ფეხბურთის მატჩზე სსრ კავშირის
პირველობაზე მოასპარეზე „ა“ კლასის მეორე ლიგის გუნდებს შო-
რის „გურია“ და გორის „დილა“.

გთხოვთ, გვეწვიოთ! საორგანიზაციო კომიტეტი“.

გურიის 1977 წლის ეთნოგრაფიული ექსპედიცია, როგორც
რაიონის საპატიო სტუმარი, მიწვეული იყო ამ ღონისძიებაზე. აქ-
ვე იყვნენ ლანჩხუთის ახლო სოფლებში ჩამოსული სხვა სტუმრე-
ბიც. სტუმრებმა ამ ღონისძიებით, გარდა რაიონის ღირსშესანიშ-
ნაობებისა, ერთიმეორეც გაიცნეს და რაიონის სისხლსავე ცხოვ-
რებას უფრო ახლო შეხვდნენ.

ჩვენ არ ვიცით, კიდევ რომელ რაიონში ტარდება ეს ღონის-
ძიება ან ვინ არის მისი პირველი წამომწყები, ჩვენ მხოლოდ ფაქ-
ტი აღვნიშნეთ. ფაქტს, რომელსაც სტუმარ-მასპინძლობის ტრადიციებში სიახლე შეაქვს და ახალ მაღალ დონეს გამოხატავს.

გურიის სოფლის ცხოვრებაში მრავალი სიახლე დაინერგა. სიახლე იგრძნობა, როგორც საწარმოო და საზოგადოებრივ სფეროში, ისე საოჯახო ურთიერთობაში. საწარმოო სფეროში მომხდარმა ცვლილებებმა გარკვეული ზემოქმედება მოახდინა საზოგადოებრივ და საოჯახო ყოფის სხვადასხვა მხარეზე.

საოჯახო ყოფა რამდენიმე ასპექტში წარმოდგინდება საქორწინო ნათესაურ ურთიერთობაში, მიცვალებულს დაკრძალვასთან დაკავშირებულ წეს-ჩვეულებებში, რელიგიურ რწმენა—წარმოდგენებთან. დაკავშირებულ რიტუალებში. ხალხურ ფოლკლორში. ცეკვა-თამაშში და აღზრდის წესებში.

თანამედროვე ცხოვრების პირობებში სწრაფად ქრება ძველი უთნოგრაფიული ყოფის ამსახველი მასალები, თითოეულ ამ ასპექტს კი საგანგებო შესწავლა სჭირდება.

საქართველოს სახელმწიფო მუზეუმის კომპლექსურმა ეთნოგრაფიულმა ექსპედიციებმა გურიაში გამოავლინეს მთელი რიგი საკითხებისა, რომელთაც ესაჭიროებათ მონოგრაფიული კვლევა-ძიება. ასეთად გვეჩვენება მიცვალებულის კულტი, ხის დამუშავების ხელოვნება, ქვის დამუშავების ხალხური წესები, ქორწინების წესები და სხვ.

1934 წელს საქართველოს სახელმწიფო მუზეუმის მეცნიერ თანამშრომლებს ყურადღება მიუქცევიათ გურული ცეკვებისათვის. ამასთან დაკავშირებით მაშინდელ დირექციას ჩოხატაურში ლუკა არანენს ძე ბერძენიშვილისათვის საგანგებო წერილიც მიუწერია ამის გამო. თუ რა დიდ მნიშვნელობას აღწევდნენ ეთნოგრაფიულ მასალას, ამ წერილის ტექსტი ნათლად ღალადებს.

მ. ო. ლ. ლუკა ბერძენიშვილის ჩოხატაური.

საქართველოს სახელმწიფო მუზეუმში ძალიან დაინტერესებულა, — ერთი ძველებური ცეკვით, რომელიც, საერთოდ რომ ვთქვათ, ახლა გადავარდნილი იქნება. როგორც ჩვენ ნიკო ბერძენიშვილისაგან გავიგეთ, მამათქვენს და ორ თქვენს ბიძას ეს ცეკვა სეოღნიათ. არ ვიცით, არც ამ ცეკვის სახელი და არც ის, თუ როგორ სრულდებოდა ის, ჩვენ იმედი გვაქვს, რომ თუ ვინმემ იცის გურიაში ამ ცეკვის შესახებ, ეს ყოველის უპირველესად თქვენ იქნებით.

საქართველოს მუზეუმს სურს ეს ცეკვა ასწეროს და შეისწავლოს რაც შეიძლება დაწვრილებით.

ამიტომ გთხოვთ, გვაცნობოთ დაზღვეული წერილით, გეგულებათ თუ არა გურიასში ამ ცეკვის მოცეკვავე ხალხი, თუ გეგულებათ, გთხოვთ, დაგვისახელოთ ასეთი პირები და გვაცნობოთ მათი მისამართი.

ამას გარდა გთხოვთ, თუ შესაძლებელია, შეადგინოთ ამ ცეკვის სრული აღწერილობა და გადმოგვიგზავნოთ საქართველოს მუზეუმში სწავლული მდივნის სახელზე.

ვინაიდან ამ ცეკვას მეცნიერებისათვის, შესაძლებელია, დიდი მნიშვნელობა ჰქონდეს. საქართველოს მუზეუმს იმედი აქვს, რომ დაამარებაზე უარს არ იტყვიან. მსწავლული მდივანი (მ. შევარდნაძე)“.

„ჩემო ლუკა, ეს ამბავი, მართალია, ცეკვას ეხება, მაგრამ საცეკვაო არ არის, არაჰედ სერიოზულია. შენი დახმარება საჭიროა და იმედი მაქვს არ დაიზარებ და რაც იცი ამის გარშემო ზედმიწევნით, დეტალურად აწერ და გამოგზავნი. ვფიქრობ, ანტონ ძნელაძესაც უნდა ახსოვდეს რამე აქედან. ან შეიძლება შენ იცოდე — ვის ახსოვს, ან ხომ არ არის ვინმე იმათგანი ცოცხალი ვინც თვითონ ცეკვავდა.“

საქმე შეეხება იმ „ქაჯურ ცეკვას“. რომლის შემსრულებლებად მე თვით მინახავს განსვენებულნი მამა შენი და ბიძა შენი. ეს არ იყო არც „ლეკური—არც „ბალადაური“ არც სხვა ცნობილი ცეკვა. იქ მოტივიც სხვა იყო და თამაშობაც. სამწუხაროდ, ეს მე მაშინ ვნახე, როცა ჯერ კიდევ 7—8 წლის თუ ვიქნებოდი. ამბობდნენ მკაცრებლები (ეს იყო აღდგომის „სათამაშოში“ ჩოხატაურში, იქ, სადაც შემდეგ „საპარასკევო“ იყო): არსენე და გლახუნე ქაჯურს ცეკვავდნენ“.

ეხლა თუ რამ გახსოვს ამ ცეკვის შესახებ ან იცი ისეთი პირი, რომელსაც ასეთი რამ ახსოვს, მისწერე ამ ხალხს, კულტურული საქმეა. იმედი მაქვს არ დაიზარებ. შენი ნიკო ბერძენიშვილი. 11/XII—34 წ. ტფილისი“.

ამ წერილებს რა შედეგი მოჰყვა, ჩვენ არ ვიცით, მაგრამ, როცა 1978 წელს იგივე ჩოხატაურის რაიონში „ქაჯური“ ცეკვის შესახებ მოხუცებს ვეკითხებოდით, მათ ეს ტერმინიც კი ძლივს ახსოვდათ.

„ქაჯური“ ცეკვის მაგალითი მრავალი საკითხის მიმართ შეიძლება გამოდგეს. ჩვენ ამით იმის თქმა გვინდა, რომ ეთნოგრაფიული მასალის შეკრება უნდა მიმდინარეობდეს უფრო აქტიურად, ამ საქმეში რაიონების მხარეთმცოდნეობის მუზეუმებმა უფრო მეტი ინიციატივა უნდა გამოიჩინონ. მოსაწონია და მისაბაძი ჩოხატაურის მხარეთმცოდნეობის მუზეუმის ინიციატივა, რომელმაც რაიონის ისტორიკოსთა დახმარებით ცალკეული სოფლის ნარკვევები შექმნა. ახლა ეს მასალები დიდ დახმარებას უწევენ. როგორც თვით მუზეუმს, ისე რაიონში სამუშაოდ ჩასულ ისტორიკოსებს. ეთნოგრაფებს, ფოლკლორისტებს და ეკონომისტებს.

წინამდებარე კრებული მხოლოდ რამდენიმე თემით შემოიფარგლა. ავტორთა კოლექტივმა იცის, რომ ამ თემებით გურიის მთლიანი სურათის ჩვენება ძნელი საქმეა. თანამედროვე გურიის ეკონომიკური მხარის და სულიერი კულტურის დონის ყველა მხარის წარმოჩენას რამდენიმე ასეთი კრებული დასჭირდება.

ბ. ჯალაბაძე

ძველი და ახალი სამეურნეო კულტურები გურიაში

გურია ისტორიულ ეთნიკური რეგიონია, რომელიც მდებარეობს დასავლეთ საქართველოს სამხრეთ-დასავლეთ ტერიტორიაზე. გურიის ტერიტორია დღეისათვის ლანჩხუთის, მახარაძისა და ჩოხატაურის რაიონებით არის წარმოდგენილი. გურიის მთელი ფართობი შეადგენს ორი ათას კვ. კმ. გურიაში ორი ქალაქია, სამი დაბა და 58 სასოფლო საბჭო, რომელშიც შედის 190 სოფელი, გურიის მოსახლეობა 1959 წლისათვის 146 ათასამდე კაცს აღწევდა¹. გურიის მოსახლეობის ძირითად შემადგენლობას 30-იან წლებამდე ქართველობა შეადგენდა². საქალაქო ცხოვრების წინსვლა-განვითარებამ, სხვადასხვა სახის საწარმოების შექმნამ და ჩაის შრომატევადი კულტურის გავრცელებამ დიდი როლდენობით მიიზიდა როგორც რაიონის გარედან, ისე რესპუბლიკის გარედან მოსული, მათ შორის არაქართული მოსახლეობაც. 1959 წლისათვის არაქართულმა მოსახლეობამ 13%-ს გადააქარბა³. ქალაქებსა და დაბის ტიპის დასახლებებში ჩასახლდნენ სომხები, ქურთები რუსები, უკრაინელები, აზერბაიჯანელები, ოსები, ბერძნები და სხვა. თუ 1926 წელს გურიის მთელი მოსახლეობა ქართველებით 99.6% იყო წარმოდგენილი, 1960 წლისათვის ქართველთა როლდენობამ სხვა ერების წარმომადგენელთა მომატების შემდეგ 86.4% შეადგინა⁴. გურია საკმაოდ მჭიდროდ არის დასახლებული, დამუშავებული მიწების 1 კვ. კმ-ზე მოდის 200 კაცი.

ტერიტორიულად ყველაზე დიდი ფართობი ჩოხატაურის რაიონს უჭირავს, მოსახლეობით კი მახარაძის რაიონი სჭარბობს. სა-

¹ ვ. ჯ ა ლ ბ ე ი ლ ი, მახარაძე-ლანჩხუთის ქვერაიონის მოსახლეობა, მახარაძე-ლანჩხუთის ქვერაიონის (გურიის) ეკონომიურ-გეოგრაფიული ნარკვევები, თბ., 1964, გვ. 68.

² იქვე, გვ. 67-68.

³ იქვე.

⁴ იქვე, გვ. 67.

ქართველოში საბჭოთა ხელისუფლების დამყარებამდე გურიის ცენტრი ოზურგეთი იყო, რომლის მოსახლეობა XIX ს. დასასრულს 4000 კაცს აღწევდა.

გურია მდებარეობით სუბტროპიკულ ზონაშია მოქცეული, წლიური ნალექები 2000 მმ აღემატება, მთაბორცვიანი მდებარეობით ხასიათდება. ვერტიკალური ზონალობა იწყება ზღვის სანაპიროდან და გრძელდება ბახმაროს მთებამდე, სოფლები სხვადასხვა სიმაღლეზეა განლაგებული. მდინარეთა ხეობების თავიანთებურმა მდებარეობამ და დინების შესაბამისად ხეეთა განლაგებამ ხელი შეუწყო ცალკეული სამეურნეო უბნების თავიანთებურებათა ჩამოყალიბებას. ამის შესაბამისად გურია გეოგრაფიული მდებარეობით წარმოგვიდგება ზღვის სანაპირო რაიონად, რომელიც უფრო დაბლობებით ხასიათდება და მთა-ბორცვიან ზონად, რომელიც ზღვის სანაპირო ზოლს ეკვრის. როგორც პირველი, ისე მეორე ზონა სამეურნეო დანიშნულებით ძველი დროიდანვე ყოფილა ათვისებული.

სამიწათმოქმედო გაშლილი ველები და ფართობები გურიაში არ არის, თუ არის, ისიც ძალზე მცირეა და უმნიშვნელო. ამდენად, სახნავ-სათესი მიწების ფართობები მცირე ნაკვეთებად არის წარმოდგენილი. ეს გარემოება თავიდანვე უარყოფითად მოქმედებდა სოფლის მეურნეობის ინტენსიურ განვითარებაზე.

ტრადიციულ სამეურნეო კულტურას გურიაში შეადგენდა ღომი, სიმინდი, ლობიო, ქვავი, იშვიათად ქერი, ზოგიერთ სოფელში დამოწმდა მასალა პურის ისეთი ჯიშის შესახებ, რომელსაც თავთავეებს აწყვეტდნენ და ისე ფშვნეტდნენ. ხორბლის ამ სახეობის არც სახელია შემორჩენილი და არც მისი მოვლა-მოყვანის წესები ახსოვთ.

ტექნიკური კულტურებიდან მოჰყავდათ ბრინჯი, თამბაქო და ბამბა.

ღომის კულტურა დიდი ხნის წინათ მიუტოვებიათ, თუმცა ახსოვთ მისი მოვლა-მოყვანის წესები და ჯიშები. ღომის კულტურა სიმინდის კულტურამ შეცვალა. ღომისაგან განსხვავებით სიმინდში ხდებოდა ლობიოსა და სიოოს შეთესვა, რომელსაც ჩვეულებრივ 1/5 წილს ურევდნენ.

სიმინდის კულტივაცია თითქმის ისეთივე იარაღებით მიმდინარეობდა, როგორც ღომისა. გვიანდელი დროისათვის ღომის ვიწრო პირიანი თოხი განიერი თოხებით შეიცვალა. ამას გარდა სიმინდის თოხს უნდა შეეცვლოდა აგრეთვე სატარე მოწყობილობა.

ჩანს, რომ მრგვალი სატარის ნაცვლად თოხმა შეიძინა ოთხკუთხა ფორმის სატარე, რომელსაც ტარი მყარად ეგებოდა. ამას კი თოხით მოქმუშავეისათვის დიდი მნიშვნელობა ჰქონდა.

სამეურნეო იარაღები, მათ შორის თოხები სხვადასხვა სამეურნეო კულტურების მოვლა-მოყვანიათვის საჭირო სამუშაოების შესაბამისად უნდა ჩამოყალიბებულყო. ერთი საინტერესო კონკრეტული მაგალითი გურიაში მეჩაეობასთან არის დაკავშირებული. კოლექტივიზაციის დაწყებამ დაემთხვა ჩარს პლანტაციების გაშენება. პირველ ხანებში კურსი იქნა აღებული იქითკენ. რომ ჩარსათვის ახალგატეხილი მიწები გამოეყენებინათ. იმ პერიოდში გლეხობას არ გააჩნდა ილერი სამეურნეო იარაღები, მათ შორის ჭერ კიდევ არ იყო საპლანტაეე გუთნები, ტრაქტორის წევახე. გლეხებმა ახალ ნატეხ მიწებში რკინის კეტებით და წერაქვებით უხდებოდათ მიწაში დარჩენილი ფესვების ამოძრევა და მიწის გასუფთავება. ჩოხატაურის რაიონის სოფელ ქვენობნელი მკედლის ვასილ გიორგის ძე თავართქილაძის (70 წლისა, 1978 წ.) გადმოცემით, მას, როგორც მკედელს, აგრონომმა მისცა ნახაზი და მახარაძის კოლმეურნეობის დავალებით ბევრი „თოხნაჯახი“ გამოქედა. კომბინირებული იარაღის თოხნაჯახის სიმაღლე 30 სმ ყოფილა. ცულის სიმაღლე—10 სმ, ცულის პირის სიგანე—10 სმ, თოხის ტარის სიმაღლე—15 სმ, სამუშაო პირის სიგანე—10 სმ.


თოხნაჯახს იყენებდნენ დაფესვიანებული ახალნატეხი მიწის დასაბარავად. თოხის მხრიდან გადმობარავდნენ და ცულის მხრიდან ფესვებს ამოჭრიდნენ, ასეთი კომბინირებული იარაღები საერთოდ მრავლად იყო საქართველოს მთის რაიონებში შემონახული (ქარჩი, ცულქარჩი, ცულწერაქვი და სხვ.)

მიუხედავად მიწათმოქმედებისათვის არახელსაყრელი პირობებისა. გურიაში მიწათმოქმედების კულტურას ოდითგანვე მისდევდნენ. ამის მაუწყებელია გურიის ტერიტორიაზე საკმაოდ დიდი რაოდენობით მოპოვებული სხვადასხვა ტიპის ბრინჯაოს თოხები, დაცული როგორც საქართველოს სახელმწიფო მუზეუმის, ისე მახარაძისა და ჩოხატაურის მხარეთმცოდნეობის მუზეუმებში.

ბრინჯაოს ხანის კოლხური კულტურის ისტორიის შესწავლისას არქეოლოგმა დ. ქორიძემ საკმაოდ საფუძვლიანად გააშუქა ბრინჯაოს განძების აღმოჩენის პუნქტები და განძთა შემადგენლობიდან ვრცლად შეეხო სამეურნეო იარაღებს (აურ. 1).

როგორც ზემოთ აღვნიშნეთ, გურიის ძველი აღმინისტრაციული ზღვარი რიონიდან კოროხამდე და მესხეთიდან შავ ზღვამდე

ტერიტორიას მოიცავდა. ბრინჯაოს ხანაში იყო თუ არა ეს მიკრო-რაიონი რაიმე ცალკე ეთნიკური ერთეულის სახით წარმოდგენილი, ძნელი სათქმელია. ბრინჯაოს განძეულობა და საერთოდ ამ



სურ. 1. ბრინჯაოს თოხები (გუთურის განძი)

დროის სამიწათმოქმედო იარაღები საგრძნობლად ბევრ პუნქტებშია ნაპოვნი. პუნქტების უმრავლესობა კოროხიდან მოკიდებული გაუყვება გურიას, გასდევს ქვემო იმერეთის მთისძირა ზოლს და ქუთაის—წყალტუბოზე გავლით გადადის რაჭასა და ლეჩხუმში ბრინჯაოს იარაღების ნაირსახეობითა და სიუხვით გამოირჩევა კოროხიდან ურეკ-გოგოლესუბნამდე ტერიტორია, სადაც ოცზე მეტი პუნქტია აღრიცხული. ამ ტერიტორიაზე გავრცელებული ბრინჯაოს თოხის ტიპებიდან დ. ქორიძე გამოყოფს ბართოხის ტიპს⁵, რომელსაც ოთ. ჭაფარიძე გულის ფორმის თოხებს უწოდებს⁶. დ. ქორიძის გამოკვლევით, გულის ფორმის თოხები თავისი ფუნქციით ბართოხის სამუშაოს ასრულებდა, რომელთა გავრცელება აჭარა-გურიის იქით არსად არ არის მიკვლეული⁷. თავისთავად ეს გარემოება მეტად საყურადღებოა. აშკარაა, რომ გულის ფორმის თოხები, რომელიც სხვადასხვა პუნქტშია ნაპოვნი, ერთდროული არ არის. ყველაზე ადრეულად ურეკის ბრინჯაოს თოხი ივარაუდება (XII—სმდე ძვ. წ. ა.). ეთნოგრაფიულ ყოფაში დამოწმებული მსგავსი ია-


⁵ დ. ქორიძე კოლხური კულტურის ისტორიისათვის, თბ., 1965, გვ. 82.

⁶ ოთ. ჭაფარიძე, მიწათმოქმედების იარაღები დასავლურ ქართულ კულტურაში, თსუ შრომები, ტ. 49, თბ., 1953, გვ. 189.

⁷ დ. ქორიძე, იქვე.

იარაღები აღმოსავლეთ საქართველოს მთის რაიონებში სწორედ მიწის პირველადი დამუშავებისათვის გამოიყენებოდა⁸.

გურიის ტერიტორიაზე განსაკუთრებით ფართოდ არის წარმოდგენილი ბრინჯაოს მხრებდაქნილი თოხები. ამ მხრივ ერთ-ერთი



სურ. 2. ბრინჯაოს თოხის ტიპები (გუთურის განძიდან)

საინტერესოა გუთურას განძი (სურ. 2) (გუთურის განძი დაცულია ჩონხატაურის მხარეთმცოდნეობის მუზეუმში კოლ. № 04354), თოხებს გორდა პირი ახასიათებს, მხრებდაქნილია, მრგვალი და სქელი სატარიტო, სიმაღლე 11 სმ. უდიდესი სიგანე მხრებისა 12—15 სმ აღწევს. პროფილში ყუის სისქე 1,5—2 სმ-ია. ერთ ეგზემპლარს

⁸ გ. ჯალაბაძე, მაწათმოქმედება თერგის ხეობაში, საქ. სახ. მუზეუმის მოამბე, ტ. XXII-ბ, გვ. 207.

(№04354/14) ყუის სისქე გარეთა აქვს მიქცეული. ეს იშვიათი შემთხვევაა და მეტალურგის ძიებას უნდა წარმოადგენდეს, რომ მას გაუმჯობესებული თოხი შეექმნა. იმდენად, რამდენადაც თოხის შიგნითა მხარე მუშაობის დროს ნოტიო ნიადაგებში მიწას ბევრს იღებს, სატარესთან შიგნით მიმართული სისქე ხელს შეუწყობდა მეტი მიწის აღებას. დასახელებული თოხის ფორმის სახით ჩვენ უთუოდ გაუმჯობესებას ცდასთან უნდა გვექონდეს საქმე. შესაძლებლად მიგვაჩნია ეს გაუმჯობესება აქ, გურიის მიწაზე მომხდარიყო. ჩვენ ქვემოთაც გვექნება ამაზე საუბარი, როცა ეთნოგრაფიულ ყოფაში დამოწმებულ თოხებს განვიხილავთ. აქ კი მოკლედ აღვნიშნავთ, რომ გურიაში თოხს ტარიც გაწყობის შესაბამისად არჩევდნენ თავგარე და თავშიგნითას. თავგარე დაბლია, ე. ი. ბარის სოფლებში იხმარებოდა, თავშიგნითა ზეგნის სოფლებში. თავგარე სწორტანიანი და მაღალი იყო, აღნიშნავს ლიხაურელი მთხრობელი რუბენ ხალუქვაძე (70 წლია, 1977 წ.)

ბრინჯაოს თოხების სიუხვე მიწათმოქმედებას კულტურაზე მეტყველებს.


რა მდგომარეობა გვაქვს ეთნოგრაფიულ ყოფაში. რა სახის თოხები იყო გურიაში ხმარებული? ამის შესახებ ნათლად შეტყველებს დღეისათვის საქართველოს სახელმწიფო მუზეუმის ეთნოგრაფიის განყოფილების ფონდში დაცული ჩვენი ექსპედიციების მიერ ველზე შეკრებილი და დაცული თოხების კოლექცია (სურ. 3).

როგორც ზემოთ აღვნიშნეთ, გურიაში განასხვავებდნენ ტანის მიხედვით თავგარეს და თავშიგნითას, ეს იყო ბარისა და ზეგანის თოხები დანიშნულების მიხედვით არჩევდნენ ღომის სათოხნს, სიმინდის პირველად და მეორად სათოხნს. პადაურობის მიხედვით არჩევდნენ ლანჩხუთის, სუფსისა და მახარაძის თოხს. ლანჩხუთისა და სუფსის თოხები ერთგვარ და ერთნაირ მიწებში იხმარებოდა, ხოლო მახარაძის თოხები უფრო ზეგანის სოფლებში იყო გამოყენებაში, გურულ თოხს, როგორც წესი, ყუა უკეთდება ოთხკუთხა ფორმისა და ტარიც ცულისებურად ზურგიდან ეგება. აღსანიშნავია, რომ გურიაში თოხის ტარის დაგებას თავისი წესი გააჩნია, თოხის ტარი მის მომხმარებელს შუბლამდე უნდა წვდებოდა. თოხის აღწერილობას ასეთი ტერმინებით მოიხსენებენ. ყუა, პირი, ყურები და ტარი. სხვადასხვა ხასიათის მიწის სამუშაოებისათვის იყენებდნენ კომბინირებულ თოხებს, რომლებსაც გააჩნდათ წერაქვისებური სათხრელი და თოხის პირი. ან თოხის და ცუ-

ლისპირი. ასეთ იარაღს თოხნაჯახა რქმევია. თოხნაჯახებს აღრეც იყენებდნენ, მაგრამ მათი ფართოდ გამოყენება ემთხვევა ჩაის ფართობებისათვის ტყებუჩქიანი ადგილების გაწმენდის სამუშაოებს, რაც მასიურად 1928 წლიდან დაიწყო (სურ. 4).

ჩაი. საქართველოში სიტყვა ჩაი მხოლოდ მეთვრამეტე საუკუნეში ჩნდება. თვით ჩაის კულტურა გურიაში XIX ს. 40-იან წლებში ყოფილა შემოტანილი⁹. ამ საქმის ერთ-ერთი ინიციატორი ყოფილა გორაბერეჟოელის¹⁰ პამულების მფლობელი კონსტანტინე ვახტანგის ძე ერისთავი. უფრო მოგვიანებით მიხეილ ერისთავმა დაამზადა პირველი ქართული ჩაი¹⁰.

1903 წლიდან ოზურგეთის მაზრის მიქელ-გაბრიელის თემის ზედუბანში მ. ნაკაშიძემ თავის მამულში 9 დესეტინაზე გააშენა ჩაის პლანტაცია, აქვე მან 1908 წლისათვის ააგო პირველი მცირე-ძალიანი ჩაის ფაბრიკა. ეს იყო ჩაის პირველი ფაბრიკა ოზურგეთის მაზრაში¹¹.




სურ. 3. გურიაში გავრცელებული თოხის ტიპები

⁹ ნ. დ ე ვ ი ძ ე, მახარაძე—ლანჩხუთის ქვერაიონის სოფლის მეურნეობის განვითარება და განლაგება. მახარაძე—ლანჩხუთის ქვერაიონის (გურის) ეკონომიკურ-გეოგრაფიული ნარკვევები, თბ., 1964, გვ. 127; რ. კ ვ ი ნ ტ რ ა ძ ე, გორაბერეჟოელის სსსოფლო-სამეურნეო ტექნიკუმი, თბ., 1974, გვ. 4.

¹⁰ ბ. შ ა თ ა ქ ი ძ ე, ბრძოლა ჩაის კულტურის განვითარებისათვის საქართველოში 1921—1927 წ. წ., საკანდ. დისერტ. ხელნაბეჭდი, 1971, გვ. 9.

¹¹ იქვე, გვ. 11.

900-იანი წლებიდან ჩაის ბუჩქის გაშენებით გლეხობაც დაიბ-
ტერესდა, თუმცა გლეხობა მის გაშენებას მაინც აქტიურად არ
ეკიდებოდა. 1914 წლამდე საქართველოში 988.8 ჰექტარი ჩაის




სურ. 4. სამიწათმოქმედო იარაღები (მახარაძის მუზეუმის კოლექცია)

პლანტაცია იყო გაშენებული¹². პირველი მსოფლიო ომის დროს
პლანტაციები მოუვლულობის გამო დაზიანდა და შექცირდა
(სურ. 51).

ჯერ კიდევ 1901 წელს რუსეთის სახელმწიფო მიწათმოქმედე-
ბის დეპარტამენტმა ოზურგეთში დააარსა თამბაქოსა და ჩაის საც-

¹² ბ. შ ა ფ ა ქ ი ძ ე, ბრძოლა ჩაის კულტურის განვითარებისათვის საქართველო-
ში 1921—1927 წ.წ. საკანდ. დისერტ. ხელნაბეჭდი, 1971, გვ. 12.

დელა პლანტაცია. ამ ორგანიზაციას უნდა ეზრუნა ახლომახლო რაიონებში ჩაისა და თამბაქოს პლანტაციების გავრცელების სტიმულირებისათვის. საქართველოში გასაბჭოების დროისათვის ეს პლანტაციები საკმაოდ დაცემული და დაზიანებული იყო. საბჭოთა კავშირს, რომელიც ახალი გამოსული იყო სამოქალაქო ომებიდან და ურთიერთობა არა ჰქონდა ჩაის მწარმოებელ ქვეყნებთან, სჭირ-



სურ. 5. სამეურნეო იარაღები (ჩოხატაურის მუზეუმის კოლექცია)

დებოდა ჩაი. ამასთან, საქართველოსათვის ჩაის წარმოება იყო ერთი ისეთი სამეურნეო დარგი, რომელიც ხელს შეუწყობდა როგორც დაცემული მეურნეობის აღდგენას, ისე საერთოდ ქვეყნის ეკონომიკურ დაწინაურებას. ამ მიზნით ფართოდ გაიშალა მუშაობა როგორც ჩაის პლანტაციების გაშენების, ისე ნედლეულის გადასამუშავებელი ფაბრიკებისა და ჩაის წარმოებისათვის სპეციალისტების მომზადების ხაზით.

ჩაის კულტურის წარმოება შრომატევადია და, გარდა სათანადო ცოდნისა, დიდძალ მუშახელს მოითხოვს, ამიტომ მისი ფართოდ დანერგვა თავიდანვე აწყდებოდა სიძნელეებს—თუ სად უნდა გაშენებულიყო, ვის უნდა მოეველო პლანტაციებისათვის,

წვრილ გლეხურ მეურნეთა მიერ უნდა განხორციელებულიყო მისი წარმოება თუ კოოპერაციის გზით? იმდენად, რამდენადაც ჩაის წარმოებაში არ იყო დანერგილი მექანიზაცია, აგრონომიული ცოდნა და სხვ. ამიტომ ჩაის წარმოება ორი მიმართულებით განვითარდა—კოოპერაციისა და მის გვერდით წვრილ გლეხურ მეურნეობებში მისი დანერგვის გზით¹³.

1924 წელს ოზურგეთის მაზრის სოფ. ქანიეთში დაარსებულ იქნა ჩაის ერთ-ერთი პირველი სასოფლო-სამეურნეო საწარმო-არტელი¹⁴. მალე ქანიეთის მაგალითი მისაბაძი გახდა მეზობელი სოფლებისათვის.

ჩაის კულტურის წარმოების შემდგომი განვითარებისათვის დიდი მნიშვნელობა ჰქონდა 1925 წელს დაარსებულ აქციონერულ საზოგადოებას „საქართველოს ჩაის“, რომელიც ხელს უწყობდა როგორც ჩაის ჭიშიანი კულტურების გავრცელებს, ისე მისგან მიღებული ნედლეულის მიღებას და გადამუშავების ორგანიზაციას; ეხმარებოდა ჩაის მწარმოებელ არტელებს და გლეხურ მეურნეობებს; აწარმოებდა ნედლი ჩაის შესყიდვას ფაბრიკებისათვის და ახალისებდა ჩაის ბუჩქის გავრცელებით დაინტერესებულ გლეხებს¹⁵.

ოზურგეთში მოეწყო ჩაის საცდელი სამეცნიერო კვლევითი სადგური (1928 წ.), რომელსაც გააჩნდა ფილიალები აჭარასა და ზუგდიდში. საცდელი სადგური წლების განმავლობაში დიდ შემოქმედებით მუშაობას ეწეოდა. სწავლობდა რაიონის ნიადაგებს და ადგილებზე აძლევდა კონსულტაციებს და ურჩევდა ჩაისათვის გამოსადეგ ნაკვეთებს.

1928 წლიდან შეიქმნა ანასეულის ჩაის ცენტრალური საცდელი სადგური (რომელიც 1930 წლიდან გადაკეთდა ჩაის კვლევით ინსტიტუტად). ჩაის საცდელმა სადგურმა კიდევ უფრო გააფართოვა მეცნიერული მუშაობა.

1924 წელს სოფელ გორაბერეჟოულში, ერისთავების მამულში გაიხსნა გურიის სასოფლო-სამეურნეო ტექნიკუმი, რომელმაც დიდი როლი შეასრულა გურიის სოფლის მეურნეობის სხვადასხვა დარგისათვის ახალგაზრდა სპეციალისტების მომზადების საქმეში.

1931 წელს ქ. მახარაძეში დაარსდა ჩაის ტექნიკუმი, რომელ-

¹³ ბ. შ ა ჟ ა ქ ი ძ ე, დასახ. ნაშრ., გვ. 31.

¹⁴ იქვე.

¹⁵ იქვე, გვ. 42.

მაც დიდი როლი შეასრულა დასავლეთ საქართველოს მეჩაიეობის რაიონებისათვის სპეციალისტების მომზადების საქმეში.

ჩაის ფართობები თანდათან იზრდებოდა. 1928 წლისათვის გურიაში 1380 ჰექტარი პლანტაცია იყო, ეს მაშინ როცა მთლინად საქართველოში ჩაის ფართობი შეადგენდა 3163 ჰექტარს¹⁶.

საკოლმეურნეო მოძრაობამ განსაკუთრებით შეუწყო ხელი მეჩაიეობის განვითარებას: 1929 წელს შეიქმნა ნასაკირალის, 1930 წელს ლაითურის, 1931 წელს ნატანების საბჭოთა მეურნეობები, საბჭოთა მეურნეობის ძირითად სამეურნეო კულტურას ჩაი წარმოადგენდა. საბჭოთა მეურნეობები წარმოადგენდნენ სხვა სოფლებისათვის მაგალითის მიმცემს.

ჩაის ფართობები ზრდა დღის წესრიგში აყენებდა მოსავლის აღების პირობებს. იმდენად, რამდენადაც ჩაის ფოთლის წარმოებაში მექანიზაცია ნაკლებად იყო დანერგილი, მთელი რიგი სამუშაოები ხელით ჩრუღდებოდა. განსაკუთრებით ძნელი იყო მიწის სამუშაოები (შემობარვა, გაწმენდა, გამოთოხნა) და ფოთლის კრეფა (სურ. 6.) 1930-იანი წლებიდან გლეხები ცდლობენ როგორმე გაიუმჯობესონ სამუშაო პირობები. 1930 წელს მახარაძის რაიონის სოფ. მელექედურის სკოლის მასწავლებელი ი. მუჯანაძე იგონებს ჩაის საკრეფ მანქანას¹⁷. მართალია მის გამოგონებას დადებითი შედეგი არ მოჰყოლია, მაგრამ თავისთავად მცდელობა, რომელიც ჩაის სამეურნეო საქმიანობის გაუმჯობესებისაკენ იყო მიმართული, დაიწყო.

1932 წელს „საქართველო“ ჩაი“ კონკურსს აცხადებს ჩაის საკრეფი მანქანისა და სხვა სამუშაოთა მექანიკური მანქანა-იარაღების გამოგონებაზე¹⁸, კონკურსში მრავალმა მეცნიერმა და ინჟინერმა მიიღო მონაწილეობა. კომისიამ განიხილა საკონკურსოდ წარმოდგენილი მანქანები და პროექტები, მაგრამ ცდები კვლავ უშედეგო აღმოჩნდა. თავისი მხრით გლეხებიც არ იყვნენ უმოქმედოდ.


როგორც ცნობილია, და ზემოთაც აღვნიშნეთ, ჩაის მწკრივთა შორისი მანძილის დაბარვა და მიწის გაფხვიერება ჩაისათვის აუცილებელია. უამისოდ ჩაის ბუჩქი მოსავალს არ მოგვცემს. დაბარვის ნაცვლად შეიძლებოდა მიწის ამ ზოლის სახვნელით გაფხვიერება, მაგრამ შებმულ სახვნელის ბუჩქთა შორის ტარება შეუძ-

¹⁶ ბ. შ ა ფ ა ქ ი ძ ე. დასახ. ნაშრ. გვ. 69.

¹⁷ ბ. შ ა ფ ა ქ ი ძ ე. დასახ. ნაშრ., გვ. 161.

¹⁸ ბ. შ ა ფ ა ქ ი ძ ე. დასახ. ნაშრ., გვ. 160.

ლებელი იყო. გამოსავალი ერთი იყო: შეიძლებოდა გურული სახენელი კავის გადაკეთება ცხენის სახენელის ტიპად და შასში




ფ 402030

3

სურ. 6. სახენელი იარაღები გურიაში

ცხენის შებმა და რიგთაშორისის მოხვნა, მაგრამ ჩაის რიგთაშორისი ძველ პლანტაციებში 120 სმ შეადგენდა. ამ მანძილის თითქმის ნახევარზე ჩაის ბუჩქები იყო გადამჭდარი, ასე, რომ 60 სმ მანძილზე ერთკბილიანი გურული კავით რიგთაშორის ორჯერ ან სამჯერ მაინც შუაში უნდა გაეელო ცხენს; ხოლო კავი ბუჩქების ძირებისაკენ უნდა მიემართა მხვენელს. სურათის მიხედვით თითქოს ადვილი შესასრულებელია, მაგრამ ესეც ძალიან მძიმე სამუშაოს წარმოადგენდა, რამდენიმე სოფელში, როგორც ჩანს, გაჩნდნენ რაციონალიზატორი გლეხები და შეიმუშავეს ორ და სამკბილიანი კაეები ცხენის წევაზე. გაუმჯობესებული კავის საფუ-

ძველს გურული კავი წარმოადგენდა. თუ როგორ გარდაქმნეს გურული ერთკბილიანი სამკბილიან სახენელად, ამაზე მახარაძის რაიონის სოფ. ლიხაურის მკვიდრს რუბენ ნაოსოვის ძე სალუქვაძეს (70 წლ. 1977 წ.) მოვუსმინოთ—„1930 წელს ჩამოყალიბდა კოლმეურნეობა, გაშენდა ჩაები და რიგთაშორის დასამუშავებლად არ იყო იარაღი. ამუშავებდნენ ცხენით და ხის კავით, მაგრამ ძნელი იყო. ერთი გუთნის ნაცვლად გავაკეთე ოროგუთნიანი კავი, გავაკეთე ჩემი ბრიგადისათვის. მერე სხვა ბრიგადებსაც გავუკეთე—ხუთი ასეთი კავი და იმით იხენებოდა რიგთაშორისი ფართობი.




სურ. 7. სახნისები

ავილე თელის კავი, იმას თავი მოვუხრიშე, შემდეგ გავხიე-გავხერხე ორად, გავწიე 1 მეტრზე, შუაში შევუღღი მერმე კავი. თითოეულ კავს გავუკეთე გუთანი და სახნისი. კავისთავი იყო მაგრად შეკრული, კასრის სალტე მქონდა გადაჭირებული. მასში ვაბამლით ცხენს. სამი კავიდან სახელური ჰქონდა ერთს, იმას რომელიც შუაში იყო. სახელური მიღურსმული იყო ორი ბოლტით, შუა კავის მუხლზე (სურ. 8).

ეს სახენელი 1932 წელს გამოვიგონე და იმუშავა სამამულო ომის წლებშიც, გუთნის სიგრძე 40—50 სმ ზევით არ შეიძლება, სისქე 25—30 სმ. კავი უნდა ყოფილიყო სისქით თითო 9 სმ. ერთი ცხენი თავისუფლად ამუშავებდა. ხარებსაც უბამდნენ. მაგრამ ცხენი ჯობდა, გუთანი უნდა ყოფილიყო აკაცია ან ბეოლი, ეს ორი

ზე მაგარია და არ ილეშება, არ იჩიჩქნება და ძალას არ თხოვს. მსხალიც შეიძლება, ისიც სუფთა ხეა. ასეთ იარაღს ხის კულტივატორს ვერძახდით აქ ჩვენა.



სურ. 8. გურიაში გავრცელებული სახვნელი კავი


ეს გამოგონება მე გაქირვებამ გამაყეთებინა. მე ღურგალი ვარ და გავაკეთე, მევიაზრე. ზოგიერთი მევიხმარე მასალის მოტანაზე. სხვიდან მე ეგ არ გადმომიღია. მანამდე ერთგუთნიანი ცხენის სახვნელი იყო და მე სამიანი გავაკეთე. ამ ხის სამკბილიან სახვნელს ომის წლების მერე აღარ უმუშავია. მერე მექანიზაცია შემოვიდა და იმან შეცვალა“.

როგორც წარმოდგენილი მასალიდან ჩანს, ჩაის კულტურის წარმოებას გლეხები თავისი მხრით შემოქმედებითად შეხვდნენ. სამკბილიანი სახვნელი კოლმეურნეობას დიდ შეღავათს აძლევდა, იზოგებოდა შრომადღეები და გამოთავისუფლებული მუშახელის დასაქმება ხდებოდა სხვა სამუშაოზე.

აღსანიშნავია, რომ მსგავს მოვლენას ადგილი ჰქონდა სამეგრელოშიც, რაზედაც ჩვენ მითითებული გვაქვს სამეგრელოს მემინდვრეობის შესწავლასთან დაკავშირებით. სამამულო ომის შემდგომ პერიოდში საკმაოდ გაიზარდა ჩაის პლანტაციები გურიაში. გურია ჩაის პლანტაციებისა და სახელმწიფოსათვის ჩაის ფოთლის მიყიდვის საქმეში საქართველოს მასშტაბით პირველ ადგილზეა. ჯერ კიდევ 60-იან წლებში საქართველოს მთელი ჩაის ფართობების 24%-ზე მეტი გურიაზე მოდიოდა¹⁹.

¹⁹ მ. დ ე ე ი ე. დასახ. ნაშრ., გვ. 127.

გურიაში 4 საბჭოთა მეურნეობა მეჩაიეობას მისდევს (ლაითურის, ნარუჯის, ნასაკირალის და ნატანების), რომელთა განკარგულებაშია 2,5 ათასი ჰექტარი ჩაის პლანტაცია. დანარჩენ კოლმეურნეობებზე 12 ათასამდე ჰა ჩაის პლანტაცია მოდის.



სურ. 9. უღლები

აქ ჩვენ გვინდა რამდენიმე მაგალითის მოყვანა იმასთან დაკავშირებით, თუ როგორ იზრდებოდა ჩაის პლანტაციები ცალკეულ სოფლებში და როგორი იყო ცხოვრების სურათი. მახარაძის რაიონის სოფელი ძიმითი ტიპიური გურული სოფელია, მდებარეობს სუფსის მარჯვენა მხარეზე, ორაგვის მთის სუფსისაკენ დაქანებულ კალთაზე. სოფელი გაფანტულად არის განაშენიანებული. 80 წლის წინ იგი 4 უბნად იყო წარმოდგენილი (თირის, კოხას, ფაფასკურის და ცენტრის).

ისტორიულ საბუთებში ძიმითი ხშირად არ მოიხსენიება. 1660—1662 წლებში ვამეყ დადიანს, მის მეუღლეს ელენეს და გიორგი გურიელს ძიმითის წმინდა კვირიკეს ეკლესია თავისი 8 კომლითურთ ბიჭვინთის ეკლესიისათვის შეუწირიათ. იგივე საბუთი 1664 წელს გიორგი გურიელს განუახლებია და დაუდასტურებია. აღნიშნულ საბუთში მოხსენიებული გვარებიდან ძიმითში დღემდე მოსახლეობენ: კბილიანიშვილები, ჩხაიძეები და მგელაძეები²⁰.

²⁰ ს. კაკაბაძე, დასავლეთ საქართველოს საეკლესიო საბუთები, წ. 1, 1921, გვ. 67—71.

ძიმიტოს კარგი მდებარეობა აქვს, მაგრამ გლეხობა მაინც ძიმიმე გა-
ჰირვებას განიცდიდა. განსაკუთრებით უჭირდა მას შემდეგ, რაც ბა-
ტონყმობის გადავარდნის შედეგად გლეხობა მიწების გარეშე დარ-
ჩა. მცირემიწიანობის გამო მოსახლეობა ან სხვის მიწას ამუშავებ-
და ან მიდიოდა სოფლიდან სხვა სახის სამუშაოს საშოვნელად. XIX
ს. მეორე ნახევარში გურულ გლეხთა საშოვარზე გასვლა ჩვეუ-
ლებრივ მოვლენად გადაიქცა. ეს ფაქტი ჰქონდა მხედველობაში
ძიმიტელ მთხრობელს. როცა ამბობდა: „ძიმიტელი გლეხი უსახს-
რობის გამო კურტანაკიდებული ნოვოროსიისკში უნდა წასუ-
ლიყო“.

XIX ს. 60-იანი წლებიდან ვენახის და აბრეშუმის ჰიის და-
ვადებამ დიდი ზიანი მიაყენა გლეხურ მეურნეობას. სოფლად ქურ-
დობა-ძარცვა ყაჩაღობა-ფირალობა ჩვეულებრივ მოვლენად იქცა.
ადგლობრივი მოსახლეობა იძულებული გახდა რაღაც ელონა. გუ-
რიაში ქურდობის ასალაგმავად სოფლებში ხევისთავები აურჩე-
ვით. ხევისთავობის, როგორც სოფლად წესრიგის დაცვის მიზ-
ნით შექმნილი ინსტიტუტის დასაწყის თარიღად ანტონ ხინთიბი-
ძეს 1889 წელი მიაჩნია²¹.

ფაქტიურ მასალაზე დაყრდნობით, რომელსაც XIX ს. ქურ-
ნალ-გაზეთები გვაწვდიან, ჩანს, რომ ხევისთავობის ინსტიტუტს
უფრო ადრე ჰქონია ჩამოყალიბებული სახე. მაგალითად, 1874
წლს „სასოფლო გაზეთში“ მოთავსებულია წერილი ძიმიტის და
მამათის საზოგადოების მცხოვრებთ შორის ერთიანი ვალდებულე-
ბის შესახებ. ეს ვალდებულება ითვალისწინებდა ცხენის და სხვა
პირუტყვის ქურდობის მოსპობას. საამისოდ კი სოფელში, მამა-
სახლისისა და ნაცვლის გარდა, აურჩევით ხევისთავად თავადი სვი-
მონ დავითის ძე გუგუნავა, აზნაურნი სიმონ ვახუშტის ძე და ალე-
ქსანდრე გიტოს ძე გოთუები და სხვები²², განჩინების მიხედვით
ხევისთავს ევალეობდა სოფელში შემოელო საგუშაგო განრიგი,
რომელიც თვალყურს ადევნებდა სოფელში შემსვლელებს და სოფ-
ლიდან გასულთ. ხევისთავობას ძიმიტის სოფლის ისტორიასთან
გარკვეული კავშირი აქვს. აქედან იწყება საერთოდ ამ ინსტიტუტის
ისტორია.

ძიმიტი ღარიბი სოფელი იყო. სოფლად მოხელები თვითნე-
ბობდნენ, 1897 წლს ძიმიტელი კორესპონდენტი „კვალში“ წერ-

²¹ ანტონ ხინთიბიძე, გურული ფირალები, თბ., 1938, გვ. 13—14.

²² გაზ. „სასოფლო გაზეთი“, 1874, № 10.

და: „ყველამ კარგად იცის, რომ სოფლის ბედილბალი დიდკაცობა-ზეა დამყარებული, ვისაც ისინი განიზრახავენ, მამასახლისად ისუნდა იყვეს არჩეული“. რადგან აქაური გლეხობა სულ თავადაზნაურობის მიწაზე მუშაობს და ამით ჰკვებავს ცოლშვილს“²³. ამის გამო გლეხობას აიძულებდნენ ხმა მიეცათ თავად-აზნაურთა სასურველი კანდიდატურისათვის. იგივე „ძიმითელი“ განაგრძობს— „როცა მეორეთ მოაწია არჩევნების დრომ, მოურავმა „იკადრა“ სოფელში „ჩამორება“ და ყველანი დაგვაშინა და დაგვაფეთა, თუ ისევე მამასახლისათ ს. უ-ძე არ დაგირჩენიათ ჩვენ მამულში ფეხი არ დაადგათ სამუშაოთ“. ძიმიტელები კი მამასახლისის არჩევას დახურული კენჭისყრით მოითხოვდნენ²⁴ (სურ. 10).



სურ. 10. ძველებური გურული სახლი

არ შეიძლება არ შევეხოთ ძიმიტის სკოლის წარსულსაც. ძიმიტის სკოლის ისტორია 1869 წლიდან იწყება. იმხანად ძიმიტში ერთკლასიანი სასწავლებელი იქნა დაარსებული, სადაც თავად-აზნაურთა შვილები სწავლობდნენ.

²³ კვალი, 1897, № 29.

²⁴ კვალი, 1897, № 17.

1900 წლისათვის მასწავლებელი ტ. თაბუკაშვილი წერდა, ძი-
ვითში, სწავლის მსურველთა 2/3 სკოლის გარეთ რჩებაო. მისივე
ცნობით, მიუხედავად იმისა, რომ 1879 წლიდან ამ სოფელში სკო-
ლა არსებობს, წერა-კითხვის მცოდნეთა რიცხვი 7%-ს არ აღემა-
ტებოდა²⁵. 1900 წელს ძიებით სკოლის შესახებ „კვალში“ წერ-
დნენ: სკოლების შენობებს არა უშავს, მაგრამ ზოგში წვიმს, ზოგს
ბუხარი არა აქვს, ზოგს კარებიო²⁶.

ძიებით სოფლის წარსულის შესახებ კიდევ ერთი ფაქტი შეი-
ძლება აღვნიშნოთ, ეს ეხება ძველი სოფლის ცენტრს, სადაც, სკო-
ლის გარდა, არსებობდა ვინმე ფოკას დუქანი. გაზეთი „კვალი“ წერ-
და, რომ ამ დუქანთან დაკავშირებული იყო გაუთავებელი ლოთო-
ბა და უწესრიგობა²⁷, რომ იგი ცუდი მაგალითის მიმცემი იყო ახ-
ლომდებარე სკოლის მოწაფეებისათვის. ძიებით სოფლის სიღარი-
ბის სინონიმად იყო ქცეული, მენშევიკების ბატონობის წლებში
რაიმე მნიშვნელოვანი გარდაქმნა არ განუცდია. სოფლის ზოგიერ-
თმა მოსახლემ გამოიჩინა ნოვატორობა და დარგო ათიოდე ჩაის
ბუჩქი, მაგრამ ძიებით მაინც რჩებოდა ერთ-ერთ ჩამორჩენილ და
მიყრუებულ კუთხედ. ძიებით თემში სხვა ნაკლთან ერთად ძალა-
რიაც მძვინვარებდა. ამიტომ იყო, რომ ადგილობრივი გაურბოდ-
ნენ აქ ცხოვრებას, ხოლო ქალები ამ სოფელში გათხოვებას. შე-
ზობელი სოფლებიდან ძიებითში ქალის გათხოვება სასჯელად იყო
მიჩნეული. „ქვიანად იყავი თორემ ძიებითში გაგათხოვებო“ ამი-
ნებდნენ მეზობელი სოფლის ქალიშვილებს.

ასეთი იყო ძველი ძიებითის მკრთალი სურათი.

როგორია ძიებითი დღეს — ამის შესახებ ვრცელი გამოკვლევა
შეიძლება დაიწეროს და შეიძლება იმ ვრცელმა გამოკვლევამაც ვერ
მოიცვას ყველა ის საკითხი, რომლითაც დღევანდელი სოფელი
ცხოვრობს.

სოფელში დღეისათვის 508 მეკომურია 1775 მცხოვრებითი,
1930 წელს ძიებითში საკოლმეურნეო არტელი ჩამოყალიბდა. ამავე
წელს კოლმეურნეობის საერთო კრებამ მოიწონა ძიებითელი კომ-
კავშირელი ახალგაზრდობის წინადადება, რომ კოლმეურნეობას მი-
კუთვნებოდა გაზეთ „ახალგაზრდა კომუნისტის“ სახელი.

²⁵ Т. Табукашвили. Дзмигское общество, СМОМПК, Тб., 1900, 27, с. 153.

²⁶ კვალი, 1900, № 36.

²⁷ კვალი, 1900, № 36.

კოლექტიურმა შრომამ თავისი ნაყოფი მალე გამოიღო. ამოაშრეს ჰაობიანი „სამთავანი“, გატეხილი და ათვისებულ იქნა „სატურიას“ ტყე, „დათვის საბუქნელა“ და სხვ.

კოლმეურნეობის ჩამოყალიბებისათვის ცალკეულ გლეხთა ჩაის პლანტაციების გაერთიანების საფუძველზე 22 ჰექტარი შედგა. ძიმითელეებმა სწრაფი ტემპით მოჰკიდეს ხელი ჩაის გაშენებას. 1933 წლისათვის ჩაი იმდენად დიდ შემოსავალს იძლეოდა; რომ კოლმეურნეობის წლიურმა ფულადმა ბრუნვამ 1 მილიონ მანეთს გადააჭარბა. 1950 წლისათვის კოლმეურნეობის ფულადი შემოსავალი 7,300 ათას მანეთს შეადგენდა, აქედან მხოლოდ ჩაი იძლეოდა 6,769 ათას მანეთზე მეტს. 1948 წელს ძიმითის კოლმეურნეობამ ჩაის სარეკორდო მოსავალი მოიყვანა. მაღალი შრომითი მიღწევებისათვის 6 ძიმითელს მიენიჭა სოციალისტური შრომის გმირის საპატიო ჯილდო, ორი კაცი დაჯილდოვდა ლენინის ორდენით, 11 კაცი—შრომის წითელი დროშის ორდენით, 225 კაცი—მედლებით.

1970 წლისათვის ძიმითს 270 ჰექტარი ჩაის პლანტაცია გააჩნდა, საიდანაც მოწეულ იქნა 13838 ცენტნერი ჩაის მწვანე ფოთოლი. 1977 წლისათვის 270 ჰექტარზე აღებულ იქნა 23376 ცენტნერი. 1977 წელს გამოშვებული იყო 176 033 კაცდღე, ფულად გაიცა 1434 285 მანეთი, კაცდღეზე 8,03 მან.

შემოსავალი ჩაიდან შეადგენდა 389,656 მანეთს, დაფნიდან — 2833, ხილიდან — 158367, ყურძნიდან — 1520, ციტრუსებიდან — 175423, ტყის ხილკენკრიდან — 660. მცენარეული და დანარჩენიდან—63358 მანეთს და სხვ.

კოლმეურნეობას გარკვეული შემოსავალი გაუჩნდა მებოცვერობიდან, ქლორელის წარმოებიდან, მეკალათეობიდან სამხერხაოდან და ასფალტის წარმოებიდან.

კოლმეურნეობას ჰყავს აგრეთვე მსხვილფეხა მერძეული ფერმა, ფუტკრის 77 ოჯახი, და სხვ. კოლმეურნეობას ემსახურება 22 ტრაქტორი, მექანიზებულია სოფლის მეურნეობის ბევრი დარგი. აქვე მინდა შევნიშნო, რომ 1937 წლიდან სოფელ ძიმითში გაიხსნა საშუალო სკოლა. დღეისათვის ამ სკოლის პედკოლექტივი ადგილობრივი კადრით არის წარმოდგენილი. სკოლამ დიდი როლი შეასრულა სოფლის მოსახლეობის ზოგადი განათლების საქმეში. ბევრი ახალგაზრდა დაუსწრებელი სწავლების წესით ამთავრებს უმაღლეს სასწავლებელს და აქვე განაგრძობს მუშაობას მაღალკვალიფიციურ სამუშაოზე, რაც სოფელს საკმაოდ გააჩინა.

ორიოდე. სიტყვით გვინდა ჩოხატაურის რაიონის სოფ. ხიდის-თავის კოლმეურნეობის მდგომარეობა. აღვწერთ.

სოფელი ხიდისთავი გუბაზოულის სანაპიროზეა გაშენებული. XIX საუკუნეში ხიდისთავი გურიაში საკმაოდ დიდ სავაჭრო ცენტრად იქცა, სადაც თავს იყრიდნენ მრავალი კუთხიდან მოსული ვაჭრები. თვით სოფელში იყო ბევრი სავაჭრო და სახელოსნო დუქანი. 1876 წლის ერთ საბუთში, რომელიც კალანდაძეების გაყრილობას ეხება, ხიდისთავი ქალაქად მოიხსენიება²⁸. შემდეგში ხიდისთავმა არახელსაყრელი მდებარეობისა და კერძო სავაჭრო და სახელოსნო მალაზიების გაუქმების შემდეგ ქალაქის იერი დაკარგა. მოიშალა ის დიდი ბაზრობა და იარმუკობა, რომელიც ამ პუნქტში იმართებოდა ხოლმე.

1938 წელს კოლმეურნეობა არ იყო ჯერ კიდევ წელმომავრებული. სოფელში მცხოვრები ყოფილი ხელოსნები და ვაჭრები ორჭოფულ პოზიციაზე იდგნენ. 1929—30 წლებში შესული კოლწევრები შემდეგში ისევ გავიდნენ. 1938—1939 წლებიდან კოლმეურნეობისაკენ კვლავ შემობრუნება იწყება. კოლმეურნეობაში მიღებისათვის 40 მანეთი საწევრო გადასახადი იყო დაწესებული. ისინი, ვინც ხელახლა უბრუნდებოდა კოლმეურნეობას, საწევრო გადასახადისაგან თავისუფლდებოდნენ.

ჩოხატაურის რაიონულ არქივში დაცული მასალის მიხედვით ჩანს, რომ 1939 წელს კოლმეურნეობაში უკან დაბრუნებაზე ან წევრად შესვლაზე მაინც ძირითადად ქალთა განცხადებებია შეტანილი²⁹.

1940 წლისათვის კოლმეურნეობის შემოსავალს იძლეოდა ვენახი, ჩაი, ტუნგო, ციტრუსები, ჩაი გაშენებული იყო 24 ჰექტარზე, მთელი შემოსავალი შეადგენდა 158800 მანეთს. მთელი წლის მანძილზე 19564 შრომადღე იქნა გამოიმუშავებული, აქედან ქალებმა გამოიმუშავეს 7847 შრომადღე, კაცებმა—11600³⁰.

1950 წლისათვის ჩაის ფართობი გაიზარდა 66 ჰექტარამდე, საიდანაც 95 ტონამდე ჩაის ფოთოლი და 21 ცენტნერი ჩაის თესლი მიიღეს. 1950 წლის ბოლოს კოლმეურნეობის ფულადმა ბრუნვამ 2474,494 მან. შეადგინა³¹. 1960 წელს კი გაიზარდა 4141 998 მანეთამდე³². შრომადღეზე განაწილებულ იქნა 11,50 მან. 1970 წელს

²⁸ ჩოხატაურის მუზეუმის ფონდი, № შწ 1620.


²⁹ ჩოხატაურის რაიონული არქივი, ფონდი 769, ანაწ. 1, ფ. 1.

³⁰ იქვე, ფონდი 69, ანაწ. 1, ფ. 24.

³¹ ჩოხატაურის რაიონული არქივი, ფ. 69, ანაწ. 1, ფ. 10.

121 511 შრომადღეზე განაწილდა 309 063 მანეთი. პრემიების ჩათვლით კაცდღეზე განაწილდა 3,48 მანეთი.

წესგავარდა ნაიონის მსახურის სესტორის კოლმეურნეობის სტრუქტურა
 1978 წლისათვის



სურ. 11 ჩოხატაურის რაიონის სოფ. ფარცხმის სტალინის სახ. კოლმეურნეობის სტრუქტურა.

1975 წელს ჩაის ფართობი შეადგენდა 156 ჰ-ას. მოიკრიფა 809 ტონა ფოთოლი, ჩაიდან მიღებულმა შემოსავალმა შეადგინა 765351 მანეთი. ქალებმა გამოიმუშავეს 42 147 კაცდღე, კაცებმა — 37 157 კაცდღე. კაცები ძირითადად დასაქმებული იყვნენ ვენახების, ციტრუსების, სიმინდის, ხილის, ფერმებისა და მექანიზაციის სამუშაოებზე. ასე, რომ ქალთა შრომა რამდენადმე ფართოდ არის წარმოდგენილი ჩაისთან დაკავშირებულ სამუშაოებზე³².

აქვე უნდა აღინიშნოს, რომ ხიდისათვის კოლმეურნეობაში, გარდა ხიდისთავისა, 5 სხვა დასახლებაც არის გაერთიანებული (ზენუბანი, ახალშენი, წიფნაგორა, მეწიეთი, და ჰაკიეთი).

ანალოგიური სურათთა თითქმის გურიის ყველა სხვა სოფელში. ჩაი, როგორც სამეურნეო დარგი, მიუხედავად მასთან დაკავშირებული მთელი რიგი მძიმე სამუშაოებისა, რომელიც წლის არცერთ დროს არ ნელდება, მაინც არის მალაღებვეტიური შემოსავლის წყარო. ჩვენს ხელთ არის ძიმითის კოლმეურნეობის წევრთა შიერ

³² ჩოხ. არქ., ფ. 54, ანაწ. 2, ფურტ. 1.2.

³³ 1970 და 1975 წლის სტატისტიკური მონაცემები აღებულია უშუალოდ კოლმეურნეობის ანგარიშებიდან სოფ. ხიდისთავში.

1970 წელს გამომუშავებულ კაცდღეთა რაოდენობა, საიდანაც ჩანს, თუ რა ინტენსიური მუშაობა მიმდინარეობს წლის ყოველ დროს.

თ ვ ე ე ბ ი	სამუშაოზე გამოვიდა კაცი	გამომუშავეს კაცდღე
იანვარი	479	6150
თებერვალი	485	5920
მარტი	667	10747
აპრილი	585	8789
მაისი	869	17756
ივნისი	845	18340
ივლისი	881	15479
აგვისტო	646	12286
სექტემბერი	616	8986
ოქტომბერი	385	4293
ნოემბერი	515	7715
დეკემბერი	409	5050
საშუალოდ	615	197

ამ ცხრილიდან კარგად ჩანს, თუ რა დიდი დატვირთვით მუშაობს სოფლის თითოეული შრომისუნარიანი კოლმეურნე.

ჩვენი საკოლმეურნეო ცხოვრებისათვის დამახასიათებელია ზრუნვა მშრომელთა მატერიალური და სულიერი კულტურის შემდგომი ამაღლებისათვის. გურიის სოფლებს ყველა პირობა გააჩნიათ, რომ კიდევ უფრო მაღალ დონეზე აიყვანონ საკოლმეურნეო დოვლათი, გაზარდონ შემოსავალი და აამაღლონ თითოეული მშრომელის ცხოვრების კულტურის დონე.

საუკუნეების მანძილზე კოლხეთის სამეურნეო კულტურაში წამყვანი ადგილი მიწათმოქმედებას ეჭირა. მიწათმოქმედებიდან მემინდვრეობა გამოირჩეოდა. მემინდვრეობაში XVII საუკუნიდან სიმინდის კულტურა დაინერგა, რამაც XIX საუკუნის მეორე ნახევარში ლომის კულტურა განდევნა. მემინდვრეობა, როგორც ერთი ძირითადი სამეურნეო დარგი, მარტივი სამეურნეო იარაღებით


იწარმოებოდა. ახლა მათ ნაცვლად მანქანებია დანერგილი, თუშცა ჩაის მოვლა-მოყვანის და კრეფის საქმეში ხელით შრომა კვლავ ძალაშია. აქ კი ჭერჭერობით ქალის შრომაა წამყვანი. ზემოთ მოტანილი ცხრილიდან ჩანს, რომ 64 ათასამდე კაცდღე ჩაის კრეფის 4 თვიან სეზონზე მოდის, როცა წამყვანი ქალის შრომაა. აქედან ნათლად ჩანს, რომ ქალი შრომითი შემოქმედია, ოჯახის ძირითადი ძალაა.

იგი ეკონომიკური დოვლათის შემქმნელია როგორც სახელმწიფოებრივი, ისე საოჯახო და საკოლმეურეო მშენებლობის ხაზით. ქალის შრომა მეჩაიეობის რაიონებში წამყვანია და წინა პლანზე დგას.

ყოველივე ამას არ შეიძლება, რომ არ მოჰყოლოდა საოჯახო ურთიერთობაში ქალისადმი დამოკიდებულების ახლებური განსახლება.

მ ბ რ ი ნ ჯ ე ბ ა. გურიაში ჩვენი შეკრებილი მასალების მიხედვით დადგენილ იქნა, რომ ზოგიერთ სოფელში მოჰყავდათ ბრინჯი. გურიაში ბრინჯის ორი სახეობა ითესებოდა, მშრალი და ნოტიო ნიადაგებისათვის. ბრინჯის დასათესად მიწის ნაკვეთს ისევე ამუშავებდნენ, როგორც სიმინდისათვის. მიწის ნაკვეთს წინასწარ გაასუფთავებდნენ ბალახისა და ჩაღისაგან. თესლოვან ბალახს ნაკვეთში აგროვებდნენ და წვავდნენ, რომ მოსავალი არ დასარეგლიანებულყო, შემდეგ იწყებდნენ მიწის მოხვნას ორ კვალზე, ე. ი. ჭერ ერთი მიმართულებით დახნავდნენ, ხოლო შემდეგ მას გარდიგარდმო გადახნავდნენ. სათესლე ბრინჯი ჩენჩიანი ითესებოდა. მას საკმაოდ სქლად თესავდნენ. ერთ ქცევაზე სამი ფუთი მაინც უნდა დაეთესათ, დათესილზე რამდენჯერმე გადაატარებდნენ ჩელტს. ნათესის ზედაპირი კარგად უნდა ყოფილიყო გაფხვიერებული და მოსწორებული. ბრინჯი საერთოდ აპრილში ითესებოდა. თესვა 20 აპრილამდე უნდა დამთავრებულიყო. აღმოცენებას იწყებდა 20 დღის შემდეგ. ორი კვირის აღმოცენებულს პირველი მარგვლა სჭირდებოდა; 2 კვირის შემდეგ გათოხნიდნენ, ხოლო მესამედ კიდევ ერთხელ გაწმენდნენ, რომ სარეველა არ მოძალებოდა. როცა თაველი ოქროსფერს მიიღებდა, შემოსულად ითვლებოდა, მას ეკენისთვეში ნამგლათ მოჭრიდნენ ძირში, კონავდნენ პატარა კონებად და გადაჰქონდათ სახლში; ბრინჯს გადახურულ ადგილზე აწყობდნენ, რომ კარგად გამომშრალიყო, შემდეგ მას ფიცარზე „დარეკავდნენ“ და „კაკალს გააყრევიდნენ“. მარ-

ცვალს აშრობდნენ და ბელელში — ხულაში ინახავდნენ. გამოყენების წინ ბრინჯს ჩამურებში ყრიდნენ და ჩენჩოს აცილებდნენ.



1 სიბიჩი-ბოსტნის მარეგი
2 თავთავის საწყვეტი ჩხირები

სურ. 12 ა) სიბიჩი ბოსტნის მარეგი,
ბ) თავთავის მოსაწყვეტი ჩხირები

ბრინჯი სათუთი მოსავლელია, განსაკუთრებით ე. წ. სველი ბრინჯი, რომელიც დათესვიდან მოსავლის აღებამდე სისტემატურად წყალში უნდა იყოს. მოსავლის აღების წინ ორი კვირით ადრე წყალს წყვეტდნენ და გამოაშრობდნენ, რომ მოსავალი მშრალად აეღოთ. რაც შეეხება მშრალ ბრინჯს, იგი გავრცელებული ყოფილა როგორც სამეგრელოში, ისე გურიაში, აჭარასა და ლაზეთში. მშრალი ბრინჯის შესახებ ჯერ კიდევ ვახუშტი ბატონიშვილი ოდიშის აღწერისას მიუთითებდა, რომ მოსავალნი მარცვალთა ფრიად ნაყოფიერნი მრავლად, რამეთუ ბრინჯი ნაყოფიერებს ურწყავად“³⁴.

ეთნოგრაფი ჯ. რუხაძე თავის ნაშრომში „ხალხური აგროკულტურა დასავლეთ საქართველოში“ მოკლედ შეეხო ბრინჯის კულტურას და აღნიშნა, რომ მშრალი ბრინჯი ძირითადად მთაში იყო გავრცელებული³⁵. იგი გამოვიდა ივ. ჯავახიშვილის „საქართველოს ეკონომიური ისტორიის“ 1 ტომში (გვ. 361) გამოთქმული მოსაზრებიდან, სადაც ივ. ჯავახიშვილი ეყრდნობა, რა ნ. მარის ცნობებს ჭანეთში მშრალი ბრინჯის მოვლა-მოყვანის შესახებ, აღნიშნული აქვს: „განსაკუთრებით აღსანიშნავია, რომ ჭანეთში ეხლაც ყოფილა ბრინჯის ადგილობრივი მუქი, მაგრამ გემრიელი ჯიში, რომე-

³⁴ ვახუშტი, აღწერა სამეფოსა საქართველოსა, თბ., 1941, გვ. 170.

³⁵ ჯ. რუხაძე, ხალხური აგროკულტურა დასავლეთ საქართველოში, თბ. 1976, გვ. 62.

ლიც თურმე ურწყავი, მთაშიც კი ხარობს და მშრალ ადგილებშიც იზრდება“³⁶.

აჭარელთა გადმოცემით, აჭარაში თეთრი ბრინჯი მოჰყავთ „ინგლისურაჲი“ „ძველათ იყო თათრულაჲი“, რადგან მთხრობელი ინგლისურად თეთრ ბრინჯს უწოდებს ალბათ „თათრულაჲი“ ის მუქი ბრინჯია, რომელიც ნ. მარს ქანეთში დაუმოწმებია. მაგრამ საერთოდ თქმა, თითქოს მშრალი ბრინჯი ძირითადად მთაში იყო გავრცელებული, ეს ძნელი დასაჯერებელია. გურიის მასალების მიხედვით ჩანს, რომ, როგორც მშრალი, ისე სველი ბრინჯი მხოლოდ ზღვისპირა ზოლში მოჰყავდათ ან ზღვისპირა ზოლიდან ოდნავ დაცილებულ, მაგრამ დაბალი მდებარეობის სოფლებში.

აღსანიშნავია, რომ, გარდა მოყვანის თვალსაზრისით ორი განსხვავებული ხასიათისა, რაც სისველე-სიმშრალით და სითეთრე-სიმუქით გამოიხატება, სხვა დამახასიათებელ ჯიშობრივ განსხვავებაზე რაიმე მასალა არ იკრებება.

1804 წელს პ. ლიტვინსკი იმერეთში გავრცელებულ მარცვლეულთა შორის მოიხსენიებს „აჭარულ ბრინჯს“³⁷. შესაძლებელია ამ ტერმინში სწორედ მშრალი, მუქი ფერის ბრინჯი იყოს ნაგულისხმევი. თუმცა პ. გუგუშვილის გამოკვლევით, მშრალი ანუ მთის ბრინჯი (*Oryza montania*) აღმოსავლეთ ამიერკავკასიაში 1852 წლიდან შემოუტანიათ ჩინეთიდან³⁸. ბრინჯის კლასიკურ ქვეყნად კავკასიაში მაინც აზერბაიჯანი უნდა მივიჩნიოთ, სადაც, შ. გულიევის გამოკვლევების მიხედვით, იქ 13 სხვადასხვა ჯიშისა და სახელწოდებოს ბრინჯი ყოფილა გავრცელებული³⁹. XIX საუკუნის ბოლოს აზერბაიჯანში ბრინჯისათვის 50 ათასი დესეტინა მიწა მუშავდებოდა და მოჰყავდათ 7 მილიონ ფუთზე მეტი⁴⁰.

ბრინჯი კახეთის ისტორიულ დოკუმენტებში ჩელთუქის სახელით მოიხსენიება, ხოლო ნაკვეთი, რაზედაც ბრინჯი მოჰყავდათ—საჩელთუქე ალაგად⁴¹. ტერმინი ჩელთუქი თურქული სიტყვაა და კახეთში აზერბაიჯანულიდან უნდა იყოს გავრცელებული.

³⁶ ი. ე. ჯ ა ვ ა ხ ი შ ვ ი ლ ი, საქართველოს ეკონომიური ისტორია, ტ. 1 თბ., 1930, გვ. 361.

³⁷ პ. გ უ გ უ შ ვ ი ლ ი, საქართველოს და ამიერკავკასიის ეკონომიური განვითარება XIX—XX ს.ში, ტ. III, თბ., 1959, გვ. 265.

³⁸ იქვე, გვ. 295.

³⁹ შ. ა. Г у л ј е в. Азербайчанда Залтикчилик, баки, 1977, с. 33.

⁴⁰ პ. გ უ გ უ შ ვ ი ლ ი, დასახ. ნაშრ., გვ. 302.

⁴¹ დოკუმენტები საქართველოს სოციალური ისტორიიდან, ტ. 1, თბ., 1940, გვ. 368—370.

კახეთში რომ ბრინჯი გვიანი შუა საუკუნეებისათვის დიდი რაოდენობით ითესებოდა, ამაზე მიუთითებს ვახუშტი ბატონიშვილი. იგი წერს: „რამეთუ უფროს გაღმა მხარს შინა და უმეტეს ელისენ-ში; ეგრეთვე ბანბასა და ბრინჯსა სთესენ გარნა იორის პირსაცა ზედა მრავალსა სთესავენ ბრინჯ-ბამბას“⁴². დასახლებულ რაიონებში რომ ბრინჯი მოჰყავდათ, ამ ცნობას ცოტა მოგვიანებით XVIII საუკუნის მოგზაური გიულდენშტედტიც იმეორებს⁴³.

მართალია არქანჯელო ლამბერტი მიუთითებს, რომ სამეგრელოში იმდენად ბევრი ბრინჯი მოჰყავდათ, რომ „არაცთუ აქაურებს ჰყოფნით „არამედ მიაქვთ ოსმალეთის გემებსაც, რომელნიც აქ მოდიანო“⁴⁴. მაგრამ უნდა ვიფიქროთ, რომ ბრინჯს მაინც დიდი ფართობები არ ეთმობოდა.

კოლხეთში ბრინჯის მოყვანის საქმეს ხელს უწყობდა დიდი რაოდენობის ნალექები (წლიურად 2000 მმ მეტი), რომელიც ძირითადად ბრინჯის სავეგეტაციო პერიოდზე ემთხვეოდა. XIX ს. მეორე ნახევრიდან ბრინჯის კულტურა აზერბაიჯანში ბამბის კულტურამ შეავიწროვა, ხოლო კოლხეთში ჩაის კულტურის განვითარებამ.

ივ. ჯავახიშვილის აზრით, საქართველოში სახელწოდება ბრინჯი ორი სახელით არის ცნობილი: ბრინჯის, რომელიც IX საუკუნეში ახალი სპარსულიდან უნდა შემოსულიყო აღმოსავლეთ საქართველოს გზით და „ორიზა“ რომელიც ბერძნულიდან უნდა შემოსულიყო კოლხეთში. აქედან გამომდინარე, თვით ბრინჯის კულტურის გავრცელებას დასავლეთ საქართველოში მიიჩნევს საბერძნეთის გზით მოსულად, რომის ანდა ბიზანტიის ჰეგემონიის ხანაში⁴⁵.

შეთამბაქო ე. ო. ბ. ა. გურიაში მეთამბაქოეობა მეურნეობის ისეთი დარგია, რომელიც ძირითადად XIX ს. მეორე ნახევარში განვითარდა და საწარმოო ეკონომიკური მნიშვნელობა საბჭოთა ხელისუფლების წლებში დაასრულა. მეთამბაქოეობა გურიაში მეჩაიეობამ შეცვალა. მიუხედავად მისი ასე ხანმოკლე არსებობისა, ჩვენ მიზანშეწონილად ჩავთვალეთ მეურნეობის ამ დარგს შევ-

⁴² ვ ა ხ უ შ ტ ი, აღწერა, გვ. 103.

⁴³ გ ი უ ლ დ ე ნ შ ტ ე დ ტ ი, მოგზაურობა, საქართველოში, ტ. 1, თბ., 1962, გვ. 17, 67.

⁴⁴ ივ. ჯ ა ვ ა ხ ი შ ვ ი ლ ი, საქართველოს ეკონომიური ისტორია, ტ. 1, გვ. 361.

⁴⁵ ივ. ჯ ა ვ ა ხ ი შ ვ ი ლ ი, დასახ. ნაშრ., გვ. 360.

ხეზოდით, რადგან გურული გლეხის სამეურნეო საქმიანობაში მას გარკვეული ადგილი ეკავა.

როგორც ვახუშტის აღწერიდან ჩანს, საქართველოში თამბაქო მოჰყავდათ, მაგრამ მისი მოყვანა საოჯახო მოთხოვნილების დაკმაყოფილების ფარგლებს არ სცილდებოდა. XIX საუკუნის მეორე ნახევარში მეურნეობის ამ დარგს გარკვეული აღმავლობა განუცდიდა. ზოგიერთი გლეხური ოჯახი თამბაქოს 0,5 ჰას თესდა. თამბაქოდან გლეხობამ დიდი შემოსავალი გაიჩინა. მეთამბაქოეობის მასიურად წარმოება, როგორც ვახუშტის „კავკაზის“ (1875 № 146) კორესპონდენტია იუწყება, 1860-იანი წლებიდან დაწყებულა. წერილის ავტორის აზრით, 1860-იან წლებში მძიმე მდგომარეობაში აღმოჩნდა მევენახეობა, ხოლო 1960-იან წლებში მებარეშუმეობა. როგორც ერთიდან, ისე მეორე დარგიდან საკმაოდ კარგი შემოსავალი შოაკლდა ადგილობრივ მოსახლეობას. დაცემული მეურნეობის გამოსწორებისათვის ზრუნვა ამავე პერიოდში დაიწყო. ორიენტაცია აღებულ იქნა მეთამბაქოეობაზე. პირველი, ვინც გურიაში ამ დარგს მიაქცია ყურადღება, იყო კონსტანტინე ვახტანგის ძე ერისთავი. მან 1860 წელს თურქეთიდან შემოიტანა საუკეთესო ჯიშის თამბაქოს თესლი და თან მოიყოლია თამბაქოს მომყვანი თურქი სპეციალისტები. თამბაქომ პირველ წელსავე ერთ ჰექტარზე 30—40 მანეთი სუფთა მოგება მისცა. 1865 წლიდან კ. ერისთავის წამოწყებას მხარი აუბეს გურიის აზნაურობამ და 1870 წლისათვის თამბაქოს ნათესებმა 60 ჰექტარამდე მიაღწია. საიდანაც 1000 ფუთი თამბაქო იქნა მიღებული, ფუთი თამბაქოს გასაყიდი ფასი შეადგენდა 3—5 მანეთს.

თამბაქოს მოყვანა დაიწყეს ჩოხატაურის ახლომახლო სოფლების მოსახლეობამ (ბასილეთი, ჭვარცხმა, აკეთი, ერკეთი და სხვ.)

თამბაქო ორი ჯიშისა — სამსუნისა და ტრაბიზონისა ითესებოდა. უმეტესად არჩევდნენ სამსუნის თამბაქოს. ჭერ სანერგეს დათესავდნენ თებერვალში, ხოლო მაისის თვეში ხდებოდა ნერგების გადანერგვა ძირითად ნაკვეთებში. სანერგე ძირითადად ეზო-კარმიდამოს ტერიტორიაზე ჰქონდათ მოთავსებული. მაისში იწყებდნენ ნერგის გადარგვას საგანგებოდ მომზადებულ მიწის ნაკვეთზე.

1875 წლისათვის „კავკაზის ცნობით“ მეთამბაქოეობას მისდევდა გურიის 120 აზნაური და თავადი და 1500 კომლი გლეხი. თამბაქოს ნათესების საერთო ფართობი 1000 ჰექტარს მიაწვდებოდა. ერთი ჰექტარს საშუალოდ 15 ფუთ მშრალ თამბაქოს იძლეო-

და. 1974 წელს 15 ათასი ფუთი იქნა მოწეული, რაც ფულზე გადაყვანილი 80 ათას მანეთამდე შემოსავალს იძლეოდა.

მიწა, რაზედაც თამბაქო უნდა დაერგოთ, ორგზის უნდა გადახნულიყო — სიგრძეზე და სიგანეზე. ორგზის გადახნულ მიწას „დაჩელტავდნენ“, შემდეგ კი კავით დაკვალავდნენ. იმისათვის რომ კვლებს შორის სწორად დაეკვით მანძილი, ხშირად კავის ნაცვლად თოხით იცოდნენ კვლების გატარება. მანძილი კვლებს შორის 50 სმ უნდა ყოფილიყო, ხოლო სიგრძე ნერგიდან ნერგამდე 20—25 სმ.


„თამბაქოს თოხი ორხელ, სამხელ უნდოდა. მნიშვნელობა ჰქონდა პირველ და მეორე თოხნის ხარისხს. თამბაქოს ფოთლის შეტეხვა ივლისის დამლევს (25) იწყებოდა. პირველი შეტეხვიდან 10 დღის მერე მეორე შეტეხვა ტარდებოდა. სულ 4-ჯერ იცოდნენ შეტეხვა“. თამბაქოს ფოთოლს ყუნწებით ბაწარზე ააცმევდნენ და კიდებდნენ ე. წ. „მაშინაში“. მაშინა წარმოადგენდა ოთხი ფიცრისაგან შეკრულ ჩარჩოს, რომელსაც სიგრძე 4 მეტრი და სიგანე 2,5 მეტრი ჰქონდა, ბაწრები, რომელზედაც თამბაქო იყო აცმული, მაშინაში ჩაებმებოდა და ისე შრებოდა. ღამლამობით „მაშინები“ შეჰქონდათ ფარდულებში, რომელსაც კაზარმას უწოდებდნენ. თამბაქოს ფოთოლი 15 დღეში შრებოდა. გამშრალი თამბაქოს ორ სამი აცმა-ბაწარს მოკეცავდნენ და კიდებდნენ კაპებზე, თითოეულ ასეთ ანაკრეფს „ხეფენგს“ უწოდებდნენ. შემდეგში ხეფენგებს ხუთ სხვადასხვა ხარისხად აწყობდნენ, რასაც ტეხად დალაგება ერქვა.

დახარისხებულ თამბაქოს ადგილზევე იძენდნენ შემსყიდველები, რომელთაც თან მოჰყავდათ თამბაქოს ცალეხად შეკვრა-შეფუთვის მცოდნე პირები, შეფუთული თამბაქო გადაჰქონდათ ქ. ბათუმში“ (მთხრობელი იოსებ ივანეს ძე დოლიძე, ს. განახლება ჩოხატაურის რაიონი, 1978 წ.).

ნაკვეთში დარჩენილი ღერებიდან იღებდნენ სათესლე მასალას. თვით ღერებს კი წვავდნენ ან შეიძლებოდა მისგან მახორკის გაკეთება, მაგრამ გურიაში ამ დანიშნულებით ღერებს არავინ იყენებდა.

თამბაქოს გარდა საბაზრო დანიშნულებისა, თავადაც იყენებდნენ, ეწეოდნენ ჩიბუხით და ქალაქში გახვეული სახითაც. თამბაქოს ღეჭვა გურიაში არ დაგვიმოწმებია. როგორც ადგილზე შეკრებილი მასალიდან ჩანს თამბაქოს ჰრიდნენ საგანგებო დანების საშუალებით, რომელსაც ადგილობრივი მკედლები ამზადებდნენ

(იხ. სურ. 13). დანას ჰქონდა ორი ყუნწი და თხელი, ბრტყელი პირი. ერთ ყუნწს გააჩნდა ნახვრეტი, მეორეზე ეგებოდა ტარი. ნახვრეტიანი ყუნწი ჩამაგრებული იყო სადგარში, ტარის აწევ-დაწვევით თამბაქოს კონებს კრიდნენ და შემდეგ იყენებდნენ.



სურ. 13. თამბაქოს საკრელი.

თამბაქოს მოვლა-მოყვანა მძიმე საშუალო პროცესების შემცველია. ცუდად მოქმედებს ადამიანის ჯანმთელობაზე და ალბათ იმიტომაც, რომ ჩაის კულტურა უფრო მომგებრიანი აღმოჩნდა, ვიდრე თამბაქოს მეურნეობა, ამ დარგმა გურიაში შემდგომი განვითარება ვერ ჰპოვა.

ДЖАЛАБАДЗЕ Г. В.

СТАРЫЕ И НОВЫЕ ХОЗЯЙСТВЕННЫЕ КУЛЬТУРЫ В ГУРИИ

Резюме

В работе дается характеристика хозяйственного быта Гурии. Выделены и изучены основные отрасли сельского хозяйства: полеводство, табаководство, рисоводство и чаевод-

ство. После установления Советской власти в Грузии основной отраслью сельского хозяйства в Гурии стало чаеводство. В работе описываются перемены, происшедшие в хозяйственном и семейном быту гурийцев в связи с развитием чаеводства.

В работе дан, статистический показатель производственного быта передовых колхозов, занимающихся чаеводством. Из статистики видно, что каждый трудоспособный член колхоза, почти ежедневно занят на чайных плантациях. На основе статистических материалов автор делает вывод, что чаеводство в Грузии является ведущей, а также трудоемкой отраслью сельского хозяйства, требующей механизацию и огромную затрату рабочей силы.

კოლექტიური შრომის ფორმები გურიისში

კოლექტიური შრომა კაცობრიობის ისტორიის მთელ მანძალზეა ცნობილი და მას, როგორც ისტორიულ კატეგორიას, საზოგადოების განვითარების სხვადასხვა სტადიაზე სხვადასხვა ფორმა ჰქონდა¹.

შრომის მარტივი კოოპერაცია ჩაისახა წინაკლასობრივ საზოგადოებაში, ნ. ზიბერი შრომით კოოპერაციას „პირველყოფილი ეკონომიკური წყობილების არსებობის პირობას“ უწოდებს². წინაკლასობრივ საზოგადოებაში წარმოქმნილი შრომითი კოოპერაციის ფორმები განაგრძობდნენ არსებობას საზოგადოების განვითარების მომდევნო სტადიაზე. კოოპერაციის ძველ ფორმებში, რომლებმაც გადნონაშთის სახით მოაღწიეს XX საუკუნემდე, მეტ-ნაკლებად შეცვლილი ბუნებით, დატულია სხვადასხვა დროისა და სოციალური წყობილების დამახასიათებელი წესები. ამიტომ მათი თავდაპირველი ბუნების აღდგენა შესაძლებელია კოლექტიური შრომის ამა თუ იმ ფორმის „მოცემულ სოციალურ გარემოში მინი კონკრეტული სახით შესწავლისა და ისტორიულ ანაქტში განხილვის საფუძველზე“³. ამ თვალსაზრისით საინტერესოა გურიის ეთნოგრაფიული მასალა. ჩვენი ინტერესები ამჯერად ისაზღვრება მემინდვრეობასთან დაკავშირებული კოლექტიური შრომის ფორმებით გურიაში.

ჩვენს ხელთარსებული ეთნოგრაფიული მასალა ასახავს XX ს. დასაწყისის სურათს. ეს პერიოდი სოფლის ცხოვრებაში გარდატეხის პერიოდს წარმოადგენდა. ეკონომიკურმა უთანასწორობამ,

¹ К. Маркс. Капитал, т. I, 1951, с. 340.

² Н. Н. Зибер. Очерки первобытной экономической культуры, М., 1937, გვ. 12.

³ ა. რ ბ ა ქ ი ძ ე, შრომის ორგანიზაციის ფორმები ძველი საქართველოს სახალხო მეურნეობაში, თბ., 1941, გვ. 14.

გლუხობის ქონებრივმა დიფერენციაციამ, სოფლად კაპიტალისტურ ურთიერთობათა განვითარებამ თავისებური დალი დაასვა მის ყოფას, კერძოდ, კოლექტიური შრომის ძველმა ფორმებმა ახალ ვითარებაში მნიშვნელოვნად შეიცვალეს სახე. ასეთ შემთხვევაში ადგილი აქვს ხოლმე თავისებურ სინკრეტიზმს. — განვითარების სხვადასხვა სტადიისათვის დამახასიათებელი მომენტების თანაარსებობას⁴.

შრომის ორგანიზაციის ამ მრავალფეროვნების სისტემატიზაციის მიზნით, საჭიროა კოლექტიური შრომის თითოეული ფორმის დეტალური ანალიზი. კოლექტიური შრომის სხვადასხვა მხარეების — მიწათსარგებლობის, კოლექტიური შრომის ორგანიზაციის, მონაწილეთა უფლებრივი დამოკიდებულების, შრომის განაწილების, შრომითი მონაწილეობის ხარისხისა და შრომის შედეგის განაწილების, ასევე კოლექტიურ შრომასთან დაკავშირებული ადათ-ჩვეულებების ანალიზი საშუალებას იძლევა თვალი გავადევნოთ კოლექტიური შრომის ფორმების განვითარებასა და გარდაქმნის პროცესს.

გურიაში ფართოდ იყო გავრცელებული შრომითი ურთიერთდახმარების ფორმა, რომლის დროსაც მეზობლები ეხმარებოდნენ ერთ ოჯახს, ამ უკანასკნელის მოწვევით. სამუშაოს პატრონი მოწვეულ პირთ, ჩვეულებრივ, უმასპინძლებოდა. ასეთი სახის შრომითი დახმარება ხდებოდა ანაზღაურების გარეშე. კოლექტიური შრომის ეს ფორმა გურიაში ცნობილი იყო ნადისა და ხარნადის სახელწოდებით. ურთიერთდახმარების ამ ფორმას მიმართავდნენ მემინდვრეობასთან დაკავშირებული თითქმის ყველა სამუშაოს დროს. გურიაში XIX საუკუნეში მემინდვრეობის კულტურებიდან ძირითადად სიმინდი მოჰყავდათ⁵. ამიტომ კოლექტიურ შრომას მიმართავდნენ ძირითადად სიმინდის მოყვანასთან დაკავშირებული სამუშაოების დროს. ასეთები იყო: ხვნა-თესვა, თოხნა, მოსავლის აღება, გადატანა, სიმინდის გარჩევა და დაფშვნა. თოხნის, მოსავლის აღების, სიმინდის გარჩევისა და დაფშვნის დროს მოწყობილ კოლექტიურ შრომას ნადი ეწოდებოდა, ხოლო ხვნასა და მოსავლის გადატანის დროს მოწყობილ კოლექტიურ შრომას (სადაც გამწევი ძალაც გამოიყენებოდა), ხარნადს ეძახდნენ.

⁴ ალ. რობაქიძე, დასახ. ნაშრ., გვ. 14.

⁵ Д. П. Носович. МИЭБГКЗК, I, 1885, გვ. 750.

ნადს განსაკუთრებით ხშირად მიმართავდნენ თოხნის დროს.. რადგან ეს უკანასკნელი მეტად შრომატევად სამუშაოს წარმოადგენდა. სიმინდს ორჯერ თოხნიდნენ. პირველ გათოხნას უწოდებდნენ „მარგვლას“. ეს ხდებოდა აპრილის ბოლოს. ორი კვირის შემდეგ მეორედ უნდა გათოხნილიყო. ეს იყო „გათოხვა“, მოროდი“.. ზოგჯერ მესამედაც თოხნიდნენ. განსაკუთრებით მძიმე სამუშაოს წარმოადგენდა მარგვლა. გარდა ამისა, მთიან ადგილებში, რომლებსაც კავი ვერ მიუღდებოდა, მიწას თოხით ამუშავებდნენ. ისე, რომ ნადი იმართებოდა მარგვლისას, გათოხვნისას და თესვის დროს (ეს უკანასკნელი მთიანი ადგილებისათვის იყო დამახასიათებელი).

ნადში მოწვეულ მუშათა რაოდენობა სხვადასხვა იყო, მაგრამ რვა კაცზე ნაკლები არ შეიძლება ყოფილიყო. როგორც ა. წულაძე წერს, „ნადის რიტხვი ისაზღვრებოდა მომღერლების მიხედვით.. ერთ პირ ნადში 8—12 კაცი შედიოდა, ორპირში—16—24, ხშირად უფრო მეტიც“⁶. თოხნის დროს ნადში მხოლოდ კაცები მონაწილეობდნენ.

შრომას სიმღერა აადვილებდა და ხალისს მატებდა. თოხნის დროს მღეროდნენ ყანურს ანუ ნადურს. ამ სიმღერას რვა კაცი სკირდებოდა: 2 დამწყები (მთქმელი), 2 გამყივანი (გადამძახებელი) და ორ-ორი ბანი (შემხმობი), თოხებს სიმღერის ტემპს აყოლებდნენ როგორც მომღერლები, ისე არამომღერლები. თოხების დარტყმა და სიმღერა რიტმული უნდა ყოფილიყო. თოხნის დროს ჭამა ოთხჯერ იყო მიღებული: საუზმე, სადილი, ზარმელი და ვახშამი. საუზმე და ვახშამი სამუშაოს პატრონის სახლში იმართებოდა, ხოლო სადილი და ზარმელი, თუ მინდორი ახლოს იყო, სახლში, ხოლო თუ შორს იყო, მაშინ მინდორში მიჰქონდა ქალს იმ ოჯახიდან, ვისი მიწაც ითოხნებოდა, ჭურჭელიც თან მიჰქონდათ. თუ მინდორი შორს იყო, მაშინ ურმით მიჰქონდათ. სადილად წვნიანი, ხორციანი საკმელი იყო ხოლმე, ხოლო ზარმელზე, უმეტესად მშრალი.

სიმინდის მოსავლის აღების დროს ნადი შერეული იყო—მონაწილეობდნენ როგორც ქალები, ისე კაცები, შრომა მათ შორის განაწილებული იყო. როდესაც ოჯახი დამოუკიდებლად, თავისი ძალებით იღებდა სიმინდის მოსავალს, მაშინ ბავშვებიც იღებდნენ მონაწილეობას, ხოლო ნადში არა.

გურიისში, ჩვეულებრივ ჯერ ტაროს ტეხდნენ და მერე დარჩე-

⁶. ა. წულაძე, ეთნოგრაფიული გურია, თბ., 1977, გვ. 21.

ნილ ჩალას ჰკრიდნენ. თუ ნადი მცირერიცხოვანი იყო, მაშინ ჯერ-ტაროს ტეხდნენ ნადით, მეორე დღეს ჩალას ჰკრიდნენ და შესამე დღეს ზვინავდნენ. იმ შემთხვევაში, თუ ამინდი ცუდი იყო ან ჩალა ნელლი იყო, მაშინ ჩალას ტოვებდნენ და რამდენიმე დღის შემდეგ ჰკრიდნენ.

როდესაც ერთდროულად ხდებოდა ტეხვა, ჩალის ჰკრა და დაზვინვა, მაშინ მომუშავეთა შორის შრომა ასე იყო განაწილებული. მომუშავეთა ნაწილი ტაროს ტეხდა და კალათებში ყრიდა. ესენი იყვნენ „მტეხავები“. მტეხავი შეიძლებოდა ყოფილიყო როგორც კაცი, ისე ქალი. ამათ მიჰყვებოდა „მეხვავე“, ჩვეულებრივ, კაცი, ზურგზე სახვავო გოდორმოკიდებული, მტეხავები კალათებიდან ტაროს უყრიდნენ მეხვავეს გოდორში. მეხვავეს მიჰქონდა გოდორი და ახვავებდა ან კალოზე, რომელიც იქვე ყანაში იყო, ან ურემთან (იმ შემთხვევაში, თუ მოტეხილი ტარო სახლში მიჰქონდათ).

მომუშავეთა ნაწილი რომ ტეხდა, ხოლო ნაწილი ახვავებდა, ამ დროს ნაწილი ჰკრიდა, ნაწილი კონიდა, ნაწილი ზვინავდა. „ჩალის მკრელები“ უმთავრესად კაცები იყვნენ, თუმცა ქალებიც არ იყო გამორიცხული. ეს დამოკიდებული იყო ქალებისა და კაცების თანაფართობაზე. ჩალას ჰკრიდნენ ნამგლით. ჩალის მკრელები კონას (ჩალის იმ რაოდენობას, რომელსაც მკრელი დაიჭერდა ერთ ჯერზე, ჩვეულებრივ 25—40 ჩალა) იქვე დებდნენ. მკრელებს მიჰყვებოდა ამკონავი (უფრო ხშირად კაცი), რომელიც თითოეულ კონას შეკონიდა ღომის ჩალით და 10—15 კონას ერთად დააწყობდა. შემდეგ ჩამოვივლიდა ურემი, რომელსაც ემსახურებოდა ორი კაცი. ურმით ჩალა მიჰქონდათ საზვინე ხესთან, რომელიც იქვე ნაკვეთში იყო ხოლმე ან პირდაპირ სახლში. ერთ ურემზე დაახლოებით 100—150 კონა ჩალა ეტეოდა.

საშუალოდ 5—7 მტეხავზე 1 მეხვავე უნდა ყოფილიყო, 2—3 მომკრელზე — 1 ამკონავი. ურმების რაოდენობა დამოკიდებული იყო მანძილზე.

მოსავლის აღების დროს ჰკამა სამჯერ იყო მიღებული: საუზმე, სადილი, ვახშამი. ზარმელი მოსავლის აღების დროს არ იყო, რადგან ამ დროს შედარებით მოკლე დღეა, საუზმე და სადილი მინდორში მიჰქონდათ. თუ ახლოს იყო ყანა, მაშინ ცხელი საჭმელი მიჰქონდათ, თუ შორს იყო, მაშინ დილით ურმით მიჰქონდათ კალათებით, გოდრებით. ვახშამობდნენ სამუშაოს პატრონის სახლში.

სიმინდის რჩევის (გაქურჩენის) დროსაც ნადს შეიწვედნენ ხოლმე. ამ დროსაც ნადი შერეული იყო — მონაწილეობდნენ ქალები და კაცები, როგორც ახალგაზრდები, ისე ხნიერები. სიმინდს ჩვეულებრივ, ღამე, მთვარის ან ჭრაქის სინათლეზე არჩევდნენ. შუშაობა შუალამემდე გრძელდებოდა. სიმინდის რჩევის დროს ძღეროდნენ „კალოს ხელხვავს, ნადისათვის განსაკუთრებული მზიარულება იყო დამახასიათებელი. მიღებული იყო სხვადასხვა სახის გართობა-ხუმრობა. იცოდნენ „ყარყუმობიე“-ს თამაში მუშაობის დროს ნადს მიაართმევდნენ ხოლმე მოხარშულ სიმინდსა და გოგრას. სამუშაოს დამთავრებისას, გვიან ღამით მასპინძელი ვახშაშს მართავდა.

სიმინდის დაფშენისას ქალების ნადს შეიწვედნენ ხოლმე, დიასახლისი პატყებდა, იგი საღამოობით ეწყობოდა და ყველა ასაკის ქალები იღებდნენ მონაწილეობას.

ხარნადს (ხენის დროს კოლექტიურ შრომას) მიმართავდნენ შედარებით შეძლებული ოჯახები. სამუშაოს პატრონი მეზობლებს დახმარებას სთხოვდა და 5—7 კაცი თავისი სახვნელი იარაღითა და გამწევი ძალით მივიდოდა მიწის პატრონთან და გასაძრკელოს გარეშე უხნავდა. მიწის პატრონი მოწვეულ პირთ გულუხვად უმასპინძლდებოდა. ხარნადს ხენის დროს არ ჰქონდა მასობრივი ხასიათი, ოჯახების უმრავლესობა დამოუკიდებლად ხნავდა, რადგან კაცი არ იყო ძვირადღირებული იარაღი და ამასთანავე გამწევი ძალა მხოლოდ ორი უღელი იყო საჭირო. ამ შემთხვევაში კი, როდესაც არ ჰყოფნიდათ გამწევი ძალა, მიმართავდნენ კოლექტიური შრომის ფორმას, რომლის შესახებ ქვემოთ გვექნება საუბარი.

ხარნადი ეწყობოდა აგრეთვე მოსავლის გადაზიდვის დროსაც. კოლექტიური შრომის განხილული შემთხვევები განეკუთვნებიან კოლექტიური შრომის ერთ სახეობას — სამუშაოს პატრონის მიწვევით, გამასპინძლებით. ისინი ერთმანეთისაგან განსხვავდებიან სამუშაოს მიხედვით, რომლისთვისაც დგებოდა აღნიშნული შრომითი გაერთიანება. ყველა შემთხვევაში ეს ეწყობოდა ერთი დღით, მონაწილეებს ჰქონდათ საკუთარი იარაღი, არ იყო შეპირობებული ნათესაური კავშირით. მტკიცედ იყო დადგენილი შრომის, კვებისა და დასვენების რეჟიმი. აღნიშნული ჯგუფები შეიძლებოდა ყოფილიყო ქალების, კაცების ან შერეული. ეს დამოკიდებული იყო სამუშაოს ხასიათზე.

უნდა ითქვას, რომ კოლექტიური შრომის აღნიშნული ფორმის დროს შრომას განსაკუთრებით საზეიმო ხასიათი ჰქონდა. აქ უფრო ზედმიწევნით სრულდებოდა კოლექტიურ შრომასთან დაკავშირებული წესები და რეჟიმი.

აღნიშნული სახის შრომითი ურთიერთდახმარება ფართოდ იყო გავრცელებული მთელ საქართველოში—დასავლეთ საქართველოში, კერძოდ იმერეთში, ნადის, სამეგრელოში ნოდის, რაჭაში შემველის⁷, ხოლო აღმოსავლეთ საქართველოში დამახილის, მაძითადის, მუშის, ულამის, სეფეს სახელწოდებით. შრომის ორგანიზაციის ასეთი ფორმა გარდა მემინდვრეობისა, სხვა სამუშაოების შესრულებისასაც ნადის სახელწოდებით იყო ცნობილი. ფ. გოგიჩაიშვილი აღნიშნავს, რომ მატერიალური დახმარების ის სახეები, რომელსაც მეზობლები ანაზღაურების გარეშე უწყევნ ოჯახს სიკვდილისა და ქორწილის დროს. „უექველად თავისი არსით მკვიდროდ არის დაკავშირებული ნადთან...“ თუმცა ასეთ შემთხვევაში ისინი თვითონ მიდიან, მათ არ „სთხოვენ“, რადგან ეს მათ მოვალეობად მიაჩნიათ, მაგრამ ამით საქმის არსი ნამდვილად არ იცვლება“⁸.

შრომითი ურთიერთდახმარების ამ ფორმას მრავალი ანალოგი მოეპოვება კავკასიაში, კერძოდ, ოსეთში აღნიშნული სახით შრომითი გაერთიანება ცნობილი იყო „ზიუს“⁹, დაღესტნის სხვადასხვა ნაწილში „გვიას“¹⁰, „მარშას“¹¹, „ეუკას“¹², ხოლო აზერბაიჯანში „იმეჯილიკის“¹³, უზბეკეთში „ურუქ ხაშარის“¹⁴ სახელწოდებით.

აღნიშნული სახის ურთიერთდახმარებას ეთნოგრაფიულ ლიტერატურაში არაერთი მკვლევარი შეხებია. მიღებულია აზრი იძის

⁷ ალ. რობაქიძე, რაჭის ეთნოგრაფიული ექსპედიციის მოკლე ანგარიში.

⁸ ფ. გოგიჩაიშვილი, ხელოსნობა ძველ საქართველოში, თბ., 1976, გვ. 69.

⁹ М. О. Косвен. Этнография и история Кавказа, М., 1961, с. 80.

¹⁰ С. Х. Асиятилов, Историко-этнографический очерк хозяйства аварцев, Махачкала, 1967, с. 57.

¹¹ А. Омаров. Как живут лахи, Сборник сведений о кавказских горцах, вып. IV, 1870, с. 9—16.

¹² Гаджи Мурад Амиров. Среди горцев северного Дагестана, Сборник сведений о кавказских горцах, вып. IV, с. 76.

¹³ М. А. Гулиев. Чалтыководство в Азербайджане, Автореферат, Баку, 1966, с. 22.

¹⁴ М. Абдураимов. Пережитки сельской общины в Узбекском кишлаке, Хумсан (XIX нач. XX вв), СЭ, 1959, № 4, с. 49.

შესახებ, რომ კოლექტიური შრომის ეს ფორმა დამახასიათებელი იყო პირველყოფილ-თემური წყობილებისათვის და თვით მისი არსიდან გამომდინარეობდა¹⁵.

აღნიშნული სახის შრომის ორგანიზაციის თავდაპირველ სახეში მნიშვნელოვან მომენტს წარმოადგენდა ურთიერთდახმარების ფაქტორი¹⁶.

შრომითი ურთიერთდახმარება საყოველთაოდ იყო გავრცელებული და აუცილებელი პირველყოფილ-თემური წყობილების დროს. აღნიშნული სახის შრომის ორგანიზაცია განაგრძობდა არსებობას სასოფლო თემის პირობებშიც და გადმონაშთის სახით მან მიაღწია XX საუკუნემდე¹⁷, მაგრამ, გადმოდის რა შემდგომ ფორმაციებში ეს ეგ. წ. „გვაროვნული ურთიერთდახმარება“¹⁸ იძენს კლასობრივ ნიშნებს¹⁹. ეს უკანასკნელი სწორედ იმაში გამოიხატება, რომ ურთიერთდახმარების აღნიშნულ ფორმას ზოგ შემთხვევაში ჩამოშორდა ურთიერთდახმარებრს აუცილებელი პირობა²⁰.

როგორც არსებული ლიტერატურის, ისე ჩვენი საველე ეთნოგრაფიული მასალის მიხედვით, საქართველოში ურთიერთდახმარების ამ ფორმის არსებობა XX საუკუნეშიც დასტურდება. ამასთან შრომის ორგანიზაციის აღნიშნულმა სახემ ამ დრომდე მოაღწია მეტ-ნაკლებად ტრანსფორმირებული სახით.

ჩვენი საველე მასალის მიხედვით, მემინდვრეობაში შრომითი დახმარება (სამუშაოს პატრონის მოწვევით) საკმაოდ იყო გავრცელებული, მაგრამ მისი ანალიზი გვიჩვენებს, რომ ამ ინსტიტუტის ფუნქციები ყოველთვის ერთნაირი არ იყო. ერთ შემთხვევაში ის წარმოადგენდა ურთიერთდახმარებას, სხვა შემთხვევაში კი მას ჩამოშორდა ურთიერთდახმარების აუცილებელი პირობა და გადაიქცა სოფლის მოსახლეობის შეძლებული ნაწილისათვის მუქთი მუშახელის შოვნის საშუალებად. ღარიბ გლეხობას არც ჰქონდა საშუალება გულუხვად გამასპინძლებისა. სოფლად ქონებრივი დიფერენციაციის გაღრმავებისა და კულაკობის გაჩენის შედეგად შრომის ორგანიზაციის აღნიშნულმა მარტივმა ფორმამ ხშირ შემთხვევაში დაკარგა ურთიერთდახმარების პრინციპი და გადაიქცა

¹⁵ Н. А. Бутинов. Папуасы Новой Гвинеи, М., 1968, с. 80.

¹⁶ М. О. Косвен. Этнография и история кавказа, М., 1961, с. 16.

¹⁷ Л. Крижвицкий. დასახ. ნაშრ., с. 77.

¹⁸ М. А. Косвен. Семейная и община патронимия, М., 1960, с. 113.

¹⁹ М. О. Косвен, დასახ. ნაშრ., с. 114.

²⁰ Н. А. Бутинов. დასახ. ნაშრ. с. 27.

შრომით დახმარებად, რომელსაც უწევდნენ შედარებით მეტი მიწების მფლობელ შეძლებულ გლეხებს. ასეთ დახმარებას გამაჰსინძლების ფასად ხშირად უწევდნენ სოფლის მოხელეებსა და სამღვდლოებს, ასევე აზნაურებს. უკანასკნელ შემთხვევაში ნადი განსაკუთრებით ხალხმრავალი იყო და მისთვის დამახასიათებელი იყო ის, რომ სამუშაოს პატრონი თვითონ მონაწილეობას არ იღებდა. გლეხი კი მოწვეულ პირებთან თანაბრად თვითონაც მუშაობდა. აზნაური, ჩვეულებრივ, მიმართავდა შუამავალს, რათა ნადი მოეწვია მისთვის. ამაში შუამავალს ფულსაც უხდიდნენ ხოლმე. ხშირად გლეხიც მიმართავდა ასეთ საშუალებას. მაგრამ ამ დროს გამოირიცხული იყო ფულის გადახდა, რადგან ნათესაობის ფაქტორი გარკვეულ როლს თამაშობდა. ასეთ ნაღს „მოყვრის ნადი“ ეწოდებოდა.

მთხრობლის გადმოცემით, „მოყვრის ნადი ისაა, მაგალითად, მე მყავს ნათესავი. იმას ვეტყვოდი, მე მინდა ამდენი კაცი და ის მოიყვანდა ნაღს. ის თუ ისე მასახლებდა, მე წავუყვანდი შერე. მე იმისი შემართა. ეს იმ შემთხვევაში, თუ დასჭირდებოდა, მაგრამ არ იყო აუცილებელი“.

შრომითი გაერთიანების ერთ-ერთ მარტივ ფორმას წარმოადგენდა ქვრივ-ობლების, დროებით უშამაქაცოდ დარჩენილი ოჯახის, უხარო ოჯახის შრომითი დახმარება ყოველგვარი ანაზღაურების გარეშე. ასეთი სახის შრომის ორგანიზაცია, როდესაც რამდენიმე მოსახლე ანაზღაურების გარეშე, თავისი იარაღით, ხშირად თავისი საგზლით, მიდიოდა და ეხმარებოდა გაჭირვებულ ოჯახს, ცნობილი იყო მემინდერეობის ციკლში შემავალ თითქმის ყველა სამუშაოსთან დაკავშირებით (ხენა, თოხნა, მოსავლის აღება, გადაზიდვა და სხვა).

გაჭირვებული ოჯახის დახმარება (არა მარტო შრომითი, არამედ მატერიალურიც) წარმოადგენს თემური წყობილების გადმონაშთს. ამ მოვლენაში გამოხატულია პირველყოფილ-თემური წყობილების იდეოლოგია. ამის შესახებ ფ. ენგელსი წერდა: „რამდენიმე დღის განმავლობაში, რომელიც მე ირლანდიაში გავატარე, ნათლად დაეინახე, როგორ გამსჭვალულია იქ ხალხი ჭერ კიდევ გვაროვნული ეპოქის წარმოდგენებით.... ყოველი შეძლებული გლეხი ვალდებულია დახმარება გაუწიოს თავის ნაკლებად შეძლებულ მეზობელს, როცა ეს უკანასკნელი რაიმე გაჭირვებას განიცდის. ეს დახმარება სამოწყალო კი არაა, იგი კლანის ღარიბ წევრს

უფლების ძალით ერგება უფრო მდიდარი წევრისა და მეთაურისა-
გან“²¹. იგივეს აღნიშნავს ფ. ენგელსი, როდესაც ახასიათებს გვა-
როვნულ წეს-წყობილებას: „შეუძლებელია, რომ ღარიბები და გა-
ჭირვებულები არსებობდნენ — კომუნისტური ოჯახი და გვარი-
ზრუნავენ მოხუცებულთა, სნეულთა და ომში დაავადებულთა შე-
სახებ“²².

გურიაში არსებობდა გაჭირვებულ ოჯახის დახმარება მემინ-
დვრობასთან დაკავშირებული სამუშაოების დროს. ამის შესახებ
ა. წულაძე წერდა: „სოფელში თუ ყანაში მუშაობის დროს მუშა-
კაცი ავად გახდებოდა, კვირას ეკლესიაში მოითათბირებდნენ, და-
ნიშნავდნენ დღეს და ავადმყოფის ყანას ნაღურით ამუშავებდნენ.
რეაქციის ხანაში პოლიტიკურ გადასახლებულის ან მოკლულის,
იმპერიალისტური ომის დროს სათადარიგო ჯარისკაცის ყანასაც
ასევე კოლექტიურად ამუშავებდნენ. ზოგჯერ გამასპინძლებას ყა-
ნის პატრონს არ ავალებდნენ, თავიანთი ხარჯით მუშაობდნენ. იქ-
თი შემთხვევაც ყოფილა, რომ პატრონს ყანის დამუშავება მეორე-
მესამე დღეს გაუგია“²³.

ჩვენს მიერ შეკრებილი მასალის მიხედვით, გურიაში შრომი-
თი დახმარება ცნობილი იყო „შემწეობის“ სახელწოდებით. ამ
დროს უმთავრესად საკუთარი ინიციატივით მიდიოდნენ დასახმა-
რებლად. სოფლის ერთ-ერთი თავკაცი აიღებდა თავის თავზე ინი-
ციატივას და წაიყვანდა ხალხს დასახმარებლად. თუ ოჯახი მე-
ტისმეტად ღარიბი იყო, მომხმარენი თავისი საგზლით მიდიოდნენ.
იმ დროისათვის, რომელსაც ეკუთვნის ჩვენი მასალა, შრომის ორ-
განიზაციის აღნიშნული ფორმა არ იყო შეპირობებული ნათესაუ-
რი კავშირით.

შრომითი დახმარების დროს ურთიერთობა მარტივი იყო და
გამომდინარეობდა იმ შეგნებიდან, რომ გაჭირვების დროს მასაც
დაეხმარებოდნენ. ხოლო ოჯახს, რომელსაც ეხმარებოდნენ, ჰქონდა
მორალური ვალდებულება სხვისათვის გაეწია დახმარება საჭიროე-
ბის შემთხვევაში.

გაჭირვებული ოჯახის შრომითი დახმარება ფართოდ იყო
გავრცელებული საქართველოს სხვა კუთხეებშიც. სამეგრელოში ეს

²¹ ფ. ენგელსი, ოჯახის, კერძო საკუთრების და სახელმწიფოს წარმოშო-
ბა, თბ., 1938, გვ. 136.

²² ფ. ენგელსი, დასახ. ნაშრ., გვ. 98.

²³ წულაძე, დასახ. ნაშრ., გვ. 24.

გამოიხატებოდა სპეციალური ტერმინით „შენწოზა“, ერწო-თიანეთში „სამადლო“, მესხეთში შრომის ორგანიზაციის ასეთ ფორმას „სანიჭარს“²⁴ უწოდებდნენ, ოსეთში დახმარებას უწოდებდნენ „ანხოსს“²⁵. დახმარების ეს მარტივი ფორმა მთელი მსოფლიოს მასშტაბით იყო ცნობილი²⁶.

კოლექტიური შრომის საკმაოდ გავრცელებულ ფორმას წარმოადგენდა მაინდი (ნამაინდი), რომლის პრინციპი იყო შრომითი დახმარების აუცილებელი ანაზღაურება.

ნამაინდს შედარებით ხელმოკლე ოჯახები მიმართავდნენ, შეძლებულები კი იწვევდნენ ნადს, ხარნადს და დაჭირავებულ შრომას მიმართავდნენ. ეს გაერთიანება არ იყო შეპირობებული ნათესაური კავშირით. თითოეულ წევრთან მუშაობდნენ დღეების თანატოლი რაოდენობით. რიგს, თუ როდის, რომელ წევრთან უნდა ემუშავნათ, წევრები აწესებდნენ იმის მიხედვით, თუ ვისთვის როდის იყო მოსახერხებელი. გარდა იმ სამუშაოებისა, სადაც მუშაობა იარაღის გარეშე ან ხელით სამუშაო იარაღით სწარმოებდა, ნამაინდს მიმართავდნენ აგრეთვე ისეთი სამუშაოების შესრულებისას, რომელშიც, გარდა ადამიანის შრომისა, გამოიყენებოდა მუშა პირუტყვი და ტრანსპორტი ან გამწვევი ძალით მომუშავე შრომის იარაღი. კვების, დასვენების, მუშაობის რეჟიმი დადგენილი და დამოკიდებული იყო სამუშაოზე, რომელიც სრულდებოდა. საკმელო მიჰქონდათ იმ ოჯახიდან, ვისთანაც მუშაობდნენ. კვება ამ დროს უმთავრესად საკლავის გარეშე იყო ხოლმე. ნამაინდში ერთიანდებოდნენ ან ქალები, ან კაცები. შერეული სანაცვლო მუშაობა არ დაგვიდასტურებია. ამ შემთხვევაში ერთიანდებოდა ერთნაირი მდგომარეობის ხალხი (ლარიბი გლეხები) და მისთვის დამახასიათებელი იყო მცირერიცხოვნობა.

ნამაინდს—განსაკუთრებით ხშირად მიმართავდნენ სოფლიდან მოშორებული მიწების დამუშავებისა და იქ მოსავლის აღების დროს.

ხშირი იყო შემთხვევები, როდესაც გურული გლეხები იჯარით იღებდნენ მიწას თავისი სოფლებიდან საკმაოდ მოშორებით მდებარე ადგილებში. მაგალითად, ახლანდელი ჩოხატაურის რაიონის მცხოვრებნი მიწას იღებდნენ ლანჩხუთის რაიონში მდებარე ე. წ.

²⁴ ლ. ბერიაშვილი, მიწათმოქმედება მესხეთში, თბ., 1973, გვ. 173.

²⁵ მ. ქანთარია, ერთობლივი შრომის ფორმები მთა ოსეთში, „მაცნე“, 1971, გვ. 58.

²⁶ „Н. Н. Зинев, დასახ. ნაშრ., გვ. 19.

ანჯელში კორძაიებისა და დიდიებისაგან. ამ მიწების დამუშავებისა და იქიდან მოსავლის აღების დროს გლეხები დროებით იქ დასახლდებოდნენ ხოლმე და უმთავრესად ნამაინდით ამუშავებდნენ მიწას და მოსავალსაც ნამაინდით იღებდნენ.

ექვივალენტური ურთიერთდახმარება დასავლეთ საქართველოში ცნობილი იყო ნადის, ნადური თოხნის, მაგიერობის (იმერეთი), ნოდის (სამეგრელო), აღმოსავლეთ საქართველოში ნაცვალგარდობის, რიგ-რიგას სახელწოდებით. მას მრავალი პარალელი მოეპოვება როგორც კავკასიის²⁷, ისე სხვა ხალხებში²⁸.

გურიაში გავრცელებული იყო შრომის ორგანიზაციის ფორმა, რომელიც ცნობილი იყო "ხარების შეუღლების" სახელწოდებით. შრომის ორგანიზაციის ამ ფორმას მიმართავდნენ ხენის დროს.

გურიაში ბუნებრივი გარემო ხელსაყრელ პირობებს ქმნიდა მიწათმოქმედებისათვის²⁹. ნიადაგის თავისებურება, იხევე როგორც საერთოდ დასავლეთ საქართველოში, არ მოითხოვდა მძიმე საბუნელს. აქ გავრცელებულ სახენელ იარაღს წარმოადგენდა ხის კავი რკინის სახნისით. ეს მარტივი იარაღი იყო. გლეხი თვითონ აკეთებდა. სახნისს მკვდელი ჰქვდა. XX ს. დასაწყისში სახნისი ოთხი აბაზიდან ერთ მანეთამდე ღირდა. კავის შექმნა ყველა გლეხს შეეძლო. გამწვევ ძალას წარმოადგენდა უღელი ხარი, მუშახელს ერთი ან ორი კაცი—მეხრე, რომელიც კავს „ეკილა“ და წინამძღოლი, რომელიც ხარს წინ მიუქოდა თუ საქონელი გაუხედნავი იყო.

ასეთ პირობებში, ბუნებრივია, ხენა-თესვას გურიაში ოჯახების უმრავლესობა დამოუკიდებლად ახერხებდა. იმ შემთხვევაში, როდესაც გლეხს მხოლოდ ცალი ხარი ჰყავდა და ამიტომ არ შეეძლო დამოუკიდებლად მიწის მოხვნა, მიმართავდა „ხარების შეუღლებას“. ორი ოჯახი, რომელსაც თითო ხარი ჰყავდა, ხარებს შეაუღლებდა. კავი და უღელი თითქმის ყველა ოჯახს ჰქონდა. ამიტომ კავსა და უღელს მიწის დამუშავების დროს ოჯახები თავთავისა ხმარობდნენ: იმ შემთხვევაში, თუ ერთ-ერთ მონაწილეს არ ჰქონდა კავი, „ამხანაგის“ კავს გამოიყენებდა საზღაურის გარეშე. კოოპერაციის წევრები თავთავისი მიწების დამუშავების დროს თვითონ „მოუკიდებოდნენ“ კავს. თუ ორი კაცი იყო საჭირო, ორივე ჯერ

²⁷ И. А. Бутинов. Дахаб. ნაშრ., გვ. 27.

²⁸ И. Н. Зибер, Дахаб. ნაშრ. გვ. 51.

²⁹ Д. П. Носович. МИЭБТКЗК, с. 735.

ერთთან მუშაობდა, მერე მეორესთან. მაშასადამე, „შეუღლების“ მთავარი პირობა იყო მხოლოდ გამწვევი ძალის ტოლი რაოდენობით მონაწილეობა. სახენელი იარაღი და მუშახელი საკუთარი მიწების ხვნის დროს თავთავისი უნდა გამოეყენებინათ. თუმცა ამ პირობის დარღვევა შეიძლებოდა. კერძოდ, იარაღი ერთისა იქნებოდა, თუ მეორე წევრს იგი არ ჰქონდა. ასევე ხვნის მთელი პერიოდის მანძილზე შეიძლებოდა ერთი წევრი „მოჰკიდებოდა“ კავს, მაგრამ ამ შემთხვევაში ზოგჯერ ხდებოდა სამაგიეროს გადახდა სხვა სახის შრომით. ამხანაგობის თითოეული წევრი ხნავდა იმდენს, რამდენიც სჭირდებოდა. თუ სახნავი ერთ-ერთ წევრს მეტი ჰქონდა, მეორეს ნაკლები, ეს სხვაობა შეიძლებოდა გაეთანაბრებინათ. ე. ი. ვისაც ნაკლები ჰქონდა დასახნავი ფართობი, იმას შეეძლო ხარები სხვა სამუშაოში გამოეყენებინა ან „ამხანაგი“ ხელის სამუშაოში მრჩმარებოდა. ზოგიერთ სოფელში იყო საამისოდ გამომუშავებული ნორმები, მაგალითად, ერთი ხარის ერთი დღით ხვნაში გამოყენება უდრიდა ერთი მუშის ერთი დღით თონაში მოხმარებას. მაგრამ ასეთი ნორმირებული გათანაბრების ეს წესი არ იყო საყოველთაოდ გავრცელებული. ზოგან საერთოდ არ იყო მიღებული „გათახაბრება“.

მაშასადამე, საქონლის თანაბარი რაოდენობით მონაწილეობის პირობებში მიწას ხნავდნენ არა მონაწილეობის პროპორციულად, ე. ი. თანაბრად, არამედ იმდენს, ვისაც რამდენი სჭირდებოდა. ერთ შემთხვევაში არა ხდებოდა ამისი გათანაბრება, მეორე შემთხვევაში ერთგვარად თანაბრდებოდა (ნაზღაურდებოდა) შრომით ან ხარების თხოვებით, მაგრამ მტკიცედ დადგენილი ნორმები არ იყო. მესამე შემთხვევაში ნორმების მიხედვით ხდებოდა გათანაბრება.

მსგავსი შრომის ორგანიზაცია იყო გავრცელებული იმერეთში, ცნობილი „შეზიარების“ სახელწოდებით, სამეგრელოში „ქალუსკვეთ“ „დიმაბუნე“, „ლოცალუა“.

ამ დროს შრომის, დასვენების და კვების რეჟიმი მტკიცედ იყო დადგენილი. ხვნის დროს ქალი შრომაში მონაწილეობას არ იღებდა. ერთადერთი საქმიანობა, რომელსაც ქალი ეწეოდა, ეს იყო მინდორში საკმლის წაღება (თუ მინდორი ახლოს იყო, სახლში მიდიოდნენ). საქმელი ამ ოჯახიდან მიჰქონდათ, ვისი მიწაც იხვნებოდა. ხვნის დროს ორჯერ ჰამდნენ (საუზმე და სადილი). ხარებს სადილობის დროს ასვენებდნენ, აკმევდნენ, წყალზეც მაშინ მიჰ-

ყავდათ. ხარებისათვის საკვებიც იმ ოჯახიდან მიჰქონდათ, ვისი მიწაც იხენებოდა.

მაშასადამე, ხენის დროს გაერცელებული იყო შრომის ორგანიზაციის შემდეგი ფორმები: ხარნადი, რომელსაც შეძლებული ოჯახი აწყობდა, ნამაინდს საშუალო ოჯახი აწყობდა, და ბოლოს, საპირო რაოდენობის გამწევ ძალას მოკლებული გლეხობა მიმართავდა— „ხარების შეუღლებას“, ვისაც ხარები საერთოდ არ ჰყავდა, ისინი ქირით ახენევენებდნენ ან „თხოულობდნენ“. ამ უკანასკნელ შემთხვევაში სამაგიეროს შრომით იხდიდნენ. ერთი დღით უღელი ხარის გაზოყენებაში სამაგიეროდ ორ დღეს უნდა დახმარებოდა თოხნაში ან სხვა სამუშაოში; თუ ხარებს პატრონი წაჰყვებოდა, მაშინ სამ დღეს უნდა მოხმარებოდა სამუშაოს პატრონს.

გურიაში დავადასტურეთ შედარებით ხანგრძლივი შრომითი გაერთიანება, როდესაც რამდენიმე ოჯახი ერთად ასრულებდა სიმინდის მოყვანასთან დაკავშირებულ ყველა სამუშაოს.

შრომითი კოოპერაციის ამ ფორმის საფუძველს წარმოადგენდა კოლექტიური მიწათსარგებლობა, რასაც იშვიათად, მაგრამ მაინც ჰქონდა ადგილი. ასეთი მიწების არსებობის ფაქტს დ. პ. ნოსოვიჩიც ადასტურებს³⁰.

მიზეზები კოლექტიური მიწათსარგებლობისა სხვადასხვა იყო. ერთ-ერთ მათგანს წარმოადგენდა განაყარ ოჯახებს შორის გაუყოფელი მიწების არსებობა.

ჩვენი საველე მასალის მიხედვით, გურიაში ოჯახის გაყოფის დროს ყველაფერი, მათ შორის მიწაც, იყოფოდა. განაყარი ოჯახები ინარჩუნებდნენ ტერიტორიულ ერთობას, მაგრამ იშვიათად ჰქონდათ რაიმე საზიარო. ან საზიარო ჰქონდათ მხოლოდ ის, რასთან დაკავშირებული შრომაც პატარა ოჯახების ძალებს აღემატებოდა. ასეთი იყო სოფლიდან მოშორებით მდებარე ზოგიერთი ნაკვეთი, რომელსაც ოჯახი გაყრისას არ ყოფდა და საერთო სარგებლობაში ტოვებდა. ამ მიწებს განაყარი ოჯახები ერთად ამუშავებდნენ, ხოლო მოსავალს იყოფდნენ. ამ შემთხვევაში შრომითი მონაწილეობა თანაბარი უნდა ყოფილიყო. თანაბარი მონაწილეობის საფუძველზე მოსავალს თანაბრად იყოფდნენ. იმ შემთხვევაში, თუ ეს ოჯახები არათანაბრად მონაწილეობდნენ შრომით თუ გამწვევი ძალით, მაშინ ეს არათანაბარი მონაწილეობა უნდა გაეთანაბრებინათ სხვა სამუშაოებში. ნორმები ამ დროს იგივე იყო, რაც ზემოთ მოყვანილ შემთხვევებში.

კოლექტიურ მიწათსარგებლობას და ამ მიწების კოლექტიურ დამუშავებას ადგილი ჰქონდა მაშინაც, როდესაც გლეხების გარკვეული ჯგუფი „ზიარად“ იღებდა მიწას იჯარით. ამას ეძახდნენ „სამოლოდ“, უფრო გვიან კი „სანადელოდ“ მიწის აღებას. ხოლო მონაწილეები იყვნენ „მოზიარეები“. იჯარით მიწის აღება გურიაში მცირემიწიანობის პირობებში გლეხობის არსებობის ერთ-ერთი საშუალება იყო. იჯარით მიწის აღების დროს პირობა ასეთი იყო: მოსავლიდან მიწის პატრონისათვის ნახევრიდან ერთ მეოთხედამდე უნდა მიეცა მიწის ხარისხის მიხედვით. როდესაც იჯარით მიწას მოშორებით იღებდნენ, ხშირად რამდენიმე ოჯახი (2—10-მდე). ერთიანდებოდა.

ეს ოჯახები აერთიანებდნენ შრომის იარაღს, გამწევე ძალას, შრომას და სიმინდის მოყვანასთან დაკავშირებულ ყველა სამუშაოს ერთად ასრულებდნენ. მონაწილეობდნენ თანაბრად, მოწეული მოსავლიდან 1/3 აძლევდნენ მიწის პატრონს, ხოლო დანარჩენს ერთმანეთს შორის თანაბრად ჰყოფდნენ. მოგვყავს მასალა: „ანჯელეკალას ტერიტორიაზე, რიონგამოღმა მეგრული სოფლებია. აქ ბაბუაჩემს და ხუთ მოსახლეს ერთად ჰქონდათ აღებული მიწები გიგო დიდიასაგან. იქ გლეხებს ერთ ადგილას დადგმული ჰქონდათ სასიმინდეები. ამ ადგილს ახლაც „ჯარნალები“ ჰქვია. მოზიარეებს დაქირავებული ჰყავდათ მცველი, რომელსაც მეველე ერქვა. სულ ორი მეველე ჰყავდათ. მათ უხდიდნენ სიმინდს, როცა რამდენიმე კაცი ერთად იღებდა მიწას სანადელოდ, ისინი ერთად აკეთებდნენ ყველა სამუშაოს და დაფშენილ სიმინდს გაყოფდნენ. აუცილებელი იყო თანაბარი სამუშაოს შესრულება. სამუშაოზე ყველას თანაბრად გამოჰყავდა მუშახელი და გამწევი ძალა. ამ დროს თვითონ ოჯახის წევრები მუშაობდნენ. მოსავალსაც თანაბრად იყოფდნენ“ (სევერო ნიკოლოზის ძე ჩხიკვიშვილი, 78 წლისა, სოფ. ზემო ფარცხმა).

XX ს. დასაწყისისათვის გურიაში საკმაოდ გავრცელებული ჩანს ქირით მუშაობა. ჩვეულებრივ, დამქირავებელი იყო შეძლებული. ადგილობრივი შრომის საფასურად ფულსაც იღებდნენ და სურსათსაც—დღეში ხუთ გირვანქა სიმინდის ან სამ-ოთხ აბაზს.

განსაკუთრებით დამახასიეთებელი იყო სოფლიდან გასვლა ქირით სეზონურ სამუშაოებზე. როგორც პ. გუგუშვილი წერს. „საშოვარზე გასვლის მთავარი მიზეზი მაინც მიწის ნაკლებობა ანუ სოფლად ზედმეტი მუშახელის გაჩენა იყო. საშოვარზე წასვლა მცირემი-

წიანი გლეხობისათვის საარსებო სახსრების მოპოვების ერთ-ერთ საშუალებას წარმოადგენდა. ფეოდალური ხანის საქართველოში საშოვარზე სიარულის შესახებ ბევრი საბუთი არსებობს³¹.

ჩვენს მიერ შეგროვილი საველე მასალის მიხედვით, გურიის სოფლებიდან ქირით მიდიოდნენ სათოხნად სამეგრელოში, ჩვეულებრივ, ჭგუფებად — რამდენიმე კაცი ერთად მიდიოდა ერთი კვირით ან ათი დღით. ჭგუფს ჰყავდა ხელმძღვანელი, რომელიც წინასწარ მოურიგდებოდა ხოლმე სამუშაოს პატრონს, მუშაობდნენ დღიურად და ნარდადაც, დღიურად მუშაობის დროს დღეში 5 გირვანქა სიმინდს ან სამ ოთხ აბაზს იღებდნენ. ფასი სხვადასხვა დროს სხვადასხვა იყო. აღნიშნული ფორმა შრომითი კოოპერაციისა დამახასიათებელი იყო კაპიტალისტური წყობისათვის.

მამასაღამე, XIX ს. ბოლოსა და XX ს. დასაწყისში გადმონაშთის სახით განაგრძობს არსებობას კოლექტიური შრომის ძველი ფორმები. ამასთანავე, მოტანილი მასალა გვიჩვენებს, რომ ახალ ვითარებაში ძველი წესები და ტრადიციები ხშირ შემთხვევაში მნიშვნელოვნად იცვლებიან.

Т. Ш. ГЕЛАДЗЕ

КОЛЛЕКТИВНЫЕ ФОРМЫ ТРУДА В ГУРИИ

Резюме

В Гурии в связи с полевыми работами составлялись временные трудовые объединения, отражающие разные стадии истории развития организации труда.

По этнографическим материалам устновлены следующие формы коллективного труда.

Безвозмездная трудовая помощь бедняку «Шемцеоба» (помощь), которую зачастую соседи оказывали по собственной инициативе.

³¹ პ. გუგუშვილი, საქართველოს და ამიერკავკასიის ეკონომიური განვითარება XIX—XX სს., ტ. II, 1956, გვ. 776; პ. ი. გ. ო. რ. ო. ყ. ვ. ა., სვანეთის საისტორიო ძეგლები, II, 1941; დოკუმენტები საქართველოს სოციალური ისტორიიდან, II, ნ. ბერძენიშვილის რედაქციით, თბ., 1953; ო. ს. ო. ს. ე. ლ. ი. ა., ნარკვევები ფეოდალური საქართველოს გლეხობის ისტორიიდან, თბ., 1967, გვ. 175.

Трудовая помощь без возмещения — нади, харнади. При данной форме коллективного труда крестьяне собирались по приглашению владельца земли. Следует отметить, что данная форма коллективного труда в новых условиях (конец XIX — начало XX вв.) значительно трансформируется.

Форма коллективного труда основанная на принципе обязательного возмещения затраченного труда — наманди. Соучастники работали друг у друга равное количество дней.

Трудовая взаимопомощь при пахании — «харербис шеглеба» (спряжение волов). В условиях примерно равного участия в трудовой кооперации пахотным орудием, тягловой силой и личным трудом, соучастники пахали земли по потребности — каждый вспахивал столько, сколько было ему необходимо.

В наши дни в Гурни отдельные семьи не занимаются полеводством и постольку вышеназванные формы трудовой кооперации функционируют в измененном виде при выполнении спешных работ (при постройке дома, при доставке строительного материала и т. д.).

მ. შაკალათია

მესაქონლეობასთან დაკავშირებული რწმენა-წარმოდგენები გურიაში

მესაქონლეობასთან დაკავშირებული რწმენა-წარმოდგენების გადმონაშთები გურიაში დასავლეთ საქართველოს სხვა დახარჩენი კუთხეების წეს-ჩვეულებათა ანალოგიურია. გურია ადრე „შეულია“ ძველ რელიგიურ წეს-ჩვეულებებს და ჩვენ დრომდე მოლწეულ რწმენათა ფრაგმენტული გადმონაშთები არ იძლევა იმის საშუალებას, რომ თემასთან დაკავშირებული ყველა საკითხი სრულყოფილად იქნეს წარმოჩენილი.

გეოგრაფიული პირობებით გამოწვეულმა მეურნეობის თავისებურებამ, ერთგვარი ასახვა ჰპოვა მეცხოველეობასთან დაკავშირებულ რწმენა-წარმოდგენებშიც, კერძოდ, ზღვის რბილმა ქაემ, არამკვეთრმა სეზონურმა ცვლილებებმა, მდიდარმა ტყემ, რაც მეცხოველეობის განვითარებლათვის არ მოითხოვდა დიდ შრომით დატანულობას, რთული სამეურნეო პირობების მქონე კუთხეებთან შედარებით, განაპირობა მესაქონლეობასთან დაკავშირებულ რიტუალთა შედარებითი სიმცირე. აღნიშნული რიტუალები, ძირითადად, წლის დასაწყისის დღესასწაულებით შემოიფარგლა—ბარბალობა, კალანდა, ბოსლობა, ილორობა, თედორობა.

ჩვენ აქ ვერ შევხვდებით პირუტყვის ბაგური კვებიდან საგაზაფხულო საძოვრებზე გადაყვანასთან ან საზაფხულო საძოვრებზე არეკვა-ჩამორეკვასთან დაკავშირებულ რიტუალებს და წეს-ჩვეულებებს, რაც ასე დამახასიათებელია საქართველოს აღმოსავლეთ, დასავლეთ და სამხრეთ მთიანეთისათვის. გურიაში მისდევდნენ როგორც მსხვილფეხა, ისე წვრილფეხა პირუტყვის მოვლა-მოშენებას. მსხვილფეხა პირუტყვს იყენებდნენ სარძევე დანიშნულებით და გამწვევ ძალად.

მსგავსად ზემო იმერეთისა, მას შემდეგ, რაც მეგრელი მეჯოგეები გურიაში გამოჩნდნენ, აქა-იქ მეჯოგეობამ იწყო განვითარება.

ეთნოგრაფიული მონაცემებით მეჯოგეთა რიცხვი ორმოცდაათამდე აღწევდა. ჩვენს მიერ მოპოვებული მასალის მიხედვით, საბჭოთა ხელისუფლების დამყარების შემდეგ დასავლეთ საქართველოში, კერძოდ, ზუგდიდსა და ცხაკიაში (სენაკი) ჩამოყალიბებულა მეჯოგეთა კავშირი, რომლის მიზანს საქოვრებით სარგებლობის მოწესრიგება, მეჯოგეთა პროდუქტების რეალიზაციის ორგანიზება და მეჯოგეობასთან დაკავშირებული სხვა საკითხების მოგვარება შეადგენდა.

მეჯოგეთა კავშირი შემდგომში ორად გაიყო და ორმოცდაათამდე მეჯოგე ზუგდიდის კავშირს მიეკედლა, მიუხედავად იმისა, რომ მათთან ტერიტორიულად ცხაკია უფრო ახლოს იყო. ზუგდიდის მეჯოგეთა კავშირს განაგებდა ვინმე გვაჯავა, ცხაკიასას კი — ხოფერია. მეჯოგეთა ზუგდიდის კავშირმა საყასბო და ყველის სარეალიზაციო პუნქტი გახსნა ბახმაროში, მახარაძეში, ბათუმში (სერგო ივლიანეს ძე რამიშვილი, 70 წლისა, ს. ვანი. ჩოხატაურის რ-ნი). მთხრობელთა გადმოცემით, ბევრი გურული არც კი კადრულობდა ჯოგის დევნას. ამის შესახებ თ. სახოკია შემდეგს წერს: ოზურგეთის ბაზარზე მას შეხვედრია ჯვარელი მეჯოგე, ვინმე კვარაცხელია, რომელიც ყველს ყიდდა. შეკითხვაზე — თუ რას აკეთებს იგი აქ?, კვარაცხელია პასუხობს — „ბატონო ჯოგი გვყავს გურიაში, ჩვენით უდგათ სული გურულებს — ჩვენ, რომ არ მოვდიოდეთ სამეგრელოდან, მთელი გურია უყველოდ დარჩებოდა: ჩვენს მეტს არავის ჰყავს საქონელი. მთებში ზაფხულობით სულ ჩვენი, მეგრელების საქონელი ბალახობს. აქაურ კაცს სირცხვილად მიაჩნია მწყემსობა; თუ ჯოგს გაჰყავა, მისი აზრით, თავი მოეკრება. იმას რჩეობენ ყველი იყიდონ ჩვენგან, ვინემ თვითონ გაიჩინონ საქონელი, თაკილობენ. მეჯოგე როგორ უნდა გავხდე ერთი სულუგუნიაო?!“¹

რა თქმა უნდა, ის აზრი, რომ გურიაში მეგრულ მეჯოგეთა გარდა, არავის არ ჰყავდა საქონელი, სინამდვილეს არ შეეფერება. გურიაში განვითარებული იყო ძირითადად ე. წ. ბარული მესაქონლეობა; აქ ადგილი ჰქონდა საზაფხულო საქოვრების გამოყენებასაც, მაგრამ მეჯოგეობა გურიაში თავისით მაინც არ განვითარებულა.

ახლა გადავიდეთ უშუალოდ მესაქონლეობასთან დაკავშირებული რწმენა-წარმოდგენების განხილვაზე.

¹ თ. სახოკია, მოგზაურობანი, გურია, აჭარა, სამურზაყანო, აფხაზეთი, თბ., 1950, გვ. 23.

ბ ა რ ბ ა ლ ო ბ ა. საერთოდ როგორც ცნობილია, „ბარბალო-ბის“ დღე იმერეთში, გურიაში, რაქა-ლეჩხუმში და ქართლში შინაური ფრინველების გამრავლებისათვის მიძღვნილი დღეობა იყო, რომ ბარბალობა დღეს ირჩევდნენ საახალწლო მეკვლეს (ქართლი, სვანეთი, სამეგრელო, იმერეთი, გურია) და რომ ბარბალობას იმერეთში ფეხადობა და ქათმის ლოცვა ეწოდება. გურიაში—ფეხადობა და ქათმის ფერხვა². როგორც ვ. ბარდაველიძე წერს: „ქართველთა ბარბალობის მეკვლეობის ძირითად დანიშნულებას, საზოგადოდ ნაყოფიერების და გამრავლების მინიჭება წარმოადგენს. მაგრამ ამასთან სხვადასხვა კუთხის ბარბალობის მეკვლეობას გარკვეული კონკრეტული მიზანდასახულობაც ახასიათებს, რის გამოც მეკვლეობაში მოცემული მოქმედებაც სხვადასხვაგვარია. სვახური ბარბალობის მეკვლეობა მსხვილფეხა საქონლის და ადამიანის გამრავლებას უაკავშირდება, ლეჩხუმური ბარბალობის რიტუალი (მეკვლეობითურთ) აგრარულ კულტსა სახავეს, ხოლო დანარჩენი კუთხეების აღწერილი ბარბალობის მეკვლეობა უმთავრესად შინაური ფრინველების გამრავლებას ემსახურება“³. გურული მონაცემები წარმოაჩენს იმ ფაქტს, რომ ბარბალობა, ქათმის ფერხვის გარდა, საქონლის ფერხვის დღეც იყო. თუ რატომ უნდა ყოფილიყო ახალი წლის მსგავსად ბარბალობა ბედობის დღედ მიჩნეული, ეს საკითხი ვ. ბარდაველიძეს შესანიშნავად აქვს ნაჩვენები სხვა კუთხეების მათგალითზე და გურული მონაცემები მას კიდევ ერთხელ დაადასტურებს. აქვე უნდა აღინიშნოს, რომ ქათმის ფეხადობა ანუ ფერხვა გურიაში, ბარბალობის გარდა, კალანდის მეორე დღეს, 2 იანვარსაც იცოდნენ და 2 იანვარი მხოლოდ და მხოლოდ ქათმების ფერხვისათვის იყო განკუთვნილი⁴.

ჩვენს მიერ მოპოვებული დამატებით შეგროვილი მასალით ბარბალობა დღე გურიაში მარტო ქათმების ფერხვის დღე. კი არ იყო, არამედ საქონლისა და ზოგ შემთხვევაში ადამიანისაც კი.

მოვიტანთ მასალას: „ბარბალობა არის კაცის, საქონლის და ქათმის ფეხადობა, ის ყველაფრის ფერხვა არის. წ ლ ი ს ფ ე რ ხ ვ ა ა რ ი ს. მერე კალანდას ვიცით ფერხვა (ს. საქორია, ნაბელლაევი, ბასილეთი); „ბარბალობას ქათმის ფერხვა იცოდნენ, საქონლის ფერ-

² ვ. ბ ა რ დ ა ვ ე ლ ი ძ ე, ქართველთა უძველესი სარწმუნოების ისტორი-
ლია (ღვთაება ბარბარ—ბაბარ) თბ., 1941, გვ. 34—35.

³ ვ. ბ ა რ დ ა ვ ე ლ ი ძ ე, დასახ. ნაშრ., გვ. 40.

⁴ Т. М а м а л а д з е. народные обычаи и поверья гурийцев, СМОИИПК.
Тифлис, 1893, с. 34.

ხვასაც უძახდენ, უფრო საქონლისა იყო. თუ საქონელი ეზარალე-
ბოდათ, იტყოდენ — ბარბალობას კაი მფერხავი არ ყოფილაო. მო-
სულ მფერხავს შეასმევდნენ ღვინოს, არაყს და მისცემდნენ სი-
მინდს. მფერხავი შემოივლიდა ნალიას და სახლს, დახედავდა სა-
ქონელს, ყველაფერს დახედავდა და თან სიმინდს ფანტავდა და
ამბობდა -- იმრავლე პატრონიანათო. ის მფერხავი კალანდის მეორე
დღესაც, ქათმის ფერხვა დღესაც მოვიდოდა (ს. ხიდისთავი), „ბარ-
ბალობას მფერხავი ჩხოს (გაუცეხავი ღამის თავთავი) ჩამოყრიდა,
ის მფერხავი 2 იანვარსაც მოვიდოდა და ჩხოჩაყრილ კვანძს
ფეხს ჩაართყამდა და დაფანტავდა, ვითომ ბევრი წიწილები გამო-
ჩიქებინანო (ს. ერკეთი)“. „ბარბალობა არის ოთხფეხის ფეხადობა,
ადამიანისა არ არის, ადამიანის ფეხადობა კალანდაა, მის მეორე
დღეს ქათმის ფერხვაა (ს. ტობაჩხო)“.

მიუხედავად იმისა, რომ ახალი წლის დღესასწაული ბარ-
ბალობიდან პირველ იანვარს იქნა გადატანილი, გურიაშიც
მსგავსად სხვა კუთხეებისა ბარბალობა დღეს ქათმის ფერხვასთან
ურთად საქონლის ფერხვაც სკოდნიათ და, როგორც გაირკვა, ბარ-
ბალობა დღე გურულებისათვისაც ყველაფრის ანუ წლის ფერხვაც
ყოფილა.

ამრიგად, გურული მონაცემები ერთხელ კიდევ ადასტურებს
ვ. ბარდაველიძის მიერ დადგენილ იმ ფაქტს, რომ ბარბალობა უნ-
და ყოფილიყო ძველი ქართული ახალწელიწადი. მკვლევარი წერს:
„თითქმის ყველგან ქართულ მოსახლეობაში, რომელთა შო-
რის ამ დღეობის არსებობის შესახებ ცნობები მოიპოვება, ბარბა-
ლობა ახალწელიწადის მსგავსად ბედობა დღედ იყო მიჩნეული და
ფართოდ იყო გავრცელებული. ახალწელიწადის მსგავსად სრულ-
დებოდა ბარბალობას მეკვლეობის წეს-ჩვეულება. მას სვანები
დღეობების თავს (ღვწარი თხუმ-ს), რაჭველები და ლეჩხუმელები
ღიახალწლების თავს, გურულები ახალი წლის თავს უწოდებდნენ.
ამგვარად, ყველა ეს ფაქტი, მოცემული ერთად, დღეობა ბარბა-
ლობას ასახავს, როგორც კალენდარული წლის დასაწყისის უძველეს
დღეობას. და, რომ ბარბალობა ზამთრის ნაბუნობის დღეობა იყო;
მთლიანი წლის დასაწყისის დღეობა⁵. მიუხედავად იმისა, რომ
ბარბალობა ძველი ახალი წლის დასაწყისის დღეობა უნდა ყოფი-
ლიყო, ჩვენამდე მოღწეული მონაცემებით საქონლის ფერხვის მი-

⁵ ვ. ბ ა რ დ ა ვ ე ლ ი ძ ე, ქართველთა უძველესი სარწმუნოების ისტო-
რიიდან, (ღვთაება ბარბარ—ბაბარ), თბ., 1941, გვ. 91—93.

ლოცვა მხოლოდ ერთი ფრაზით ამოიწურება—“ კარგად იყავით თქვენი პატრონიანა“, მაშინ, როცა ბედობის დღისათვის დამახასიათებელი მუსაქონლეობასთან დაკავშირებული ძირითადი წეს-ჩვეულებები სრულდება ახალ წელსა (კალანდას) და ბოსლობა-ილორობა დღეს. ამ ფაქტს უთუოდ თავისი ახსნა მოეპოვება.

საქონლის ფერხება, როგორც უკვე ითქვა, კალანდა დღესაც იცოდნენ. ჩვენ აქ არ მოვიტანთ საახალწლო რიტუალის მთლიან აღწერილობას, მხოლოდ შევჩერდებით იმ მომენტებზე, სადაც მუსაქონლეობასთან დაკავშირებული წეს-ჩვეულებები აიხასა.

როგორც მამალაძე წერს, კალანდა დილას სახლში შემოსვლის წინ, ოჯახის უფროსი მამაკაცი ჩიჩილაკით ხელში დაიძახებს:—
ვაგვიღეთ კარი! დიასახლისის შეკითხვაზე—რა მოგაქვს? კაცი პასუხობს — წმ. ბასილე მობრძანდება, მოაქვს კაცთა მშვიდობა, თეთრი და საქონელი მრავალი. ამას გაიმეორებენ სამჯერ. შემდეგ შედიან სახლში, სადაც შეაქვთ ღორის თავი, დოქით ღვინო, ჩიჩილაკი, ღომის მარცვლით სავსე ქოთანნი, შიგ ჩადებული კვერცხით (აქვე უნდა აღინიშნოს, რომ ღომის მარცვლით სავსე ქოთანნი, შუაში ნახევრად ჩაფლული კვერცხით, ფერხვის დროს გურულ მეფერხეს ბარბალობა დღეს და კალანდა მეორე დღესაც დაქონდა). ღორის თავს გობზე დებენ. ეს მომენტი ყველაზე საზეიმოა მთელი დღესასწაულის მანძილზე: ყველა მამაკაცი, ბავშვებიც კი უკან მიჰყვებიან ოჯახის უფროსს, რომელსაც ხელში უჭირავს ჩიჩილაკი. პროცესია სამჯერ შემოუვლის სახლს. ვისაც ღომის მარცვლიანი ქილა უჭირავს, მსვლელობის დროს მარცვალს აბნევს ძირს, რითაც გამოიხატება ყველაფრის გამრავლების სურვილი. შესამედ შემოვლის შემდეგ ჩიჩილაკს გამოსაჩენ ადგილზე კიდებენ. მამაკაცები იწყებენ ლოცვას. ოჯახის უფროსი მამაკაცი სთხოვს წმ. ბასილე მღვდელმთავარს, რომ დამდგარი ახალი წელი, მისთვისა და მისი ოჯახისათვის ბედნიერი იყოს, რომ მან ყველას მოუტანოს ჯანმრთელობა, კეთილდღეობა, ყველა საქმეში წარმატება და სიმდიდრე. მამაკაცი ლოცვის დროს ღვინოს ასხამს მიწაზე და საქმეველს აკმევს (ნალვერდლებზე ყრის), თან ატრიალებს საფერხავ გობს და ღომიან ქოთანს მარჯვნიდან მარცხნივ. ასევე დაილოცებიან დანარჩენი მამაკაცები და ბავშვებიც კი. ამ რიტუალს მოსდევს თოფების სროლა, რის შემდეგაც იწყება ცეცხლისათვის საახალწლო მილოცვა. ამისათვის ოჯახის თითოეული წევრი იღებს ცხემლის ნედლ ხეს და ცეცხლს უკეთებს; თან წარმოსთქვამს—“ცე-

ცხოვრობდა კალანდა მშვიდობით გაგიტენოს შენი ბატონიანა“. როცა ცხემლის ხეები ისე დაიწვიეს რომ მუგუზლად გადაიქცევა, მაშინ იწყება შინაური ცხოველებისა და ფრინველების მილოცვა. ის, ვინც ფეხბედნიერად ითვლება, მიდის თავლაში, ბოსელში და საქათმეში, თან მიაქვს მუგუზალი და დებს სადგომის კართან ისე, რომ გამოსულმა პირუტყვემა ფეხი გადააბიჯოს, თან წარმოსთქვამს ლოცვას — „ცხენო, იროხავ და ა. შ. ღმერთმა მრავალი კალანდა შვიდობით გაგიტენოს შენი პატრონიანათ“. ამით მთავრდება ახალი წლის შეხვედრა, რასაც გურიაში „გალოცვა“ ეწოდება⁶.

„გალოცვის“ დილის ცეცხლთან დაკავშირებული რიტუალი შედარებით განსხვავებულად არის აღწერილი მ. თავდუშაძის მიერ⁷.

„კალანდა დილით, გალოცვის დაწყების წინ ოჯახის უფროსი მამაკაცი გადიოდა გარეთ და თან გაქონდა საფერხავი გობი (რომელზედაც იღო დედო პური, ყველიანი ჩაქაპური. ღორის თავი და საჯიქიო — ზურგიელი ანუ კეფა, პატარა თიხის ქოთნით ღომის გაცეხვილი მარცვალი, შიგ ჩადებული კვერცხით, მოხარშული ქათამი, ოქრო-ვერცხლი, აბრეშუმის შულო, ზვარაკი და ტკბილეული, ზედ მიკრული სანთლით), ჩიჩილაკი და ღვინის ჭურჭელი; იგი მარანზე გავიდოდა. ახდიდა ჭურს და ლოცულობდა — მრავალახალწელს დაესწარი პატრონიანა, კარგად გყოლოდეს და იღებდა ღვინოს. პირველად გაავსებდა დოქს და დადგამდა საფერხავ გობთან, შემდეგ ამოიღებდა ახალწელს დასალევ ღვინოს დიდ ჭურჭელში, დაიხოქებდა და ღმერთს შესთხოვდა: — „ღმერთო შოგვეცი კაცთა მშვიდობა, ჯამრთელობა, მხიარულება, კარგად ყოფნა, ოქრო და ვერცხლი უთვალავი, რქოსანი საქონელი და ღორი ჯოგათ, ქათამი, ბატი გროთ, მარანი ღვინით სამსე, ბელელი ღომით და პურით სამსე, ნაჭუჭი გულით სამსე“. შემოაბრუნებდა საფერხავ გობს წალმა სამჯერ და სახლისკენ წავიდოდა. კართან მისული დაუძახებდა დაისახლისს: „კარი გამიღე!—დაისახლისი უპასუხებდა — რა მოგვაქვს?“

— კაცთა მშვიდობა, ჯამრთელობა, მხიარულება, კარგად ყოფ-

⁶ Т. М а м а л а д з е. Народные обычаи и поверья гурийцев. СМОМИПК. вып. XVII, Тифлис, 1893, с. 27—30.

⁷ მ. თავდუშაძე, „ბედობა ანუ საახალწლო დღესასწაული გურიაში“, ხელნაწერი, მახარაძის მხარეთმცოდნეობის მუზეუმის არქივი, № 1, საქმე 72.

ნა, ოქრო-ვერცხლი უთვალავი, რქოსანი საქონელი, ღორი ჯოგათ. ქათამი, ბატი გროთ, სიმსუყე, უხვი მოსაველი, მარანი ღვინოთ სამსე, ბელელი ღომითა და პურიოთ სამსე, ტყავი ხორკით სამსე, ძვალის ტვინით სამსე, ღონჭოპო (ნაჭუქი) გულით სამსე, კარი გამილე!“ ეს კითხვა-პასუხი სამჯერ უნდა განმეორებულყო. შესდგამდა თუ არა სახლში ფეხს, მიულოცავდა სახლს, შემდეგ დადგამდა გობს და ჩიჩილაკს შუა ადგილზე: ოჯახის უფროსი გავილოდა გარეთ და შემოიტანდა ცხემლის შეშას, მიულოცავდა ცეცხლს—ცეცხლო, მრავალ ახალწელს დევსწარ, შენი პატრონი კარგად გყოლოდეს და გადაიხარხარებდა. ასევე იქცეოდნენ ოჯახის სხვა დანარჩენი წევრებიც. შემდეგ ყველანი გობთან დაიჩოქებდნენ და ოჯახის უფროსი მამაკაცი შესთხოვდა ღმერთს — ღმერთო მოგვეცი კაცთა მშვიდობა და ჯამრთელობა და კვლავ მეორედობოდა ზემოთ მოტანილი ლოცვა — რქოსანი საქონელი და ღორი ჯოგათ.... თან საფერხავ გობს და ჩიჩილაკს ატრიალებდნენ, რის შემდეგაც სუფრაზე დაიდებოდა ყველა ნივთი და სათითაოდ შეახებდნენ ყველანი ხელს; მერე ერთმანეთს მიულოცავდნენ ახალწელს და ტკბილს ჩაუდებდნენ პირში. გარეთ გავილოდნენ და თოფს გაიტანდნენ, ოჯახის უფროსი ცეცხლს შეუჩუჩხუნებდა მუგუზლით ისე, რომ ნაპერწკლები ავარდნილიყო და თან ლოცულობდა—„ღმერთო მომეცი ამდენი ძროხა, ამდენი ხარი, ამდენი ღორი, ამდენი ქათამი, ამდენი ბატი, ამდენი იხვი, კაცთა მშვიდობა და კარგად ყოფნა“.

ამრიგად, სასახალწლო რიტუალში ცეცხლის ლოცვა გურიაში ისეთივე სახით დასტურდება, როგორც ამას ადგილი ჰქონდა საქართველოს სხვა კუთხეებში (ხევსურეთი, ფშავი, მთიულეთი, გუდაუყარი, ქართლი, სამცხე-ჯავახეთი, იმერეთი და სხვა). ზოგ კუთხეებში ცეცხლის შეჩუჩხუნების წინ ცეცხლში ერბოს ასხამდნენ და ავარდნილ ალს||„ალავს“ (მესხეთი) შესთხოვდნენ საქონლის გამრავლებას. რამდენი ნაწყიელი (იმერეთი), სკივი (ხევსურეთი), -ლავი (მესხეთი). ავარდებოდა, იმდენი ძროხის, ხარის ცხენის, ცხვრის (იმისდა მიხედვით, რომელ კუთხეში რა სახის შინაური პირუტყვი ჰყავდათ) გამრავლებას შესთხოვდნენ ცეცხლიან ალს. ამრიგად, თითქმის მთელ საქართველოში გავრცელებული წეს-ჩვეულება, ახალწელს ცეცხლის მილოცვისა და ცეცხლისათვის შინაური პირუტყვის და ფრინველის გამრავლების გამოთხოვა, უთუოდ ცეცხლის ღვთაების დიდ კულტზე უნდა მიუთითებდეს. ჩვენ თავის

დროზე აღნიშნული გვექონდა, რომ ცეცხლის ალი მამაკაცური ბუნებისა ჩანს („წითელი ხარის ნაწოლზე ბალახი აღარ ამოვა“)⁸.

როგორც ცნობილია, ახალი წლის დღესასწაული ბუნების ძალების აღორძინების წინ სრულდებოდა და ამ ძალების აღორძინების იდეას უკავშირდებოდა. ადამიანები ცდილობდნენ მთელი წლის სიკეთე წინასწარ დაებევეებინათ და უზრუნველყოთ⁹. ამ თვალსაზრისით, არც გურიის ახალი წლის რიტუალი წარმოადგენდა გამონაკლისს.

როგორც უკვე ითქვა კალანდის მეორე დღე ითვლებოდა ქათმის ფერხვის დღედ. როგორც მამალაძე წერს, 2 იანვარი არახაკლები დღესასწაულია, ვიდრე პირველი იანვარი. ამ დღეზეა დამოკიდებული არა მარტო ფრინველის, არამედ მთელი ოჯახის ბედნიერებაც.

ჩვენ არ შეგვიძლია არ შევჩერდეთ ქათმის ფერხვად წოდებულ დღეზე, რადგან ეს საკითხი დანარჩენ რიტუალებთან ერთად წარმოაჩენს გურიის მეურნეობის სპეციფიკას. აღნიშნული სპეციფიკა, მთის რაიონებისაგან განსხვავებით, დამახასიათებელია ბარის რაიონებისათვის, სადაც კარგად ჩანს, ის ფაქტი, რომ აღამიანას მიერ მეცხოველეობის დარგებისადმი წაყენებული მოთხოვნების მთელი სიმძიმე მხოლოდ მსხვილფეხა მესაქონლეობას კი არ აწვებოდა, არამედ ნაწილდებოდა სხვა დარგებზედაც—მელორობა (ხორცი), მეფრინველეობა (ხორცი, კვერცხი), მეთხეობა (რძე, ტყავი, ხორცი). როგორც ვიცით, 2 იანვარს ქათმის ფერხვას ბარბალობას არჩეული მფერხავი ასრულებდა. როგორც მამალაძე წერს, მფერხავს, გარდა თავისი შინაგანი თვისებებისა (კეთილმოზურნეობა, სიკეთე), უნდა გააჩნდეს შემდეგი ფიზიკური ნიშნები: 1) არ უნდა ჰქონდეს ფიზიკური ნაკლი, 2) არ უნდა იყოს დაბალი, 3) მისი ტანსაცმელი არ უნდა იყოს არც ძალიან გრძელი და არც ძალიან მოკლე (თუ გრძელი ჩოხა აცვიათ, კალთებს აიკეცავენ და სარტყელში ჩაიტანებენ); 4) სახლში შესვლისთანავე უნდა მოიხადონ ქუდი, 5) ნაბადი უნდა დატოვონ ქიშკართან ან სახლის წინ. თუ მფერხავს ფიზიკური ნაკლი აქვს, ეს იმას ნიშნავს, რომ წიწილებიც ნაკლულნი იქნებიან: თუ მფერხავი პატარა ტანისაა, ქათ-

⁸ მ ა კ ა ლ ა თ ი ა, მესაქონლეობასთან დაკავშირებული რწმენა-წარმოდგენები სამეგრელოში, კრებ., „სამეგრელო“, 1979, გვ. 83.

⁹ ვ. ბ ა რ დ ა ვ ე ლ ი ძ ე, ქართული (სვანური) საწესო გრაფიკული ხელოვნების ნიმუშები, თბ., 1953, გვ. 61—62.

მებიც პატარა გამოვა, თუ მფერხავი მოკლე ტანსაცმლით არის, მაშინ ქათმები შიშველნი იქნებიან, ხოლო თუ გრძელი ტანსაცმლით მოვა, ქათმებს ფრთები დაშვებული ექნებათ და „მოფუზულნი“ იქნებიან. მფერხავი 8—9 საათზე მოდის და, გადმოდგამს თუ არა ფეხს, იტყვის—აქა მშვიდობა, რომ მისი ფეხი ამ სახლში ბედნიერი იყოს. მფერხავს აძლევენ ღომით სავსე ქოთანს, რომელშიც კაკლები აწყვიან; ცდილობენ, რომ კაკლები სალი იყოს. მფერხავი წინ მიდის და კრუნს განასახიერებს, ხოლო მას უკან წიწილებივით შიშველებიან ბავშვები (ბავშვებიც სწრაფად უნდა მოძრაობდნენ, თორემ წიწილებიც მობუზული იქნებიან). პროკესია საქათმეში შედის და სამჯერ შემოუვლის მარჯვენადან მარცხნივ, შემდეგ ქოთანს მიწაზე დაახეთქებს და იფანტება მარცვლი ნამტვრევებთან ერთად. ღომის მარცვლებს ქათმები ჭამენ. თუ კაკლები აღმოჩნდება სალი, მაშინ კვერცხებიც სალი იქნება.

ამის შემდეგ მფერხავთან ერთად სადილობენ, რომლის თავისებურებას შეადგენს ის, რომ მამაკაცებისა და გაუთხოვარი ქალებისათვის დამზადებული წვენი განსხვავდება გათხოვილი ქალებისათვის შემზადებული წვენისაგან. გათხოვილი ქალებისათვის წვენი შემდეგნაირად მზადდება: მას აკეთებენ საკალანდოდ დაკლული ნასუქი ქათმების ნაწლავებისაგან, რომელსაც საკაკავი ეწოდება, რის ჭამაც ეკრძალებათ მამაკაცებსა და გაუთხოვარ ქალებს. საკაკავისათვის ცხვება აგრეთვე განსაკუთრებული ძაჭაპური, რომელშიც დებენ მოუხარშავ კვერცხს და ღორის უკანა ბარკალს, რომელიც ყოველთვის მოკაკულია. მფერხავი თუ დარჩა სადილად, მას ასაჩუქრებენ წინდებით ან ხელთათმანებით, აგრეთვე ქისით თამბაქოსათვის.

ამ დღეს აკრძალულია: 1) ხმაური, რადგან თუ ხმაურია, ქათმებიც მთელი წლის განმავლობაში იკაკანებენ; 2) თავის მოქექვა; რადგან ქათმები ისლით გადახურულ ნაგებობის სახურავს გადაქექავენ; ამ დღეს ზოგან არ ჭამენ ღორის ხორცს, რადგან, თუ ღორის ხორცი შექამეს, მთელი წლის განმავლობაში ღორები ქათმებს და წიწილებს დაუწყებენ ჭამას¹⁰.

მ. თავდუმადის აღწერილობით: 2 იანვარს სანამ ქათმები ხიდან ჩამოიკრიფებოდნენ, დიასახლისი ან მამაკაცი წავილოდა სამ-

¹⁰ Т. М а м а л а д з е. Народные обычаи и поверья гуринцев, СМОИПК вып. XVII, Тифлис, 1893, с. 36—30.

ზარეულო სახლში, გააჩაღებდა ცეცხლს, აანთებდა სანთელს, აიღებდა კოთხოს (ხის ჭურჭელი), რომელშიც ჩაყრილი იყო ჩიჩილაკიდან ჩამოღებული კურკანტელი და სუროს მარცვალი, ჩხო (გაუცეხავი ღომი), მოაბნევდა სახლში და იტყოდა. „აკეთე ჭერ ორფეხი, მერე ოთხფეხი და მესამე ფრინველები იმდენი, რამდენიც ტყეში სურო და კურკანტელია, ეწერში გიმარაა, ზღვაში ქვიშაა, ცაზე ვარსკვლავები“ ასეთი სიტყვებით და მარცვლის ბნევით სამჭერ შემოუვლიდა კერას. კოთხოში ცოტა მარცვალს დატოვებდა, ვინიცობაა ვინმე შემოსულიყო და მასაც უნდა დაებნია მარცვალი ამავე სიტყვებით. შემდეგ შესჭამდა ქათმის ფერხვისათვის საგანგებოდ გამომცხვარ ყველიან პურს, შესვამდა ღვინოს, ფეხის ჩარტყმით გატეხავდა მწარე ხაპს და თესლს დააჩხრიალბდა, რაც გამოხატავდა წიწილების გამოჩეკის პროცესს¹¹.

ჩევნი მასალებით, როცა ორ იანვარს მფერხავი კვლავ გაიმეორებდა ჩხოჩაყრილი ხაპისათვის ფეხის ჩარტყმას და ჩხოს დაფანტვის რიტუალს, და ამასთანავე ღომის მარცვლებს მიმოაბნევდა, იგი წარმოსთქვამდა — „ასი დედალი, ასი მამალი, ასი მისი შოჩხოროკი“. ამ სიტყვებს სამჭერ გაიმეორებდა. ზოგან მოჩხოროკის ნაცვლად ბოჩხოროკს ამბობდნენ (ს. საჭამიასერი). ტერმინი შოჩხოროკი წიწილებს უნდა აღნიშნავდეს და შესაძლოა მეგრული ტერმინისაგან — „ოჩხოტია“, მომდინარეობდეს (ოჩხოტია—დასაკვლავად წამოზრდილი წიწილა).

ანალოგიური რიტუალი იმერეთშიც სრულდებოდა — ბარბალობა დღეს ჩხოიანი კვახის გატეხვა აქაც სცოდნიათ. როგორც ბარდაველიძე წერს, იმერეთში აღნიშნულ რიტუალს ახალი წლის მეორე დღესაც იმეორებდნენ¹².

ჩვენ აქ განგებ ვრცლად მოვიტანეთ ქათმის ფერხვის რიტუალი, რათა გვეჩვენებინა ის გარემოება, თუ თავის მაგიურ ქმედებათა მრავალფეროვნებით ქათმის ფერხვა როგორ აღემატება ყველა სხვა სახის პირუტყვის ფერხვას, რაც კიდევ ერთხელ მიუთითებს მეფრინველეობის დიდ როლზე გურულთა სამეურნეო ყოფაში.

2 იანვარს ქათმის ფერხვის რიტუალში არ ფიგურირებს ღვთაება ბარბალე, რომელიც, როგორც ვ. ბარდაველიძე ი. მეგრელი-

¹¹ მ. თ ა ე დ უ მ ა ძ ე, დასახელებული ხელნაწერი.

¹² ვ. ბ ა რ დ ა ვ ე ლ ი ძ ე, ქართველთა უძველესი სარწმუნოების ისტორიიდან (ღვთაება ბარბარ-ბაბარ) თბ., 1941, გვ. 36.

ძის მასალაზე დაყრდნობით წერს — გურულებს შინაური ფრინველის გამამრავლებელ უზენაეს არსებად ჰყოლიათ წარმოდგენილი. თუ გავითვალისწინებთ, რომ 2 იანვარი ახალი წლის დღესასწაულზე ნაკლებად არ ითვლება, მითუმეტეს, ფრინველების გამამრავლებელი უზენაესი ღვთაება ბარბაღე რაიმე ფორმით ამ დღესაც უნდა ეხსენებინათ; მაგრამ ამაზე პაპუხის გაცემა ამჯერად ჯირს.

დღესასწაულ ბოსლობის არსი, ღვთაება ბოსლეს ბუნება და ფუნქცია შესწავლილია ვ. ბარდაველიძის მიერ¹³, ხოლო რაჭულ ბოსლობას სპეციალური გამოკვლევა მიუძღვნა კ. სოხაძემ¹⁴. ბოსლობის სახელწოდებით არსებული დღესასწაული თითქმის მთელ დასავლეთ საქართველოში იყო გავრცელებული, „ილორობა“ კი მხოლოდ გურიაში გვხვდება, და ისიც მხოლოდ ლანჩხუთსა და მახარაძის რაიონებში შემავალ სოფლებში. გურული ბოსლობის ყველაზე ადრეული აღწერილობა მოცემულია ტ. მამალაძის შიერ¹⁵. ბოსლობის აღწერილობა დაცულია აგრეთვე ა. წულაძის ნაშრომსა¹⁶ და მ. თავდუშაძის ხელნაწერში¹⁷, რომელთაც აღწერილი აქვთ აგრეთვე ილორობის დღესასწაული. აღნიშნულ დღესასწაულთა შესახებ გურიაში დღემდე კიდევ იძებნება ეთნოგრაფიული მასალები.

მოგვიანო ხანის სპეციალურ ლიტერატურაში რატომღაც გვერდი აქვს ავლილი გურულ ბოსლობასა და ილორობას.

ტ. მამალაძის აღწერილობით, ბოსლობას ყოველთვის ყველიერის წინა კვირის შაბათ დღეს დღესასწაულობდნენ. ამ დღეს მუშაობა არ იკრძალება. ბოსლობა ეძღვნება შინაურ ცხოველებს და მის თავისებურებას წარმოადგენს დიდი ზომის ხაჭაპური, რომელსაც გულში უკეთდება საახალწლოდ დაკლული ღორის დამარილებული ქონი. მას სალამოზე აცხობენ და ვახშმად მიირთმევენ. ხაჭაპურის გამოცხობის შემდეგ ასრულებენ რიტუალს,

¹³ ვ. ბ ა რ დ ა ვ ე ლ ი ძ ე, ქართული (სვანური) საწესო გრაფიკული ხელოვნების ნიმუშები, თბ., 1953 წ.

¹⁴ კ. ს ო ხ ა ძ ე, ქართველი ხალხის სამეურნეო ყოფის ისტორიიდან (რაჭული ბოსლობა), ხელნაწერი, 1955.

¹⁵ Т. М а м а л а д з е. Народные обычаи и поверья гурнийцев, СМОИИПК 1893, с. 48.

¹⁶ ა. წ უ ლ ა ძ ე, ეთნოგრაფიული გურია, 1971, გვ. 114.

¹⁷ მ. თ ა ვ დ უ შ ა ძ ე, დასახ. ხელნაწერი.

რომლის დროსაც ზოიხსენიება ბოსლე პატროსანი, შინაურ ცხოველთა მფარველი; რიტუალი მდგომარეობს შემდეგში: ხაჰაპურს გობზე დებენ. რომელზედაც აწყვია კაკლები და მიკრულია სანთელი. გობი ქალს, ოჯახის დიასახლისს უჭირავს. მას თან მიჰყავს ბიჭი. რომელსაც მიაქვს წყლით სავსე დოქი და ანთებული სანთელი. ასე მიდიან ბოსელში. ბიჭი დგება ძროხებსა და ხარებს შორის, ქალი კი მიღს საპირისპიროდ, ბაგის აქეთ.

- ქალი ეკითხება — ბოსლე შინა ხარ?
— შინა ვარ ბატონო!
— ძროსას მომცემ?
— ბევრს ბატონო!
— ხარს მომცემ?
— ბევრს ბატონო!
— ცხენს მომცემ?
— ბევრს ბატონო!
— კაცთა მშვიდობას მომცემ?
— ფრინველს მომცემ?

ეს დიალოგი სამჯერ მეორდება, რის შემდეგაც კაკლებს ბაგაში ჩაყრიან. ხოლო ქალი და ბიჭი უკან ბრუნდებიან. წყლით სავსე დოქი ნიშნავს იმას, რომ ძროხები ბევრს მოიწველიან. კაკლებით საქონლის გამრავლების სურვილია გამოხატული. ქონიანი ხაჰაპური კი, საქონლის სიმსუქნის საწინდარია.

ამის შემდეგ ყველანი ვახშობენ და პირველი ჭიქით თითოეული მათგანი ბოსლე პატროსანს შესთხოვს ყოველივე მას, რაც დედამ ან მამამ გამოსთხოვა. აღნიშნულ დღეს საკმეველს არ აკმევენ, სანთლების რაოდენობა შემოიფარგლება იმ ორი სანთლით, რომელიც ქალსა და ბიჭს ეჭირა, როცა ბოსელში შევიდნენ¹⁸.

ა. წულაძე შემდეგნაირად აგვიწერს დღესაწაულს: სალაძოს გამოაცხოზდნენ ქონიან მკაღს, რომელზედაც დიდი ჭიქით აღნიშნავდნენ და ამბობდნენ:

— ამდენი ცხენის ჯოგი, პატარა ჭიქით—ამდენი ძროხის ჯოგი. ორკაბი ფიჩხით—ამდენი თხის, ცხვრის და ქათმის ჯოგი. მკაღს სანთელს შემოუწებდნენ. ოჯახის უფროსი კაცი იკითხავდა.

— ბოსლე, შინა ხარო? — ერთი პასუხობდა — შინ გახლავარო!

¹⁸ Т. М а м а л а д з с. Народные обычаи и поверья гурнийцев, СМОМПИК, Тифлис, 1893. с. 46.

— ცხენი რამდენი გყავსო? — ჯოგი, — ძროხა? — ჯოგი,
 — ცხვარი და თხა? — ჯოგი, — ღორი? — ჯოგი, ქათამი?
 — ჯოგი და თავდებოდა ამით¹⁹.

ჩვენ მასალის მიხედვით, ბოსლობა ჩეულებრე ხორციელის შაბათს მოდიოდა. მოხელდნენ სიმინდის ფქვილიაგან ცოძს. გაყოფდნენ ორად და ერთ ნაწილს ცხელ კეცზე დააკრავდნენ, მასზე დაღებდნენ საკალიანდოლ დაკლული ღორის გვერდის ქონს ე. წ. პანას, რომელიც წვრილად იყო დაჭრილი და შერეული ქონსა და პილპილითა და სახვით შეზავებული შეფუშვილი (მხვილად დანაყილი) ნიგოზი. ზემოდან გადააკრავდნენ ცომის მეორე ნაწილს. ქონიანი მკადის ზედაპირს „მოაჭიკვიებდნენ“: ძროხას, რადგან ჩლიქი აქვს გაყოფილი, გამოსახავდნენ გულამოღებული ჩალის ღეროთი, თუ კვიციანი ცხენი ჰყავდათ, მას ძრგვალი ღეროთი გამოხატავდნენ (ცხენს გაუყოფელი, მრგვალი ჩლიქი აქვს) — რამდენჯერაც მოაჭიკვიებდნენ (ჩაჩხვლევდნენ), იმდენჯერ იმეორებდნენ: ამდენი ძროხა, ამდენი ხარი, ამდენი ღორი, ამდენი ქათამი, ამდენი ბატი (ს. ხევი, ჩოხატაურის რაიონი). ზოგ სოფელში (ბუკის ციხე, ნაბელლაევი) საბოსლობო მკადის ზედაპირს ატმის ბოლით (ტოტი) ან ორბოტიკა (ორტოტა) ატმის ტოტით მოაჭრებდნენ და თან იტყოდნენ: — ასი ძროხა, ასი ხარი, ასი ფხობი, ასი ცხენი, ასი კვიცი, ასი ცხვარი, ასე ღორი გაგვიძრავლე. ზოგი საბოსლობო მკადს კი არ მოაჭიკვიებდა, არამედ ძროხის ცურის ფორმას მისცემდა (ძროხის ცურნეს გააკეთებდა). აქვე უნდა შევიჩერდეთ ატმის ტოტის საკულტო დანაშნულებაზე: სამეგრელოში გერცემულ ძროხას მხოლოდ ატმის ტოტით ულოცავდნენ: ტოტი მიჰქონდათ მის ყურთან ახლოს და გერცემულის ლოცვას წარმოთქვამდნენ. აქ უთუოდ თავს იჩენს მსხმოიარე ხის კულტის გადმონაშთი. იმ კუთხეებში, სადაც ხეხილი არ გვარობდა, „მყოფანი“ ხის ტოტები მიჰქონდათ და საქონელს ბაგაში უყრიდნენ გაზაფხულზე (არხოტი), ან საქონლის რქებს მინდვრის ყვავილებით ამკობდნენ (ს. შუაფხო). აქ უთუოდ საქმე იხეთ მაგიურ ქმედებასთან გვაქვს, რომელსაც საფუძვლად უდევს რწმენა — მსგავსი მსგავსს იწვევს — ნაყოფიერ ხეს ნაყოფიერება უნდა გამოეწვიოს.

საბოსლობო მკადის გამოცხობის შემდეგ ქალს მიჰქონდა ქონიანი მკადი, კაკლები და წყალი ახორში. იგი ბაჟს ჩააყენებდა პირის ბაგაში, სანთლებს რქებზე მიაკრავდნენ საქონელს და იწყებოდა დიალოგი:

¹⁹ ა. შ. უ. ლ. ა. ძ. ე. თონოგრაფიული გურია, 1971, გვ. 114.

ქალი ეკითხება ბიჭს — ბოსლო, შინა ხარ?
 — შინა, ბატონო!
 — ძროხას მიკეთებ?
 — ბევრს, ბატონო!
 — ცხენს მიკეთებ?
 — ბევრს, ბატონო!
 — ცხვარს მიკეთებ?
 — ბევრს, ბატონო!
 — ღორს მიკეთებ?
 — ბევრს, ბატონო!

ზოგი ფრინველსაც ახსენებდა. ამჟამად სამჯერ გაიმეორებდნენ და დამთავრებისას ქალი წყალს გადაასხამდა საქონელს და კაკლებს ჩაყრიდა პირის ბაგაში, რათა „სიმსუქნე ყოფილიყო ოჯახში“.

მეორე დღეს ბავშვები დილაადრიან გარბოდნენ ახორში, რათა კაკლები ამოეკრიფათ პირის ბაგიდან.

დასავლეთ საქართველოს სხვა კუთხეების ბოსლების ვარიანტების გამოკვლევის საფუძველზე, ენობრივი და ეთნოგრაფიული მონაცემების შედარების საფუძველზე ვ. ბარდაველიძე მივიდა დასკვნამდე, რომ ბოსლობაში ასახულია სქესობრივი განაყოფიერებისა და გამრავლების მფარველი ღვთაება ბოსელი (ბოსლო, ბოსლა), რომელიც ამ სახელთან ერთად მოიხსენიება დღეობის ლეჩხუმურ ვარიანტში კოტრას ეპითეტით და სვანურ ვარიანტებში კოტრას შესატყვისი კიტისა და ბამბულუ, ბე-მბლუ, ბომბლა, ბობლა- სახელწოდებით... და, რომ ბოსლობაში ბოსელის ხატი ისე ნათლად გამოკვეთილი არაა, როგორც სვანურ ლიფანალსა და სვანურ, მთიულურ და გუდამაყრულ ახალწელიწადში ამ ღვთაების სახე. მაგრამ, მიუხედავად ამისა, მაინც ხერხდება ბოსლობაში წარმოდგენილი ღვთაებრივი პერსონაჟის გარეგანი გამოსახულების ზოგად ხაზებში აღდგენა. ამ მხრივ, უწინარეს ყოვლისა, შეინიშნება ის, რომ ქართველების ზემოგანხილული დღეობა ყველა ან თითქმის ყველა თავის მონაცემით ღვთაება ბოსელს შინაური ცხოველების სქესობრივ განაყოფიერებისა და გამრავლების მფარველობას მიაწერს. განსაკუთრებით მნიშვნელოვანია მის სახელზე განკუთვნილი მთავარი რიტუალის თავისებურება: კულტის მსახურნი ღვთაების თაყვანისცემასა და მსახურებას ცხოველური სახის მოქმედებით და ცხოველური ხმის გამოღებით („ბუ-უ“, „მი-ჰი-ჰი“)

გამოხატავდნენ²⁰..... სვანური და რაჭული ვარიანტების მიხედვით, ღვთაების საკულტო წესები სრულდებოდა მაინცდამაინც მსხვილფეხა რქოსანი საქონლის სათავსოს, სვანებთან ე. წ. გუალის წინ, რაჭველებთან კი ბოსლისაკენ წაშვლის დროს გზაში და თვით ბოსელში²¹. მკვლევარი დაასკვნის, რომ ბოსლობაში ასახული ღვთაება თავდაპირველად ცხოველური სახის არსება უნდა ყოფილიყო. ბოლო შინაური მსხვილფეხა რქოსანი ცხოველებიდან ქართველებში გაღმერთებული უეჭველია, ხარი იქნებოდა. ვ. ბარდაველიძეს ეკუთვნის, აგრეთვე ის დებულება, რომლის მიხედვითაც თვით ღვთაება ბოსელი მიწათმოქმედების მეურნეობასთან არის დაკავშირებული და ანთროპომორფული სახე აქვს მიღებული სხვა ასტრალურ ღვთაებათა მსგავსად, რომელთა წრეშიც ის არის მოქცეული. მკვლევარს მიაჩნია, რომ აღნიშნული ღვთაება ბოსლობასთან შედარებით აქ უფრო მეტი ფუნქციებით ხასიათდება, მნიშვნელობის ფორმებიც, რომლებიც ახალი წლის ციკლის დღეობებშია მოცემული, უფრო მდიდარი და მრავალფეროვანია, ამასთანავე, უფრო რთულ მოქმედებებში გამოხატული. ვ. ბარდაველიძის აზრით, ახალი წლის ციკლის დღეობებში ეს უძველესი ითიფალური ღვთაება (იგულისხმება ზოსლო) ბასილის სახელს ატარებს და, მაშასადამე, ღვთაება ბოსელ-ბომბლას კულტი ბასილის კულტად არის აღიარებული²².

ამრიგად ვ. ბარდაველიძეს მიაჩნია, რომ ღვთაება ბოსლო ის ითიფალური ღვთაებაა, რომლის კულტი არა მარტო ბოსლობის რიტუალში აისახა, არამედ მოცემულია ახალი წლის ციკლი დღესასწაულებში და ბასილის სახელს ატარებს, მის კულტად არის აღიარებული. ასევე საინტერესოა აკ. სოხაძის მოსაზრება, დღესასწაული ბოსლობის არსისა და ღვთაება ბოსლოს ბუნების შესახებ. მისი აზრით, „ბოსლობა უპირატესად მსხვილფეხა საქონლის—ხარებისა და ძროხების გამრავლებისა და კეთილდღეობისათვის იყო განკუთვნილი. ამას გარდა მის მიზანდასახულებას შეადგენდა სხვა შინაური ცხოველების, შინაური ფრინველებისა და მათი მომვლელი ადამიანის გამრავლება და კეთილდღეობა, ყანა-ვენახებისა და სათიბების მოსავლიანობის გადიდება და დაცვა. ეს გარემოება

²⁰ დღესასწაული „ბუაობას“ დროს ცხოველურ ხმებს გამოსცემდნენ ბუ-უ, „ბუ-უ“. ტიპონიმი „ბუსკრები“ მთიულეთში მეტად გავრცელებულია.

²¹ ვ. ბარდაველიძე, დასახ. ნაშრ., გვ. 103.

²² ვ. ბარდაველიძე, დასახ. ნაშრ., გვ. 104.

ცხადჰყოფს, რომ ბოსლობა ფართო დანიშნულებს საოჯახო დღეობა იყო, რომელიც აერთიანებდა ქართველი გლეხის რთული მეურნეობის ამსახველ ნაირი სახის წეს-ჩვეულებებს“. იხევე როგორც ვ. ბარადაელიძე, აკ. სოხაძეც იმ დასკვნამდე მივიდა, რომ დღეობა თავდაპირველად მარტოდენ მესაქონლეობის წარმატებებს ემსახურებოდა. აკ. სოხაძეს ნიაჩნია, რომ ბოსლობის მსგავსად ასეთივე ფუნქციისა (იგულისხმება მიწათმოქმედების, მესაქონლეობის, მეფრინველეობის გამრავლებისა და დაცვის ფუნქცია) და ფართო დანიშნულების ხალხური დღეობების ჩგუფს განეკუთვნება: ბარბალობა, ახალი წელიწადი, ყეენობა — ბერიკაობა და სვანური მურყვამობა²³.

ამრიგად, ჩვენი წინამორბედი მკვლევარნი აღიარებენ ერთი მხრივ ღვთაება ბოსლოს და ბასილის იდენტურობის (ვ. ბარადაელიძე), ხოლო მეორე მხრივ, ბოსლობის დღესასწაულს თავის ფუნქციით იგულისხმება მესაქონლეობის, მიწათმოქმედების, მეფრინველეობის გამრავლების და დაცვის ფუნქცია) და ფართო დანიშნულებით განაკუთვნებენ ისეთ ხალხურ დღეობათა ჩგუფს, როგორც არის ბარბალობა, ახალწელიწადი, ყეენობა — ბერიკაობა და სვანური მურყვამობა (აკ. სოხაძე).

მართალია, გურული ბოსლობის რიტუალში არ არის შემორჩენილი ღვთაება ბოსლეს თაყვანისცემის გამობატვა ცხოველური სახის მოქმედებით და ცხოველური ხმის გამოღებით, მაგრამ აქ გვაქვს გამოთქმა — „მიკეთებ“, — ძროხას მიკეთებ? ხარს მიკეთებ? ცხენს მიკეთებ? და ა. შ. რაც გამანაყოფიერებელი ანთროპომორფული ღვთაების მოქმედების გამომხატველია. გურიაშიც ბოსლობის ძირითადი რიტუალი მსხვილფეხის სადგომში ტარდებოდა, მიუხედავად იმისა, რომ რიტუალის შესრულების დროს თითქმის ყველა სახის შინაური პირუტყვი (რაასაც კი გურიაში აშენებდნენ) და ფრინველი მოიხსენიებოდა.

ამრიგად, გურული ბოსლობის დღესასწაული თავისი არსით დასავლეთ საქართველოს სხვა კუთხეების ბოსლობის ანალოგიურია.

ღვთაება ბოსლოს თაყვანისცემის რიტუალი (იგულისხმება შინაური ცხოველების გამრავლების მიზნით ბოსლობა — ბემბლე ღამეს გადაჭარბებული ცოლქმრული ურთიერთობანი (ს. იელიში, იფარის თემი, სვანეთი და ბოსლობის ლეჩხუმური ვარიანტი) ერ-

²³ აკ. სოხაძე, დასახ. ნაშრ., გვ. 14—15.

თხელ კიდევ ადასტურებს იმ მოსაზრებას სისწორეს, რომელიც ჩვენ თავის დროზე გამოთქვით — ძველი რწმენების მიხედვით სამყარო აღიქმება ადამიანთა და ცხოველთა ფიზიოლოგიურ ერთიანობაში.

ზ. კიკნაძე თავის ნაშრომში „შუამდინარული მითოლოგია“. ექვეყნეშ აყენებს ვ. ბარდაველიძის მიერ გამოთქმულ მოსაზრებას იმის შესახებ, რომ ღვთაება ბოსლო, რომლის სახელწოდება საქონლის სადგომის სახელწოდების ანალოგიურია, მამაკაცური ბუნების მქონე ნაყოფიერების ღვთაებაა. მას შიანია, რომ ღვთაება ბოსლო ქალღმერთი უნდა იყოს. როცა ის იხილავს შუამდინარეთის მითოლოგიურ მონაცემებს იმის შესახებ, რომ ბოსლოს (ე. ი. სადგომის) სახით წარმოდგენილია მშობიარე ქალღმერთი. ღვთაერივი ფური. შილამი, რომლის ხატოვანი ნიშანი იგივეა: რაც არხუშისა (საშო)—„ბოსელში ჩახატული დედრი“, წერს რომ „აქვე უნდა მოვიხმოთ ანალოგი ჩვენში (განსაკუთრებით რაქა-ლეჩხუმსა და სვანეთის სოფლებში) დადასტურებულ შინაურ ცხოველთა ნაყოფიერების ღვთაებასთან, რომელიც იმ შენობის სახელს ატარებს, სადაც იბადება მისი პირუტყვი და, რომელსაც წელიწადის გარკვეულ დროს, გაზაფხულის პირზე, ბოსლისაყენ ძღვენით შიძავალნი უხმობენ; ბოსელ, ბოსელ. ბუ... (ვ. ბარდაველიძე). ქართულ ბოსელშიც ექვი არ არის ნინთურას ტიპის ღვთაება, — არა მაშრული ბუნებისა მაგ. „გალმერთებული ხარი“ (ვ. ბარდაველიძე, გვ. 108), არამედ დედრი, რადგან სწორედ შობის და ნაყოფიერების ქალღმერთი განასხეულებს თავის საშოს პირუტყვის სადგომს წიაღში და სახელწოდებასაც მისგან იღებს. ეს ის საშოა, საიდანაც მითოსური აზრით იბადება ყოველი დაბადებული²⁴.

რაც არ უნდა მიმზიდველი გვეჩვენებოდეს შუამდინარულ მონაცემებთან ქართულის შეხების წერტილების ძიება, სინამდვილეს გვერდს ვერ აუვლით. ქართული მონაცემებით ღვთაება ბოსლო//ბოსლე მხოლოდ და მხოლოდ მამაკაცური ბუნებისაა. შესაძლოა ეს ღვთაება, რომლის სახელწოდება სადგომის სახელწოდების იგივეობრივია, მართლაც და ქალღმერთს განასახიერებდა. მაგრამ ჩვენამდე მოღწეული რწმენები წინა პლანზე აყენებს მამაკაცური ბუნების მქონე ღვთაებას.

გურიანში ბოსლობის დღესასწაულს უშუალოდ მოსდევს ანევე მესაქონლეობასთან დაკავშირებული დღესასწაული „ილორო-

²⁴ ზ. კიკნაძე. შუამდინარული მითოლოგია, თბ., 1976, გვ. 81—80.

მა“. აღნიშნულ დღესასწაულს, რომელიც ყველიერის ხუთშაბათს იმართებოდა, არ იცნობს ჩოხატაურის რაიონი. ამ დღესასწაულს იხდიდნენ მახარაძის და ლანჩხუთის რაიონებში შემავალი სოფლები. ილორობის დღესასწაულის აღწერილობა მოეპოვება წულაძესა და თავდუმაძეს.

მრგვაქვს წულაძისეული აღწერილობა: ილორობას ანუ ყველიერის ხუთშაბათს გამოაცხობდნენ ძალიან დიდ ხაჭაპურს, რაც შეიძლება მეტი ყველით სავსეს, ძროხა კაი მეწველი იქნებაო. გააკეთებდნენ ძროხის ცურნესავით ცომს, ამას ყველს უზამდნენ და გამოაცხობდნენ. საქონლის რქებზე სანთლებს დაანთებდნენ და ლოცულობდნენ: „ღმერთო და ილორის წმ. გიორგიო, იხსენი ჩვენი საქონელი ჭირისა და ფათერაკისაგან, ნადირის კბილისაგან, ძვალი ტვინით გუუფსე, ცურნე რძით გუუფსე, ტყავი ხორცით გუუფსე და პატრონს მშვიდობაში და სიამეში მოახმარე“. საქონელზე თავშემორებული სანთელი ეკლესიაში მიჰქონდათ და წმ. გიორგის ხატს უნთებდნენ²⁵.

თავდუმაძე შედარებით განსხვავებულად აგვიწერს ილორობის რიტუალს. იგი „ილორობას“ მოიხსენიებს, როგორც „ძროხების და ხარების სალოცავს“: ილორობას ანუ ძროხებისა და ხარების დღეობას უქმობდნენ წინათ ყველიერის ხუთშაბათს. აღნიშნულ დღეს საღამოთი გამოაცხობდნენ საგანგებოდ ამ დღისათვის ყველიან ხაჭაპურს, რომლის ზევითა მხარეზე გამოხატული უხდა ყოფილიყო ძროხის ცურნე და ძუბუები. ყველთან ერთად ჩაყოლებდნენ სუფთა ვერცხლის ფულს. ყველიერის ხუთშაბათ საღამოს, როცა დაბნელდებოდა, ოჯახის უფროსი შევიდოდა ახორში (ბოსელი), რომელიც კარგად იყო დასუფთავებული და ძროხებს, ხარებს და დეკულებს მიაკრავდა რქებზე, ოჯახში ჩამოქნილ თაფლის სანთელს და ილოცავდა — ღმერთო გაგვიკეთე და გაგვიძრავლე საქონელი და დაიცავი იგი ნადირისაგან, ბოროტი თვალისა და სულისაგან, როცა სანთლები ისე დაიწვებოდა, რომ რქას მიუახლოვდებოდა, მოხსნიდნენ, ოთხად გაყოფდნენ და მიაკრავდნენ ახორის ოთხსავე კუთხეში. ამის შემდეგ შევიდოდნენ სახლში და ვახშმად დამჯდარნი ღვინოს სმის დროს დაილოცებოდნენ: „ღმერთმა გაგვიკეთოს და გაგვიძრავლოს საქონელი და დაიცვას (დაიფაროს) იგი ნადირისაგან და ბოროტი თვალისა და სულისაგან“. ვახშამზე გაჭრიდნენ ხაჭაპურს იმდენ თანასწორ ნაწილად, რამდენი წევრიც

²⁵ ა. წულაძე, დასახ. ნაშრ., გვ. 114.

იყო ოჯახში და ვის ნაჭერშიც აღმოჩნდებოდა ვერცხლის ფულ-
 ის ითვლებოდა იმ წელიწადს ილბლიანი. როგორც ვხედავთ, ილო-
 რობაც ძირითადად ძროხებისა და ხარების დლეობა იყო და ილო-
 რის წმინდა გიორგის მიეწერებოდა შინაური რქოსანი პირუტყვის
 გამრავლება, ნაყოფიერება და ნადირის კბილისაგან დაცვის ფუხ-
 ქცია. ამ დლეობის თავისებურებას, განსხვავებით ერთი კვირით
 ადრე ჩატარებულ ბოსლობასთან შედარებით შეადგენდა ყველის
 გულიანი ძროხის ცურის ფორმის დიდი ზომის ვერცხლის ფულ-
 ჩატანებული ხაჭაპური (ჩვენ ზემოთ ვაჩვენეთ, რომ ბოსლობის
 დროსაც სკოდნიათ მქადისთვის ძროხის ცურის ფორმის მიცემა).
 აბ. წულაძისა და მ. თავდუმაძის მასალაში არ ჩანს ილორობის
 დლეობის რიტუალში ბოსლეს თაყვანისცემის ელემენტები, მაგ-
 რამ ჩვენს მიერ შეგროვილი მასალით მახარაძის რაიონის ზოგი-
 ერთ სოფელში აღმოჩნდა, რომ (ს. ვაკისოფელი, ქვემო ბახვი), აქ
 ილორობა დღეს ღვთაება ბოსლე ხსენდებოდა: ილორობას ყველი-
 ერის ხუთშაბათს ქონიან მქადს აცხობდნენ, ქალი მქადს გობზე
 დებდა, კაცს გარეთ გაუშვებდა, თვითონ კი კართან დგებოდა. გა-
 რეთ გასული ეკითხებოდა: —ბოსლე, შინა ხარ?

- შინა, ბატონო!
- ძროხა შინა გყავს?
- შინა, ბატონო!
- ღორი შინა გყავს?
- შინა, ბატონო!
- ქათამი შინა გყავს?
- შინა, ბატონო!

შემდეგ მამაკაცი სახლში შედიოდა და ყველანი მაგიდას მიუს-
 ხდებოდნენ. აქ, როგორც ჩანს, ბოსლობის ეს ვარიანტი შერყუნი-
 ლი სახით გვაქვს მოცემული — ბოსლეს როლში ქალი გამოდის.

ჩვენ ვვარაუდობთ, რომ დლეობა ბოსლობა და ღვთაება ბოს-
 ლეს თაყვანისცემა საყოველთაო მოვლენა უნდა ყოფილიყო გუ-
 რიაში, ხოლო, რაც შეეხება ილორის წმინდა გიორგის ხსენებას
 ყველიერის ხუთშაბათს, მაშინ, როდესაც მისი ხსენების უმთავრეს
 დღეებად 23 აპრილი და 23 ნოემბერი იყო, ერთი შეხედვით გაუგებ-
 რად გვეჩვენება. მაგრამ თუ გავითვალისწინებთ, რომ წმინდა გო-
 რგის მრავალი ფუნქცია მიეწერებოდა, მაშინ აღნიშნული ფაქტი გა-
 საგები გახდება. ს. მაკალათია წერს: წმინდა გიორგო, როგორც

მითრა მიწის მუშაკთა და განსაკუთრებით მწყემსთა მფარველად იყო აღიარებული²⁶. აღმოსავლეთ საქართველოს მთაში საერთოდ, ხალხი მას მგზავრ ან გელოზს, უყმო ყმათ მეშველს უწოდებდა და შესთხოვდა—თუ რა ცუდი, საზიანო საქმე გეხდებოდეს, გვიშველე და გვიმაშველე. გადაგვაცილე და აგვაცილე, ყველა უბედურება, მაცილე, ფათურაკი, გვიხნენი (ფშავი, ხევსურეთი. მთიულეთი, ხევი). ილორის წმინდა გიორგი მთავარი ღვთაება იყო მეგრელი მეჭოგეთათვის, რადგან ისინი სულ გზაში იყვნენ, ყველასიარი დახმარების გაწევას შესთხოვდნენ მას.

ზემოთ მოტანილი მასალა ნათლად გვიჩვენებს, რომ ბოსლოზის რიტუალში უხვად არის მოცემული ახალი წლის ანუ ბედობის დღისათვის დამახასიათებელი ელემენტები: ბოსლობა-ილორობა ღვთის ცდილობდნენ მთელი წლით დაებეგებინათ შინაური პირუტყვისა და ფრინველის გამრავლება, ნაყოფიერება, ავი თვალისა და სულისაგან და აგრეთვე ნადირისაგან დაცვა.

ასეთი უნივერსალური, ყოვლის მომცველი ფუნქციები, როგორც ვიცით, წლის შემცვლელ ღვთაებას უნდა ჰქონოდა. ამასთანავე ისეთი რიტუალური ხაჭაპურის თუ ღორის ქონიანი მკადის გამოცხობა, რომელიც ძროხის ცურს გამოსახავდა, საერთოდ აღმოსავლეთ საქართველოს მთასა თუ ბარში სრულდებოდა მხოლოდ და მხოლოდ ახალი წლის რიტუალში. ბოსლობის დროს გამომცხვარი ღორის ქონიანი მკადის „მოჭიკვიება“ — დაქრელება. თითოეული შინაური პირუტყვის ფეხის მინაგვარი ჯოხით თუ ჩალის ღეროთი და შეძახილები — ამდენი ძროხა! ამდენი ხარი! ამდენი ცხენი, ამდენი ღორი და ა. შ. ასევე მხოლოდ და მხოლოდ წლის დასაწყისის ბედობა დღისათვის არის დამახასიათებელი. საქონლისა და საერთო შინაური პირუტყვის გამრავლების დაბეგების მიზნით ასეთი შეძახილები სრულდებოდა მთელ საქართველოში, ახალწელს, ცეცხლისათვის მილოცვის დროს.

ამრიგად, მესაქონლეობასთან დაკავშირებული ორი დღესასწაული გურიაში თებერვლის თვეში სრულდება. ამას თუ დაუშვებთ მარხვის პირველი კვირის შაბათი დღის თედორობის დღესასწაულს, რომელიც ცხენების გამრავლებას ეძღვნება — „თედორობის კვირეში კვიცი ცხენის კიდეში“, მაშინ ნათელი გახდება, რომ

²⁶ ს. მ ა კ ა ლ ა თ ი ა, ჟეგ-მისარონის კულტი ძველ საქართველოში, თბ., 1978, გვ. 25.

აღნიშნული დღესასწაულები ერთ ღვთაების, მამაკაცური ბუნების მქონე ითიფალური ღვთაების თაყვანისცემას ასახავს. უნდა აღინიშნოს, რომ მეგრულ-აფხაზური ქრისტიანთა ლოცვის რიტუალი, როდესაც, საქონლის გამრავლების მიზნით, ყველიანი მკაღი კერაზე ცხებოდა და რომელიც იქვე უნდა დაეჭრათ, ქავე თებერვლის თვეში, ყველერის აღება ღაქეს ცხებოდა. აღნიშნული ნაყოფიერების მფარველი ღვთაების სახე იმდენად ტრანსფორმირებულია, რომ, ერთი შეხედვით, სხვადასხვა ღვთაებად გვეჩვენება. ჩვენ ვფიქრობთ, რომ ბოსლობის რიტუალში აისახა ისეთი ელემენტებიც, რომელიც ცეცხლის ღვთაების თაყვანისცემას გამოავლენს. კერძოდ, ბოსლობის სრული სახის მქონე ქვემო სვანური და რაჭულ-ლეჩხუმურ რიტუალებში ძირითადი წეს-ჩვეულება კერის გარშემო სრულდებოდა. თუ გავითვალისწინებთ აგრეთვე იმ მასალას, რომელიც შესაქონლეობასთან დაკავშირებით ცეცხლის ღვთაების კულტს ასახავს, კერძოდ, ცეცხლისათვის საქონლის გამრავლების გამოთხოვას. მაშინ დავრწმუნდებით ზემოთ დაშვებული ნიშანბრებებს სისწორის შესაძლებლობაში. ზემოთ თქმულს ამაგრებს საყოველთაო ქართული ცეცხლის დღესასწაული ლამპრობა, რომელსაც თებერვლის თვის დასაწყისში იხდიდნენ: ხევი (ამპარობა, იანვრის კულის მოწვა), ხევსურეთი (ლამპრობა, ზამთრის განახევრება—გიორგობის ათიდან ათი კვირის შემდეგ ლამპარობა, ლამპრობიდან ათი კვირის გასვლის შემდეგ ოცობა-დღელამეთა სწორობა. აქვე ცეცხლმოკიდებული გუჯინას მთიდან დაგორება). თუშეთი (მარხვის ტყეპა, ცეცხლმოდებული გოდრის დაგორება); გურული და სვანური ლამპრობა ასევე ცეცხლის დღეობის ხაზით მატარებელია.

ამდენად, ჩვენ გვეჩვენება, რომ ბოსლეს ცეცხლის ღვთაების ფუნქციაც აქვს მითვისებული; რამდენადაც ვიცით მიწიერი ცეცხლი მამაკაცური ბუნებისაა („წითელი ხარის ნაწოლზე, ბალახი აღარ ამოვა“).

ჩვენ მიგვაჩნია, რომ შესაქონლეობასთან დაკავშირებული რიტუალები, თავისი არსით მზის თაყვანისცემის დღესასწაულებს უკავშირდება — ბარბალობა, ლამპრობა, ოცობა. ეს არც უნდა იყოს გასაკვირი, რადგან ხალხი, რომელიც ძირითადად, მზის კალენდრით სარგებლობდა, მისი სითბოს თანდათანობით მატების აღსანიშნავად და გასაძლიერებლად, ცეცხლის დღეობებს აწყობდა, რომელიც შეიცავდა მეურნეობის ძირითად დარგებთან დაკავშირებულ წეს-ჩვეულებების შესრულებასაც.

ამრიგად, მესაქონლეობასთან დაკავშირებული რწმენა-წარმოდგენების გადმონაშთები გურიაში დასავლეთ საქართველოს მესობელ კუთხეთა წეს-ჩვეულებების ანალოგიურია.

აღნიშნული რიტუალები ძირითადად წლის დასაწყისის დღესასწაულებით შემოიფარგლება — ბარბალობა, კალანდა, ბოსლობა, ილორობა, თედორობა.

ახალი წლის ძველი დღესასწაულის ბარბალობიდან კალანდას (1 იანვარი ძვ. სტილით) გადანაცვლებამ გამოიწვია ბედობის დღის რიტუალთა განმეორებით შესრულება: საქონლის ფერხვა—ბარბალობასა და კალანდას, ქათმის ფერხვა — ბარბალობასა და კალანდა მეორე დღეს (2 იანვარი). გარდა ამისა, საქონლის ფერხვის რიტუალი (ბოსლობა, ილორობა, თედორობა) შემდგომშიც სრულდებოდა.

გურული მონაცემები მთელი საქართველოს ეთნოგრაფიულ მასალებთან ერთად ნათლად გვიჩვენებენ მესაქონლეობასთან და აგრეთვე მიწათმოქმედებასთან დაკავშირებულ რიტუალთა მზის სითბოს, თანდათანობითი ზრდის პერიოდების დასაწყისის დღესასწაულებთან მჭიდრო კავშირს, რომელიც იწყებოდა მზის საზამთრო ბუდიდან („დათვი ხვრელსა, მზე ბუდესა, შუა ქრისტიშობის თვესა“) გამობრუნებით და მთავრდებოდა მის საზაფხულო ბუდეში მისვლით (ბარბალობა, ახალი წელიწადი, ლამპრობა, ოცობა, ამაღლება). დროის აღნიშნული მონაკვეთი ხალხში მიჩნეული იყო აღმოცენებისა და ზრდის პერიოდად. მომდევნო ხანის რიტუალები შედარებით განსხვავებული ხასიათის მატარებელია და კვლავ მზის კალენდარს უკავშირდება.

МАКАЛАТИЯ М. Н.

РЕЛИГИОЗНЫЕ ВЕРОВАНИЯ И ОБРЯДЫ СВЯЗАННЫЕ СО СКОТОВОДСТВОМ В ГУРИИ

Резюме

Пережитки религиозных верований и обряды, связанные со скотоводством в Гурии, аналогичны с таковыми зафиксированными в соседних районах Западной Грузии. Эти ритуалы выполнялись главным образом, в религиозные праздники начала года — Барбалоба, Каланда, Бослоба, Илороба, Тедороба.

Старый грузинский новогодний праздник, совершавшийся 4 декабря по старому стилю (Барбалоба), как известно, был перенесен на 1 января по старому стилю (Калаида). Этим обусловлено выполнение новогодних ритуалов, призванных увеличить размножение и плодородие скота, дважды, как в день Барбалоба, так и во время Калаида.

Аналогичные ритуалы (поздравление скота и др.) повторялись и на праздниках, следующих за новогодними (Бослоба, Илороба, Тедороба). Многократное повторение ритуалов вызвано, очевидно тем, что они тесно связаны с праздниками начала последовательных этапов постепенного нарастания солнечного тепла (Барбалоба, Лампроба, Оцоба, Амаглеба), которое начиналось в день зимнего солнцестояния и заканчивалось летним солнцестоянием. Этот период считался в народе временем пробуждения и роста жизненных сил.

Ритуалы последующего времени носят несколько иной характер, хотя и связаны также с солнечным календарем.

Изучение гурийских праздников Бослоба и Илороба показало, что они подобно сванскому и рачинскому Бослоба, имели целью размножение скота и увеличение его плодородия.

Праздник Бослоба, как известно, устраивался в честь божества — покровителя скота — Босло//Босле.

В Гурии эти праздники устраивались в феврале до начала Великого поста — Бослоба в субботу мясоеда и Илороба в четверг масленицы — непосредственно вслед за старым языческим праздником огня — Лампроба (2 февраля).

Характер этих праздников показывают, что они отражают ритуалы поклонения итифальному божеству, которое олицетворяло мужское начало.

მ. ბეზარაშვილი

ქალის ტანსაცმელი გურიიში

ქართული კოსტუმის მრავალფეროვნება გურიაში გავრცელებულ სამოსელსაც მოიცავს. ლიტერატურაში „გურულად“ წოდებულ ამ ტანსაცმელში მამაკაცის სამოსიდან „ჩაქურად“ ხმობილი¹ და ქალის შესამოსელიდან ის სახეობაა ნაგულისხმევი, რომელიც „ქართული ჩაცმულობის“ შემოსვლამდე იყო გავრცელებული.

აღნიშნული ჩაცმულობისათვის საჭირო მასალაში ფაბრიკულთან ერთად ადგილობრივი საფეიქრო ნაწარმიც ერია. XIX ს. მიწურულისათვის შინნამზადი ქსოვილების როლი საგრძნობლად მცირდება. მათ შორის თითქმის აღარ გვხვდება დასავლეთ საქართველოსათვის ტრადიციული დარგების სელისა და კანათის კულტურებთან დაკავშირებული ქსოვილები, თუმცა მათგან მიღებული ძაფის მრავალმხრივ გამოყენებას XX საუკუნეშიც არ დაუკარგავს თავისი მნიშვნელობა². ჯერ კიდევ ბერძენ მწერალთა მიერ შენიშნული და საგანგებოდ მითითებული კოლხური სელის ბადეების სიკარგე ნოხეუც გურულებსაც მოსაგონებლად აქვთ გამხდარ³. აქ სკოდნიათ შერეული ძაფის (აბრეშუმი და სელი) ბადეების ქსოვაც³. ს. ნაბელაევში დღესაც ბინანულით იწარმოებენ ბადის მქსოველი ქალის ფერთანე მგალობლიშვილის სახელს. მის ნახელავს, რომელიც კანათის ძაფით იყო დამზადებული, სამი კაცის ქირით ყიდულობდნენ. იმ დროს დღიური მუშის ფასი ერთი მანეთი ყოფილა⁴.

მთხრობელთა გადმოცემით, სელისა თუ კანათის ე. წ. „კედის“ ძაფს სიმაგრე ჰქონია და ფაბრიკული ძაფის გავრცელებამდე დიდი

¹ მეგზური საქართველოს ერთიანი ეთნოგრაფიული გამოფენისა, შემდგ. გ. ჩაჩაშვილი, თბ., 1958, გვ. 51.

² დასავლეთ საქართველოში კანათისა და სელის გამოყენების შესახებ იხ. ჯ. რ. უ. ხ. ა. ე. ხ. აღხური აგრიკულტურა დასავლეთ საქართველოში, თბ., 1976, გვ. 62—84.

³ ფ. გ. ი. ა. ი. შ. ვ. ი. ლ. ი, ხელოსნობა საქართველოში, თბ., 1976, გვ. 84.

⁴ გურიის 1978 წლის ექსპედიციის მასალები, რვ. № 2, გვ. 132.

გასავალიც. გაჭირვების უამს, ამ ბაფით ქსოვდნენ სახლში სახმარ ფაჩუჩ-კარაჭინებს; კანაფის ძაფს გრეხდნენ და შინაურობაში სასიარულო ფესხაცმელებს ძირად უდგამდნენ. ძველი ტრადიციის ვამოძახილად უნდა მივიღოთ ბამბისა და კანაფის ძაფის ნაერთით დიდ ჩხირებში მოქსოვილი ე. წ. „ხაბუკე“ (მაგარი) კაბების არსებობის ფაქტიც.

წინა საუკუნეთა მსგავსად, XIX საუკუნეშიც „ხელონურ წარმოებას მისდევდნენ. ცალკეულ საოჯახო მეურნეობებში თითქმის ყოველი გლეხის ოჯახი თვითონ ამზადებდა არსებობისათვის საჭირო პროდუქტებს: ამუშავებდა მიწას, მისდევდა მეღვინეობას, კერავდა საკუთარი ან ნაყიდი მატყლის, ბამბის ან აბრეშუმისა თუ სელის ტანსაცმელს, აკეთებდა ხისაგან სხვადასხვა ჭურჭელს და ა. შ.⁶ ასეთი მდგომარეობა იყო გურიაშიც. ცნობილი მოგზაური გამბა, რომელსაც XIX საუკუნის დასაწყისში უმოგზაურია საქართველოში, შენიშნავდა. რომ მრეწველობა კოლხეთში ოჯახებშია კონცენტრირებული, ქვეყანას არ შეეძლო შეექმნა ფაბრიკები ან მანუფაქტურები“. იმ დროისათვის, წერს ამ სტრიქონების ავტორი ფ. გოგიჩაიშვილი. ეს შენიშვნა ეხებოდა არა მარტო სამეგრელოს (კოლხეთს), არამედ მთელ დასავლეთ საქართველოსო.

1873 წ. გაზეთ „დროებაში“ ოზურგეთიდან მოწერილ კორესპონდენციაში ვკითხულობთ: „...უწინ სანამდის სამზღვარგარეთის საქონელი შემოვიდოდა ჩვენი, ჩვენი ხალხი კმაყოფილდებოდა თავისი ნაწარმოებით. ის თავის მოქსოვილს დარაიას. შალს იცვამდა, ხარის ტყავს გაახმობდა და იმისაგან თვითონვე შეიკრავდა ჩუსტებს, წალებს... რაკი სხვა ქვეყნებთან ერთობა გაჩნდა. ვაჭრებმა მოიტანეს: ჩითი, ნარმა, ჭიქა, კარგი მაუდი, კარგი გამძლე ტყავები... რაკი რომ ჩვენმა ხალხმა ნახა უფარგისობა თავისის და ვარგისობა უცხო ქვეყნის ფართლის, დაანება თავი (საჭიროების დაგვარად) შალის ქაოვას, დარაიას, და იცვამს, იხურავს სულ სხვა შალებს, მაუდებს, წალებს“⁶... უფრო გვიან, 1899 წელს საყვირაო გაზეთი—„ქვალი“ სოფლის ცხოვრების და კერძოდ, ნიგოითის დახანიათების დროს შინაური წესით დამზადებული ქაოვილებს მოსპობის საკუთსაც ეხება: „...წინათ სანამ ჩვენი ცხოვრება გაქალაქდებოდა“, დედაკაც ბევრი საქმე ჰქონდა ოჯახში. გარდა საოჯახო ყოველდღიური საქმეებისა, ქალი ოჯახის წევრთა საყოფ ტანისამოსს, მატყლეულსა და ბამბეულს ქსოვდა და თითონვე ჰკერავდა. შემდეგ, როცა „ქვეყანა გა-

⁶ ფ. გოგიჩაიშვილი, დასახ. ნაშრ., გვ. 48.

⁷ კორესპონდენცია ოზურგეთიდან, გაზ. „დროება“, № 42, 1873.

ქალაქდა“ საზოგადოებაში ის აზრი დატრიალდა, რომ ქალების წინანდებური შრომა სირცხვილიაო, „მატყლის ბრუნვას“ (ჩეჩვას) და ლომის ცეხვას რაღა იკადრებს პატიოსანი ვარგებული ქალიო—ასე გაშინჯეთ. სასიძონი პირობას აძლევდნენ ქალის მშობლებს, შენ ქალს ლომი არ გავაცეხვით, ყანაში სადილი არ წავაღებო და სხვ. ამ აზრის გამავრცელებელი და მაგალითის მიმცემი რასაკვირველია, მაღალი საზოგადოება (თავად-აზნაურობა და სამღვდლოება) იყო⁷.

გურიაში საქსოვ დაზგაში დღემ-სავარცხელში დამზადებული ქსოვილებიდან პირველ რიგში უნდა დავასახელოთ წმინდა ქსოვილები: შალი, აბრეშუმი და ტილო; ასევე შერეული ძაფის პროდუქტი: შალ-აბრეშუმი, შალ-ბამბა, ბამბა-აბრეშუმი, რომელთა მისაღებად რამდენიმე ხერხს მიმართავდნენ-: ქსელში ძაფის მონაცვლეობა, დასაძახავი ძაფების ერთად შეცალება და უფრო გავრცელებული ქსელად და ზედად სხვადასხვა ძაფის მოხმარება. ამ უკანასკნელის გამოყენების დროს ზოგჯერ ფერსაც ურჩევდნენ (ქვედა თეთრი აბრეშუმი ზედა შავი შალი). ასეთი წესით მიღებულ ნაქსოვს „ტილრედი“ ერქვა⁸.

მთხრობელთა დამოწმებით ძველად ტერმინი „ხამი“ კანაფისა და ბამბის ნაქსოვს აღნიშნავდა, რომელსაც გამოუხარშავი კანაფის ძაფის სიუხვზე ნაქსოვშიაც შერჩენილი ჰქონდა. სწორედ ამ თვისების გამო ეს ქსოვილი ქალის შიდა ბოლოსა და კაცის ხალათებად ე. წ. „ბლუზებად“ გამოუყენებიათ. დასახელებული სახელწოდებიდან უნდა იყოს წამომდგარი გურიაში უხეში კაბის სინონიმებად ნახმარი ტერმინები „ხაბუკე“ და „ხამულა“.

სატანსაცმლე მასალის გასაკეთებლად ადგილებზე მოიპოვებოდა ნედლეული. ზოგიერთი სოფელი ბამბის ნაკლებობას განიცდიდა. ზოგი მატყლისას. მატყლი ძირითადად ახალციხიდან შემოჰქონდათ, აბრეშუმის პარკით კი ყველა გამრჯე გლეხი ქალის ოჯახი იყო მომარაგებული, ს. ჩიბათის მაგალითზე XX საუკუნის დასაწყისში თითო ოჯახზე საშუალოდ ორი თუმნის პარკი მოდიოდა⁹. როგორც ცნობილია, ამიერკავკასიაში მოყვანილი აბრეშუმის პარკი საზღვარგარეთაც იგზავნებოდა. ამაში გურული ქალის ნახელავიც ერია. გურიაში ამ საქმიანობის საუკეთესო ადგილად ლანჩხუთი იყო მიჩნეული¹⁰.

⁷ სოფელი, სოფლის ცხოვრება, გაზ. „კვალი“, № 35, 1899.

⁸ გურის 1977 წლის ექსპედიციის მასალები, რვ. № 2, გვ. გვ. 11, 12.

⁹ ს. ი. მ. ქო რ ბ ე ნ ა ძ ე, ჩიბათი (გურია), გაზ. „კვალი“, № 18, 1903.

¹⁰ გურია, გაზ. „კვალი“, № 27, 1899.

საფეიქროდ გასამზადებელი ნედლეულის დამუშავება იმ დროს იწყებოდა, როცა გლეხი „ტეხა-კრეფას“ მორჩებოდა. ეს სამუშაო საკმაოდ რთული და შრომატევადი იყო. ამიტომ ხშირად მიმართავდნენ კოლექტიურ დახმარებას — „ნადს“. „ქალებმა იცოდნენ სტეპზე ნადი. იყო ჩერიების ბრიალი“ — გვიყვება ერთი მთხრობელი. ზოგიერთი სამუშაოს შესრულების დროს დალოცვაც სცოდნიათ, კაი ხვავი, კაი ყოლაო; ზოგჯერ, მაგალითად შალის მოთელვის წინ, ასეთ წესს ასრულებდნენ: წინდაწინ ძალს დაუძახებდნენ, რის შემდეგაც ფეხბადობის აღარ ეშინოდათ¹¹.

აბრეშუმის პარკს ოთხ ჯგუფად ახარისხებდნენ. აქედან პირველი და მეორე ხარისხიდან ქსოვილებისათვის საჭირო ძაფს იღებდნენ. პარკს ჯერ წვრილი ძაფი მოსდევდა, მერე მსხვილდებოდა. პირველად ამოხვეულით წმინდა აბრეშუმს („დარაია“, „ქათანა“ — ნაზადნაკეთები დარაია ყოფილა) მოქსოვდნენ, მსხვილსა და დაუხვეწელ ძაფს „ჩიჩონჩათ“ წოდებულ ქსოვილზე ხარჯავდნენ. მესამე და მეოთხე ხარისხის პარკიდან ყაჭის ძაფს ამოიღებდნენ, რომლისაგან გრძელ წინდებს თუ მოქსოვდნენ. ამ ძაფის ამოსაღებად პარკის საგანგებო დამუშავება სცოდნიათ. ჯერ მიწაში დამარხავდნენ ორი კვირით მაინც, მერე ამოიღებდნენ, გარეცხავდნენ და რამდენიმე, ღამით გარეთ ტოვებდნენ — ცვარში „აბუმბუზებდნენ“. საქვეყნოდ ყოფილა ცნობილი ლანჩხუთელ ქალთა ნახელავი¹².

აბრეშუმის შინამზადი ქსოვილების შესახებ საინტერესო ცნობა შემოუნახავს გაზ. „ივერიას“ „...ადგილ-ადგილ მოჩანან სოფლის ღარიბული მცირე ნაწარმოები: თიხისა და ხის ქურჭლეულობა, აბრეშუმები, სოფლათ ნაქსოვი სხვა და სხვანაირი შალეები, რომელთა შორის ზოგჯერ შეხედება კაცს ძლიერ რიგიანათ ნაკეთები; დარაიები სხვადასხვა შალეები, ზოგი ისრე ღამაზათ და ნაზათ ნაკეთები (ქათანა) რომ არ გჯერა, თუ ეს ხელობა რომელსამე ქარხანაში გამოვლილი არ არისო“¹³. თუ აღრე აბრეშუმის პარკი იქცევადა ყურადღებას, შემდგომში წმინდა აბრეშუმის ნაქსოვი — „დარაია“ ქცეულა დაინტერესების საგნად. მიმწოდებლად ისევ დაბა ლანჩხუთია დასახელებული, შემსყიდველებად — ქალაქები: მოსკოვი, პეტერბურგი, ვარშავა, სადაც ჩინეთიდან შემოტანილი ამგვარი სახის, მაკრამ ნაკლებ გამძლე ქსოვილი საკმაოდ ძვირად იყიდებოდა¹⁴.

11 ა. პ. შოლაძე, ეთნოგრაფიული გურია, თბ., 1971, გვ. 102.

12 მგზავრი, კორესპონდენცია (ლანჩხუთი), გაზ. „ივერია“, № 99, 1895.

13 წერილი გურიიდან. გაზ. „ივერია“, № 37, 1878.

14 Ланчхути, газ. «Кавказ», № 64, 1906.

XIX საუკუნის II ნახევარში, ფაბრიკული ქსოვილების გვერდით, საოჯახო ნაწარმსაც თავისი მომხმარებელი ჰყავდა. ამ მდგომარეობას გამოხატავს გურიაში დღემდე დაცული სახელწოდებანი: „ღარაიას ქიცა“ და „სალაბე ქიცა“ (ქიცა — თავსაფარი). უნდა იხიცი ითქვას, რომ შინნამზადი ქსოვილების ამსახველი ზოგადი ტერმინების დასახელებას ერიდებიან და ხშირად გაიგონებთ; საჩოხე, საყაბალახე, საკაბე, საშალვრე და ა. შ.

XIX ს. თან მიჰყვა საოჯახო წესით დამზადებული ქსოვილების წარმოებაც. „„ფაბრიკულმა ნაწარმმა სიიაფითა და სილამაზით კონკურენცია გაუწია შინაურ ნაწარმოებს და ყველგან დაამარცხა“ — ვკითხულობთ 1899 წლის ქართული გაზეთის ფურცლებზე¹⁵. ამასვე ამოწმებს 1905 წელს რუსულ ენაზე გამოსული გაზეთაც¹⁶.

XX ს. დასაწყისში გურიაში ფაბრიკული ქსოვილების ასორტიმენტი საგრძნობლად იზრდება. საზამთროდ იყიდება: დიაგონალი, ტერნო, ყარამანდულა, შივიოტი, ინდიგო, კავერკოტი. წელიწადის სხვა დროს ჩასაცემლად გამოიყენება: ლეპერტინა, პოპლინი, ცინდელის სატინა, ატლასი, აბრეშუმი; ჯუჯანეთი — ფოთლებიანი „ბატისტია“, „ქისაია“—ჯვრისწერის კაბად გამოსადეგი უთხელესი საკაბე. ჩამოთვლილთაგან კარგი ხარისხის მასალა საგარეო სამოსელის დამზადებას ხმარდებოდა, საშინაოდ ჩითეულობა და სატინაც საკმარისი იყო, საცვლებად ბატისტები და მარკიზეთი მოსწონდათ, აქედან „მიდაპოლანის“ ბატისტი საუკეთესოდ ითვლებოდა და მისი ფასი ათი — თორმეტი კაპიკი იყო; ორმაგი ბატისტი თხუთმეტი კაპიკი ღირდა ჩითი — ორი, ხუთი შაური; „ცინდელის“ სატინას, რომელსაც მუჭში მოიმწყვდევენ, ექვსი აბაზი უნდოდა, ამაზე ზევით მხოლოდ კარგი ხარისხის აბრეშუმი და შალი იყიდებოდა. საუკეთესო შალის ფასი რვა აბაზს არ გადასცდებოდა. სიიაფის მიუხედავად, კარგი ხარისხის ქსოვილის შექმნა ღარიბი გლეხის საოცნებო საგანს წარმოადგენდა.

გურულები ტანსაცმლის მასალას ადგილებზე გახსნილ სავაჭრო დუქნებში იძენდნენ. გარდა ამისა, ფართალს ბაზრობის დროსაც ყიდულობდნენ, რომელიც დაბეზსა და მსხვილ სასოფლო ცენტრებში კვირის განსაზღვრულ დღეებში იმართებოდა. დღეების მიხედვით ბაზრობებს ერთიმეორისაგან ანსხვავებდნენ: ზოგი ოთხშაბათობა იყო (ნაგომარი) და ზოგიც პარასკეობა (ოზურგეთი, ჩოხატაური). ყოველწლიური, მრავალდღიანი ბაზრობა — „იარმუკობა“, რომელ-

¹⁵ სოფელი, სოფლის ცხოვრება, გაზ. „კვალი“, № 35, 1899.

¹⁶ По Гурин (продолжение), газ. «Кавказ», № 100, 1905.

საც აქ „ქალაქობაც“ ერქვა, უფრო დიდ არჩევანს სთავაზობდა მოსახლეობას. აღმოსავლეთ საქართველოსაგან განსხვავებით, სადაც ხელზე ვაჭრობა იყო განშორებული, დასავლეთ საქართველოსათვის სწორედ ეს საკვირაო და ყოველწლიური ბაზრობები ყოფილა დამახასიათებელი¹⁷. გ. გოგიჩაიშვილი დასავლეთ საქართველოში მისთვის ცნობილ 12 წლიურ ბაზრობას ასახელებს, რომელთაგან 6 ორკვირიანი, 8 თითო კვირიანი და 3 თითო დღიანი იყო. მათ შორის უნდა ვიგულისხმოთ გურულებისათვის კარგად ცნობილი „ქალაქობანაც“ — საჯავახოში, ჭუმათში, კოხნარში, ერკეთში და ყველაზე პოპულარული ორკვირიანი ნაგომრობა, რომლის საეაქრო ოპერაცია, თ. სახოკიას დამოწმებით¹⁸, აღემატებოდა ჭუმათისა და საჯავახოს ოპერაციებს.

„ნაგომრობა“ 13 ივლისს იწყებოდა და ორ კვირას გრძელდებოდა. მთხრობელთა გადმოცემით ელიობას „შუა ქალაქობა იყო“. ამ დღეებს ემთხვეოდა დღესასწაული—„მარინობაც“, რის გამოც ბაზრობა უფრო ხალხმრავალი ხდებოდა. თ. სახოკიამ ასე აღწერა ეს ბაზრობა; „ნაგომრობა ერთ საუკეთესო ბაზრობად უნდა ჩაითვალოს... ვაჭრობის საგანი ფართლელი და სოფლებიდან შემოტანილი ნაწარმოებია, ყველაზე მეტად შემოაქვთ აბრეშუმი, ძაფათ ამოღებული აქაური. აქაურებისავე ნაქსოვი დარაია, რომლის ალაბი ექვსი შაურიდან სამ აბაზამდე იყიდება. ნაქსოვი, საზოგადოდ, ტლანქია, გაცილებით ჩამოუვარდება ს. ხონში ნახელ-საქნარ დარაიას. აქვე ჰყიდიან დარაიის საზაფხულო ყაბალახებს; თითოს 2 მ.“¹⁹. ამ ბაზრობაზე ვაჭრები მოდიოდნენ აგრეთვე ქობულეთიდან, ბათუმიდან, ახალციხიდან, კულაშიდან ქუთაისსა და თბილისიდან. აღნიშნულს გარდა გურულებს გასაყიდად გამოქონდათ; ფრთოსანი, ოთხფეხი, ხილი, თაფლი, ღვინო, არაყი; ასევე ხელოსნური ნაწარმი; გიდელ-გოდორ-კალათა, ჭილოფი, ხისა და თიხის ჭურჭელი და სხვ. ვახუშტი ბატონიშვილის ცნობით, XVIII ს. დასავლეთ საქართველოში ვაჭრობას სომხები და ებრაელები მისდევდნენ. შემდგომში, გურიაში ამ საქმეში ლაზები და ქანებიც ჩაებნენ. XIX ს. 70-იანი წლებიდან, როცა დახლთან დგომას გურიაში აღარ თაკილობდნენ²⁰, ამ საქმიანობას ძირითადად გურულები წარმართავდნენ. ასეთი

¹⁷ ფ. გოგიჩაიშვილი, დასახ. ნაშრ., გვ. 134.

¹⁸ თ. სახოკია, მოგზაურობანი, თბ., 1950, გვ. 67.

¹⁹ იქვე, გვ. 67.

²⁰ Д м. Б а к р а д з е. Археологическое путешествие по Гурии и Ад-чаре (с атласом), Санктпетербург, 1878, с. 3.

მდგომარეობაა ხელოსნობაშიც. მოვაჭრეთა რაოდენობის მხრივ გურიის თემებიდან ყველას ლიხაური გამოეყოფოდა, ვაჭრული თვისებებით კი ოზურგეთლები და ხიდისთაველნი, რომელთაც უსწორო ყანთარით და მოკლე ალაბით უმოწყალოდ უყვლეფიათ გურიის ჰცხოვრებნი.

საბაზრო დღეთა საგანგებო შერჩევა შემთხვევით არ მომხდარა აქ ანგარიში გაეწია სამუშაოთა განაწილების იმ ძველ წესს, რომლის მიხედვით კვირის ყოველი დღე გარკვეულ სამუშაოს ჩასატარებლად იყო ვარგისი.

გურიაში არსებული ძველი რწმენის თანახმად, კვირის დღეებიდან ზოგი წარმო იყო და ზოგიც უკუნი. გურულ მთხრობელთა ჯადმოცემით, წარმო უკეთესი დღეა, უკუნი იმის მიმდევარი. ორ კვირაში ენაცვლებიან ერთმანეთს, წარმო კიდევ დაგვირდება, უკუნი ერთხელ; წარმო ნათელია და უკუნი ბნელი. ერთი საარქივო მასალით²¹ წარმო დღეებში მცენარის ორგანიზმში წვენის მოძრაობა სწარმოებს, უკუნში არა. ძველად გურიაში საქმეებსაც ამის მიხედვით ანაწილებდნენ. წარმო დღეზე დაწყებული საქმე ადრე და წარმატებით თავდებოდა²².

აპ. წულაძის მონაცემებით, ახალ მთვარეზე ხუთშაბათი და შაბათი უკუნია, დანარჩენი — წარმო, ძველზე პირიქით. მ. თავდუმეძის მასალებით ოთხშაბათი და კვირა არც წარმოა და არც უკუნი, პარასკევი კვიმატია, დარჩენილთაგან ორი წარმოა და ორიც უკუნი. ტრადიციული, მაგრამ ამჟამად უკუგდებული წესებით უკუნზე იმარხებოდა მიცვალებული — უკუნისამდღე აღარ მოაკითხავდა ოჯახს; ამ დღეებში სჭრიდნენ ხეებს, განსაკუთრებით „სახხო ხეებს“, რომლითაც საწნახელს, ნავსა და სახლის ფიცრებს ამზადებდნენ; ბედელსა და ხულასაც პირველად უკუნზე „შესძრავდნენ“ და ახალ სახლშიაც ამ დროს გადავიდოდნენ²³. დასახელებულ დღეებში თავს არ დაიბანდნენ, მაკრატელს ხელს არ ახლებდნენ — ცუდად წავა ოჯახის საქმეო. ძველად სწამდათ ბუჯერობა (ბარაქა) და ხელადი (კაი ხელი), უკუნ დღეებში ოჯახიდან არაფერს არ გასცემდნენ — ხელი გადაყვებო. თუ აუცილებელი იყო წესის დარღვევა. მაშინ ან ცოტას მოაფტკენიდნენ, ანდა მიწაზე დასდებდნენ; ზოგიერთი მორწმუნე კი ვაზის ქვეშ გაატარებდა ოჯახიდან გაცემულ ნივთს, ხელი არ გადაჰყვეს და ოჯახს ბარაქა არ გამოელიოსო; წარმოზე

²¹ მაკარი თავდუმეძის მასალები, დაცულია ქ. მახარაძის მხარეთმცოდნეობის მუზეუმის არქივში, ინვ. № 34, გვ. 21.

²² აპ. წულაძე, დასახ. ნაშრ., გვ. 156.

²³ იქვე, გვ. 122.

სცოდნიათ საძიკველის დასკვნა, თმების შეკვეცა, დათესვა დარგვა, დამყნა, ყამირი მიწის გაკათვა, სამგზავროდ წასვლა. ახალ ტანსაცმელს წარმოზე დაჭრიდნენ, კიდეც შეიკერავსო.

უფრო ძველია გურიაში დაცული სხვა წესი, რომელიც სამეწაოს შესრულებას მთვარის ფაზებს უფარდებს. საერთოდ მიღებული აზრით, საქმისათვის კენტი მთვარე ყოფილა კარგი. ცუდად მიაჩნდათ ორი და თორმეტი მთვარე. არც შეიღში დაიწყებდნენ საქმეს — გაგიმტყუნებდნენ. ისე სხვადასხვა თვის ზოგიერთი დღეც საქმისათვის არ ყოფილა სასურველი²⁴.

ძველი მთვარის დადგომამდე რამდენიმე ეტაპს გამოყოფდნენ: ჩვილ მთვარეს, შუა მთვარეს, მატებიან და შევსებულს — ცხრომამდე. ოთხ დღემდე მთვარის სიჩვილის გამო ზოგიერთი საქმის დაწყებას გაუბრძოდნენ. გასული საუკუნის მიწურულში ტ. მამალაძეს შენიშნავდა, რომ არცერთი საქმეს ახალ მთვარეზე არ იწყებდნენ, ელოდებოდნენ საესე მთვარეს²⁵. მამალაძის ცნობის მიხედვით გამოდის, რომ ყველა საქმის დასაწყებად საესე მთვარე იყო სასურველი. მთხრობელები კი გვიყვებიან, რომ ამისათვის მატებიანი მთვარეც არ იყო ურიგო, რადგან საესე მთვარის მსგავსად ამ დროს შესრულებული ზოგიერთი საქმე (მაგალითად ტეხა-კრეფა, არყის გამოხდა და სხვ.) ხვადიანი იქნებოდა. ამ მხრივ სრული მთავრე საუკეთესო პერიოდი იყო საერთოდ და კერძოდ, ახალი ტანსაცმლის დასაჭრელადაც.

სხვა საქმიანობის აკვეთასთან ერთად კვიმატ დღეს არც ტანსაცმელი იჭრებოდა. „ამ დღეებში დაბადებული გამოვიდეს საწყალი, ღარიბი, დღემოკლე. ყიდვა-გაყიდვა არ ვარგა, მგზავრობა, ქორწინება. ავად გახდეს ძნელად მორჩეს. თესვა, აშენება, დაჭრა-შეკერვა. ყოველგვარი მოძრაობა გაუგებარია (ნაგინებია)“²⁶.

ჩამოთვლილ დღეთა გარდა, წელიწადის კალენდარული დღესასწაულებიდან, (ე. წ. მაგარი დღეები), ზოგიერთი ესევე საბძინლო ყოფილა. 29 აგვისტოს ნათლისმცემლის თავის კვეთის დღეს სისხლი არაფრისათვის არ უნდა ეღინებინათ. ამ დროს მუშაობა საფუძვლიანი არაფრისა ვარგოდა. ბარბარობას თმებს არ დაივარც-

²⁴ მასალა მთვარის დღეების შესახებ დაცულია ჩოხატაურის მხარეთმცოდნეობის მუზეუმის არქივში.

²⁵ Т. М а м а л а д з е. Народные обычаи и поверия Гурийцев, Сборник материалов для описания местностей и племен Кавказа, вып. XVII, отд. II Тифлис, 1893, с. 114.

²⁶ გურის 1978 წლის ექსპედიციის მასალები, რე. № 2, გვ. 170; ქ ს ე ნ ე ა კ ა რ ს ა ნ ი ძ ი ს ჩ ა ნ ა წ ე რ ე ბ ი.

ჩინდნენ. ქათმები სახურავს აგვიბუღნიანო, არც შეკერავდნენ—ქათმები ჩხუბს დაიწყებენო²⁷. საკალანდოდ სახლში შეტანილი ჩიჩილაკი 6 იანვრამდე რჩებოდა იქ. მერე მას მარანში გაიტანდნენ, სადაც რამდენიმე წელიც ეკიდა ხელშეუხებები. მისი გატანის დრომდე იმ ოთახში, სადაც ეს საახალწლო მოსალოცი იდგა, დართვა და კერვა არ შეიძლებოდა²⁸. დიდმარხვის პირველ დღეს ყვავილმოუბდელი ქალები თმებს არ დაივარცხნინდნენ, წიგნს არ წაიკითხავდნენ და არც შეკერავდნენ რამეს. სჯეროდათ, რომ რამდენი კბილიც ჰქონდა სავარცხელს, რამდენი ასოც იყო წიგნში და რამდენ ნაკერსაც გააქეთებდნენ, იმდენი ნიშანი დააჩნდებოდათ²⁹.

ძველი დროიდან მომდინარე ამ წესებმა სახეცვლილი სახით მოაღწიეს ჩვენამდე. გურიის ექსპედიციებში (1977, 1978 წწ) ჩაწერილი მასალების მიხედვით, გურულებს ტანსაცმლის დასაპრელად სამშაბათი, ხუთშაბათი და შაბათი ჰქონიათ შერჩეული. ეს დღეები დაბედების დღეებად ითვლებოდა და ლოცვაც ამ დღეებში იყო შემრგე. აქედან, სამშაბათს დაჭრილს შავი მოუწევსო, ამიტომ ამ დღეს მხოლოდ სამგლოვიარო ტანსაცმელს გამოსჭრიდნენ. თან შავის დაჭრამდე მაკრატელს ფერად ქსოვილს გააჭრევიებდნენ, ოჯახს შანი არ დაებედოსო. გადმოცემით იციან, შავს რომ იკერავ, წარმოდღე არ უნდა შეგვხვდეს, კიდევ დასჭირდებაო. შაბათი, როგორც ნაკლული დღე მოზარდის სამოსელის გამოსაპრელად არ ვარგოდა. დღენაკლები იქნებოდა. ეს დღე, როგორც მთელს საქართველოში შუადღის შემდეგ საუქმო იყო. „უკანასკნელ ნემსსაც არ იხმარდნენ, არ იყო ნება. ზოგიერთი ქალი სუნელს არ დანაყავდა ისე ეკრძალებოდა“³⁰. კვირას დიდებისათვის შეეძლოთ ჩასაცმელის გამოჭრა, უფრო კობტა გამოვა. კვირის დარჩენილი დღეებიდან ოთხშაბათს, კუდიანობის დღეს, დაჭრა არ ვარგოდა—მოკლე გამოვავო; პარასკევს ცეცხლში დაიწვევბო. ზოგიერთი ავტორი³¹ პარასკევის აკრძალვას ქრისტეს ჯვარცმის დღესთან აკავშირებს, როცა ყოველი ქრისტიანისათვის რკინის იარაღის ხმარება აკრძალული იყო.

დაჭრისათვის დილის საათებს ურჩევდნენ, მზის გადახრის უამს მუშაობას: უნდა დავეთხოვოთ მზე ჩადის და თან არ ჩაეაყოლოთ.

²⁷ გურიის 1977 წლის ექსპედიციის მასალები, რე. № 1, გვ. 38.

²⁸ Т. М а м а л а д з е. Указ. соч., с. 40.

²⁹ Н а к а ш я д з е. Новый год и другие обряды гурийцев, газ. «Кавказ», № 27, 1848.

³⁰ გურიის 1977 წლის ექსპედიციის მასალები, რე. № 2 გვ. 15, 16.

³¹ აბ. წ უ ლ ა ძ ე, დასახ. ნაშრ., გვ. 155.

დაქრის დროს ლოცვაც აუცილებელი ყოფილა: უკეთეს უკეთესის შეეკრვაშიო, უანგარიშოს დაცვეთაშიო და ა. შ.

ახალ ტანსაცმელს შობა-აღდგომისათვის იმზადებდნენ. აღდგომის ტანსაცმელს წინა — ვნების კვირაში დაქრიდნენ და შეეკრავდნენ. ამ კვირის ყველა დღე დიდი იყო. იტყოდნენ. დიდ ხუთშაბათს და დიდ შაბათს გამოჭრილი კარგია, პატრონს დიდი დღე ექნებაო. სამეგრელოში არსებული წესისაგან განსხვავებით, სადაც ახალ ტანსაცმელს ისე არ ჩაიცვამდნენ, რომ ჭერ მარჯვენა ფეხით არ გაეთელათ³², გურიისში ახალი კაბით პირველად წყალს მოიტანდნენ, ალარ დაიწვებო³³.

გურიაში გავრცელებული ტრადიციული სამოსელი ძირითადად ადგილობრივი ძალებით მზადდებოდა. XX ს. ფეხმოკიდებული ახალი ფორმის ჩაცმულობას კი „მოდისტკებთან“ განსწავლული შეგირდები ეკრავდნენ. რადგან ამ პერიოდში საკერავი მანქანებიდან გრიელშაქოიანი „ცენტრალი“ და მრგვალმაქოიანი „ზენგერი“ ჭერ კიდევ არ იყო გახშირებული, ამიტომ ქალებს ისევ მამაპაპური წესით ხელით უხდებოდათ მუშაობა. იცოდნენ გვირიშითა და გაცუდვით კერვა. ეს უკანასკნელიც მაგარი ნაკერი იყო, მაგრამ პირველზე ნაკლები. ლამბის სანაცვლოდ ხმარობდნენ ტერმინს — „დალუხტკრა“ (ჩოხატაურის რ.). XX ს. დასაწყისში საკერავ მანქანებთან ერთად გურიისში ჩულქის საქსოვი მანქანებიც შემოუტანიათ³⁴. თერძთან კაცის ტანსაცმელიდან ჩოხა-ახალუხის შეეკრვა 3 მ. ღირებულა, „მოდისტკას“ ქალის კაბაში 1 მ. უხდიდნენ. ზოგიერთი ოსტატი თანაუგრძნობდა თურმე სოფლელ ქალებს და ზოგჯერ ნატურით (1 ბაუშანი სიმინდი), ან ყანაში მოხმარებით იღებდა შრომის საფასურს³⁵.

XIX საუკუნის ბოლო მეოთხედში გურიაში გახსნილ სამრევლო სკოლებსა თუ საქალაქო სასწავლებლებში ან შინა მასწავლებლებთან დანიშნული ხელსაქმის გაკვეთილები ხელს უწყობდა ქრა-კერვის მცოდნე პირთა სიმრავლეს. ამ კუთხეში ბოლო დრომდე შემორჩენილი ერთი ძველებური რიტუალიც³⁶, რომელიც ბავშვის კიპის მოჭრის დროს, დაბედების მიზნით, გოგონებისათვის მაკრატელსა ან ჩეჩიასათვის ხელის მოკიდებას ითვალისწინებდა, იმაზე მიგვითითებს,

³² ა რ ქ ა ნ ჭ ე ლ ო ლ ა მ ბ ე რ ტ ი, სამეგრელოს აღწერა, მთარგ. აღ. კუონია, მეორე გამოცემა, თბ., 1938, გვ. 147.

³³ გურიის 1978 წლის ექსპედიციის მასალები, რე. № 1, გვ. 121.

³⁴ საპასუხო წერილი ხიდისთაიდან (გურია), გაზ. „კვალი“, № 11, 1901.

³⁵ აბ. შ უ ლ ა ძ ე, დასახ. ნაშრ., გვ. 84.

³⁶ გურიის 1977 წლის ექსპედიციის მასალები, რე. № 2, გვ. 51.

რომ აქაც, საქართველოს სხვა კუთხეთა მსგავსად, დიდ მნიშვნელობას ანიჭებდნენ ქალის ხელსაქმობას.

ტანსაცმლის ფორმათა გავრცელების ხარისხი დიდად იყო დამოკიდებული მოსახლეობის ყველაზე მრავალრიცხოვანი ნაწილის — გლეხობის ქონებრივ შესაძლებლობაზე. ინფორმატორთა ცნობით, გლეხობა სამ ჯგუფად ნაწილდებოდა: მდიდარი ანუ ვაშალაშინებული, საშუალო ანუ სულმოდგმული „წამოპუქურებული“ და ლატაკი — სულმიღნავებული. გლეხთა ამგვარ მდგომარეობას ახლობლები და მეზობლები ოჯახის ქონების მიხედვით ამჩნევდნენ, უცნობი და შორეულნი ტანსაცმელითაც შეიტყობდნენ. დღესაც იგონებენ მოხუცები: „ძველად სამნაირი გლეხი იყო კარგი ჩაცმული — თავადიშვილური ჩაცმულობა, საშუალო ჩაცმულობა — გლეხური და ღარიბული ჩაცმულობა, გლახას ღარიბს ეტყვიან. ამას ქალამანიც დაგლეჯილი ეცვა, იგიც არ ქონდა ინახავდნენ“³⁷. /თუ ვერწმუნებით მთხრობელთა ცნობას, XIX საუკუნის ბოლოსა და XX ს. დასაწყისში სოფელის ტიპიურ სახეს საშუალო შეძლების გლეხი იძლეოდა, რომელიც რიცხობრივადაც ორივეს ჭარბობდა. ასეთ გლეხად ის ითვლებოდა, ვისაც რამდენიმე ქცევა მიწა ჰქონდა, კარგი სახლი ედგა და საქონელიც ყავდა. ყველაფერი ეს კი ახალი დროის მონაპოვარი იყო. ძველად, იგონებდნენ მთხრობელები, გლეხებს საშუალებაც რომ ჰქონოდათ, უფლება იმის ნებას არ იძლეოდა, რომ ფიცრულ-ყელური სახლი აეშენებინათ. მათ ტალახით შელესილ ფაცხაში უნდა ეცხოვრათ³⁸.

ახალმა დრომ ახალი მოთხოვნების წინაშე დააყენა მოსახლეობა. ძველი სახლი და ძველებური ავეჯი აღარავის მოსწონდა, არც ერთი ხელი „სამკვდრო-სასიცოცხლო“ შინ დამზადებული ტანსაცმელი აკმაყოფილებდათ. ცხოვრების ახალი წესით მოწყობას კი დიდი თანხა სჭირდებოდა. ძველად გურიაში მოწონებულმა ოჯახის „დაზენვილების წესმა“, რაც ძველი სიმიდისა თუ პურის შენახვას გულახსმობდა³⁹, აზრი დაჰკარგა და მიწის მფლობელმა გლეხმა ოჯახის ჭარბი პროდუქტი ბაზარში გაიტანა და ფულად აქცია.

XIX ს. I ნახევარში გურიაში წამყვანი კულტურა ყოფილა სიმიინდი, ლეინო და აბრეშუმი⁴⁰. აბრეშუმს არც XIX ს. II ნახე-

³⁷ გურის 1978 წლის ექსპედიციის მასალები, რვ. № 2, გვ. 126.

³⁸ საარქივო მასალა, მ ი ხ ე ი ლ რ ა მ ი შ ვ ი ლ ი, ს. ერკეთის ისტორია (1962), დატულია ჩოხატაურის მხარეთმცოდნეობის მუზეუმში.

³⁹ სოფ. ნიგოთის (გურია) ქონებრივი მდგომარეობა, ვაზ. „კვალი“, № 35, 1899.

⁴⁰ Ф. К—с к и й, Гурья и ея новое производство, газ. «Кавказ», № 146,

ვარში დაუკარგავს მნიშვნელობა. ამ პერიოდში ზემო გურიაში თამბაქოს კულტურა იწყებს დაწინაურებას და აბრეშუმთან ერთად გლეხის სამოსელის შესაძენ ერთ-ერთ ძირითად წყაროდ იქცევა⁴¹. „ცნობის ფურცელი“ გვაუწყებს, რომ ზემო გურიაში იშვიათად ყოფილა ისეთი გლეხის ოჯახი, რომელსაც წელიწადში 20—30 თუმნის თამბაქო არ გაეყიდა. თავად-აზნაურთა ოჯახებში ამ გზით მიღებული შემოსავალი კი 50—60 თუმანს შეადგენდა⁴². ნაკლები მიწის მქონე გლეხობამ ფულის შოვნის სხვა გზა მოძებნა. მან სამუშაოს საწოვნელად აზოვისა და შავი ზღვის სანაგისადგურო ქალაქებს მიაშურა. ამავე მიზნით ზოგიერთი ციმბირშიაც მოხვდა⁴³. გურულთა ასეთ დენადობას არამარტო ფულის დაგროვება მოჰყოლია შედეგად, არამედ ტანსაცმლის მზა ფორმების შემოტანის წყაროც გამხდარა, რასაც არანაკლები მნიშვნელობა ჰქონია გურიაში ჩაცმულობის ახალი ფორმების გავრცელებისათვის.

ტანსაცმლის ახალი ტიპის შემოღების საკითხის გაშუქების დროს გასათვალისწინებელია კიდევ ერთი გარემოება. კერძოდ, გურულთა ხასიათის ერთი თავისებურება, საქართველოში შეუძენველი არ დარჩენილა გურულთა ჩქარ-ცვალებადი ხასიათი. აკაკი წერადა, რომ ასე ადვილად მიმბაძველი ხალხი ცოტა მოიძებნება ქვეყანაზე⁴⁴. ამ მხრივ განსაკუთრებული მონდომებით არიან დახასიათებული გურული ქალები, ისინი, რომელთა გარეგნობამ ზოგიერთს⁴⁵ სამხრეთ იტალიის ქალები გაახსენა. „ვინც გურიის ხალხს ცოტათი მაინც იცნობს, იმას არ გაუკვირდება აქაური ქალების ამგვარი ქცევა. ბევრი ხალხი არ უნდა მოიძებნებოდეს ქვეყანაზე იმდენათ ბუნებით ცოცხალი, მოძრავი, ყველაფერი ახლის და უცხო რამესი ადვილად მიმღები და შემთვისებელი, როგორც გურულებია. ყველაფერს ახალს და უცხოს, როგორც კარგს, ისევე ავსაც, გურული ძალიან მალე ითვისებს. ჩვენებური სოფლის ქალი ხედავს, რომ ოზურგეთის „განათლებული და სწავლული“ ქალები ძალიან ფრანტი, მდიდრულად მოდაზე შეკერილი კაბებით ირთვებიან: მაშასადამე ტან-

⁴¹ დ. ზიდისთავი და აქაური ჩარჩები (წერილი გურიიდან), ვაზ. „ივერია“, № 174, 1897.

⁴² ზემოგურული, გურიის მეთამბაქოეთა მდგომარეობა, ვაზ. „ცნობის ფურცელი“, № 1651, 1901.

⁴³ აკაკი, ხასიათები, სტატია მესამე, ვაზ. „დროება“, № 8, 1875; ქ. გ. ვ. ბ. რ. ა. მ. ძ. ე., გურია; ეურნ. „მოგზაური“, № 1, 1901; წერილი გურიიდან, ვაზ. „ივერია“, № 37, 1878.

⁴⁴ Из Гурин, газ. «Кавказ», № 30, 1865.

საცემელშიაც განათლება ყოფილაო და ვინც სწავლული და განათლებულია, უთუოდ ფრანტათაც უნდა ეცოსო! ამის მოსაზრე ჩვენებური ქალები მოსდგნენ და იკერავენ რათაც უნდა დაუჯდესთ, ძვირფას კაბებს“⁴⁵.

აკაკისაც აწუხებდა გურულის კოხტაობის საკითხი⁴⁶. ნაგომარის იარმუკის ერთ-ერთი მხილველი წერდა „... წახდა, ბატონო, დრო, ქვეყანა გაირყვნა, ყველაფერში თვალთმაქცობა და მეტიჩრობა შემოვიდა. სხომის რომ დარაიას (შინ მომზადებული აბრეშუმის მატერია) მოექსოვდით და პერანგად შევიკერავდით, ხუთი წელიწადი ნეცვა და კიდევ მოწონება ჰქონდა: ახლა რომ ნათლი-მამას დარაიას საპერანგე გავუგზავნე, საყვედური შემომითვალა, რეიზა გამაგლებო, ახლანდელ დროში ტილო და შიტკალი გლესსაც კი აცვიოაო და მე ხომ აზნაურიშვილი ვარო! უშალისკაბოთ ქალი გარეთ ვერ გამომიყვანია; ჩვენებურს ყოლიფერს ფასი და მოწონება აკლდება, უცხოს და გარეშეს დღითი-დღე ემატება...“⁴⁷ ეს მდგომარეობა შეუმჩნეველი არ დარჩენია ეგნ. ნინოშვილსაც⁴⁸.

მოდურ ჩასაცმელს და „ტანცაობა“ თუ „ვიზიტების“ წესს, ცხადია, უპირველეს ყოვლისა მაღალი საზოგადოების ქალები შემოიტანდნენ და ისიც ოზურგეთში, სადაც ძველთაგანვე გურიელთა სახლი ევროპული კულტურის გადმოღების საუკეთესო მაგალითს იძლეოდა⁴⁹. მაგრამ მონაცემები იმის მაუწყებელნიც არიან, რომ ამ ხმას გლესის ქალებიც აპყოლიან. გურულ სოფელელ ქალთა ეს ნიშბაძველობა გაზეთის ერთ-ერთ კორესპონდენტს⁵⁰ შედარებული, აქვს ევროპის არისტოკრატთა იმ საქციელთან პარიზის ტანთ-ცმა და ქცევა ეტალიონად რომ გაიხადეს. ოზურგეთთან ერთად მისაბამ-მაგალითს ხიდისთავის მცხოვრებნიც იძლეოდნენ, რის გამოც ზემო გურიაში მას ხუმრობით „პატარა პარიზს“ ეძახდნენ.

ზემოთ ვთქვით, რომ საშოვარზე გასული კაცების მეშვეობით ახალი ფორმის ჩასაცმელი გურიაში უშუალოდ რუსეთის ქალაქებ-

⁴⁵ ქ ა ლ ე ბ ი ს ე რ თ გ უ ლ ი, ნაგომარის იარმუკა გურიაში, ვახ. „დროება“, № 100, 1875.

⁴⁶ ა კ ა კ ი, „ლუკმა გავარდესო, ჯამში ჩავარდესო“, ვახ. „დროება“, № 450, 1874.

⁴⁷ ქ ა ლ ე ბ ი ს ე რ თ გ უ ლ ი, დასახ. სტატია.

⁴⁸ ე გ ნ. ნ ი ნ ო შ ვ ი ლ ი, იუმორისტული ფელეტონი, გურიის ამბები, თბზ. სრ. კრ., ტ. III, ტფ., 1935, გვ. 9.

⁴⁹ Н. Д у н к е л ь - В е л и н г. Из записок о Гурни (продолжение), газ. «Кавказ», № 82, 1853.

⁵⁰ ქ ა ლ ე ბ ი ს ე რ თ გ უ ლ ი, დასახ. სტატია.

დან შემოდიოდა. მაგრამ ძირითად მიმწოდებლად ქალაქები ქუთაისი და თბილისი ითვლებოდნენ, სადაც ამგვარ ჩაცმულობას მტკიცედ ჰქონდა ფეხი მოკიდებული.

მთხრობლები იცნობენ გურიაში გავრცელებული სამი ტიპის ჩასაცმელს „გურული“, „ქართული“ და „რუსული“ სამივე პირობითი ტერმინებია. მაგრამ პირველი გურულობას ვერ დაიმკვიდრებს. და ბოლოს სახელწოდებად „ევროპული“ უფრო მორგებული იქნება. ე. წ. გურულ ტანსაცმლად კაცის ჩაქურჩიანი კომპლექსი და ქალის ტანსაცმელიდან „ქართულ ჩაცმულობამდე“ არსებული ფორმაა ნავარაუდევია. მთხრობელებს კარგად ახსოვთ ჩაქურჩიანი ერთობის ყველა ელემენტი, სამაგიეროდ ვერაფერს იხსენებენ ქალის ტანსაცმლის შესახებ. ამის მიზეზი კი ის უნდა იყოს, რომ ქალის ეს კომპლექსი XIX საუკუნის II ნახევარში გასულია მოხმარებიდან, მაშინ, როცა ჩაქურჩა ჩოხა-ახალუხის შემოღების შემდეგაც განაგრძობს არსებობას და XX ს. ინახავს თავს, როგორც მობურთალ-მოცეკვავეთა ფორმა.

საქართველოს ერთიანი ეთნოგრაფიული გამოფენის მეგზურში ვკითხულობთ: „...გამოფენაზე წარმოდგენილია მაღალი წოდების გურული ქალის ტანსაცმელი ელეგი სახელოებიანი (ზედატანი), რომელსაც გაჭრილი სახელოების ნაწიბურები და გულისპირი მდიდრულად აქვს მოქარგული, ოჭრომკერდის ნაქარგი სარტყელი და გულისპირი, ლეჩაქი, აბრეშუმის კაბა, და ტყავის ქოშები“⁸¹.

აღნიშნული კომპლექსი შერეული ხასიათისაა, მისი ერთი ნაწილი, კერძოდ, კაბა, ლეჩაქი, დალალები და ქოშები შერჩეულია გურული ქალის იმ ერთობის შესაესებად, რომელიც მუზეუმში 5—11 ნომრითაა აღრიცხული. ეს ნივთები მუზეუმში შემოსულია 1911 წლის 29 აგვისტოს, ადგილად ქუთაისის გუბერნიის ოზურგეთის მაზრის ქ. ოზურგეთის დასახელებული, მომხმარებლად გურულები, მეპატრონედ ნინო კაციას ასული გურიელი, დაბადებით დადიანი. კოლექცია 5 ელემენტისაგან შედგება და ეთნოგრაფიის განყოფილების საინვენტარო დავთარში გურული ქალის ძველებური კოსტიუმის სახელით არის გატარებული. კოლექციის შემადგენლობაში შედის ზედატანი, სახელოები; გულისპირი და სარტყელი.

მოკლე ზედატანი (№ 4—11), რომელიც გარეთი სამოსელის ფუნქციას ასრულებს შინდისფერი ხავერდისაგან არის დამზადებული. იგი ხელითაა ნაკერი. ტანზე მომდგარი ეს სამოსელი მთლიანად დასარჩულებულია თეთრი მიტკლით; სახელოებს, რომელნიც

⁸¹ დასახ. მეგზური, გვ. 51.



აღწერილობით ყურთმაჯებად მოიხსენიებიან, მოყავისფრო აბრეშუმში აქვთ გამოკრული ზედატანი შედგება წინა ორი კალთისა, უკან ზურგისა და გრძლად დაშვებული დეკორატიული სახელოებისაგან, რომელთა სიგრძე (48 ს.) ილლიის ძირიდან 15 სმ. მერე შეხსნილია; ზედატანი მხრებშია გაკერილი. ტანზე გამოწყობისათვის წინა მხარის ორ ადგილას (5 და 8 სმ. დაცილებით) შიგნიდან გრძლადაა გამოკერილი (ნაპირიდან პირველის სიგრძე 19 სმ. მეორისა 11 სმ). აქედან პირველი შედარებით სწორედ მიემართება. მეორე განზე ილლიისკენაა გაზიდული. აირიბებული გვერდის ნაპირები ღრმად გადადის ზურგში: ზედატანის ბოლო შემოქობილია 1,5 სმ. სიგანის შვინდისფერი აბრეშუმით; შესაკვრელად დედალ-მამალი ხრიკა დაკერებული. წელსზევით სამოსელის ეს ნიმუში უხვადაა შემკულა. გულისპირისა და სახელოთა შეხსნილ ნაპირებს შემოსდევს ოქროსფერი სირმის გრეხილი, რომლითაც ყვავილოვანი სახეებია გამოყვანილი.

ქვედა სახელოები წ. (№ 55—11/2) მოყვითალო სახიანი ატლასისა: ხელით ნაკერი. ილლიის ხაზი 11 სმ. სიგრძის გაკერვის მერე ბოლომდე გახსნილია. სახელოთა ნაპირების ოქროსფერი სირმით ყვავილოვანი ნაქარგი შემოსდევთ. დასამაგრებლად სახელოებს მხართან მიტკლის ზონარი აქვთ მოკერებული.


გულისპირი (№ 5—11/3) მოყვითალო, სახიანი ატლასისა: კისერზე მოდებული და წინ გულისპირში ჩაშვებული ორი გახსნილი ნაპირით. ნაპირები ცოტათია გადაკეცილი და ხელით ამოხვეული. შიდა მხარეს ოქროსფერი არშია აქვთ შემოვლებული. ნაქარგი ისეთივეა როგორც წინა ნივთებზე მოვიხსენიეთ.

სარტყელი (№ 5—11/4) ატლასისა, გამოკრული აქვს თეთრი აბრეშუმის სარჩული. ნაქარგია ოქროს ძაფით; სარტყელს მიმაგრებული აქვს ორი ტოტი (№ 5—11/5), რომელიც იგივე მასალისაა და მსგავსად შემკობილი.


კომპლექსისათვის შერჩეული თეთრი კაბა აბრეშუმისაა, რომელსაც სიგრძე „მუარის“ თეთრი ზოლები დაუყვება. ხელით ნაკერი ეს კაბა ორნაწილიანია. კაბის ზედატანი ტანზეა მოყვანილი. იგი ზურგში და გვერდებზეა გაკერილი. გულისპირი ღრმად, ოთხკუთხედის ფორმაზეა ამოღებული აქვს გრძელი და მხრებთან სწორად მიდგმული სახელოები, რომელთა სიგანე ბოლოსაკენ იკლებს და მაჯასთან პირისფერი აბრეშუმით დასარჩულებული ყოშით მთავრდება. ილლიის ძირში ხიშტაკებია შედგმული. ზედატანი ქვედასთან



0 5 10 15




სურ. 1. ზებუნე



0 1 2 3

სურ. 2. კაბის სახელოები, გულსპირი, სარტყელი

დაკვეთილია მცირე სიგანის ქსოვილით, რომელიც ღრმა ნაკეცებით არის მიკერებული. ქვედატანი ხუთნაკრიანია. შედგება სამი დიდი განისა და ორი მომცროსაგან, რომელნიც ქვედატანის უკა-




სურ. 3. კაბა (თარგი)

ნა მხარეზეა მოქცეული. ქობალ თავისივე ნაჭერია გადაკეცილი. კაბა გამოირჩევა შეგულობით. მასალად ნახშირი აბრეშუმის ნაჭერი, რომელიც ზემოდან უხვალაა ნაქარგი ფერადი აბრეშუმის ძაფებით.

ორნამენტის სახე ყვავილოვანია; ნაქარგობაში ჩართულია ფერადი შუშის სხვადასხვა ზომისა და ფორმის მძივები, ესევე ფირფიტებაც.

აღნიშნულ კაბასთან ერთად კომპლექსის შეაჯსებად გამოყენებული ლეჩაქი სამკუთხი ფორმისაა და ნაქარგი მცენარული სახეებით შემკული; ქოში ყავისფერი ტყავისა, დაბალქუსლიანი.

დახასიათებული ერთობის გარშემო თავს იყრის გაურკვეველ საკითხთა წყება: შემადგენლობა, გავრცელება, მოხმარება და სხვ.



სურ. 4 კაბის შემკულობა

თავიდანვე ითქვა, რომ კამპლექსი გამოფენის მომწყობთა მიერ არის შერჩეული. სხვა მონაცემებთან ერთად, ისინი, ცხადია, ხელმძღვანელობდნენ გურული ლექსიკონითაც, სადაც გურული შეძლებული ქალის ტანსაცმელია აღწერილი: „ჯამფასის ნიფხავ-პერანგი, ყანაოზის კაბა, გრძელი, ნაოკიანი, გულზე აღილული. წელზე გრძელი, ბრტყელი აბრეშუმის; სარტყელი, რომელიც კაბის კალთის წინა ნაწილს შუაში ჩაპყვებოდა წელიდან ორფად. კერმუხტის ქოშები; თავხურვა ანუ ჩიხტი კოპი; კაკვილები; თავსრაკი (თავსაკრი) მო-

ქარგული, „გურჯელაი“-თვლიანი ქანძისთავი ზედმიზნეული: ლაჩაქი (ლეჩაქი, თავსრაკ-ლეჩაქი); ქათიბი (ბეწვიანი ჩასაცმელი)⁵².

ზემოთ დახასიათებული კაბა ლიტერატურაში ქართული კაბის ვარიანტად არის მიჩნეული⁵³ როგორც ვხედავთ, აქ ქართული კაბით შედგენილი აღმოსავლეთ საქართველოს ბარში ფართოდ და საქართველოს სხვა კუთხეებში ნაკლებად გავრცელებული ერთობაა წარმოდგენილი. გამოფენილი ასე სრულყოფილად არ გამოიყურება და ძირითად სხვაობას ბეწვიანი ქათიბის უქონლობა და მის სანაცვლოდ, მოკლე, წელამდე დასული სიგრძის, ჩასაცმელის ის ნიმუში იძლევა, რომელიც საქართველოს ერთიანი ეთნოგრაფიული გამოფენის მეგზურში სახელოებიანი ელეგის სახელით არის სახელდებული.

შესაძლებელია, დასავლეთ საქართველოს ბარის კლიმატური პირობები არც აყენებდა დათბილული ქათიბის გამოყენების აუცილებლობას. ელეგის შესახებ კი შემდეგი უნდა აღინიშნოს: ამ სახელწოდებით გურიაში დღემდე მოხუც ქალთა წრეში თავს ინახავს გულის დამკერი, მოკლე, უსახელოებო, გულამოცობული და წინ ღილებით შეკრული სამოსელი. როგორც ქალის, ასევე მამაკაცის გურულ-აჭარული სამოსელის ყველა კომპლექსში ელეგს შიდა სამოსელის ფუნქცია აკისრია, გარეთა სამოსლად კი ზუბუნია დასახელებული. სწორედ ქალის ასეთ გრძელ და წელამდე გვერდებზე-სწორე ზუბუნთან (№ 11—13/7), ამჟღავნებს სიახლოვეს ჩვენთვის საინტერესო ნიმუში, არა მარტო ფორმით, არამედ შემკულობითაც. ქარგვის მოტივის მსგავსებას თან ერთვის მოსაქარგავი საშუალებების ერთგვარობაც. ძველ (XVIII ს.) მზითვის წიგნებში⁵⁴ კაბა-ქათიბთან ერთად ზუბუნიც არის მოხსენებული.

ამრიგად, შეიძლება ვივარაუდოთ, რომ ზემოთ დახასიათებულ ერთობასთან წარმოდგენილი მოკლე ზედატანი, ძველად, გურიაში ქალთა წრეში გავრცელებული „აჭარულის“ მსგავსი ტანსაცმლიდან, კერძოდ, ზუბუნიდან უნდა მომდინარეობდეს. აქ განხილული ფორმა ადგილობრივ უნდა იყოს შემუშავებული და ქათიბის სანაცვლოდ მოხერხებულად გამოყენებული ქართული კაბით შედგენილ კომპლექსთან ერთად. ისიც უნდა აღინიშნოს, რომ „ქართული ჩაც-

⁵² გურული, ზემოქართული და ლეჩხუმური ლექსიკონი, გურულის შემდგენელი გ. შარაშიძე, თბ., 1938.

⁵³ დასახ. მეგზური, გვ. 51.

⁵⁴ მასალები საქართველოს სოციალ-ეკონომიკური ისტორიისათვის (მზითვის წიგნები), გამომც. მ. იაშვილი. თბ., 1974, გვ. გვ. 96, 107.

მულობის“ სრულყოფილება გურიაში თავსაბურავის ელემენტების არასრული გამოყენებითაც ხშირად ირღვეოდა. უმეტესად, ქართულ სარტყელ-გულისპირიან კაბასთან მარტო ლეჩაქით სკოდნიათ თავის დაბურვა, რომელიც აფხაზური წესით ჰქონიათ თავზე მოხვეული⁵⁵. გურული ქალის ეს ჩაცმულობა ქართული კაბით შედგენილი ერთობის ერთ-ერთ საინტერესო გამოვლენად უნდა მივიღოთ.

აღნიშნულ კომპლექსში გაერთიანებული ელემენტები აშკარად ხდიან მისი კუთვნილების საკითხსაც. იგულისხმება, რომ მოსახლეობის იმ მკირე ნაწილში, მაღალი საზოგადოების ქალთა გვერდით მდიდარი გლეხის ქალებიც უნდა მივითვალოთ. მისი გავრცელების არეალად საქართველოს გურია-სამეგრელო, რაჭა-ლეჩხუმი და აფხაზეთია მოხაზული⁵⁶.

აღმოსავლეთ საქართველოს ბარში ჩამოყალიბებული ქართული სარტყელ-გულისპირიანი კაბით და ქათიბით შედგენილი ჩაცმულობა ჯერ დასავლეთ საქართველოს ბარში, ხოლო შემდეგ საქართველოს მთიანეთის ზოგიერთ კუთხეშიც ვრცელდება, რომელიც თითქმის ყველგან იმეორებს ქართლ-კახური ჩაცმულობისათვის დამახასიათებელ ძირითად ელემენტებს. XIX ს. II ნახევარში, როცა ქართული კაბით მორთულ ქალებს „ახალი მოდის“ ჩასაცმელი მიუღიათ, „ქართულ ჩაცმულობას“ გლეხთა წრეში ვამოწმებთ, როგორც ჯვრის წერის დროს გამოყენებული სამოსელის ერთ-ერთ საუკეთესო ნიმუშს.

საგვირგვინო სახლართავიანი კაბა (ოქროსფერი, ჩალისფერი, ვარდისფერი, ცისფერი), სარტყელ-გულისპირიანი ყოფილა დაძვრიალეხულ-დაჯინჯილებული. ზემოდან მოსახურავი უნდოდა, ზამთარში უბეწვო ქათიბი ან ტალმა და ზაფხულში „პელენიკა“, რომელიც ტატილებით (წვრილი მძივებით) ყოფილა გაწყობილი. სწორედ ამგვარი სამოსელის მოხმარებით უნდა აიხსნას გურიაში დადასტურებული ზოგადი ტერმინების „საცმელ-სამოსელის“ არსებობა. ტალმატოლომის სახელწოდებით ცნობილი ნაბღისებური ტიპის სამოსელის გავრცელება დასავლეთ საქართველოს ბარში დოკუმენტურად XVIII ს. მოწმდება⁵⁷. მისი გავრცელების წარმოადგენად გვინდა გავიხსენოთ შალიკაშვილების გვარის გუ-

⁵⁵ გ. წერეთელი, „პირიმზე“ (რომანი), გაზ. „კვალი“, 1899, გვ. 194.

⁵⁶ დასახ. მეგზური, გვ. 51.

⁵⁷ მასალები საქართველოს სოციალ-ეკონომიური ისტორიისათვის... გვ.გვ. 96, 107, 116.

რიაში დამკვიდრებასთან დაკავშირებული ერთი გადმოცემა⁵⁸. შვე-
ნეთიდან ოსმალებს გამოქცეული თავადი შალიკაშვილის ოჯახი
ჯურის მთავარს მიუცია. ერთი ამა გომში დაუსახლება, დანარჩე-
ნი—ს. ლენელას. აღდგომა დილას წირვის დროს სოფელს მტერი
დასხმია თავს, მღვდელი იქვე მოუკლავთ და სხვები ტყვედ გაუ-
რეკიათ, მათ შორის 24 ტოლომიანი ქალიც.

ქართული ჩაცმულობის დროს თავიც ქართულად უნდა დაე-
ხურათ. შუაში ან ზემოთ ავარცხნილ თმას ორ ან ერთ ბწნად იე-
თებდნენ. ყურებთან თმები ჯანჯუხებივით ეკიდათ და თავზე თავხურ-
ვა ედგათ: ჩიხტი-კობი. თავსრაკი შუბლსაკრავია და გაურჯელა-შუბ-
ლის ქინძისთავი, თუმცა ზოგი მთხრობელი ამ უკანასკნელს კობის
აღსანიშნავად ხმარობს. თავსაბურავიდან ლეჩაქი ყველაზე პოპულა-
რული ყოფილა. სიმღერად დარჩენილა ხალხში; „ლეჩაქი ქარმა წა-
მართვა, მოსახურავი წყალმაო“. დასახელებულ ერთობას XIX საუ-
კუნის ბოლოსათვის უკვე ქალაქური ფეხსაცმლებით ავსებდნენ.

როგორც გაირკვა, წარმომავლობის მიუხედავად, ქართულ
ჩაცმით ყველას შეეძლო ესარგებლა. ნაკლებ სარწმუნოა, მაგრამ
მთხრობელები აღნიშნავდნენ, რომ „ღარიბზე მეტი იყო მდიდარი
გლები“, მაგრამ „პაწაი შეიძლებულ გლებ ქალებსაც ჰქონდათ თურმე
ადრე სარტყელ-გულისძირიანი კაბა, რომელშიაც ჯვრის დაწერა იყო
კარგი“⁵⁹. XIX ს. ბოლოს გურიაში მოგზაურობის დროს თ. სახო-
კიას ოზურგეთში ოთხი მანდილოსანი შეხვედრია ქართულად ჩაც-
მულ-დახურული⁶⁰. ეს მონაცემი გურიაში ხმარებიდან გასული
ჩაცმულობის აღსარიცხავად გამოგვადგება მხოლოდ.

იმერთა ზოგად დახასიათებაში ვახუშტის ერთი საინტერესო
დაკვირვება მოეპოვება: „...ხოლო კაცი და ქალნი, ვითარცა ვსთქუთ,
ეგრეთცა იუწყე, გარნა უშვენიერესადცა და უუჰეროვნესადცა. ვი-
ნაიდგან გლებთაცა შვილნი მიგვანან წარჩინებულთა შვილთა—
სუფთანი, სამოსელთ გამწყსონი, ეგრეთვე ცხენთა, და იარაღთა და
საქურველთა“⁶¹. ვახუშტის მიერ შემჩნეული ეს თვისება გურულებს
დიდხანს გაპყოლიათ და XIX ს. ბოლოსათვის იგი ისევ შესამჩნევი

⁵⁸ საარქივო მასალა წულაძეებისა და შალიკაშვილების გვარის გურიაში დო-
სახლების შესახებ (1894 წლის) საინვ. № 865, [დაცულია ეგნ. ნინოშვილის
სახლ-მუზეუმში (ს. არჩუელი).

⁵⁹ გურის 1977 წლის ექსპედიციის მასალები, რე. № 2, გვ. გვ. 29, 36.

⁶⁰ თ. სახოკია, დასახ. ნაშრ., გვ. 35.

⁶¹ ვ ა ხ უ შ ტ ი ბ ა გ რ ა ტ ი ო ნ ი, აღწერა სამეფოსა საქართველოსა (სა-
ქართველოს გეოგრაფია), თ. ლომოურისა და ნ. ბერძენიშვილის რედაქციით, თბ.,
1941, გვ. 32.

ყოფილა. თ. სახოკიას გურიაში მოგზაურობის დროს დღიურში ჩაუწერია: „...აქაურებს ვერ შეამჩნევთ იმ კონტრასტს, რომელიც აღმოსავლეთ საქართველოს თავადსა. აზნაურსა და გლეხს შუა არის. განსაკუთრებით დღეობაში ქართლში და, საზოგადოდ, აღმოსავლეთ საქართველოში, დიდი ლარი და ხაზი არ უნდა, გლეხი თავადისაგან გამოიცილო, არც ჩაცმულობა და რაიმე დაახლოვებული მანქანა მსგავსება, არც ქცევა-ლაპარაკში. ამ ორ წოდებას შუა უშველებელი უფსკრულია, ხილია ჩატეხილი, ქართლელ გლეხს რაღაც დაჩაგვრის, დამონების ბეჭედი აზის სახეზედა. თამამად ორ სიტყვას ვერ ეტყვის ადამიანს. თითქმის რაღაცის ეშინიან, რაღაც აწუხებს, თავი მალა ვერ აუღია. წელში ვერ გასწორებულა, ახლა ნახეთ აქაური, გურული გლეხი და შეადარეთ მის ქართლელ მოძმეს! შედარებაც კი არ შეიძლება, თითქმის ყველას გრძელი ჩოხა აცვია სუფთად და ფაქიზად: გლეხიც თავადივით პირდაპირ მოლაპარაკეა, თამამი მოსიყვარულე, დამაქრული სიტყვა-პასუხის პატრონი, უმაღლესად ზრდილი და თავაზიანი“⁶³. XIX ს. საქართველოში ფართოდ მოარული „ჩატეხილი ხილის“ პრობლემა, ჩვენის აზრით თ. სახოკიას მიერ გაზვიადებით არის წარმოდგენილი.

მოტანილი მასალა ქალის საგარეო და ძირითადად საქორწილო სამოსელს შეეხებოდა. არანაკლებ მზრუნველობას იჩენდნენ მიცვალებულისა და გლოვის დროს სახმარი ტანსაცმლის მიმართაც. ძველად, გურიაში ქორწილი მილოცვიანი სცოდნიათ და ტირილი წაბურვიანი. ახალი წესისაგან განსხვავებით, ორივე მსუბუქი ვალდებულება ყოფილა და მძიმე ხარკად არ აწვებოდა გლეხის ოჯახს. მიცვალებულს ტრადიციული წესის მიხედვით დაიტირებდნენ და დასაფლავებდნენ. დასაფლავების რთულ რიტუალში მიცვალებულის გაწყობასაც დიდ დროს უთმობდნენ.

აკრძალული იყო მიცვალებულისათვის შალის ტანსაცმლის ჩაცმა, „ბჭკენს და არც დიდხანს ღნებო“. ამ მოსაზრებით ხელმძღვანელობდნენ მაშინაც, როცა მკვდარს უჭურკლოდ, მარტო წმინდა სანთელში ამოვლებულ თეთრ ტილოში — სუდარით გახვეულს აბარებდნენ მიწას⁶³. არც ფესსაცმელების გატანა ყოფილა კარგი, განსაკუთრებით ერიდებოდნენ რეზინის ძირიანებს. რკინის ნივთის გატანება ასევე წესი არ იყო, ოქრო-ვერცხლისა პირიქით. საყურისა და ბეჭდების გარეშე არცერთი გურული ქალი არ იქნებოდა.

⁶² თ. სახოკია, დასახ. ნაშრ., გვ. 60.

⁶³ Г у р и е ц. Похороны и оплакивание в Гурии, газ. «Кавказ», № 252, 1884.

დიდი მოწონება ჰქონდა აგრეთვე ქარვის მძივებსაც. მაგრამ აღნიშნულიდან მიცვალებულისათვის საყურის გატანება იყო აუცილებელი, ისე რომ დაემარხათ, იტყოდნენ. გველი გაატანს კუდასა⁶⁴.

მიცვალებულისათვის უხმარი ტანსაცმელი არ უნდა ჩაეცვათ, რადგან იმ ქვეყანაში ველარ იცნობდნენ. თუ ამ წესს დაარღვევდნენ, მიცვალებული სულ შიშველი ესიზმრებოდათ. თუ მიცვალებულს გარეთ ტანსაცმელი ისეთი ჰქონდა, რომ ახლის ჩაცმა აუცილებელი ღებოდა, მაშინ საცვლებად მაინც ნახმარი უნდა გამოეყენებინათ. — პატრონის სიტბო ექნებაო. მიცვალებულის ტანსაცმლის საუკეთესო ზელს ჯვრისწერის ტანსაცმელი ქმნიდა, ამიტომ თავიდანვე სიფრთხილით ხმარობდნენ და სიკვდილამდე ინახავდნენ. ზოგიერთებს სწამდათ, ეს რომ გაიკვიტოს, ბედი გვიღალატებსო. ღრმა მოხუცს ამაში არ გამოაწკობდნენ, თან ჩაატანდნენ, რადგან წესად ჰქონდათ მოხუცების მუქ ტანსაცმელში დამარხვა. „შეკოქვილა“ არაფერს არ ჩააყოლებდნენ — შეწუხდება მკვდარიო. თუ ამ შემთხვევაში მკვდრის შეწუხებას ერიდებოდნენ, სხვა ღროს პირიქით იქცეოდნენ. დამარხვის წინ კურკლიდან რაიმე ნივთის ამოკლება და შინ წამოღება სკოდნიათ ეწყინება და სახლს აღარ მოაკითხავსო.

აღდგომა-ახალკვირის და შობას ვარდაცვლილი ცხონებულად მიაჩნდათ, რადგან ამ ღროს ჯოჯოხეთი დანგრეული ყოფილა და სამოთხის კარი ღია. ამ დღეებში ვარდაცვლილის გამო არც დიდ ტირილს გამართავდნენ და არც ისე იგლოვებდნენ. ზარის მაგივრად „ქრისტე აღსდგაო“ გალობდნენ თურმე და ძაძა-ფლასის სანაცვლოდ ნაკლებ სამგლოვიარო ეცვათ⁶⁵. სხვა შემთხვევაში კი გლოვა დიდი სკოდნიათ, მაგრამ არც ისეთი, როგორც სვანეთსა და სამეგრელოში.

როგორც ყველგან, აქაც ყველაზე მეტად ქმრის დაღუპვას აღნიშნავდნენ, მერე შვილისას. ქვრივს ძაძა-ფლასი უნდა ეტარებინა, რომელიც იმ ღროს გავრცელებული ტანსაცმლის ფორმის შესატყვისი იყო, მხოლოდ უბრალო მასალისაგან, ულაზათოდ დამზადებული. ამ სამოსელს ყველა ნაპირი შემოუტეხავი ჰქონდა. შავთან ერთად ყავისფერიც სამგლოვიარო ფერად მიაჩნდათ⁶⁶. ძაძა-ფლასში გახვეულს ძველად საცვლებიც შავი უნდა სცმოდა. ფეხშიშველი ეარნა და ულოგინოდ ხმელ ქილოფზე დაეძინა. ძაძის განახლება ნებადართული არ იყო, ის ხევით უნდა გაეცვიათათ. აკრძალული ჰქონდათ ზედ საკერა-

⁶⁴ მ. ხიზანიშვილის მიერ გურიაში შეგროვებული ეთნოგრაფიული მასალა, 1977; რვ. № 1.

⁶⁵ აბ. შუღლაძე, დასახ. ნაშრ., გვ. 228.

⁶⁶ Т. М а м а л а д з е. Указ. соч., с 87.

ვის დადებაც, რადგან მის განახლებას, ახალი უბედურება მოჰყვებოდა. ძაძის ტარების ვადა 40 დღე ან 1 წელი ყოფილა, რის შემდეგ მას ეზოს გარეთ გაიტანდნენ დასაწვავად და თვითონ კი შეცვლით შავს ატარებდნენ ნაპირებზემოტეხილი შავით 3 წელს მაინც შეასრულებდნენ და მერე თალხებზე გადადიოდნენ. ამ ტანსაცმელშიც თეთრი და წითელი არ უნდა გამოერიათ. შავეებით მოსილს არ შეეძლო ბატონებიან ავაღმყოფთან გამოჩენა და არც აღდგომის დროს წითელი კვერცხით ვინმეს მილოცვა⁶⁷.

კაი „ტან-ფეხი“ ანუ „საგარიოთ გამოსაჩენი“ ტანსაცმელი გურიაში განსხვავდებოდა საშინაოსაგან, ზოგჯერ ფორპით, ხშირად მასალისა და შემკულობის ნხრივ, საშინაოდ ქალს: სადად—„ჩაღინჩათ“ უნდა სცმოდა. შესასწავლ პერიოდში ამ ტიპის ჩასაცმელის ძირითად ფორმას წელსზევითისა და წელსქვევითის ერთობა იწოდებოდა. მათ გვერდით ვხვდებით ადრინდელი ჩაცმულობიდან მომდინარე წელში გადაჭრალი და ყელამდე ღილებით შეკრულ მთლიანი კაბის ნიმუშებს. საცვლებისა თუ სხვა დანიშნულების ტანსაცმლის ნაირფეროვნება კიდევ ინახავს ადრეარსებული ჩაცმულობის ცალკეულ ელემენტებს. ზოგიერთს მთლიანად შეცვლილი აქვს ძველი ფუნქცია.

1854 წ. „კავკაზში“ გამოქვეყნებულ წერილში ნ. დუნკელ-ველინგი წერდა, რომ გურულ ქალებს უყვართ ღია ფერისა და საუკეთესო ქსოვილის ტანსაცმელი, მაგრამ ისინი ყურადღებას მხოლოდ გამოსაჩენ სამოსელს აქცევენ⁶⁸. რამდენად მართებულია XIX საუკუნის შუა წლებისათვის ავტორის ეს სიტყვები ძნელი დასადგენია, მაგრამ ამავე საუკუნის ბოლოსათვის რომ საცვლები გურული ქალის საზრუნავის ერთ-ერთ საგანს შეადგენდა, ეს ჩვენი მასალებითაც აშკარაა. მოხუც ქალთა წრეში ისევ მოსწონთ XIX საუკუნის შუა წლებიდან მოსული ორსართავიანი, ნაწილებიანი, უბით შედგენილი, ოთხზოლტიანი ქვედასაცვალი, რომელსაც თავისი წინაპრის ყველა ნიშანი უსესხია, სიგრძის გარდა. ასევე ვხვდებით ყელდახურულსა და გრძელი სახელოებით შედგენილ პერანგებსაც, მაგრამ ძირითად ფორმად ლარგაყრილი ან ღილით შეკრული მოკლე ტოტიან ქვედასა და „მოზაპულ“ (გულმოხსნილ) მხრიან ზედას ასახელებენ. ადრე არსებული მალული ქვედაბოლო და წელსზევითი ისევ განაგრძნობენ არსებობას და მათ მომხმარებლად დღესაც არაერთი

⁶⁷ Т. Мамаладзе. Указ. соч., с. 50.

⁶⁸ Н. Дункель - Веллинг. Из записок о Гурин, газ. «Кавказ», № 10, 1854.

სოფლელი ქალი გამოდის. გურიაში კარგად ახსოვთ ქვეშა „ორაბორ-კიანი იუბკა“, რომელსაც ზედა კაბა განზე უნდა დაეყენებინა. თუ ზაფხულში მალული ქვედაბოლოს დასამზადებლად ქსოვილებს იყენებდნენ. საზამთროდ მატყლის ძაფებითა და ყაისნალით ნაქსოვი სციმათ. სათბურად დაბამბულიც უტარებიათ, რომელთაც გურიაში „ლაბადა“ რქმევიან⁶⁹.

პერანგს ზემოდან „ელეგი“ ეცვათ. ის ფაქტიურად მოხაულო პერანგის ზედაა, მხოლოდ ტანზე მომდგარი და წინ ან გვერდში აღილული. ითვლებოდა ქალის გულმკერდის დამფარავ საშუალებად. ზამთარში სქელ მასალას ურჩევდნენ ან დაბამბუდნენ და ამით სათბილავი სამოსელის ფუნქციასაც იძენდა. მოხუცები ახლაც დაბეჭითებით ირწმუნებინან, რომ „თუ გინდ ჩითის რუბაშკა გცმოდა, მაინც არ გაცივდებოდი, იი რომ გადავარდა მას მერე დაავადდა ხალხი“⁷⁰. შემდგომში, მხრიანი, მოკლე ზედაწელი, რომელიც ზოგჯერ სარტყელშიც იყო მოქცეული, სამკლაურიანი გამხდარა და მოკლე პერანგის მოხმარების დროს მისი ადგილი პერანგის შიგნით გადანაცვლებულა. ამის მერე იგი წმინდა საქალო სამოსელად ქცეულა.

გურიაში დამოწმდა ერთი სათბილო სამოსელიც, რომელიც სახლში მოქსოვილ მხრის შალებთან ერთად დიდ სამსახურს უწევდა გლენობას. მას აქ „ზიპუნას“ სახელწოდებით იცნობენ და იკა ერთნაირად გამოიყენება როგორც ქალთა, ისე მამაკაცთა წრეში. ეს კაბასა და პერანგს შუა მოთავსებული ჩასაცმელი უსახელოებო ზედატანს წარმოადგენდა და შერჩეულ მასალასთან ერთად დაბამბულიც გამოუყენებიათ. ამეამად მოსახლეობა მოქსოვილით კმაყოფილდება.

საშინაოდ გურული ქალი ორი „ცახოციტ“ იხურავდა თავს. პირველით, პატარა სამკუთხედის ფორმაზე მოყვანილით, შუბლს გაიკრავდა და მეორე ოთხკუთხედს, რომელიც უბეურად უნდა მოეყეცა, თავზე გადმოიფარებდა და წინ ყელთან დაიმაგრებდა. ზამთარში მათ სამკუთხედის ფორმაზე ჯოხებითა და ყაისნალით მოქსოვილა „ლაზილა“ ცვლიდა ან დიდი ზომის თავშალი. დღისით საშხურს იხურავდნენ, რომელსაც გარშემო ფრთები ჰქონია და „წმელის“ ჰუდს ანუ ჭილოფისას ყანაში მუშაობის დროს გამოიყენებდნენ.

საყოველთაოდ ცნობილია, რომ ქართველი ქალის ეროვნული წიკმულობის რღვევა ფეხსაცმლით დაიწყო. მიუხედავად ამისა, გუ-

⁶⁹ დასახ. გურული ლექსიკონი.

⁷⁰ გურიის 1977 წლის ექსპედიციის მასალები, რე. № 2, გვ. 64.

რიაში სამუშაოზე თუ შინ სახმარად ადრე არსებული ფეხსაცმელი-
სა და ფეხსამოსის არაერთ ნიმუშს ვხვდებით. მათ შორის ყველაზე
პოპულარული წულა, კაცის „ლექურა“ — დახურულ წულასაგან
განსხვავებით, „პირმოსაპული“ ყოფილა. წულას ხარაზები კერავდ-
ნენ. ქვეშ მთლიანი ტყავი ჰქონდა საძირედ, საძირედ — „სამუგე“.
ზოგიერთი საძირე მოსირმულიც ყოფილა. სკოდნიათ „ქუბიანი წუ-
ლაც“, რომლსაც ჩვეულებრივისაგან განსხვავებით თავისივე ტყა-
ვი ჰქონდა ქუბად ჩაყოლებული. დაღობილ ხარაზულ ტყავს თარ-
გით გამოჭრიდნენ და ბამბის გასანთლული ძაფით შეკერავდნენ. შე-
კერვით უკულმა კერავდნენ, შემდეგ გადმოაბრუნებდნენ და კალა-
პოტზე გააშრობდნენ. გაჭირვების ჟამს რეზინისისირიანი წულებიც
სცმიათ, რომელნიც გამძლეობის გამო „ვირის წულების“ სახელით
მოუნათლავთ გურულებს. წულის მაგიერი ჩუსტების სახელწოდებად
აქ „პაპუცებია“ დადასტურებული⁷¹.

არანაკლები მოწონებით სარგებლობდა ხის ქოში — „ოხოფეხი“,
რომელიც ადრე საგარეო სამოსელთანაც მოიხმარებოდა. „ძველად
ნახევარი გზობა ოხოფეხები გვქონდა“ და „ახალ ქოშებს პატარ-
ძლებსაც მიაერთმევდნენ ხოლმეო“ — იგონებენ მთხრობელები⁷².
ოხოფეხის ძირად წიფლის ან თხმელას ხეს გამოიჩორკნიდნენ, პირად
„პალატკა“, შალი, ტილო ან ქალაქურ ტყავს აირჩევდნენ. ფეხსაც-
მლის ეს სახეობა ორგვარი ჰქონიათ: დაბალქუსლიანი ზაფხულში და
მაღალქუსლიანი ზამთარში სატარებლად, რომ თოვლსა და ტალახში
მოსიარულეს ფეხი სისველისაგან დაეცვა. საპირის დაცვის მიზნით,
გარშემო „უესტს“ შემოაჭედებდნენ.

გურიამი სკოდნიათ აგრეთვე კანაფისძირიანი ფეხსაცმელების
დამზადება. კანაფის ძაფს დაგრეხავდნენ და ძირის ფორმას მიაღე-
ბინებდნენ, მერე ზედ საპირეს დაადგამდნენ. ასეთი ტიპის ფეხსაც-
მელიც ორგვარი ყოფილა ქუქლიანი და უქუქსლო.

ქალები იშვიათად გამოიყენებდნენ ქალამანსა და ქეჩხოს (ტყა-
ვი). ოჯახში ქალის სახელზე ქალამნის ორი ცმა მაინც იქნებოდა
წენახული, რომ საჭირიების დროს მათი მოხმარება შეუძლებოდათ,
ამ მიზნით, ძროხის ტყავს ხმარობდნენ, ფორმად კი მეგრული ერ-
ჩივანთ, რომელიც ნაკლებ თბილი იყო, მაგრამ კობტა-წულის მსგავ-
სი. ქეჩხოს თხის ტყავისაგან კერავდნენ. ბევრით გარეთ მოქცეული
ტყავის ამ სამოსელს სახელოებს არ უკეთებდნენ და გულისპირსაც:

⁷¹ აბ. წულაძე, დასახ. ნაშრ., გვ. 83.

⁷² გურიის 1977, 1978 წლების ექსპედიციის მასალები, რვ. № 1, გვ. 13, რვ.
№ 1, გვ. 4.

ჩახსნილს უტოვებდნენ. მისი სიგრძე თეძოებს წვდებოდა. სიცი-
ვესა და ავდარში კარგი მოსახმარი იყო.

წულეში სითბოსათვის შალის ძაფისაგან ტერფის ფორმაზე
მოყვანილ ფაჩუჩებს იცვამდნენ. ს. ნაბელაევში მათ სახელწოდებად
„ფაჩაქულა“ გაახსენდათ. ისე მატყლის ძაფის მოკლე წინდებს „კა-
რაქინებს“ ეძახდნენ, გრძელს — „თათებს“, სხვა ტიპის ფეხსაც-
მელში აბრეშუმის კარაჭინები სცმიათ. წულეები რომ „დაგჭებოდა“,
მერე „ჩხაპურტედ“ ეცვათ, რაც ქუსლებჩათელილ ფეხსაცმელებს.
აღნიშნავს, სახლში ფეხზე მორთულ ფოსტლებს ახლაც ჩხაპურ-
ტებს უწოდებენ.

გურიაში ფრამენტალურად შემორჩენილი ძველქართული წეს-
ჩვეულებათა ნაწილის რიტუალური ქმედება ტანსაცმლის ცალკეუ-
ლი ელემენტების აუცილებელ მონაწილეობას ვარაუდობს. ასეთი
სახის ბრძნილობა, როგორც ამას გურიაში უწოდებენ, თუ მაგიუ-
რი მოქმედება ადამიანის ცხოვრების სხვადასხვა სფეროს უკავშირ-
დება, მაგალითად, ავი თვალისა თუ ჰენჯესულებისაგან ადამიანის
დაცვას, ეკლესიის კარზე ძღვნად მიტანის წესს, ტანსაცმლის მოვ-
ლა-შენახვის საკითხებს/ჩამცემლი ქალის სახელით ის ქალი სარგებ-
ლობდა, ვისაც სამი ხელი საგარეო ტანსაცმელი მაინც ექნებოდა.
მაგრამ გურული ქალი კარგი ქალობის სახელს მაშინ დაირქმევდა,
როცა ამ ტანსაცმლის კარგი პატრონი და მომვლელი გამოვიდოდა.
მოვლა კი პირველ რიგში მის ხშირ გამომზეურებაში გამოიხატებო-
და, რადგან წინააღმდეგ შემთხვევაში დასავლეთ საქართველოს ნეს-
ტიანი ჰავა თავის დაღს დაასვამდა. ამ საქმის შესრულება ყველა დღეს
შეეძლოთ შაბათ-კვირასა და უქმის გარდა. განსაკუთრებით უფრო-
ხოდნენ ხარება დღეს, რადგან ხარებაზე რომ რამე გამოეტანათ, უზ-
სუნებელი ჩამოვიდოდა⁷³. ამ მხრივ ტანსაცმელს განსაკუთრებულ
ყურადღება ივნისის თვეში სჭირდებოდა, როცა აქ გამუდმებული
წვიმები იცოდა, რის გამოც ამ თვეს „ჩოხა დამპალესაც“ უწოდებდ-
ნენ. ტანსაცმლის დამკრელი კიის — ჩინჩის დასაფრთხობად სუნია-
ნი მცენარის ნიგვზისა და თამბაქოს ფოთლების ჩაწყობა სკოლნიათ
ძველებურ კამოდ-ზანდუკებში. ამავე მიზნით გამოუყენებიათ ომ-
ბალო, ანწლი, წალიკა (წვრილფოთლოვანი ბალახია) და ნიორი..
მწერის არჩივის სახელწოდებით გურიაში ცნობილი რიტუალით⁷⁴,
რომელიც დიდმარხვის წინა ღამეს სრულდებოდა, ტანსაცმლის
დამკრელი კიის ულუფაც იყო განსაზღვრული. აღების ვახშმის ნამ-
ცეცებით გატენილ კვერცხის ნაჭუქს სახლიდან მოშორებით წაი-

⁷³ მ. ხიზანიშვილის დასახ. მასალები.

⁷⁴ Т. Мамаладзе. Указ. соч., с. 47.

ლებდნენ და იქ ხის ფულფროში დააბინავებდნენ. ფიქრობდნენ, რაკი მწერებმა თავისი წილი კერძი მიიღეს, ამ საზღვარს აღარ გადასცილდებიანო⁷⁵. ზოგიერთი დიასახლისი სიფრთხილეს იჩენდა და დამატებით მატყლის ან შალის ძაფის პატარა ნაჭერს სადმე მოათავსებდა და იტყოდა; „ჩინჩა ეს შენი არჩივია, ქამე და იყავი მანდაო“⁷⁶.

გასარეცხად ნაცრის ძალას იყენებდნენ. სარეცხს რამდენიმე ღამით გარეთ ტოვებდნენ, ცვარს მიიღებს და გათეთრდებაო. შავი ტანსაცმლის მოვლაც განსაკუთრებული სცოდნით; წყალში ლელვის ფოთოლს ჩაპყრიდნენ და მოადულებდნენ. ამ წყლით კარგად იწმინდებოდა შავი ფერის სამოსელი⁷⁷.

სწამდათ ფეხადი, ხელადი და თვალავი ადამიანის არსებობა. ავი თვალისაგან დასაცავად ავგაროზს გამოიყენებდნენ, რომელიც წითელი ვაშლის ხისაგან გამოთლილ ჯვარს წარმოადგენდა ან წითელი ტყავის სამკუთხედის ფორმაზე მოყვანილ ნივთს, რომელშიც „წმინდა საგნები“ ეწყო, ხან ქალაღზე დაწერილი ლოცვა. „ანგაროზს“ ყელზე ატარებდნენ, ზოგჯერ ტანსაცმელს შიგნით მარჯვენა ზსარზე ან გვერდში დააკერებდნენ. ასევე დიდი შიში ჰქონიათ კუდიანებისა, განსაკუთრებით კვირიკობის (ივლისი) 20-ში და დადგს (1 სექტემბერი). ამ დღეების დადგომის წინ აუცილებელი ყოფილა ოჯახში ყველაფრის სანთლით შებეჭნა. ასეც იტყოდნენ, კვირიკობას შებეჭნილს ელვა აღარ მიუდგება და დადგეობისა როკაპის საჩუქრად აღარ ივარგებსო. საჩუქარი კი ზღვის პირზე უნდა მიეტანათ კუდიანების წინამძღოლთან, რომელიც ხნე ქალის სახით წარმოედგინათ. ზღვიდან ამოსულ როკაპს მისულები ზღვის კენჭებს ესროდნენ თურმე კბილებში „შემომიწირავს შენთვის სულიო“. ეს სული კი იმისი ყოფილა, ვისაც შებეჭნა დავიწყებია ან ვერ მოუსწრია და მზაკვავს მისთვის თვალი დაუდგია⁷⁸. 1 ენკენისთვე თ. საზოკიას გამოთქმით, კუდიანების საბენეფისო დღე, ხალბური დაკვირვებით ისეთი ყოფილა, რის მერე ზე აღარ გამოისხამდა, მხოლოდ ნაყოფი მწიფდებოდა. „დადა შემოვიდაო“ — ამბობდნენ გურიანში, მოდის ტეხა-კრეფაო⁷⁹. თუ ხალხი გამაფრთხილებელ ზომებს არ მიიღებდა, მაშინ მალაავი თავისუფლად შევიდოდა სახლებში და

⁷⁵ მ ა კ ა რ ი თ ა ვ დ უ მ ა ძ ი ს დასახ. მასალა, გვ. 14.

⁷⁶ გურიის 1977 წლის ექსპედიციის მასალები, რვ. № 1, გვ. 48.

⁷⁷ გურიის 1978 წლის ექსპედიციის მასალები, რვ. № 2, გვ. 171, ქსენია კარსანიძის ჩანაწერები.

⁷⁸ მ. ხ ი ზ ა ნ ი შ ე ი ლ ი ს დასახ. მასალები.

⁷⁹ იქვე.

შეუბეკნავ ადამიანს გულს ან ტანსაცმელს ნაკერს ამოაცლიდა, რაც ამ ადამიანის დაძაბუნების საწინდელი იყო.

ტანსაცმელთან დაკავშირებული სხვა წესებიც დადასტურდა გურიაში. მშობიარეს წელზე შემოართყამდნენ სარტყელს, ღმერთის წყალობით იოლად მორჩებაო. ბებიქალი თვითონ მოიბანდა სარტყელს და თავზე შემოავლებდა: „ღვთის მშობელო ღედავ, გზაი სსნილი მიეცი, მშვიდობით გადაარჩინე. ღვთისმშობელო, შენ გახსენი მისი გზაო“⁸⁰. ამავე მიზნით აკეთში და სხვა შორეული სოფლის მცხოვრებნიც მძიმე მშობიარობის დროს მიმართავდნენ როსტომ თავდგირიძის ოჯახს, რათა მათგან „ნაოფლარი“ გამოეთხოვათ. წამოღებულ ნივთს თუ ქსოვილის ნაკერს მელოგინეს ქვეშ უღებდნენ იმ იმედით რომ იგი მალე განთავისუფლდებოდა. ამ ჩვეულების ასახსნელად გურიაში ასეთი გადმოცემა არსებობს; გიორგი თავდგირიძეს დატყვევებული ჭინკა ქვევრიდან ამოუშვია. განთავისუფლებულს დაულოცნია სახლი, ცეცხლი, ჯოგი და უთქვამს უემური (ავი სული) არ შეგვხდება არც შენ და არც შენი მოდგმიდან ვინმე და იმასაც, ვისაც თქვენ ნაოფლარს მისცემთო. ასევე, სადაც თქვენი ნაოფლარი იქნება, აქ, ორსული ქალი რაც უნდა „ირჩებოდეს“ განთავისუფლდებოა⁸¹.

ძველად გურიაში სწამდათ, რომ თუ ცრუ ჩვენების მიმცემს დაწიანებული მხარის რომელიმე მამაკაცთაგანი შეუხსნიდა პერანგის საყელოს, მას ჩადენილი ცოდვა აეხსნებოდა⁸²; ფეხსაცმელების გამყიდველი თუ გასაყიდ ცალებს ძირს მოწმენდა, ოჯახის დოვლათი თან აღარ გაჰყვებოდა; ქალებს ეკრძალებოდათ თავშიშველი დაჭდომა ჯარზე ან „წელშიშველი“ — შეურტყმელი პირჯვრის დაწერა, ასევე ოთხშაბათს ფერქცეული ტანისამოსის ჩაცმა⁸³; გადაბრუნებული ტანსაცმლის ჩაცმა საწყენოს მიმნიშნებლად ითვლებოდა⁸⁴ და ა. შ.

უკვე ითქვა და ახლაც ვიმეორებთ, რომ ახალი ცხოვრების ფერხულში საქართველოს კუთხებიდან შედარებით ყველაზე მეტად გურია აღმოჩნდა ჩაბმული. ამ მდგომარეობას ქართველებთან ერთად უცხოელებმაც მიაქციეს ყურადღება. ბ. ღუნკელ-ველინგი ამ მხრივ ამირეკავკასიაში გურულებს ანიჭებდა პირველობას. სხვა

⁸⁰ ა. ბ. შუღაძე, დასახ. ნაშრ., გვ. 112.

⁸¹ ი. სახოკია, დასახ. ნაშრ., გვ. 77, 78.

⁸² Т. Мамаладзе, Указ. соч., с. 109.

⁸³ ა. ბ. შუღაძე, დასახ. ნაშრ., გვ. 11.

⁸⁴ იქვე, გვ. 140

ავტორი ამტკიცებდა „გურულს ფუფუნებისადმი მიდრეკილება აქვს, მისი ცოლი ევროპულად იცვამს, სახლიდან ცხენით სხვანაირად არ გადის, თუ არა ინგლისურ უნაგირზე, მეურნეობის მთელი ნამეტი მრდის კომფორტის საგნების შესაძენად, რაც ყოველი გურულის იდეალს წარმოადგენს“⁸⁵. მოტანილი მონაცემებისა და მთხრობელთა ჩანაწერების მიხედვით ივარაუდება, რომ აღნიშნულ პროცესში ჩაბმული აღმოჩნდა მოსახლეობის არც თუ მცირე ნაწილი. სწორედ ეს სიმრავლე იყო თვალში საცემი, სხვა შემთხვევაში, გურიის გლეხობის გარკვეულ ნაწილში დასადგურებული სიღარიბის შესახებ ეგნ. ნინოშვილის ნაწერების გახსენება იქნებოდა საკმარისი.

XIX ს. II ნახევარში საქართველოში ფეხმოკიდებული ტანსაცმლის ყველა ფორმა მთლიანი (მხარიანი კაბა, „კაპოტი“), თუ ორნაწილადი კაბებისა („კაბა-კურტა“, „კაბა-კერესი“, „კაბა-კოფთა“, „კაბა-რუბაშკა“, „კაბა-კასტუმი“ და ა. შ.) და აგრეთვე გარეთი ღამოსელი („გეიშა“, „მანტო“, „საიკი“, „პალტო“ და სხვ.) გურიაშიც მოწმდება. ასევე დადასტურებულია მათთან დაკავშირებული თავსაბურავისა (ზაფხულში შარფები, ზამთარში — თავშლები. „ფუსა“ უთხელესი შარფების „ფოიოსა“ და „ფულარის“ აღმნიშვნელი ზოგადი სახელწოდებაა. ხმარობდნენ აგრეთვე ცხრა ან შეიდეკრიანსა თუ ვარსკვლავიან შარფებს, სამკუთხედის ფორმის შემოტანილ „ლაკონკას“, ისევე მოსწონდათ სახლში დამზადებული ორმხრივი ჭინჭილოებიანი — დარაიას შარფი და მგზავრობის დროს თავზე ყაბალახსაც მოიხვევდნენ. ზამთარში ეხურათ შალისა და მირინოსის თავშლები. გლოვის დროს სათათრეთიდან შემოსული თალხი აბრეშუმის „უსკუდარის ცახოცი“ წაიკრავდნენ შუბლს) და ფეხსაცმლის ელემენტები (უყელო, დახურული, ქუსლიანი თუ უქუსლო „კონდრები“ და ყელიანი, წვერილქუსლიანი და წვერილწვერიანი „პოლსაპოშეები“ და ა. შ.). მათ შესახებ ჭაუბარს აღარ გავაგრძელებთ, რადგან ისინი იმერეთისა და სამეგრელოს მაგალითზე ჩვენს მიერ არის შესწავლილი⁸⁶.

⁸⁵ მოგვეყვას ფ. გოგიჩაიშვილის დასახ. წიგნის მიხედვით, სადაც მითითებულია Д. Н. Н о с о в и ч. Хозяйственное положение государственных крестьян Озургетском уезде. Материалы, I. 758. с. 76.

⁸⁶ იხ. გლეხი ქალის ჩაცმულობა იმერეთში, კრ. მასალები იმერეთის ეთნოგრაფიული შესწავლისათვის, თბ., 1978 წ., ქალის ჩაცმულობა სამეგრელოში, კრ. მასალები სამეგრელოს ეთნოგრაფიული შესწავლისათვის, თბ., 1979 წ.

Ц. И. БЕЗРАШВИЛИ

ЖЕНСКАЯ ОДЕЖДА В ГУРИИ

Резюме

Согласно этнографическому материалу в Гурии бытовало несколько типов одежды.

Первый тип костюма, который в указанном регионе называют «гурийским», во второй половине XIX века вышел из употребления. Восстановить его помогли те элементы старинной женской одежды (колл. № 5—11/1—5), которые принадлежат фонду ткани и костюма этнографического отдела Государственного музея Грузии им. акад. С. Н. Джанашиа и полевые этнографические материалы.

Второй тип т. н. «грузинский» («Сарткел-гулиспирнани каба» и верхняя одежда «Катиби») был распространен среди высшего сословия. В этот костюм наряжались и зажиточные крестьянки во время праздников; среди них он бытовал вплоть до XX века, как любимая форма свадебной одежды.

Третий тип — европейский костюм (несколько вариантов «юбки» и «рубашки») XX в. сделался основным видом гурийского женского костюма.

ლ. მოლოდინი

ლებვის ხალხური წესები

გ უ რ ი ა შ ი

სამლებრო საქმიანობა საქართველოში ხანგრძლივი ტრადიციებისა და თვითმყოფი თავისებურების მატარებელი დარგია. სხვა დარგებთან ერთად ქართველი ხალხის ამ დარგში მიღწეული წარმატებები ძველი კულტურული სამყაროსათვის კარგად ყოფილა ცნობილი. ბერძენი მწერალი ჰეროდოტე წერს, რომ კასპიის ზღვიდან დასავლეთით გადაკიშულია კავკასიონი, სადაც ცხოვრობს ადამიანთა მრავალი ტომი. აქ იზრდება მცენარეები, რომელთა ფოთლები თავისებური მოყვანილობისაა, აქ ამ ფოთლებს ნაყავენ, ურევენ წყალს და ამით ხატავენ ტანსაცმელს, ხოლო ეს ნახატები კი არ ხუნდება. არამედ ცვდება დანაჩენ შალთან ერთად¹. ლებვის ტექნოლოგიაზე რომ არაფერი ვთქვათ, როგორც ჩანს, ჰეროდოტეს ყურადღება განსაკუთრებით ქსოვილის მცენარეებით მტკიცედ ლებვას მიუძევერია. აქ მოტანილ მასალას კარგად ეხმაურება ბედენის ზეგანზე და არ-ნაზციხეში (ვაგინეთი) გათხრებით აღმოჩენილი ქსოვილის ნაშთები. რომელთაგან პირველი შვინდისფერი ნაზი ქსოვილი III—II ათასწლეულით², ხოლო მეორე ყვითელი და ყავისფერი ნართით დამზადებული, ახ. წ. I საუკუნითაა დათარიღებული³. ორივე, დღემდე ცოცხლად შემორჩენილი ფერით ანუ შეღებვის მაღალხარისხოვნებით, ფერის სიმტკიცით იმსახურებს ყურადღებას.

¹ თ. ყ ა უ ხ ჩ ი შ ვ ი ლ ი, ჰეროდოტეს ცნობები საქართველოს შესახებ, თბ., 1920 წ.

² გ. გ ო ბ ე ჯ ი შ ვ ი ლ ი, ბედენის აკლდამა, „მაცნე“, თბ., 1967 წ.

³ ქ. ი ს ა კ ა ძ ე, საფეიქრო ბოქოვან მასალათა დამუშავება ძველ საქართველოში, მაცნე 4, 1969, გვ. 74; მისივე, საფეიქრო საქმე ძველ საქართველოში, მაცნე, 4, 1967, გვ. 185—186.

ამ დროიდან მოყოლებული ლიტერატურასა თუ წყაროებში ამ საქმის ამსახველი სხვადასხვა ხასიათის მასალები სამღებრო საქმის მაღალ დონეს და ტრადიციულობაზე მიუთითებენ⁴.

XIX საუკუნეში ქიმიის დარგში საოცარმა მიღწევებმა შესაძლებელი გახადა მცენარეული და ცხოველური საღებავების სინთეზური საღებავებით შეცვლა. იაფმა ხელოვნურმა საღებავმა საშუალებებმა და ლებვის მარტივმა ტექნოლოგიამ ძლიერი ლახვარი ჩასცა ლებვის ხალხურ ტრადიციებს.

მიუხედავად იმისა, რომ ლებვის ქიმიურ ტექნოლოგიაში უდიდეს მიღწევებს აქვს ადგილი, ძვირად ღირებული ხალიჩების მხატვრული ეფექტის შექმნაში მაინც მცენარეული საღებავების როლი იქნა აღიარებული. ამიტომ XX საუკუნეში ხელახლა დადგა საკითხი უხუნები და მტკიცე ფერების მცენარეული საღებავების აღდგენის შესახებ, რასაც მიეძღვნა ორი საკავშირო სესია (1936 წ. მოსკოვში, 1939 წ. ბაქოში), ეს საკითხი არც შემდეგ მოხსნილა დღის წესრიგიდან. აზერბაიჯანსა და სომხეთში საამისო პრაქტიკული ნაბიჯიც იქნა გადადგმული. ქ. ერევნის ფირმა „აიგორგმა“ სომხეთის მინისტრთა საბჭოს წინაშე დააყენა საკითხი ხალიჩების წარმოებაში სახალიჩე ნართის შესაღებად გამოყენებულ იქნეს წარსულში სახელგანთქმული წითელ საღებავად ხმარებული ცხოველური წარმოშობის საღებავი „ვარდან კარმირ“, ხოლო ქ. ბაქოში „აზერხალიჩას“ სამმართველოს სამღებრო სახელოსნოში საექსპორტო ხალიჩების ნართის შესაღებად ხმარობენ ბროწეულის ქერქსა და კაკლის წენგოს⁵. ეს ღონისძიებები გვაძლევს იმის მაგალითს, რომ ხალხურ ლებვის რეცეპტურა შეიძლება წარმატებით შეერწყას თანამედროვე სამღებრო წარმოებას. მთავრობის ორგანოების სპეციალურ დადგენილებაში „ხალხური მხატვრული სარეწების შესახებ“⁶. ხანგასამუღლია ხალხური დეკორატიული გამოყენებითი ხელოვნების მნიშვნელობა, რომელიც ისტორიულად შემუშავებულ ტრადიციებზეა და-

⁴ ი. ვ. ჯ ა ვ ა ხ ი შ ვ ი ლ ი, მასალები ქართველი ერის მატერიალური კულტურის ისტორიისათვის, თბ., 1976, გვ. 193—194. შ. მ ე ს ხ ი ა, ხელოსნობა. ძველ საქართველოში, თბ., 1942 (საკანდიდატო დისერტაცია). გვ. 23. მისივე, «Город и городской строй Феодалы Гruzии 1939, გვ. 23; გ. ჩ ა ჩ ა შ ვ ი ლ ი, საქართველოს მუზეუმის საჩითავები, თბ., 1962 წ.; დ. ა ბ ჟ ა ნ დ ა ძ ე, დართვის საქმის ისტორიისათვის საქართველოში (წერლობითი წყაროების მიხედვით), საქართველოს სახელმწიფო მუზეუმის მოამბე, XXXIII თბ., 1978 წ.

⁵ ლ. მ ო ლ ო დ ი ნ ი, 1970 წ. ბაქოსა და ერევანში მივლინების მასალები.

⁶ გაზ. „კომუნისტი“, 27 თებერვალი, 1975. წ.

ფუნქციონირებს. ამ ასპექტში ხალხური ხელმარჯვე ოსტატთა შემოქმედების ერთ-ერთ განშტოებას ხალხური სამღებრო საქმიანობაც შეადგენს.

ქართულ ეთნოგრაფიულ სინამდვილეში ჯერ კიდევ შემონახულია სამღებრო საქმიანობის უძველესი წესები, ტექნიკური ხერხები და საწარმოო გამოცდილება, რომელიც ძველი ხალხური მხატვრული სარეწების ზემოაღნიშნული ასპექტით აღდგენაში შეიძლება წარმატებით იყოს გამოყენებული. ამ მხრივ საინტერესო მასალას შეიცავს ლეხის ხალხური წესები გურიაში; წინამდებარე შრომაც ამ წესებისა და სამღებრო საქმიანობის ამ დარგის კუთხური თავისებურების გამოვლინებას ისახავს მიზნად.

ცნობილია, რომ სამღებრო საქმიანობა გულისხმობს შესაღებ მასალისა და შესაბამის საღებავ საშუალებათა არსებობას. გურიაში ამ საქმიანობის განვითარების ორივე პირობა იყო მოცემული.

გურია კოლხეთის დაბლობის სამხრეთ პერიფერიულ ნაწილში მდებარეობს, ამავე დროს იგი მოიცავს აჭარა-იმერეთის ქედის ჩრდილო-დასავლეთ განშტოებას⁷. ამგვარად, გურიაში დაბლობისა და მთის გორაკბორცვიანი ბუნებრივი სამეურნეო ზონა გამოიყოფა. ამგვარი გეოგრაფიული მდებარეობის შესაბამისად გურიის ფარგლებში ბუნებრივი პირობების მრავალფეროვნებაა მოცემული. ამის კონკრეტული გამოხატულებაა ფართოფოთლოვანი მცენარეების მასივები, წიწვიანი ტყეები, ბუჩქები, რაც მცენარული საღებავების მდიდარ წყაროს წარმოადგენდა. ჩოხატაურის რაიონის სოფლის ისტორიისა და ტოპონომიკური მასალებიდან, რომელიც ჩოხატაურის მხარეთმცოდნეობის მუზეუმშია დაცული, ჩანს, რომ თითქმის ყველა სოფლის ფლორის თანხმლებ კულტურას შეადგენდა ლაფანი (*Pterocarya pterocarpa* (Mchx), მუხა (*Quercus*), შქერი (*Rhododendron ponticum*), წყავი (*Laurocerasus officinalis* Roem) თხმელა (ჩვეულებრივი მურყანი *Alnus barbata* C. A. M). ნიგოზი (კაკლის ხე ჩვეულებრივი-*Juglans regia* L), ქიაფერა (*Phytolaca americana* L), ანწლი (*Sambucus ebulus* L) და სხვა, რაც გურიაში საღებავად გამოყენებულ საშუალებებს განეკუთვნება. გურიაში გავრცელებული საღებავი მცენარეების კიდევ უფრო გრძელი სიაა მო-

⁷ რ. კ ვ ე რ ე ნ ჩ ხ ი ლ ა ძ ე, მახარაძე, ლანჩხუთის ქვერაიონის ზოგად ეკონომიურ-გეოგრაფიული ნიშნები; კრებული მახარაძე - ლანჩხუთის ქვერაიონის/ გურიის/ ეკონომიურ-გეოგრაფიული ნარკვევები, თბ., 1964, გვ. 3.

⁸ ჩოხატაურის რ-ნის მხარეთმცოდნეობის მუზეუმში დაცული სოფლის ისტორიის მასალები.

ცემული ბოტანიკურ ლიტერატურაში⁹. სპეციალურ სამეცნიერო ლიტერატურაში აქვე მინერალური საღებავების ოხრისა და რკინის სურინჯის საბადოების არსებობაც არის დადასტურებული. ოხრის საბადოებისათვის გურიაში ადგილობრივ მოსახლეობას ადრევე მიუკვლევია და მიწანელას სახელით საღებავადაც გამოუყენებიათ.¹⁰

აქ დასახელებული მცენარეული და მინერალური საღებავებით გურიაში ადგილობრივ ფეიქრულ ნაწარმს ლებავენ. ეს ნაწარმი კი მრავალფეროვანი იყო. ვახუშტი ბატონიშვილის ცნობით, XVIII საუკუნის გურიაში მისდევდნენ ბამბის, აბრეშუმის მოყვანას. აქვე არა მრავლად ჰყოლიათ ცხვარი¹¹. XIX საუკუნის გურიაში მეაბრეშუმეობა კიდევ უფრო დაწინაურებულა და შინამრეწველობის ერთ-ერთ მნიშვნელოვან დარგადაც ქცეულა. მას ფეხდაფეხ მიდევდა ბამბისა და შალის ქსოვილების წარმოებაც. საერთოდ, ამ დროისათვის საფეიქრო წარმოება აღმავლობის გზაზეა, გურია-იმერეთის ქსოვილები სამეგრელოსა და სვანეთშიც გააქვთ¹². XIX საუკუნის გურიაში თითქმის ყველა ოჯახში ყოფილა გამართული საფეიქრო, რომელზედაც ოჯახის წევრებისათვის იქსოვებოდა საჩოხე შალი, საპერანგე დარაია, ლოგინის გადასამოსავე ბამბის ხამი, ტილო შალ-აბრეშუმი, ყაბალახი და სხვ. საოჯახე წესით დამზადებული კარბო პროდუქტი ადგილობრივ ბაზარზეც გადიოდა:—ლანჩხუთში (პარასკეობაზე), „ნაგომარზე“ (15 ივლისიდან აგვისტოს დასაწყისამდე), იზურგეთში¹³. ადგილობრივ წარმოებული აბრეშუმის ქსოვილი წარმატებით უწევდა კონკურენციას მოსკოვის, პეტერბურგისა და ვარშავის ბაზრებზე იმავე რიგის საზღვარგარეთულ ნაწარმს¹⁴. ამგვარ ვითარებაში უნდა დაეუშვათ, რომ აღნიშნული ქსოვილები, სათანადოდაც უნდა ყოფილიყო შეღებილი. აღსანიშნავია, რომ ჩვენ ხელთარსებულ ლიტერატურულ და სიტყვიერ მასალაში არ მოიძებნება ცნობები გურიაში სამღებრო სახელოსნოების არსებობის

⁹ А. Х. Р о л л о в. Дикорастущие растения Кавказа. Тифлис, 1908. № 2. შ ე ნ გ ე ლ ი ა, საქართველოს საღებავი მცენარეები, თბ., 1958.

¹⁰ Природные ресурсы Грузинской ССР., т. II, М., 1939, с. 284—95; ვ. კ ო ბ ა ხ ი ძ ე, ნ. ს უ ლ ხ ა ნ ი შ ვ ი ლ ი, მახარაძე—ლანჩხუთის ეკონომიური ქვერეაიონის ბუნებრივი პირობები და რესურსები. კრებ. მახარაძე-ლანჩხუთის ქვერეაიონის (გურია) ეკონ. გეოგრ. ნარკვ. გვ. 29.

¹¹ ვ ა ხ უ შ ტ ი, აღწერა სამეფო საქართველოსა, თბ., 1941, გვ. 176.

¹² საქართველოს ისტორიის ნარკვევები, ტ. IV, თბ., 1973, გვ. 581.

¹³ ივერია, № 163, 1891.

¹⁴ Кавказ, № 64, 18. III, 1906.

შესახებ¹⁵. ამგვარად, გურიაში ლეგვა მთლიანად ოჯახის პირობებში მიმდინარეობდა. შესაღები ქსოვილები სხვადასხვა მასალისა და დანიშნულებისა იყო, მაგრამ აქაური ქსოვილები ნაირფეროვნებით არ ხასიათდებოდა. გურული გლეხის ჩაცმულობაში გაბატონებული ადგილი ეკირა მუქ და ერთფეროვან ქსოვილებს. ჩოხა და ჩაქურა შავი ან ყლალი შალისაგან იკერებოდა, შარვალი ისევე შავი, ზოლიანი, იშვიათად ლურჯი ფერისა იყო, ყაბალახსადაც კვლავ შავს ან თეთრს არჩევდა. სხვა ფერები (წითელი, ყვითელი, მწვანე, ლურჯი) მცირე რაოდენობით მოიხმარებოდა, ისიც ზოლიანსა და კუბოკრულ ხამის ქსოვილებში; რომლისთვისაც საქსელი და მისასხმელი ძაფა ლანდებად ამოხვეული იღებებოდა ეს მონაცემები გვიჩვენებს, რომ სამღებრო საქმიანობა გურიაში ფერთა გამით ღარიბ სპექტრს იძლეოდა. მაგრამ აქაური სპექტრის გამომხატველი ტერმინოლოგიური მასალა უფრო მდიდარ სურათს ხატავს, იგი გამოავლენს ფერთა სპექტრის ადგილობრივ თავისებურებებს, ხოლო ზოგ შემთხვევაში ფერთა თუ ტონთა აღქმის, გაგების შესაძლებლობასაც იძლევა. ჩვეულებრივ ძირითადი ფერებისაგან (წითელი, შავი, ლურჯი, მწვანე, ყვითელი) განსხვავებით სხვადასხვა ტონისათვის შედარებით აღწერილობითი სახელები იხმარება; მოლისფერი, ციცარისფერი, ნაცრისფერი, ყავისფერი, ღვინისფერი, თაგვისფერი, ქვიშნისფერი, ფოთლისფერი, სუროსფერი და ა. შ. ამ რიგის მონაცემები ანალოგიურია თუშეთის, ქსნის ხეობისა და სამცხე-ჯავახეთის შესაბამისი მასალისა. მათგან განსხვავებით სხვა ტერმინებთან ერთად შერეული ფერის, ჭრელის აღსანიშნავად, „ჭყიყორი“ იხმარება. ჭყიყორი ქ. ე. გ. ლექსიკონის მიხედვით ნესტიან წვიმიან ამინდს ეწოდება. მთხრობელთა განმარტების მიხედვით, ჭყიყორი წვიმის შედეგად ატალახებულ, აჭრელებულ გარემოსთან-ჭყიყორიან ამინდთან ასოციაციით არის შემუშავებული. თეთრი და შავი მატყლის გადაჩეჩვით მიღებულ ფერს ლილევი, ყლალი ეწოდება, ამათგან შავ ფერმორეულს — ბოცს ეძახიან. თეთრით გადამეტებულს კი შეფქვეულად განმარტავენ. სამგლოვიარო სამოსელთან დაკავშირებით აღსანიშნავია მისი ფერის, ტონის მიხედვით დიფერენცირება, რომელიც ასეთი თანმიმდევრობით ლაგდება; ძაძა, ნიგრი და თალხი. ამათგან ძაძა უხეში, შავი ქსოვილის სამოსელი იყო, ნიგრი — ღია შავი სატინის ქსოვი-

¹⁵ ნ. ბერძენიშვილი, სამღებროთა შესახებ XVIII ს. საქართველოში, მასალები საქართველოს და კავკასიის ისტორიისათვის, თბ., 1938.

ლისაგან იკერებოდა¹⁶, ზოლო თაღი—შავ, სახიან ქსოვილს ეწოდებოდა, რომელშიც წითელი და მწვანე არ უნდა ყოფილიყო შერეული. ზოლებიან ქსოვილს ფორჩხიანს, ტიხაროსაც უწოდებდნენ, ეს უკანასკნელი ჭრელ, ზოლიან საქონლის სახელსაც წარმოადგენს იმერეთსა და სამცხე-ჯავახეთში; თეთრი და შავი წვერით შეტოლებულ ძაფს ჭრელი ან ჯალა ფერით იხსენიებენ; ჭრელ, ფოთლიან სახის ქსოვილს ფოტას ეტყობდნენ, ფერთა ხარისხის აღსანიშნავი ტერმინებია მუქი ტონისათვის—მუქი, ქუფრი, ღია ტონისათვის—გალა, ტიალი, საინტერესოა, რომ სახელით ტიალი ან ზმნით—იტიალა განთიადს, ალიონს ან მის მოახლოებასაც აღნიშნავდნენ. მთლიანად ერთი ფერის საქონელს ზედსართავის ურწყის თანდართვით ეტყვიან ურწყ თეთრს, ურწყ შავს, ან ურწყ წითელს და ა. შ. აქვე დასტურდება ფერთა სინკრეტიზმის მოვლენაც. ცნობილია, რომ ეს მოვლენა ერთ შემთხვევაში, „ორფეროვანი“ მხედველობის განვითარების სტადიას ასახავს, როცა მრავალი ფერის შეგრძნება დაყვანილი იყო ყვირული ან ლურჯი ფერის აღქმის უნარამდე¹⁷. მხედველობის განვითარების ამ სტადიაზე გურიაში მიუთითებს მოხუც მთხრობელთა მიერ მწვანე ფერის ლურჯად, ზოგჯერ ნაცრისფრად სახელდება. ამგვარად, შემოთ მოტანილი ფერთა თუ ტონთა სახელები სხვადასხვა ნიუანსებს გადმოსცემს. აქ დასახელებული მაგალითებიდან ნაწილს ახსნა სამლებრო ან საფეიქრო საქმიანობაში ეჭებნება, მაგალითად, ფოტური ჭრელად ღებვას გულისხმობს, ტიხარი — ფორჩხიანი ქსოვის პროცესში ზოლებად დაჭრელებული ქსოვილია, ჟღალი, ლიელოვი—სხვადასხვა ფერის მატყლის გადაჩეჩვით მიღებული ჭრელის სახელია, ჯალა სხვადასხვა ფერის წვერით შეტოლებული ძაფია. ამას ისიც უნდა დაემატოს, რომ ღებვა მიმდინარეობდა ინდივიდუალური გამოცდილების, მოთხოვნილების ან შთაბეჭდილების მიხედვით, ანუ ყველა ცალკეულ შემთხვევაში განსხვავებული იყო საღებავის დოზირება, ღებვის და დედების—ფერქერის ხანგრძლივობა. რაც უამრავ გარდამავალ ტონთა მიღებას უზრუნველყოფდა და თავისთავად შესაბამისი ტერმინოლოგიით აღნიშვნის საშუალებასაც იძლეოდა. ამგვარად, ჩვეულებრივად ტონთა სიმრავლეს გურიაში, სამლებრო საქმეც ჰქმნიდა.

¹⁶ ჩვენ არ ვიცით რა კავშირშია ტერმინი ნიგროზინი სამგლოვიარო ტანისამოსის ფერთან—ნიგროთან. მაგრამ. ქ. ე. გ. ლექსიკონის მიხედვით ნიგროზინი nigrier—ერთგვარი მოშავო ლურჯი ფერის საღებავია. ქ. ე. გ. ლ. ტ. VII, გვ. 19.

¹⁷ С. С. Алексеев, Цветоведение, М., 1952, с. 54.

სპეციალური ლიტერატურით ცნობილ უამრავ საღებავ მცენარეთაგან გურიაში უკანასკნელ დრომდე ყველაზე ხშირად ხმარობდნენ ლაფნის ფოთოლს და კანს, კაკლის ფესვებს, ფოთოლს, ნაჰას კანს, მუხის და თხმელის ხის კანს, ლუკუფხის მარცვლებს, ბროწეულის კანს||ქეჩხოს ჭიაფერას, ხაზარულას, ზაფრანას და ზოგ სხვა-საც. საღებავ მცენარეთა არც თუ დიდი რიცხოვნების მიუხედავად მრავალფეროვანი ღებვის წესები, რომელიც სამეცნიერო ლიტერატურაში დაფარვით, პირდაპირი და ფერჭერით ღებვის ტიპებად ჯგუფდება, ამ საღებავ საშუალებათა სხვადასხვა კომბინაციით გამოყენებას და ამ გზით ფერთა სხვადასხვა ტონის მიღებას უზრუნველყოფდა.

ცნობილია, რომ დაფარვით ღებვა ღებვის უძველეს ტიპს განეკუთვნება, რომელიც სათავეს პირველყოფილი ადამიანის მიერ სხეულის შეღებვაში ღებულობს¹⁸. გურიაშიც დაფარვით ღებვის ჰვარტლით ეწეოდნენ, დაფარვით ღებვის უძველესი დროიდან წარმომავლობის შესაბამისად ჰვარტლით ღებვა გურიაშიც ღებვის ერთ-ერთ უძველეს წესად წარმოგვიდგენია, რომლის შესახებაც აქ ძალიან მცირე ცოდნაა შემონახული, ისიც არა უშუალო მღებავების, არამედ წინა თაობიდან გადმოსული გადმოცემებით. ამ ცნობით ჰვარტლს შალის შესაღებად ხმარობდნენ, თანაც განსაკუთრებული საღებავი თვისებებით წაბლის ჰვარტლი გამოირჩეოდა. უმეტესთა მახსოვრობაში ჰვარტლი დამოუკიდებელ საღებავს კი არ წარმოადგენდა, არამედ ბროწეულის კანთან—ქეჩხოსთან ერთად იხმარებოდა.

თუ დაფარვით ღებვაზე მცირე ცოდნაა შემონახული, სამაგიეროდ პირდაპირი ღებვის წესით გურიაში ბოლო დრომდე ხელმძღვანელობდნენ. ღებვის ამ წესით ღებულობდნენ სხვადასხვა ტონის ყვითელს, ყავისფერს, წითელსა და მათ შორის გარდამავალ ტონებს. პირდაპირი ღებვის საშუალებათა შორის აღსანიშნავია ზაფრანა, იგი გურიაში ყვითელი ფერის მნიშვნელოვანი წყარო იყო.

ბოტანიკური მონაცემებით ნამდვილი ზაფრანა რუსული ზაფრანაა. — (Шафран¹⁹, (ლათ. *Crocus sativus*) გურიაში საღებავად გამოყენებული ზაფრანის სახელით ცნობილ მცენარეს კი *Tagates pazu-la* L შეესაბამება, რომელიც ჩვენში სხვადასხვა სახელით არის გავრცელებული (ქართლი—კაკია, იმერეთი—ყვითელი სუნელი, ხარჩოს-

¹⁸ ზ. შენგელია, საქართველოს საღებავი მცენარეები, თბ., 1958, გვ.9.

¹⁹ აღ. მაცაშვილი, ბოტანიკური ლექსიკონი, თბ., 1971.

ყვავილი, სამეგრელო—ქორთული ზაფრანი). აღსანიშნავია, რომ ეს ორი მცენარე ბოტანიკურ ლიტერატურაში საღებავ მცენარეთა ნომენკლატურას არ განეკუთვნება²⁰.

ყვითლად ლებვისათვის ძაფზე ასხმულ ზაფრანას მზეზე შესაქცნობად გაჰკიდებდნენ სამი-ოთხი დღის შემდეგ მას მწვანე ყუნწებს მოაშორებდნენ და მოხარშავდნენ. ფოთლებს კარგად ჩახარშვის შემდეგ გადასწურავდნენ, წვენიში მარილს და შაბს დაუმატებდნენ, წყალში დასველებულ აბრეშუმის შულოებს ზაფრანის ნახარშიში წამოადუღებდნენ, მერე გამოდგამდნენ და შიგვე ამოაცივებდნენ, მერე დღეს ცივ წყალში გარეცხავდნენ და გააშრობდნენ. ყვითლად გურიაში ცოცხისნახარულას (*sorghum technicum* Koern) კაკლით—მარცვლითაც ლებავდნენ. ხაზარულათი უმათერესად ბამბა იღებებოდა, რისთვისაც მის მარცვალს მოხარშავდნენ, წვეს გადასწურავდნენ, ქსოვილსა თუ შალებს ამ წვენიში მოხარშავდნენ. ანალოგიურად ლებავდნენ ამ საშუალებით იმერეთშიაც, სადაც იგი ჭიჭურას სახელით ყოფილა გავრცელებული, მაგრამ მიღებული ფერი არსად არ იმსახურებდა მოწონებას. ანალოგიური წესით ლებავდნენ ყვითლად ბროწეულის ახალ ქერქში და ხახვის ქურჩენაში, მაგრამ ფერს გამძლეობას მაინცდამაინც ვერ უქებდნენ; სამაგიეროდ, ენდროში შეღებილს ფერის სიმტკიცეს განსაკუთრებით აღნიშნავდნენ. ენდრო (*Rubia tinctoria* L.) აქ ძალიან იშვიათად იყო გავრცელებული, ისიც მთიან ნაწილში. ზემო სურებში ენდროს ღელის პირებში პოულობდნენ. იმერეთის მოსაზღვრედ (ს. საკამიასერი) მას საგანგებოდ თესავდნენ. შესალებად გამხმარ ენდროს ძირებს დანაყავდნენ, წყალს დაასხამდნენ, შაბს ჩაყრიდნენ და შიგ ქსოვილსა თუ შულოებს წამოადუღებდნენ; ეს საღებავი ერთნაირად კარგად ეკიდებოდა ლაზლას, ბამბას და აბრეშუმსაც. წითელი ფერის მომცემ საშუალებას ჭიაფერაც (*Phytolacca americana* L) წარმოადგენდა. საღებავად ჭიაფერას ნაყოფს წვრილ წითელ მარცვლებს ხმარობდნენ ნედლად ან ხმელი სახით. ნედლ მარცვალს დაწურავდნენ, ხმელს კი წყალს დაასხამდნენ, ორივეს ცოტა შაბს და ძმარს დაუმატებდნენ, შესალებ მასალას ექსტრაქტში წამოადუღების შემდეგ შიგვე ამოაცივებდნენ და მერე დღეს გარეცხავდნენ. ჭიაფერა გურიაში აბრეშუმის საღებავად იყო აღიარებული. გურიაში ჩვენ ჭია-

²⁰ А. Х. Роллов. Указ. соч. А. А. Гроссгейм. Растительные богатства Кавказа, М., 1952; ზ. შენგელია, საქართველოს ზოგერთი საღებავი მცენარეები, თბ., 1958.

ფერაში წითლად შეღებილი ბამბის ძაფი ვნახეთ. ჩვენი მთხრობელები კიაფერაში მიღებული ფერის სიმტკიცეს საგანგებოდ აღნიშნავენ. ეს მცენარე სამეგრელოში ჯამფეზიად არის წოდებული, რომლითაც აქაც ისეთივე წესით ღებავდნენ როგორც გურიაში, ხოლო ჯამფეზიაში ღებვით მიღებული წითელი ამ მცენარისათვის დამახასიათებელ ფერად იყო აღიარებული. ჯამფეზიას პერანგის სახელიც ამ მცენარეში ან ამ მცენარეთი ღებვის დროს მიღებულ ფერთან უნდა იყოს დაკავშირებული. ყოველივე ეს მიუთითებს იმაზე, რომ მთელ დასავლეთ საქართველოში კიაფერა წითელი ფერის მიღების ერთ-ერთი გავრცელებული საშუალება უნდა ყოფილიყო.

გურიაში მწვანედ ლუკუმხაში (*Frangula alnus* Mill). ღებავდნენ. ლუკუმხა იგივე ხეჭრელია. შესაღებად ხეჭრელის ნედლ ნაყოფს—მარცვალს ხარშავდნენ და ჩვეულებრივ, ზემოთ აღწერილი წესის მიხედვით ღებავდნენ. ამგვარადვე ე. ი. პირდაპირი ღებვის წესით ღებავდნენ ყავისფრად მუხის ქერქით, კაკლის წენგოთი, ქერქით და ფესვით, დაფნის ფოთლითა და ქერქით. მათ შორის ფერის სიმტკიცით მუხის ქერქში შეღებილა გამოირჩეოდა. აქ ჩამოთვლილი საღებავი საშუალებები იმავე დროს შავად ღებვის მასალასაც შეადგენდნენ. ყავისფრად ღებვა შავად ღებვის შემადგენელი ეტაპი იყო და ცალკე ფაზასაც წარმოადგენდა, ამიტომ, ყავისფრად ღებვაზე ცალკე აღარ შევჩერდებით, მით უმეტეს, რომ ამ ფერის მასალა გურიაში მცირე რაოდენობით იყო გამოყენებული. სამაგიეროდ, ყველაზე დიდი მოთხოვნილება შავ ფერსა ჰქონია, რაც შავი ფერის ტრადიციულობით და ქართული სანამღვილისათვის ძველთაგან დამახასიათებელი შავი ფერის სამოსელის²¹ ხმარებით უნდა აიხსნას. ცხადია, ყველაზე ხშირად ქსოვილს შავად ღებავდნენ. ამ ფერის მიღების წყაროს შეადგენდა ერთა მხრავ, მცენარეულობა კაკლის წენგო II ნაჭა II ლაგორა, ქერქი, ლაფნის ფოთოლა, მუხის ქერქი, ბროწეულის ქერქი და მეორე მხრივ, მინერალური საღებავი—მიწანელა, რომელთაც ფერის გამაგრებისათვის აშველებდნენ უანგიანი რკინების, კინაწილის ან ნაცრის ნაყენს—ნაცარძალს II ნაცარგალოს. ზემოთ დასახელებული ეს მცენარეები საქართველოში ფართოდ გავრცელებული და ბევრგან (ქართლი, იმერეთი, თუშეთი, ქიზიყი, სამეგრელო), შავად ღებვის აღიარებული კულტურებიცაა; რაც შეეხება მიწანელას, იგიც ფართოდ გავრცელებულ მინერალურ

²¹ ც. ბ ე ა რ ა შ ე ი ლ ი, თუში ქალის ტალავარი, კრებული.—თუშეთის ეთნოგრაფიული შესწავლისათვის, თბ., 1967, გვ. 186—187.

საღებავად გამოყენებული მიწა. ამ მიწის სხვადასხვა სახელოდებათა შორისწლია (იმერეთი), ლეკი (კახეთი), მიწალები (რაჭა), ტყვილ (სვანეთი), ტლაპო (სამცხე-ჯავახეთი) მიწანელა ენობრივად გარკვეულ მსგავსებას იჩენს მიწალებთან.

ნ. ბერძენიშვილი ფიქრობს, რომ „მიწანელა“ ნილ-ნაწილის შემცველი სიტყვაა, რომელიც ინდიგოსა და ლურჯის შინაარსს შეესატყვისება²². ივ. ჯავახიშვილი მიწალების შესახებ წერს, რომ ამ სიტყვაში ლები ლურჯი მიწის აღმნიშვნელი ნაწილია²³, სულხან-საბა-ორბელიანი მიწალებს უწოდებს ლებს²⁴, იმავე ლექსიკონის სხვა ვარიანტში კი განმარტავს „შავი საღებავი მიწაო“²⁵. უკანასკნელთან დაკავშირებით ანგარიშგასაწევი ვ. ნოზაძის მიერ „ვეფხისტყაოსნის“ სათანადო ადგილების ანალიზიც, რომლის მიხედვით ლები შავი ფერის მნიშვნელობას უტოლდება²⁶. იმისგან დამოუკიდებლად მიწალები და მიწანელა ენობრივად ერთნაირი ცნებებია თუ არა, ზემოთ წარმოდგენილი ჯაბუთიანობისა საფუძველზე ორივე სახელი საღებავ საშუალებად წარმოგვიდგება. ეთნოგრაფიული მასალა კი ამ მიწის შავ საღებავად გამოყენების სასარგებლოდ ლაპარაკობს/გუერიაში „მიწანელას“ განმარტავენ როგორც დამპალ, სუნიან ტლაბს, რომელსაც დაქაობებულ II კონკუო ადგილებიდან მოჰქონდათ. ასეთი ადგილები კი ბევრი ყოფილა ს. ბიმიოთან — ჩუნია, ს. ლესასთან — კვათირი, ს. ვაიჭვართან — ზეზაურის ძირები, ს. გომთან — დოლაური, ჩვენია, კვიცასტომი, ს. აცანასთან — ჩიტილა, ოფიშტია. ს. ზემო ჰურებთან — ნაქიანები, ს. ნაგოშართან — ენაური, ს. ხიდისთავთან — ლუგუბაის პირი, ს. ზომლეთთან — მერობა, ს. ჯაკამიასერთან — ჩონეთის პირი და სხვ. ამ ადგილთაგან ძველად ზოგი (ნაგომარი, სურები) კუსტარული დამუშავების ობიექტიც ყოფილა²⁷. როგორც ჩონატაურის მხარეთმცოდნეობის მუზეუმში დაცული სოფლის ისტორიის ამსახველი მასალებიდან ჩანს, ნაქიანების (ზემო სურები) და ენაურის (ნაგომარი) საბადოებით 900-იან წლებში უცხოელი მრეწველებიც დაინტერესებულან. საბჭოთა პერიოდში კი

²² ნ. ბ ე რ ძ ე ნ ი შ ვ ი ლ ი, საღებავთა შესახებ XVIII ს. საქართველოში, მასალები საქართველოსა და კავკასიის ისტორიისათვის, თბ., 1937, გვ. 169.

²³ ივ. ჯ ა ვ ა ხ ი შ ვ ი ლ ი, საქართველოს ეკონომიური ისტორია, წ. II, 1935, გვ. 122.

²⁴ ს უ ლ ხ ა ნ - ს ა ბ ა ო რ ბ ე ლ ი ა ნ ი, სიტყვის კონა, თბილის.

²⁵ ს უ ლ ხ ა ნ - ს ა ბ ა ო რ ბ ე ლ ი ა ნ ი, ქართული ლექსიკონი, თბ., 1928 წ.

²⁶ ვ. ნ ო ზ ა ძ ე, ფერთაშეკვლევა, ბუენოს აირესი, 1959 წ., გვ. 44.

²⁷ Природные ресурсы Грузинской ССР, т. II, с. 282.

თბილისის სამღებრო ქარხანაშიც დაუწყიათ²⁸ მისი დამუშავება. ინტერესი ამ მიწისადმი არც შემდეგ შენელებულა და იგი სპეციალური შესწავლის ობიექტადაც ქცეულა. 1931 წ. მოსკოვის მინერალოგიის სამეცნიერო-კვლევით ლაბორატორიაში დასახელებული საბადოები ქიმიური ანალიზის მიხედვით ნაგომარის მიწა უმაღლესი ხარისხის ოხრის ნორმებს ექვემდებარება, რომლის შემადგენლობის უმთავრესი კომპონენტია Fe_2O_3 , ხოლო ზემო სურების საბადო რკინოვან სურინჯს წარმოადგენს²⁹, ახლა ამ საღებავი მიწის ყველა საბადო მიწითაა დაფარული, მიუხედავად ამისა, მთხრობელთა დახმარებით, მოვახერხეთ ს. ძიმითიდან იაშა დოლიძის ეზოდან მიწანელას წამოღება. მუზეუმის ქიმსარესტავრაციო ლაბორატორიაში ჩატარებული ანალიზის მიხედვით გაირკვა, რომ მიწის შემადგენლობაში შედის ორვალენტოვანი რკინა“ 2, რომელიც დაჟანგვის შემდეგ სამვალენტოვან“ 3 რკინად იქცევა. ნაგომარის მიწას თავის შემადგენლობით უახლოვდება მათხოჯის საბადო. ს. მათხოჯიდან (იმერეთი) წამოღებული ტალახის ანალიზის საფუძველზე მუზეუმის ქიმსარესტავრაციო ლაბორატორიის გამგე რ. ბახტაძე დაასკვნის, რომ მათხოჯის ტალახში შემავალი რკინისა და გოგირდის შენაერთით მიიღება შავი ფერის ნალექი. რამდენად შეესაბამება მიწანელას ასეთი ქიმიური შემადგენლობა მის მღებრობაში გამოყენებას ეს კიდევ დამატებით შესწავლასა და კვლევას მოითხოვს. აქ საგანგებოდ უნდა მოვიგონოთ ის, რომ სამეცნიერო ლიტერატურაში საღებავი მრეწველობის გაუმჯობესების მიზნით სხვა საღებავთა შორის განსაკუთრებით გამოყოფილია და დაყენებულია საკითხი ნაგომარისა და მათხოჯის საღებავი მიწის დეტალური ძიება-შესწავლისა³⁰. ამ გზაზე მიწანელათი ლებვის ხალხური ტექნოლოგიაცაა გათვალისწინებული.

მიწანელათი გურიაში შალს, აბრეშუმს და შერეულ ქსოვილს შალ-აბრეშუმს ლებავდნენ. აქ საგანგებოდა იყო შეფასებული მიწანელათი ლებვის ხარისხი, ამიტომაც ამბობდნენ: „რასაც მეტი შრომა უნდოდა, ამით იმას ლებავდნენ“. შავი ფერის ხარისხის ძიებაში გურიაში სხვადასხვა რეცეპტისათვის მიუგნიათ. ისინი იმდენად მრავალფეროვანია, რომ მათზე თვალის გადავლება ცალკეული სოფ-

²⁸ Там же, კობახიძე, ნ. სულხანიშვილი, მახარაძე—ლანჩხუთის ეკონომიური ქვერათონის [ბუნებრივქ პატობები და რესურსები, კრებ. მახარაძე—ლანჩხუთის ქვერათონის (გურიის) ეკონ. გეოგრ. ნარკვევები, გვ. 19.

²⁹ Природные ресурсы Грузинской ССР, т. II.

³⁰ Природные ресурсы Грузинской ССР, т. II, с. 288.

ლების მიხედვითაც კი აჩენს განსხვავებას. მაგრამ ჩვენ აქ ლებვის ისეთ წესებზე ვისაუბრებთ, რაც გურიისათვის მეტ-ნაკლებად იყო ღამაზასიათებელი.

როგორც ვთქვით, მიწანელა გურიაში გავრცელებული საშუალება იყო და ლებვაშიც სხვადასხვა წესით იხმარებოდა. მათგან ერთ-ერთი ხერხი მისი დამოუკიდებელ სალებავად ხმარებაც იყო. ამ დროს მიწანელას წყლიან-ჭონჭყოიან ადგილიდან მოიტანდნენ, თავზე მომდგარ წვეწვს ცალკე გადმოასხამდნენ, შეათობდნენ, შიგ შესალებ მასალას ჩაალაგებდნენ და ორი სამი საათის შემდეგ დაფესვილ ქსოვილს ამოიღებდნენ და შეეშრობდნენ. ახლა დარჩენილ წყალში წვეწვში მიწანელას გაჰქნიდნენ, გახსნიდნენ, საცერში ან ღოღბანდში გადასწურავდნენ, მასში ქსოვილს წამოადლებდნენ და შიგვე დასტოვებდნენ ამოციებამდე. ამგვარად შეღებილს მონაცრისფროდ განნარტავენ. სხვა შემთხვევაში ასე იქცეოდნენ: სქელი კონსისტენციის მიწანელაში შესალებ მასალას ორ-სამ დღეს დააყოვნებდნენ. მიწანელა, რომ არ ამომშრალიყო, ზევიდან ნეშოს (კაკლის ფოთოლს) დააფარებდნენ. ამ წესით შეღებილს ს. საჭამიასერში ბოც ფერს უწოდებდნენ. მაგრამ არც ასე შეღებილი ქსოვილი გამოირჩეოდა ფერის ხარისხით, ამიტომ ლებვის ამ წესსაც იშვიათად მიმართავდნენ. სრული შავი ფერის მიღება უფრო რთული პროცესი იყო, საამისოდ მიწანელასთან ერთად შალის შესალებად ყველაზე ხშირად ლაფნის ფოთოლს ან ქერქს ხმარობდნენ. აქაური მოსაქმე ქალების დაკვირვებით ნედლ ფოთოლს ან კანს მეტი წვენი და ძალა ჰქონდა. კვირთით (მხრით რასაც მოიტანდნენ) რა რაოდენობის ფოთოლსაც მოიტანდნენ, კარდალში ხარშავდნენ, სანამ წვენი გაშავდებოდა, მერე კი მას გადასწურავდნენ და შიგ ძმარში დამკვავებულ ჟანგიან რკინის ნაყენს დაუმატებდნენ; ზოგჯერ ჟანგიან რკინებს ლაფნის ფოთოლთან ერთად ხარშავდნენ. ს. საჭამიასერში, ლაფნის წვეწვში შეღებილ ქსოვილს გამონახარში ჟანგიანი რკინებით დაჭორგავდნენ (დააწყობდნენ), მიღებულ ექსტრაქტში შესალებ ქსოვილს ჩაალაგებდნენ და შიგვე დატოვებდნენ. მთხრობელთა სიტყვით „შეღებვას ჯერე დაქერა უნდოდა და მერე მიწანელა“, ამიტომ მოყავისფროდ დაფესვილ ქსოვილს ახლა მიწანელაში შეღებავდნენ. სქელ მიწანელას ქსოვილი არ მიიღებდა, ამიტომ მას ლაფნის თბილი წვეწვით გააზავებდნენ, ნადულის სისქის ნაზავში ჩაალაგებულ ქსოვილს ღამე დატოვებდნენ, მეორე დღეს კი კარგად გარეცხავდნენ. თუშეთსა და ქვემო იმერეთში შავად ლებვისათვის ლაფნის ფოთოლთან, კაკლის ქერქთან ან ფოთოლთან ერთად ძალას ხმარობდნენ. ლაფნთან ერთად ნიგვ-

ზის კანით ან წენგოს ნაჭით ლებვა არც გურიასში ყოფილა უცხო. ლაფანს ხშირად ენაცვლებოდა კაკლის ნაჭა II ლოგორა ან ქერქი. კაკლის ახალ, ნელდ ნაჭას II ლოგორას შეაღობდნენ, რისთვისაც მას რაიმე ჭურჭელში ჩატენიდნენ, რომელსაც ორი-სამი დღის შემდეგ მოხარშავდნენ. საცერსა ან დოლბანდში გაწურულ წვენში მიწანელას გახსნიდნენ და შიგ ღაზლას შეღებავდნენ. ასე შეღებილი ხურყუმა შავი გამოდიოდა. ასეთივე წესით ლებავდნენ შავად მიწანელასთან ერთად კაკლის ნაჭით, მუხის ქერქით და ბროწეულის ქერქით. ამათ შორის ბროწეულის ქეჩხოს აბრეშუმის შესაღებად მიმართავდნენ, რომელთან ერთად სხვადასხვა მღებავი შაბს, მარილს, ნაცარძალს II ნაცარგალოს, ჟანგიან რკინებს ან კინაწილას იშველიებდა. (კინაწილა ეწოდება სამჭედლოში რკინის დროს წყლიან როფში ჩაღეჭილ რკინის მტვერს).

აქ დასახელებულ საშუალებებთაგან უკანასკნელ ორს შემდეგნაირად ხმარობდნენ: ჟანგიან რკინებს ან კინაწილას საღებავ მცენარეებთან ერთად ხარშავდნენ, ან ცალკეც აყენებდნენ, რისთვისაც ჟანგიან რკინებს, გინდ კინაწელას ძმარში ან მოძმარებულ ღვინოში ერთ თვესაც კი გააჩერებდნენ, ან წყალში ხარშავდნენ. მიღებულ წვენს საღებავი მცენარეების ნახარშს ჩაუმატებდნენ.

საგანგებოდ გვინდა შევჩერდეთ შავად ლებვის ერთ ვარიანტზე. იგი ასე მიმდინარეობდა: გაშლილ, სწორედ დაფენილ შესაღებ ქსოვილსა თუ შულოებზე II ლანდებზე ლაფნის ფოთოლს დაალაგებდნენ. ქსოვილს გადაახვევდნენ და ამ სახით ადუღებდნენ წყალში. აქედან ამოღებულ ქსოვილს შეაშრობდნენ და ხელახლა წამოადუღებდნენ, ასე გაიმეორებდნენ სამჯერ, რის შემდეგაც დარჩენილ წვენში მიწანელას გასძრავდნენ, წვენს გაწურავდნენ და ლაფნის ფოთლის დაფენილ ქსოვილს ახლებურად შემზადებულ წვენში წამოადუღებდნენ, რომელსაც მეორე დღემდე ქვაბში დატოვებდნენ, იგივე წესით ლებვის დროს ს. ძიმითში ლაფნის ფოთლებს თუჯის ქვაბში — ჩანახში მოშუშავდნენ, დარბილებულ — გაყავისფერებულ ფოთლებით ქსოვილს მთლიანად დაფარავდნენ, შემდეგ მრგვალად დაახვევდნენ და სივრილეში, უცეცხლო ოთახში დებდნენ. მას ზევიდან სიმძიმეებს დააწყობდნენ და ერთ დღე და ღამეს გააჩერებდნენ. მეორე დღეს მას ზემოაღწერილი წესით შეღებავდნენ შავად მიწანელაში ან ყავისფერად კაკლის ქერქის ნახარშში. პროფ. ფ. გოგიჩაიშვილი თავის შრომაში „ხელოვნობა საქართველოში“ შავად ლებვის ზემოხსენებული წესის რამდენიმე განსხვავებულ ვარიანტს გვწვდის. ლებვის ზემოთ მოტანილი წესისაგან განსხვავებით ლაფ-

ნის ფოთლებით დაფენილ და დახვეულ ქსოვილს წამოდულებიან შემდეგ ამოიღებდნენ. ჩახარშულ ფოთლებს შემოაცლიდნენ, ახალ ფოთლებს დააფენდნენ და ისევ წამოდულებდნენ. ეს პროცესი რამდენიმეჯერ მეორდებოდა და ბოლოს ქსოვილს ქვაბში ამოსაციებლად დასტოვებდნენ³¹.

ცნობილია, რომ ფ. გოგიჩაიშვილი დასახელებული მონოგრაფიის წერის დროს მასალებს ლებულობდა იმერეთიდან, გურიიდან, სვანეთიდან, მთიანეთიდან და სხვა ადგილებიდან. თუ გავითვალისწინებთ. ივ. ჭავჭავაძის თაოსნობით შეკრებილ შინამრეწველობის მასალებს, სადაც ლებვის წესებს შორის ზემოხსენებული წესით ლებვა მხოლოდ გურიის მიხედვით არის აღწერილი, მაშინ, ალბათ, შეცდომა არ იქნება, თუ ვიტყვით, რომ ფ. გოგიჩაიშვილი თავის შრომაში ლაფნის ფოთლების დაფენვით ლებვას გურიიდან მიღებული მასალებით აღწერს. §1962 წ. ჩვენ ბორჯომის რაიონის ს. გვერდისუბანში ოს მოსახლეობაშიც დავადგინეთ შალის შულოების ნედლეული — „ხსირ ქარდაგ“-ით ყვითლად ლებვის ანალოგიური ტექნიკა. ამის მიუხედავად ლაფნის ფოთლის დაფენვით შავად ლებვის, გურული წესი ლებვის ქართულ წესებს შორის მაინც სპეციფიურია. თუმცა იქნებ ლებვის ანალოგიური წესი ივარაუდებოდეს ლებვის, თუშურ ტექნიკაშიც. ამ წესით ქვაბში შესაღები მასალისა და საღებავი მცენარეების ურთიერთმონაცვლეობით ისე გაწყობა, ჩალაგება და ლებვა, როცა ქსოვილი ან შიტები (თუშეთი) მთლიანად საღებავი მცენარეებით არის მოფენილ-დაფარული, რამდენადმე ქსოვილის ლაფნით დაფარვის მსგავსად ტექნოლოგიურად რამდენად დასაშვებია ლებვის აქ მოტანილი პროცესების ანალოგიურობაზე მსჯელობა, ეს ცალკე და სხვა დარგის შესწავლის სფეროა.

ამგვარად, შავად ლებვისათვის მცენარეები იხმარებოდა, ლებვის რეცეპტიც მრავალნაირი იყო, მაგრამ შავად ლებვის ყველა ვარიანტის გამაერთიანებელ ნაწილს მიწანელა წარმოადგენდა. მთხრობელთა ნათქვამიდან, რომ შავად ლებვას „ჭერ ფერის დაჭერა უნდოდა, მერე მიწანელეთ“, ჩანს, რომ ამ საქმიანობის მიმდევარნი ლებვაში გამოყოფენ ორ ფაზას: ფერის დაჭერას, რასაც აქ დაფესვა ეწოდებოდა და ლებვას. ტექნიკის ენაზე ამ წესით ლებვა ფერჭერით ლებვის სახელს ატარებს. ფერჭერით ლებვაში კი გადაჯვარედინებულა პირდაპირი და დაფარვითი ლებვის ტიპები. შავად ლებ-

³¹ ფ. გოგიჩაიშვილი, ხელოსნობა საქართველოში, თბ., 1976,

ვის გურული წესიდან დაფარვით ლებვას მიწანელაში ლებვა შეესაბამება, პირდაპირი ლებვა კი დაფესვით მიმდინარეობდა. შავად ლებვის გზაზე დაფესვა იგივე ლებვაა კაკლის ფესვებში, ქერქში, ან მუხის ქერქში და ლაფნის ფოთოლში, კინაწილაში. მოყავისფროდ დაფესვილი მასალა ჩვეულებრივი სახმარი პროდუქტია, სამაგიეროდ ბროწეულის ქეჩხოში დაფესვილი ასეთად ვერ გამოდგებოდა, ამიტომ ბროწეულის ქეჩხოში ყვითლად დაფესვილს მიწანელაში, მუხის ქერქში ან ხელოვნურ საღებავში ლებავდნენ. ამგვარად, გურიანში, ჩანს, სათანოდ ერკვეოდნენ აღნიშნული მეცნარეების ლებვის ხარისხში, ლებვის ტექნიკასაც მცენარეთა ლებვის უნარიანობის მიხედვით წარმართავდნენ, მღებავთა ეს ცოდნა განსაკუთრებით ფერქერით ლებვაში იჩენს თავს. ამ მხრივ ფერქერის გურული წესი—დაფესვა საინტერესო მომენტებს შეიცავს, იგი ფერქერის სხვა ხალხურ წესებთან მოჭაკვა (სამეგრელო), დატიტბვა (ქიზიყი), დადეღვა (თუშეთი, სამცხე-ჯავახეთი), დაწერვა (იმერეთი) ურთიერთობაში ფერქერის განვითარების გარკვეულ საფეხურსაც ასახავს. თავის მხრივ ფერქერის ზემოხსენებულ წესებში ლებვის ტექნიკა ან ფერქერის თვისება იგულისხმება, მაგალითად: დატიტბვა ბროწეულის ქერქში—ტიტიტბში ხარშვაა, რომლის დროსაც შესაღები ქსოვილი ყვითლად შეფერადდება, მთხრობელთა ახსნით წერი კაკლის ქერქია, ხოლო დაწერვა კაკლის ხის ქერქის ნახარშით ქსოვილის მოყავისფროდ შეფერადებას ეწოდება. აღსანიშნავია, რომ ხშირად დაწერვას სხვა მცენარეებში ხარშვასაც უწოდებდნენ. თუ ეს ასეა, მაშინ დაწერვა შეიძლება „წერ“ ცნებასთან კავშირშიც იყოს განხილული, რომელიც ჭრას, კვეთას, დაკრელებას, კვალის გავლებას უნდა აღნიშნავდეს³². მაშინ კაკლის ქერქის სახელი „წერიც“ მის საღებავ თვისებას და ამ გზით ლებვის ტექნიკას დაუკავშირდება. უნდა გავიხსენოთ ისიც, რომ იმერეთში ლებვის პრაქტიკაში კაკლის ფესვებით ფერქერაც დაწერვა და თანაც გავრცელებული ლებვის საშუალებაა. აქ აღდება კითხვა გურულ დაფესვაში—ფერქერაში შემონახული ხომ არ არის მცენარული ფესვების გამოყენების სტადია? თუ ეს ასეა, მაშინ დაწერვა, დატიტბვა, დაფესვა იგივე ფერქერაა, მაგრამ სხვადასხვა საშუალებით წარმოებულ. ასეთი ვითარება უნდა იგულისხმებოდეს, როცა ვ. პეტროვი წერს.

«Материальные источники для получения определенного крас-

³² იხ. ს უ რ გ უ ლ ა ძ ე. „წერა“ ცნების გაგებისათვის, მასალები საქართველოს ეთნოგრაფიისათვის, XVI—XVII ს. თბ., 1979, 280—282.

сильного эффекта даже в пределах того же самого окрашиваемого материала, исторически не оставались постоянными»³³. ამ წყაროთა დროში მონაცვლეობა სრულიად აშკარად ჩანს. ჩვენს შრომაში მოტანილი ლებვის მრავალფეროვანი რეცეპტები, ხოლო გურიაში შავად ლებვის წესში არსებული ფერქერა-დაფესვა საერთო ქართული ლებვის ტექნიკის ლოკალურ საფეხურს უნდა მიეკუთვნოს.

თუ ერთფერად ლებვის ტექნოლოგიაში გურიაში გურული მღებავის ცოდნა და გამოცდილება კარგად ჩანდა, კრელად ლებვაზე ანუ ქსოვილების დაჭრელებაზე ეს არ ითქმება.

საერთოდ ქსოვილების დაჭრელების ორგვარი წესია ცნობილი: ლებვით და ფერადი ძაფებით ქსოვით. გურიაში ლებვით დაჭრელებას შულოების დაკვანძის საშუალებით აღწევდნენ. მაგრამ დაჭრელების ამ წესს იშვიათად და ისიც მხოლოდ ლანდების II შულოების შესაღებად მიმართავდნენ, რომელსაც კრელი წინდის, კარაჭინის II პაიჭის საქსოვად ხმარობდნენ. უფრო ხშირად ქსოვილის დაჭრელება ქსოვით სცოდნიათ. ასე ქსოვდნენ კრელ, ზოლიან-ფორჩხებიან ხამს, რომელშიც ფერადი ძაფებით დაქსელილ ფორჩხებს ერთი ფერის ძაფს მიასხამდნენ. ქსოვილით დაჭრელების სხვა სახეობას კუბოკრული ქსოვილი წარმოადგენდა, რომელიც ფერად ზოლებად დაქსელილ ფორჩხებზე ფერადი ძაფის მისხმით იქსოვებოდა. ამგვარ კრელს გურიაში ფოტურს უწოდებდნენ. ც. ბეზარაშვილი წერს, რომ ფოტური ფუთურის სინონიმია. მას იმერეთში ფუთური ორი მნიშვნელობით დაუდასტურებია: ქსოვილისა და ნაქსოვში დაყოლებული ზოლის სახელად³⁴. მაგრამ ფუთურს აქვე მესამე მნიშვნელობაც უნდა ჰქონოდა, კერძოდ, ფუთური ლებვით დაჭრელებულ ქსოვილს, ხოლო დაფუთურებული—დაჭრელების წესს აღნიშნავდა. დაჭრელებისათვის კი ასე იქცეოდნენ. ალაგ-ალაგ, გარკვეულ მანძილზე ორად გაკეცილ ხამს ძაფს შემოახვევდნენ ან ნემსით რამდენიმე წვერს ამოუგდებდნენ, ნაოქს სხვაგვარადაც აკეთებდნენ: გარკვეულ მანძილებს შორის თანაბარი ზომის კენჭებს ან თხილებს გამოკრავდნენ: ამგვარად, დაკონილ ხამს, შეღებვის შემდეგ დახსნიდნენ, რომელსაც ძაფით დაკონილი ნაწილი შეუღებავი რჩებოდა და შეღებილ ფონზე

³³ В. А. Петров. Опыт классификации красильных растений и растительных красок.

³⁴ ც. ბეზარაშვილი, ქალის ქვეშეთი სამოსელი საქართველოს მთიანეთში (მასალები ქართული სამოსლის ატლასის შესადგენად), საქართველოს სახელმწიფო მუზეუმის მოამბე, XXXI-ვ, თბ., გვ. 162—163.

ჭრელ სახეს ქმნიდა. ასე დაფუთუარებულ ქსოვილს გურიიდან დაფოთლილი სახიანი ფოტური ცახოცი შეესაბამებოდა. გამოდის, რომ ფუთური II ფოტური, საერთოდ სახიანი ქსოვილის სახელია, რომლის მნიშვნელობა ითავსებს როგორც კუბოკრული ისე ფოთლიანი სახის ქსოვილსაც. ამავე დროს ამ უკანასკნელის მნიშვნელობა ფოტურს//ფუთურში იქნება უადრესი ან პირველადი იყოს ფუთური ფუთ-ძირისა და ურ-სუფიქსით ნაწარმოები სიტყვაა, სადაც ურ-სუფიქსი აღნიშნავს თვისებას, სათანადო საგანთან მიმართებით (მაგ., ქალ-ურ-ი, მგლ-ურ-ი, მხეც-ური)³⁵. ფუთ-აქ. ე. გ. ლექსიკონში განმარტებულია ბოხჩად³⁶, ბოხჩა ქსოვილის ოთხკუთხი ნაჭერია, რომელშიც გამოაკრავენ ნივთებს, ასეთ ნაჭერში გამოკრული რამ, ზვითონ-ასეთი ნაკრულია³⁷. ამ მონაცემებს მიხედვით ფუთურიც ფუთაში გამოკრული რამ, ნაკრულია. გურულად ფუთა იგივეა რაც ფოტა³⁸. ხოლო ფოტურიც ფოტაში გამოკრულს უნდა ნიშნავდეს რომელშიც ფუთურის ანალოგიურად ლეხვით ქსოვილის დაჭრელების წესი უნდა იგულისხმებოდეს. ამის მიხედვით უნდა დავეუშვათ, რომ ფუთური II ფოტურით დაჭრელების ტექნიკას გურიაშიც იყენებდნენ. ფოტური—ცახოცი. რომელსაც აქ სახიან ცახოცად განმარტავენ. მართო ორნამენტოვან მოტივის სახელად კი არ უნდა იქნეს მიჩნეული, არამედ ფოტურში II ფუთურში დაჭრელების ტექნიკაც იგულისხმება. მაშასადამე, ფოტურ ცახოცში ლეხვით დაჭრელების თავდაპირველი მნიშვნელობაა შემონახული, რომელიც შემდეგ ორნამენტული სტილის განუჩრჩველად ჭრელის ზოგად სახელად იქცა.

ჭრელ ქსოვილთა შორის სამყადის სარტყელსაც მოვიხსენიებთ. იგი რამდენიმე ფენად წელზე შემოსარტყმელი მამაკაცის აბრეშუმის სარტყელია. სამყადის სარტყელი გურიაში დიდი მოწონებით სარგებლობდა. გურიის სოფლებში სამყადის სარტყლის ქსოვაში დაოსტატებული ქალებიც იყვნენ ცნობილნი. ბოლო დრომდე მოწონებით სარგებლობდა ს. ლიხაურში მოქსოვილი სამყადის სარტყლები. ხუთი ფერითაც უქსოვიათ იგი, რომლის შუა თეთრით დაქსე-

³⁵ ა. შ ა ნ ი ძ ე, ქართულიენის გრამატიკის საფუძვლები, თბ., 1973, გვ. 128.

³⁶ ქ. ე. გ. ლექსიკონი, ტ. VII, თბ., 1962 წ.

³⁷ ქ. ე. გ. ლექსიკონი, ტ. I, თბ., 1950 წ.

³⁸ ქართული კილო-თქმათა სიტყვის კონა, შეადგინა ალ. ლლონტმა, თბ., 1975, გვ. 163.

³⁹ გ რ. შ ა რ ა შ ი ძ ე, გურული ლექსიკონი, გურული ზემოიმერული, ლეჩხუმი ლექსიკონები, თბ., 1938.

ლილ ფორჩხებს ერთ მხარეს წითელი, ლურჯი, მეორე მხარეს ცისფერი და ყვითელი ფორჩხები იყო გაწყობილი, მას კვლავ თეთრი და მისი მომდევნო ფერების ფორჩხები მოსდევდა. ფერების ასეთივე თანმიმდევრობა მეორდებოდა განივ მისხმული ფორჩხებითაც¹². ფერთა ამგვარ თანმიმდევრობას გურიაში ცისარტყელასაც ადარებდნენ, საერთოდ სხვა აქაური ქსოვილები ფერთა სიჭრელით არ ხასიათდებოდა. ბამბის II ხამის ქსოვილები ორი-სამი ფერით იქსოვებოდა—წითლითა და შავით; ლურჯითა და წითლით; წითლით, მწვანითა და შავით; წითლით, ლურჯითა და თეთრით. ამგვარი შეწყვილება-შეხამების ზოგადი კანონით აღიარებული დადგენილი წესია. როგორც ჩანს, გურული ქალები ფერთა შეხამების არსშიც კარგად ერკვეოდნენ, და მაინც, ქსოვილების მოჭრელება გურიაში დიდ ყურადღებას არ იმსახურებდა. ძირითადს ლებვის საქმიანობაში შავად ლებვა წარმოადგენდა, რაც როგორც დავინახეთ, რთული და შრომატევადი პროცესი იყო. სოფლებში ამ საქმეში დახელოვნებული და ვაწაფული მოსაქმენიც გამოირჩეოდნენ. ეს მოსაქმენი ლებვას ხშირად ღელის პირებში აწარმოებდნენ: „სადაც წყალი იყო ცეცხლს იქ ანთებდნენო“. იქნებ ს. ფარცხმის ტოპონიმიკაში დადასტურებული „ლებრის გორის“ სახელის ახსნაც ამ ადგილებში სამღებრო საქმიანობას დაუკავშირდეს. მაშინ აქ პროფესიონალ მღებავზეც შეიძლება ფიქრი. სოფელში ლებვის საქმეში დახელოვნებული მღებავებიც ხომ ლებვას დაკვეთით ეწეოდნენ, ხოლო საზღაურს ფულით ან ნატურით იღებდნენ, რომლის ოდენობა მკაცრად კი არ ყოფილა განსაზღვრული, არამედ ურთიერთ შეთანხმებაზე იყო დამოკიდებული, უფრო ხშირად დამკვეთის სურვილით წყდებოდა. მიუხედავად ამგვარი შემთხვევებისა, გურიაში ლებვა ბოლომდე ოჯახური მრეწველობის ფარგლებში რჩებოდა.

ხარისხიანი ლებვისათვის პრაქტიკულ ცოდნასთან ერთად გურული მოსაქმე ქალი მაგიურ-რელიგიურ ღონისძიებასაც მიმართავდა, ამათგან ზოგს ემპირული ცოდნა-გამოცდილება ელო საფუძვლად. ამ მხრივ აღსანიშნავია ძველ მთვარეზე ლებვის უპირატესობა ე. ი. მაშინ, როცა მთვარე დამცხრალი და სავსე იყო; როცა მთვარე პატარა იყო. ახალ მთვარეზე იტყოდნენ: საღებავს დასწავსო. სხვადასხვა საქმიანობათა შორის ახალ მთვარეზე ზის მოჭრასაც ერიდებოდნენ. ლ. ბედუკიძე ხალხური ავეჯის შესწავლის საფუძველზე წერს, რომ: ამ ხალხურ ჩვეულებას თავისი საფუძველი გააჩნია, რომელიც შეიძ-

ლება იქიდან გამომდინარეობდეს, რომ ახალ მთვარეზე „ხის ჰია“ ილვიძებს, აქტიურდება, ხეში წყალს ამოძრავებს და ხის ყოველგვარ სინესტეს ფესვებიდან და პირუკუ აბრუნებს, ხე „ამღვრულია“, რადგან მთვარე მოწოს ამოძრავებასთან ერთად ჰიასაც აცოცხლებსო. ხოლო ჰიანაჰამი ხე მდარეა და ავეჯისათვის გამოუყენებელი. მაშასადამე, წელიწადის განსაზღვრულ დროში მოჭრილი ხე მთვარის გარკვეულ ფაზაშიც უნდა მოქცეულიყო⁴⁰. საავეჯე ხის მასალისათვის დაშვებული ეს ვარაუდი, არც ლებვის დროს უნდა კარგავდეს ძალას, რადგან ჰიანაჰამ და დასუსტებულ ხეს, რომლის წვენიც მთვარის გარკვეულ ფაზაში განზიდულია, ლებვის ხარისხის უნარიც ნაკლები ექნებოდა.

სხვა წეს-ჩვეულებები ირაციონალური ხასიათისა იყო. აქ ყურადღებას იქცევს შეხედულება ავ თვალზე. ამ დროს უცხოვსთან ლებვას ერიდებოდნენ და თუ უცხო თვალი ლებვას მაინც შეესწრებოდა და თავის ალტაცებას, „ვაი რა კარგია“, სიტყვებით გამოხატავდა. მაშინ ამ შეძახილის გასაბათილებლად ასეთ მაგიურ მოქმედებას მიმართავდნენ: შემოსწრებულ უცხო პირს თმას ჰპარავდნენ, დაწვავდნენ და მასვე ჩუმად გადააყრიდნენ თავზე.

ლებვაში ფეხის დაცლაც იყო ძალაში, რასაც აქ სხვა ამგვარ ჩვეულებებთან ერთად ბრძნილობას ეტყვიან.

ლებვაზე დაბადებასთან დაკავშირებული აკრძალვის წესიც ვრცელდებოდა, იგი შემდეგში გამოიხატებოდა: ოჯახს სიკვდილი, რომ არ დაბედებოდა, ძმაზე ან მამაზე შწუხარეს სამგლოვიარო სამოსელის შავად ლებვა საკუთარ (ქმრის) ოჯახში ეკრძალებოდა. საერთოდ სამგლოვიარო სამოსელს თვით მიცვალებულის ოჯახში ლებავდნენ.

აქ დასახელებული წეს-ჩვეულებები მარტო ლებვისათვის არ ყოფილა დამახასიათებელი, იგი საერთო ქართულ წარმოდგენათა სისტემის ორგანული ნაწილია და მისგანვე მომდინარეობს.

ამგვარად, როგორც ვხედავთ, ლებვის გურულ წესებში კარგად აისახება ხალხის საწარმოო — შემოქმედებითი უნარი. მაგრამ, ჩვეულებრივ, ამ დარგს აქაც კარგა ხანია გამოეცალა საფუძველი. აქაური მოსახლეობა ხელოვნურ საღებავს იმთავიდანვე მიეტანა, რომელსაც დაუბრკოლებლად იძენდნენ ბაზრობაზე, სოფლის დუქნებში ან ებრაელებისაგან. კარდაკარ მოსიარულე ებრაელების ე. წ. „ბარგის წამალში“ გუნდა-ლახოსტაკს და სხვა საწვრილმანო საქო-

⁴⁰ ლ. ბ ე ლ უ კ ი ძ ე, სვანური ავეჯი, სვანეთის ეთნოგრაფიული შესწავლისათვის, თბ., 1970, გვ. 170.

ხელთან ერთად ხელოვნური საღებავების არჩევანი მოეპოვებოდათ. ხელოვნურმა საღებავებმა გურულ ქალს გაუმარტივა ღებვის შრომატევადი პროცესი, რამაც ხალხური საშუალებების ღებვაში გამოყენება შეზღუდა, ხოლო ღებვის ბევრი ხალხური წესი დაეწეებას მიეცა. ამ ხასიათის მასალა ახლა ფრაგმენტულია. მიუხედავად ამისა, ღებვის ხალხური ტექნოლოგია გურიაში მეტ-ნაკლები სისრულით მაინც შეიძლება აღდგეს.

Л. Н. МОЛОДИНИ

НАРОДНЫЕ СПОСОБЫ КРАШЕНИЯ В ГУРИИ

Резюме

На основании изучения этнографического материала установлено, что крашение народным способом в Гурии характеризуется теми же признаками, которые восходят к общегрузинским традициям.

Материалом окраски являлись изделия из шерсти, шелка и хлопчатобумажные изделия (одежда: чохы, брюки, головные платки, пояс, пряжа для носков и ноговиц, постельного белья. Указанные предметы окрашивались в разные цвета, в основном в черный.

На активное развитие занятия этого рода указывает существование дифференцированной терминологии для определения местного спектра. В Гурии отличали основные краски, отдельные тона и качества цвета. Основные цвета определялись собственными именами «красный», «желтый», «синий», тона цветов сравнительно — описательными именами: кофейный, винный, вишневый, цвет травы и т. д., качества цвета светлый и темный именовались — темным — «купри» и светлый — «тиали», «гала».

Источниками спектра в Гурии являлись культурные породы местной флоры и минеральные вещества — «мицанела» (по химическим анализам охра). В качестве сырья для красок использовались кора, скорлупа и листья грецкого ореха (*Juglans regia*), марена (*Rubia tinctoria* L) Кора граната и др.

На основании технологического анализа крашения народным способом, в Гурии установлены способы покрывного, прямого и протравного крашения. Они составляют ступени

развития технологии окраски, указывающее на местное происхождение этой отрасли хозяйства путем восприятия местных красительных ресурсов.

Среди вышеречисленных красильных средств некоторые являются независимыми красками, а часть применяется с помощью протравы.

К протравному крашению обращались во время черной окраски. В этом случае протравом служила кора дуба, ольхи, грецкого ореха, а черной краской применяли минеральную краску «мицанела»

В технологии крашения прибегали к закрепительному средству, каким являлись поташ, железная ржавчина или квашеная железная опилка — «кинацила». В Гурии засвидетельствована техника пестрого крашения — «потури». В научной литературе и словарях «потури» объясняется как клетчатая или линейная ткань. В труде автор старается доказать, что «потури» обозначает технику пестрого крашения. В настоящее время название — «потури» носят пестрые клетчатые ткани.

Фаза протравного крашения, выраженная термином «дапесва» (дословно протравливание листьями или корой растений) является разновидностью протравливания, которое производилось растительными корнями. Гурийское протравливание — «дапесва» локальный вариант общегрузинской техники крашения.

6. ლოლოჯიკი

ხალხური გართობა-თამაშობანი ბურიაში

თამაშის გავლენა ამა თუ იმ ხალხის ბუნების ჩამოყალიბებაში ჩანს გურიის მაგალითზე. ჩამოთვლის რა XIX ს. საზ. მოლვაწე ტ. მა-მალაძე გურიაში გავრცელებულ თამაშებს, დასძენს, რომ „თამაშთა გავლენა ჩანს ამ კუთხის მცხოვრებთა ხასიათზედაც. გურულები მოქნილები, ცქვიტები, გამბედავები, საზრიანები, გონებამახვილები არიან. ამ თვისებათა ჩამოყალიბებას ხელი შეუწყო გურულებისათვის საყვარელმა თამაშებმაც¹ ამავე ღროს, თუ გავიხსენებთ იმ ისტორიულ ვითარებას, რომელიც არსებობდა საუკუნეთა მანძილზე, უსაგები გახდება აუცილებლობა ისეთი თამაშებისა, რომლებიც ადამიანებს გამოუმუშავებდნენ სათანადო ჩვევებს ყოველგვარი გასაქირის გადასატანად.

გურულ გართობა-თამაშობათა შესახებ ცნობებს ვხვდებით მოგზაურთა ნაწერებში, ა. წულაძის წიგნში, გ. ლომთათიძის, ა. თოიძის საარქივო მასალებში. მხატვრულ ლიტერატურაში და სხვა გ. ლომთათიძის და ა. თოიძის შეკრებილი მასალა სპორტულ თამაშებს ეხება, ამიტომ აქცენტი გადატანილია შეჭიბრებითი ხასიათის გართობაზე და მასალაშიც მოყვანილია ისეთი გართობა-შეჭიბრი, რომელიც უფრო ვაჟის ფიზიკურ წვრთნას ემსახურება. ასეთებია: წონასწორობა, თითის, ფრჩხილის „წკიპარტი“, ბეჭის გატეხვა ცერზე, „კენწლობიე“ ფეხით, ჯოხით, უმოძრაო კაცის აყვანა, მჭილის გახსნა, მუშტებით აყვანა, „მკლავაყვანიე“, ფოთლის „გატკლეცა“, ცურაობა, „ჩორხიალი“ (თავდაღმართზე ჩამოსრიალება) და სხვა.

¹ Т. М а м а л а д з е. Народные обычаи и поверья Гურიинцев, СМОМПК, Тб., 1899, Ч. I, с. 59.

როგორც ვხედავთ, ჩამოთვლილ გართობებს არაერთად სიუჟეტი არ გააჩნია და ისინი თამაშებად არც ჩაითვლებიან. ამრიგად, მიზანშეწონილად ჩავთვალეთ არსებული მასალების, ლიტერატურული წყაროების მოშველებით, ძირითადად მაინც ჩვენი მთხრობელების ნაამბობს დაეყრდნობოდით. აქვე აღვნიშნავთ, რომ ჩვენი მთხრობელებიც ასახელებენ ზემოაღნიშნულ შეჯიბრებითი ხასიათის გართობას და ჩვენ იმათ აღარ გავიმეორებთ.

გურიამი ბავშვს დაბადებისთანავე ხელზე და ფეხზე ჭერ ცივ წყალს გადაავლებდნენ — „ხელში წადგომა არ ეცოდინებაო“ (ხელები არ გაეყინება), მერე — თბილს. წესით აკვანი ქალის შშობლებს უნდა მოეტანათ. ხოლო თუ ვერ მოხერხდებოდა, მაშინ ვინმესგან ითხოვდნენ, გარეცხავდნენ და მკლავზე გადაკიდებულს ცეცხლზე „გადააშვერდნენ-გადმოაშვერდნენ, თან გაიძახოდნენ: „წმინდა გიორგი და 365 ანგელოზო დაიცავი, იხსენ ყოველი ბოროტისაგან“. ამის შემდეგ ბავშვს ჩააწვერდნენ აკვანში. ლეიბის ქვეშ ჩაუდებდნენ ყავარს, რომელიც საშიბაქე ადგილას ამოჭრილი იყო და ირგვლივ შემოწყობილი ჰქონდა შქერის ფურცელი. ბალახს დასველებისთანავე გადაყრიდნენ და შეცვლიდნენ მშრალი ფოთლებით, სასთუმალ-ქვეშ შემოუწყობდნენ დანას, სავარცხელს, მაკრატელს, ტაგანას (ფოთოლო). ტაგანას იმდენად განსაკუთრებულ ძალას მიაწერდნენ, რომ საყმაწვილოთი დაავადებული ბავშვის შელოცვისას ტაგანასაც ახსენებდნენ. „ლილა, ქალბანა, ტაგანა, პილა პოლიტანი. სახელითა მამითა, ძითა ღვთისითა, ამ ბალანაის ტანიდან გამოდი, გამოეცალე, გაქრი და გაიპარე, ფეხის ჭვინთში გაიარე“. ავი თვალისაგან დასაცავად და თან გასართობად აკვნის ხელზე ჩამოკიდებდნენ ხოლმე პანტის ჭვარს, აბოს კბილს, ტატილეს (ფერად მძივებს), ქარვას, ბატის ზორხს, ზღვის ლოკოინას, აგრეთვე აკვანზე წაუსვამდნენ ხოლმე კუპრს. ზოგჯერ კი ყურს უკან ულაგებდნენ დამწვარ ასანთის ღეროებს და თან ბავშვს ასუნებინებდნენ. როცა დედა გადიოდა ოთახიდან, მაშინ აკვანზე ან ჯოხს მიაყუდებდა, ან სკამს მიადგამდა. თან ხმაშალდა წარმოთქვამდა: — მე ამ ბალანას მარტოს არ ვტოვებ“ როცა ბავშვი ფეხს აიდგამდა, ოქვიარაში სვამდნენ და იქ სწავლობდა სიარულს.

ამ კუთხის გართობა-თამაშობანი დავალაგეთ შემდეგნაირად: შეჯიბრზე აგებული, სამონადირეო, საყოფაცხოვრებო, გონების სავარჯიშო. ასაკობრივ თუ მივუდგებით, ბიჭები თამაშს იწყებდნენ 5—6 წლიდან და თამაშობდნენ 14—15 წლამდე. გოგონები კი 5—6

წლიდან ვიდრე 10—11 წლამდე, შემდეგ კი ებმებოდნენ საოჯახო საქმიანობაში.

ს ი მ ა რ დ ის გასავეითარებელი წვრთნა იწყებოდა ჯერ ადგილად შესასრულებელი სავარჯიშოებით. მაგ., სირბილი გარკვეულ მანძილზე დანიშნულ საზღვრამდე, ზოგჯერ ცალ ფეხზე. როგორც მოსალოდნელი იყო, ასაკის მომატებასთან ერთად მატულობდა გასაქცევი მანძილიც, იყო ტომარაში ჩამჭდარი ბავშვების სირბილიც. სირბილზე იყო აგებული თამაში კო დ ი ლ ე. დანიშნული ადგილიდან გამოქცეული ერთ-ერთი მოთამაშე რომელიმეს ხელს დაარტყამდა, მიაძახებდა „კოდილეს“ და განაგრძობდა სირბილს. თუ „დაკოდილებული“ დაეწეოდა და ხელს დაარტყამდა, მაშინ იგი ვანთავისუფლებულად ითვლებოდა და ახლა ის „დაკოდავდა“ ვინმეს. თამაშ ხ ი ტ ი რ ი ა ს დროს ერთ-ერთ თვალახვეულს მიუახლოვდება მეორე მოთამაშე, რომელსაც ისეთი საგანი უჭირავს ქახუნის ხმას რომ გამოსცემს. იგი ყურთან გაუქახუნებს და თან მიაძახებს: „ხიტირია“, „ხიტირიაო“. თვალახვეული გამოუდგება და თუ დაიჭირა, მაშინ იგი გამარჯვებულად ითვლება და ახლა თვალებს აიხვევს დაჰერილი.

იყო სხვადასხვა სახეობის ხტომაც. ადგილიდან, სიგრძეზე მიწყობილი ფეხებით (ამას ფ ე ხ მ უ წ ი ე ე რ ქ ე ა), გამოქცევიტ, ჩხირზე, სიმაღლეზე, რომელიც შემდეგნაირად ხდებოდა: ხის ორ, სწორ ტოტს გასხლავენ ისე, რომ შეარჩენენ მხოლოდ მცირე ტოტების წაწაშვერებს (3—5 სმ. სიგრძისა). გასხლულ ორ ტოტს ჩაარკობენ მიწაში, ერთმანეთისაგან 1—1,5 მეტრის დაცილებით, ტოტების განასხლავ მცირე შვერილებზე ჰორიზონტალურ მდგომარეობაში ჩამოადებენ სწორ შოლტს ან თამასას, მხტომელთა შესაძლებლობის მიხედვით, შოლტს გადაუნაცვლებენ ქვევიდან ზევით. გამარჯვებულად ის ჩაითვლება, ვინც შოლტზე წამოუდებლივ ყველაზე მაღლა გადახტება. იცოდნენ აგრეთვე ზურგზე გადახტომაც და ნაბაღზე გადახტომაც. თამაში იწყებოდა ერთი ნაბლით და თანდათან უმატებდნენ ნაბლების რაოდენობას. ამრიგად, ნაბლის კალთების სიგრძის მიხედვით საზღვრავდნენ ნახტომის სიგრძესაც. ასეთი რთული ნახტომის შესრულებას ახერხებდნენ, რასაკვირველია, მოზრდილები. გადახტომამაზეა აგებული თამაში კ ლ ა ს ო ბ ი ე. დახაზავდნენ უჯრებს და ფეხით გადაჰქონდათ ქვა უჯრიდან — უჯრაში, ვინც მოახერხებდა ქვის გამოტანას უჯრიდან ისე, რომ ქვა რომელიმე უჯრის ხაზზე არ მოხვედრილიყო — ის გამარჯვებულად ითვლებოდა.

წ ო ნ ა ს წ ო რ ო ბ ი ს გრძნობის გამომუშავებას ემსახურებოდა ხის ტოტი ან მსხვილი თოკი, რომელზედაც გადი-გამოდიოდნენ.

ფერობებზე და მთებზე ცოცვამდე ეჯიბრებოდნენ ერთმანეთს უტოტო, სწორ ხეზე ასვლაში. გამარჯვებულად ითვლებოდა ის მოთამაშე, რომელიც ყველაზე უფრო მაღლა მოახერხებდა ასვლას. იცოდნენ აგრეთვე ტანგამართულად ჭოკზე აცოცვა, რაც შემდეგში გამოიხატებოდა: აიღებდნენ თხილის სწორ ჭოკს ან ვენახის გრძელ ლერწს და ხის ტოტზე მიაბამდნენ ბაწრით. ჩამოკიდებული ბოლოდან ბიჭები ტანგამართულად აცოცდებოდნენ ჭოკსა თუ ვენახზე. აქაც, გამარჯვებულად ის ჩაითვლებოდა, ვინც მოახერხებდა ყველაზე უფრო მაღლა ასვლას.

ლონის გამოსაცდელად კი ეჯიბრებოდნენ ერთიმეორეს ხელების გადაწევაში, ვენახით მოქაჩვაში. ამ დროს, არჩევან-არადანის გათვლის შემდეგ მოთამაშეების ორი ჯგუფი ერთიმეორეს პირდაპირ დგებოდა. შუაზე გაავლებდნენ ხაზს. ხელს ჩაავლებდნენ თავისუფალ ბოლოებზე ვენახის მოგრძო ლერწს; რომელი ჯგუფიც იმ ხაზს გადმოაცილებდა და თავისკენ გადმოსძალავდა, გამარჯვებულად ითვლებოდა. ძალ-ლონის გამოსაცდელად ერთიმეორეს ეჯიბრებოდნენ ჭიდაობაში, რაც განსაკუთრებით იმართებოდა ხოლმე დღეობებში. მწყემსი ბიჭები კი ჭიდაობდნენ მცენარე გვიმრებით და ამას კაკვობიე ერქვა. გვიმრის ტოტების ამონაყარებს მოტეხავდნენ და ფოთლებს შემოფეცქნიდნენ. მიღებულ მხრეულებს აჭიდებდნენ, ვისი გვიმრაც გატყდებოდა, ის ითვლებოდა დამარცხებულად. როგორც ყველგან, აქაც ეჯიბრებოდნენ აგრეთვე მძიმე ქვის აწევაში.

ხელის სიმარდის განვითარებას ემსახურებოდა ისეთი თამაშები, როგორიცაა: კენჭობიე, რომელსაც თამაშობდნენ ხუთი კენჭით, ყველგან გავრცელებული წესისამებრ. იღებების სახელები იყო: ერთობიე, ორობიე, სამობიე, ოთხობიე, გორობიე, გოჯობიე, ჯილობიე, ცილობიე. ტკაველობიე, კლავობიე, მუხლობიე, ფხარობიე, ჩუმათობიე, ხაჭურობიე, ცისკარტობიე. ამ თამაშისათვის მდინარე სუფსას ნაპირებზე სპეციალურ კენჭებსაც კი ეძებდნენ ხოლმე.

ჯოხობიეს დროს ჩხირებს წვრილ ნაჭრებად დატეხავდნენ და კენჭობისასვით თამაშობდნენ. გამარჯვებულად ის ჩაითვლებოდა, ვისაც ხელში კენტი ჩხირები შერჩებოდა.

რაც შეეხება თამაშ დანობიეს ზოგი მას თხის პოკოკობს ეწახდა. ვინც ვერ შეასრულებდა საჭირო იღებებს (ზურგი, მუჭო, ნეკედო, თავო, წარბო, ცხვირო, კბილო, წკიპარტო, და სხვა), ისჯებოდა და მას კბილით უნდა ამოეღო მიწიდან ჯოხი. ხელის მოქნილობა იყო საჭირო აგრეთვე თამაშ წკიპარტას დროს. სხვადასხვა ადგი-

ლას დალაგებული სამი ქვა წკიპურტით ისე უნდა გაეგდოთ, რომ სამივე ერთიმეორისათვის მიეახლოვებიანთ. ვინც ამას მოახერხებდა, გამარჯვებულად ითვლებოდა.

ჩ ხ ი რ ო ბ ი ე ს სხვადასხვა რაოდენობის ჩხირებით თამაშობდნენ და წესებიც ოდნავ განსხვავებული იყო. წინასწარ შეთანხმდებოდნენ ქულათა რაოდენობაზე. ხან ხელის გულზე დალაგებულ ათ ჩხირს მალლა აპყრიდნენ, ხელს გადმოაბრუნებდნენ და ხელის ზურგით დაირჩენდნენ. შემდეგ საწინააღმდეგო ილუთს შეასრულებდნენ. რამდენ ჩხირსაც დაირჩენდნენ და არ ჩამოაგდებდნენ, ის ქულად ითვლებოდათ. ზოგჯერ ჩხირებს თავისი სათვალავი ჰქონდა. ვისაც მეტი ქულების რაოდენობა დაუგროვებოდა, ის გამარჯვებულად ითვლებოდა. იყო ასეთი ჩ ხ ი რ ო ბ ი ე ს: ქვაზე დადებდნენ მოგრძო ჯოხს და ზედ დალაგებდნენ ჩხირებს. ორი მოთამაშე ბავშვი გამოიქცევა, დაარტყამს ფეხს ჯოხს, ჩხირები მალლა ახტებიან და მიწაზე მიმოიფანტებიან. ვინც მოასწრებს მეტის აკრეფას, ის გამარჯვებულად ითვლება. თამაშ რეკატობიას დროს კი ამოთხრიან ორმოს, ზევიდან დალაგებდნენ სამ ჯოხს. მოზრდილ ჯოხს დაარტყამენ ერთ-ერთ ჯოხს, ის სადღაც დაეარდება, იქიდან სასროლო ჯოხით გადაზომავდნენ მანძილს, ამ თამაშშიც მანაწილე ორი ბავშვი წინასწარ შეთანხმდებიან ქულათა რაოდენობაზე, გამარჯვებულად ჩაითვლება ის, ვინც შეასრულებს დათქმულ ქულათა რაოდენობას.

ვეზირობიას თამაშობდნენ უფრო მწყემსად გასული ბიჭები, დაახლოებით 7—15 წლის ასაკამდე. თამაშობდნენ სამნი. ხის სწორ ტოტს, სიგრძით 5—7 სმ. გააპობენ სიგრძეზე ორ თანაბარ ნაწილად. მიწაზე წრედ შემომსხდარი ბიჭები დაიწყებდნენ გაპობილი ჯოხების მიტყუპულად ასროლას და დაყრას. თუ განაპობი პირით ორთავე ნაჭერი მიწისკენ დაეყრება, დამყრელს მიეკუთვნება „ვეზირის“ წოდება, მას ჩაბარდება ტყავის ქამარი და ეძლევა უფლება „მეფის“ ბრძანების შესრულებისა. „მეფედ“ ის მოთამაშე ხდება, რომლის მიერ აყრილი ჯოხები პირით მალლა დაცვივა. „ბატის ქურდად“ კი ის ჩაითვლება, რომლის ასროლილი განაპობი ჯოხები დაეცემა ერთი პირით დაბლა და მეორე მალლა. ბოლოს „მეფე“ უბრძანებს „ვეზირს“ „ბატის ქურდის“ დასჯას, რაც გამოიხატება ან ხელის გულზე ქამრის დარტყმით, ან სხვა სახის სასჯელით.

თორმეტ-თორმეტაობას გურიში ასე ასრულებდნენ: აიღებდნენ წალღს ან დანას და წვერით სცემდნენ მიწაზე ან ფიციარზე, თან თითოეულ დაკვრას ზედ აყოლებდნენ შემდეგ ტექსტს: „თორმეტ, თორმეტ თორმეტაო, თუ გამოხვალ თორმეტაო, დანა შენ

და პირი მეო“. დაითვლიდნენ წალდის წვერით დაჩხვლევით ადგილებს და, თუ თორმეტი გამოვიდოდა, მოგებულად ითვლებოდა. აქვე უნდა აღინიშნოს, რომ საქართველოს ბეერ კუთხეში (განსაკუთრებით აღმოსავლეთ საქართველოს მთაში) „თორმეტობა“ ზოგჯერ გათვლის ერთ-ერთ წესად ითვლება, ზოგჯერ კი გონების სავარჯიშო-ჭადრაკის მსგავს თამაშად².

სიმარჯვეა საჭირო ლ ა ხ ტ ი ს თამაშის დროსაც, რასაც გუჩიაში უფრო ქ ა მ რ ო ბ ი ა ს ეძახდნენ და ასრულებდნენ ყველგან გავრცელებული წესის მიხედვით. ჭ ა ფ ა რ ი კ ა ც (რიკ-ტაფელას მსგავსი) საყვარელ გასართობს წარმოადგენდა არა მარტო ბავშვებისათვის, არამედ მოზრდილებისათვისაც.

იმ თამაშებიდან, რომლებსაც საფუძვლად უდევთ ნადირობა, შეიძლება დავასახელოთ: ბ ა ტ ო ბ ი ე. ამ თამაშისას ბატების პატრონი საძოვარზე გარეკავს ბატებს. ორი ტურა კი, ერთი მამალი ბატის გარდა ყველას მოიტაცებს და დამალავს თავის სადგომში, ბატების საძებრად წასული პატრონი შეხვდება ტურას, რომელიც უარპყოფს ბატების მოტაცებას, მაგრამ პატრონი მაინც მიაღწევს იმ ადგილამდე, სადაც ხელიხელ გადანასკული ბატები არიან დამწყვდეულნი. პატრონი ულტიმატუმს წამოუყენებს ტურას, მხოლოდ ის ბატები გერგება, რომლებსაც ხელებს გაუხსნით, ტურა ჩაატარებს ამ მოქმედებას და დიდი წვალების შემდეგ ნაწილი მას დარჩება, ნაწილი კი პატრონს დაუბრუნდება. ქ ო რ ა - ბ უ დ ე შ ო ც არის ბრძოლა ქორსა და კრუხს შორის. ქორის ბუდესთან მივა წიწილებმომბული კრუხი და შესძახებს: „— ქორო, ბუდეს დაგიშლი“, ამაზე ქორი უპასუხებს — „— მე წიწილას წაგართმევ“, „დაიწყებენ ბრძოლას. კრუხი ცდილობს ბუდის დაშლას, ხოლო ქორი კი თან იცავს თავის ბუდეს კრუხის თავდასხმისაგან, თან კი ცდილობს წიწილის წართმევას. ბრძოლაში თუ ქორი დამარცხდა, ის უთმობს ადგილს კრუხს, ხოლო თუ კრუხი დამარცხდა, თავის ადგილს უთმობს მომდევნო წიწილას. ნ ე ს ვ ო ბ ი ე ს თამაშობდნენ მარტო გოგონები. ერთ-ერთი მოთამაშე „დიასახლისი“ იჭდა ცალკე „ნესვები“ კი მოშორებით. მეზობლები ყველა ნესვს გაიტყუებენ. ზოლოს, ნესვების უკან დასაბრუნებლად გაიმართება ბძოლა „დიასახლისსა“ და „მეზობელ-დამტაცებლებს“ შორის.

თ ვ ა ლ ს ა ზ ო მ ი ს, მ ი ზ ა ნ შ ი მ ო რ ტ ყ მ ი ს უნარიან განვითარებას ემსახურება მიზანში ქვის სროლა, რასაც „ქ ვ ი ს

² კრებ. თუშეთის ეთნოგრაფიული შესწავლისათვის, ნ. ლ ო ლ ო ბ ე რ ი ძ ე, თუშური საბავშვო გართობა-თამაში და სათამაშობი, გვ. 241.

და ყუღებებს“ ეძახიან. თამაშ პოკუჩის ან როგორც ზოგჯერ ეძახის ზუკუტურიას დროს კი პატარა ქვას შემოდებენ დიდ ქვაზე და შორიდან ესვრიან რიგ-რიგობით. ვინც მორტყმით გადააგდებს ქვას, ის შეაჯდება დამარცხებულს ზურგზე და მიაყვანინებს ქვამდე.

ორმოხიას დროს კი ამოთხრიან რამდენიმე ორმოს. თითო-ეულ ორმოზე განკუთვნილი იქნება ქულების გარკვეული რაოდენობა. წინასწარ დათქვამენ გასამარჯვებელ ქულათა რიცხვს, მოთამაშე ბავშვები დაიწყებენ რიგრიგობით თხილის ან კაკლების ჩაყრას. რომელი მოთამაშეც ადრე შეასრულებს დათქმული ქულების (ფორა) ნორმას, მას მიეცემა ყველა თხილი ან კაკალი, რომლებიც ორმოებში ჩაყვივდა.

ნიგვზოხიას სხედასხვანაირად თამაშობდნენ. ხან კოჭებივით დაწყობილ ნიგვზებში ისროდნენ როგორც ნიშანში და ეჯიბრებოდნენ ერთიმეორეს მასში მოხვედრებაში. ვინც მოახვედრებდა, იღებდა კაკალს. ხან, რამდენი მოთამაშეც იყო, იმდენ ნიგვზს-დააგროვებდნენ, ვისიც ყველას გაუსწრებდა, ის გამარჯვებულად ითვლებოდა და დანარჩენ ნიგვზსაც დაეპატრონებოდა ხოლმე. იცოდნენ ასეც: კაკლის ზომაზე ამოაღრმავებდნენ მიწას, ერთ-ერთი მოთამაშე ისეთნაირად მოათავსებდა ხოლმე კაკალს ორმოში, რომ მარტო თავი უჩანდა ზემოთ. მეორე მოთამაშე თავის კაკალს დაარტყამდა ზემოდან, ვისი კაკალიც გატყდებოდა, მთელს პატრონი აიღებდა.

მშვილდისას-ბზიკალ-კოდალს აკეთებდნენ თხილისას, ისარა — კოდალს კი შქერისას ან ცოცხის ღეროსაა, მასში ჩაარტობდნენ ნემსს. ლურსმანს, წინდის ჩხირის წანატეხს და ისროდნენ ან ნიშანში ან შინაურ ჩიტებში (ბელურა, სკვინჩა, თავშავა.. კვირხილა).

თამაშ ფირალოხიას დროს, ორ გჯუფად გაყოფილები ერთმანეთს ებრძოდნენ ბზიკალ-კოდალებით. რაც შეეხება შურადულს, (ზოგი მთხრობელი მას ქვის სასროლ ჯოხს ეძახის), მასაც, იყენებდნენ უფრო შეჯიბრში, თუ ვინ უფრო შორს ისვრის ქვას. ზოგჯერ კი შურადულს იყენებდნენ ყანიდან დათვის გასაგდებად. დასაფრთხობლად. გარდა ყველგან გავრცელებული შურადულის სახეობისა (ბაწრით ნაქსოვი), ხმარობდნენ აგრეთვე თხილის ჯოხს ან ჩალის ღერს, რომელსაც გაუპობდნენ თავს, შიგ ჩადებდნენ შესაფერი სი დიამეტრის კენჭს, ჯოხს ღონივრად მოიქნევდნენ და კენჭი

ზაიტყორცნებოდა გარკვეული მიმართულებით. ეს სახეობა შურ-
დულისა ჰგავს სვანურ ბირეკყევს³.

გურიაში, აგრეთვე ძალზე გავრცელებული ყოფილა ცხენ-
ნოსნობა, ჯოხზე გადამჯდარი პატარა ბავშვები ერთმანეთს ეკი-
ბრებოდნენ დათქმულ ადგილამდე მისვლაში და ამასობაში ისეთ
წვრთნას გადიოდნენ, რომ ცნობილი მოჭირითეები ხდებოდნენ, უფ-
რო მოზრდილები კი კაც-ცხენობიას თამაშობისას შეაჭდე-
ბოდნენ ზურგზე ერთიმეორეს, გადაუქნევდნენ შოლტს და „ცხენი“
გაქენდებოდა. ამ თამაშთან დაკავშირებით გურიაში შეიქმნა ლეგენ-
და სათაურით: „როგორ გაჩნდნენ ქართველები სტამბოლში“, იგი
მოგვითხრობს შემდეგს: ეშმაკმა გურულს უთხრა: „ცხენობია“ ვი-
თამაშოთო, რიგ-რიგობით შევასხდეთ ერთმანეთს ზურგზე სიმღერი-
თაო. შეასდნენ და, როცა გურულმა „ია-უა“—„ია-უა“—ს სიმღე-
რით სტამბოლამდე წაიყვანა, ეშმაკი. გურიაში დაბრუნდა, გუ-
რული კი სტამბოლში დარჩა და გამრავლდა⁴. არქივის ამავე ნომ-
რით (№ 35) აღნიშნულ მასალებში შემდეგი ცნობაცაა: „1923 წელს
საქართველოში ჩამოვიდა ფერეიდნელი ქართველი სეიფულა იოსე-
ლიანი. ბათუმის აკადემიურ თეატრში ზ. კიკინაძის თხოვნით მან სა-
ზოგადოებას გააცნო ფერეიდნელი ქართველების საყოფაცხოვრებო
ადათ-ჩვევები. სხვათა შორის თქვა: „პატარაძლის მოყვანის დროს
ნაყრები გადავაჭდებოდით ჯოხის ცხენებს და ეზოში დავაქენებ-
დითო“.

ა. ცამციშვილიც აღნიშნავს, რომ „გურულების გაწაფულობა
თვალსაჩინო ხდებოდა... ნაგომრის საასპარეზოზე, სადაც ე. წ. „ქა-
ლაქობას“ თავს იყრიდნენ გურულები, მეგარელები და აჭარლებიო“⁵.
ამავე ავტორის ცნობით, უცხოეთში სახელის მოხვეჭა გურულებმა
დაიწყეს იმით, რომ „თავდაპირველად, კირილე მაქსიმელის ძე
ჯორბენაძემ ამერიკელ თომა ოლივერს შესთავაზა ცხენოსანთა გუნ-
დის შექმნა. განაზრახი კიდევაც მოიყვანა სისრულეში და ცნობილი
მოჭირითეების ლუკა ნინიკოს ძე ჩხარტიშვილისა და ფოლტა ცინ-
ცაძის მონაწილეობით შეადგინა გუნდი და უცხოეთში დაიწყო მოგ-
ზაურობა... ქართველი ცხენოსნები წარმატებით გამოდიოდნენ იტა-
ლიაში, საფრანგეთში, გერმანიაში, ინგლისში, შეერთებულ შტატებ-
ში. არგენტინაში, ბრაზილიაში, მექსიკაში და ყველგან ხიბლავდნენ

³ კრებ. სვანეთის ეთნოგრაფიული შესწავლისათვის, ნ. დ. დ. ბ. ე. რ. ი. ძ. ე.,
ხალხური აღზრდის წესები სვანეთში, 1970, გვ. 206.

⁴ მახარაძის სამხარეთმცოდნეო მუზეუმი, არქივი № 35, „მასალები ხალხურ
სპორტულ თამაშობათა შესახებ გურიაში“ (ჩამწერი ა. თომიძე).

⁵ ა. ცამციშვილი, ცხენოსნები უცხოეთში, 1958, გვ. 9.

მაცურებელს. ქართველ ცხენოსანთა გუნდში მომეტებული ნაწილი გურულები იყვნენ. მაგ., ივანე (პატარა) მალაქიას ძე მახარაძე, („ჩოხაგაძელი“), ვასო ერაჯის ძე, ირაკლი, დათა ჭყონიები, დიმიტრი მგალობლიშვილი, ბესარიონ, მელიტონ ცინცაძეები, ლევანტი ჯორბენაძე, მოსე გურგენის ძე გიგინეიშვილი და სხვა⁶.

ჩოხატაურის მხარეთმცოდნეობის მუზეუმის არქივში ინახება ზიძინა გოგობერიძის მიერ შედგენილი სოფელ ქვემოხანის ისტორია⁷, სადაც აღნიშნულია უკვე სახელოვანი მოჭირითე ქალების გვარები. ესენი იყვნენ დები: ბარბალე სპირიდონის ასული ზაქარეიშვილი—~~იმნაძისა~~ და მარო სპირიდონის ასული ზაქარეიშვილი—კვიტაიშვილისა. ქალებს გათხოვებამდე კარგად სცოდნიათ ცხენოსნობა. გათხოვების შემდეგ კი მეუღლეებთან ერთად შევიდნენ ცხენოსანთა იმ გუნდში, რომელსაც ლუკა ჩხარტიშვილი ედგა სათავეში. ეს ის ლუკა ჩხარტიშვილია, რომელიც ა. ცამცივილის დასახელებული ჰყავს, როგორც საქვეყნოდ ცნობილი მოჭირითე.

დოღი, როგორც წესი, იმართებოდა ბახმაროზე სეზონის დამთავრებისას, დაახლოებით 17 აგვისტოს. აქ ერთმანეთს ეჯიბრებოდნენ რაიონები. მაგ., ჩოხატაურის რაიონში განთქმული იყვნენ: ლადო ბერძენიშვილი, ლაზარე ცინცაძე და სხვები. როგორც ვხედავთ, ცხენოსნობას საპატიო ადგილი ეკავა გურიაში, მაგრამ კიდევ უფრო საყვარელ გართობას წარმოადგენდა ბურთაობა, რომელიც უმთავრესად ტარდებოდა ამა თუ იმ სოფლის სათამაშო მოედანზე. პატარები ბურთს უფრო ცხოველების ბალნისაგან ამზადებდნენ. ზორკლიან. მრგვალ კენჭზე ირგვლივ შემოახვევდნენ ბალანს, ხელში მოთელავდნენ, თან ხელის გულით აგორებდნენ, სანამ არ მიიღებდა მრგვალ ფორმას. მოზრდილები კი ბურთს ხარის ტყავისაგან ამზადებდნენ. ტ. მამალაძე ასახელებს მხოლოდ სამი სახის ბურთაობას. ესენია: ჭაკუნობა, გაგდება და გატანა (გატანა, ბევრი მთხრობელის ცნობით, იგივე ლელობურთია)⁸. ჩვენი მთხრობელები კი ამ თამაშის სხვა სახეებსაც გვამცნობენ. პრიმიტიულ თამაშად ითვლება ფეხგორია. როგორც თვითონ სახელწოდებიდან ჩანს, ამ თამაშის დროს ბურთს ფეხით აგორებენ. თამაშობდა ორი ბავშვი, უფრო უმცროსი ასაკისა. ისინი ერთმანეთის პირისპირ დგებოდნენ თავთავიანთ

⁶ ა. ცამცივილი, დასახ. ნაშრ., გვ. 17, 18, 22.

⁷ ზიძინა გოგობერიძე, სოფ. ქვემოხანის ისტორია, ინახება ჩოხატაურის მხარეთმცოდნეობის მუზეუმში.

⁸ დასახ. ნაშრ., გვ. 51.

ლელოს ხაზზე. წინასწარ შეთანხმდებოდნენ ქულათა რაოდენობაზე, რასაც „ფორას“ ეძახდნენ. თითოეული მოთამაშის მიზანი იყო ბურთი გადაეცილებინა მოწინააღმდეგის ლელოს ხაზისათვის და დაეგროვებინა დათქმულ ქულათა რაოდენობა. გ ა გ დ ე ბ-გ ა მ ო გ დ ე-ზ ის დროს არჩევენ-არადანით გაყოფილი ორი ჯგუფის წევრები ცდილობენ თავისი ჯგუფის ხელში მოხვდეს თამაშის დასაწყისში ერთ-ერთი მოთამაშის მიერ მაღლა აგდებული ბურთი. ამა თუ იმ ჯგუფის წევრი, რომლის ხელშიც ბურთი ჩავარდა, სწრაფად გადასცემს ბურთს თავისივე ჯგუფის წევრს, ეს უკანასკნელი სხვას და, ამრიგად, გამარჯვებული ის ჯგუფი გამოდის, რომლის ხელშიც ბურთი უფრო დიდხანს არის.

ხ ე ლ გ ა კ ვ რ ი ა ს დროსაც ორ ჯგუფად იყოფიან. თითოეულ ჯგუფს თავისი საზღვარ-ლელი აქვს. თუ რომელი ჯგუფი დაიწყებს თამაშს, ეს წყდება წილის ყრით (დანიშნული ქვის მაღლა აგდებით), შემდეგ უფლებამოსილი ჯგუფის ერთ-ერთი წევრი შუა ადგილიდან აისვრის ბურთს და ხელის გულით გაჰკრავს მოწინააღმდეგის ბანაკისაკენ, რომელიც ცდილობს ბურთი ჰაერშივე დაიჭიროს და იმ ადგილიდან საცა დაიჭიროს, ისეთივე წესით გამოგზავნოს მოპირდაპირე ნხარეა, გამარჯვებულად ის ჯგუფი ითვლება, ვინც დათქმულ მიჯნას გადააცილებს. ამ თამაშით უფრო ერთობიან 10—12 წლის ბავშვები. ტ. მამალაძეს აღწერილი აქვს თამაში მ ა ი ა, რომლის დროსაც არჩევან-არადანით გათვლის შემდეგ ორი ჯგუფი ერთმანეთის პირისპირ განლაგდება. თითოეული პარტია მოეწყობა თავის კვალზე, ამ კვალის პარალელურად გაჰყავთ მეორე კვალი. კვალთა შორის მანძილს (ჩვეულებრივ ერთ მეტრამდეა) მაია ჰქვია. თამაში შემდეგნაირად მიმდინარეობს: პირველი პარტიის რომელიმე მოთამაშე გამოეყოფა თავის ჯგუფს და დადგება მოწინააღმდეგე ჯგუფის პირველ კვალზე (უკანა კვალზე, როგორც ვიცი, დგანან მოწინააღმდეგენი) ეს მოთამაშე გარბის თავისი ბანაკისაკენ. მოწინააღმდეგე ჯგუფის ერთ-ერთი მოთამაშე მას გამოეკიდება დასაჰკერად. გამჰქევი გადააფურთხებს „მტრების“ მაიაზე და შესძახებს: „ფუი შენს მაიას“, იგი ვერც კი მოასწრებს ნახევარი გზის გავლას, რომ პირველი პარტიიდან გამოიქცევა რომელიმე ამხანაგი მის დასახსნელად. თუ მღვეარი გაქცეულს ვერ დაეწევა, ხელს არ დააკარებს და თავის ბანაკისაკენ ვერ მოაბრუნებს, ამ დროს კი ამხანაგის დასახსნელად გამოქცეული მოთამაშე ამ მღვეარს დაიჭერს, მაშინ იგი ტყვედ ჩავარდნილად ითვლება. ტყვედ ჩავარდნილი ჯგუფის

წევრები კი გზავნიან ახალ მღევრებს, რათა ამხანაგი დაიხსნან „მტრებისაგან“ და თვითონ იწყებენ „მტრების“ დაქერას. „ტყვეებს“ აყენებენ იმ ბანაკთან ახლოს, რომლებმაც ისინი ტყვეებად ჩაიგდო ხელში. მათი განთავისუფლება ხერხდება მხოლოდ იმ შემთხვევაში, თუ მათივე ჯგუფის მოთამაშეები მოახერხებენ მხარზე ხელის დარტყმას. გამარჯვებულად ითვლება ის პარტია, რომლის მოთამაშეებიც ნაქლებ არიან „ტყვედ“ ჩავარდნილები.

როგორც ტ. მამალაძე დასძენს. ამ თამაშით ერთობიან ბავშვები 2 წლიდან ვიდრე 20 წლამდე⁹. რაც შეეხება ლელოგატანიას, იგი ყველაზე გავრცელებული ჩანს ამ კუთხეში და, ბავშვების გარდა, 21-ით ერთობიან ახალგაზრდები და უფროსი ასაკის ადამიანებიც. ლელო-ბურთის სათამაშოდ ახალგაზრდები ტილოს ტანსაცმელსაც კი იკერავდნენ წინასწარ, რათა თამაშის დროს მათთვის ტანზე არ შემოეგლიჯათ ყოველდღე სახმარი ტანსაცმელი. ლელო-ბურთის თამაში უფრო ხშირად აღდგომას იწყებოდა და გრძელდებოდა ახალი კვირის მეორე დღემდე. თამაში ტარდებოდა საგანგებოდ განკუთვნილ ადგილას. მაგ., ჩოხატაურელები მის „სათამაშო ეწერს“ ეძახდნენ. მოთამაშეები გაიყოფოდნენ ხან უბნების მიხედვით, ხან ცოლიანები ცალკე და უცოლოები ცალკე. ს. ბახვის მცხოვრები 72 წლის თამარ გიორგის ასული ანდლულაძე-ბაქელიძისა ლელოს თამაშს ეძახდა „ზედაურ-ქვედაურობას“. მისი გადმოცემით, „ზედაურს“ ეკუთვნოდა: ასკანა, ვაკიჯვარი, ოქროსქედი, შეიდობაური, ფანფალეთი, „ქვედაურს“ კი: ბახვი, მელექედური, ლაშე, ღუაბზე, ბოხვაური. რაც შეეხება შეჯიბრის კუთხეებს შორის, მაგ., გურულებსა და მეგრელებს შორის, ის უფრო იმართებოდა ფოთში პირველ მაისს. მოთამაშენი არჩევან-არადანის წესით გაიყოფოდნენ ორ ჯგუფად. თითოეულ ჯგუფს ჰქონდა თავისი საზღვარი და ჰყავდა თავისი „სარდალი“, ე. ი. მეთაური, რომელიც განსაკუთრებით გამორჩეული უნდა ყოფილიყო ფიზიკური ძალით. სიმარდით, მოსაზრებულობით, სითამაშით. ურთიერთშორის შეთანხმების შედეგად დათქმულ საეალდებულოდ შესასრულებელი ქულების მოგროვებას „გაფორმებას“ ეძახდნენ (ფორა). ფორად შეიძლება დათქმული ყოფილიყო ქულები: ოცი, ოცდახუთი ან ორმოცდაათი ქულა. თამაშის დაწყებისას ორივე ჯგუფი შუა ადგილას დადგება, ააგდებენ მალა ბურთს და, ვინც მას დაიჭერს, ყოველ ღონეს ხმარობს, რათა მოწინააღმდეგეს არ ჩაუგდოს ხელში და საკუთარი ლელოს ხაზამდე მიიტანოს. თამა-

⁹ ტ. მამალაძე, დასახ. ნაშრ., გვ. 58.

შის მიმდინარეობის დროს, მართალია, იკრძალებოდა სათამაშო წესების დარღვევა (მოწინააღმდეგის ფიზიკური შეურაცხყოფა ან ლანცლეა-გინება), მაგრამ ექსტაზში შესული მოთამაშეები ხშირად ივიწყებდნენ წესებს და ხელჩართულ ბრძოლებში ებმებოდნენ. მაგ., მოწინააღმდეგეს ბურთს ხელიდან „გამოლტყავდნენ“. ზოგჯერ, ლელოს მოთამაშეებში ცხენოსანი მოთამაშეებიც ჩაერეოდნენ ხოლმე, მაგრამ ზოგი ყოჩაღი მოთამაშე გაქენებულ ცხენსაც კი დაეწეოდა და ცხენოსანს ძირს დასცემდა. თუ თამაში წარმოებდა რომელიმე მდინარის პირას, მაშინ ბრძოლა იმართებოდა წყალშიაც. ზოგჯერ მოზრდილები ბურთს ამხანაგებს არ გადააწოდებდნენ ხოლმე. ასეთ დროს მოთამაშეები ელლიტავებოდნენ ერთმანეთს, ბურთის იძულებით გამოსატაცებლად. ამ წესით ბურთის თამაშს ეძახდნენ **ლ ე ლ ო- ლ ლ ი- ტ ი ო ს**. „ლლიტა“ ხშირად პატარა ბავშვებიც მიმართავდნენ. თითქმის ყველა სოფელს ჰყავდა თავისი მარჯვე მობურთალები მაგ., ჩოხატაურის რაიონში ს. ქვენობანში ხალხი დღესაც ასახელებს სტეფანე სიმონიშვილს, ნესტორ ლომთათიძეს, მელიტონ ცხოიძეს, ამბალ ლომაძეს, ვლადიმერ მათითაშვილს, სოფ. ბუცნარიდან — ალფესი გაგუას, ს. ძინითიდან — პართენ ჩხარტიშვილს, ვანო ხინთიბიძეს, შუა ფარცხმიდან — ტარასი მეგრელიშვილს, ეფანე ბერძენიშვილს, ს. ნაგომარიდან — აკაკი მამალაძეს, ს. ბახვიდან — ილარიონ ბაჭელიძეს, სოლომონ თენიაშვილს, ესტატე შავიშვილს, ისიდორე ბაჭელიძეს, ტოჩკა ბაჭელიძეს და სხვა.

ლელო-გატანაში ვაჟების გარდა ზოგჯერ ქალებიც რდებდნენ მონაწილეობას და მათ შორისაც გამოერეოდა ხოლმე საყოჩაღოდ განთქმულები. მაგ., ჩოხატაურის რაიონიდან ასეთები იყვნენ: ელპიტე გოგოლაშვილი, ათინო ბაჭელიძე, ელისაბედ ანდრულაძე, ლისა, შავიშვილი, ს. ვომის მცხოვრებ 83 წლის ანდრო თედორეს ძე აბაშიძის გადმოცემით, ძველად ლელო-ბურთის მაგვარ თამაშს ეძახდნენ **კ ი ლ ა შ უ რ ს**. ლელო-გატანიას თამაში ლანჩხუთში ახლაც იმართება ხოლმე ყოველ პირველ მაისს (გავიხსენოთ ტრადიციული თამაში გურულებსა და მეგრელებს შორის პირველ მაისს ქ. ფოთში). საინტერესო ის არის. რომ ამ დღეს ახლომახლო სოფლიდან ყველა აქ იყრის თავს.

ქ ა კ უ ნ ო ბ ა ს ა ც (პოკეის მსგავსი, მხოლოდ მინდორში—მწვანეზე) თამაშობდნენ უფრო მოზრდილები 17—18 წლისანი და უფროსებიც, ზოგჯერ ცოლიანებიც. საამისოდ შეკერავდნენ ბურთს ძველი კინკებიდან, შეკერავდნენ ბეოლის ქერკით. ხან საქონლის ბალნისაგან შეთელილ ბურთს ხმარობდნენ. აქაც გაიყოფოდნენ ორ

ჭგუფად. თითოეულ ჯგუფს ჰქონდა თავისი საზღვარ-ლელო. ერთ-ერთი მოთამაშე ააგდებდა ზემოთ ბურთს, შემდეგ კი ორივე ჯგუფი ცდილობდა ბოლომოკაუჭებული ჯოხით—ჭაკუნით ბურთის თავის საზღვარისაკენ—თავის ლელოში შეგდებას. საერთოდ, ორნაირი გზით ხდებოდა გამარჯვების მოპოვება. ერთ შემთხვევაში გამარჯვებულად ითვლებოდა ის პარტია, რომელიც თავის ლელოზე გაიტანდა ბურთს, მეორე შემთხვევაში კი, თუ მოწინააღმდეგის ლელოზე გაიტანდა. ვინაიდან, წესით, ბურთის ხელში დაჭერა არ შეიძლებოდა, ამიტომ საკმაოდ ძნელი იყო ჭაკუნით ბურთის ჰაერში დაჭერა და ნეორე მოთამაშისათვის გადაცემა. ამ თამაშშიაც სახელმწიფოებები იყვნენ: კაპიტონ ლომთათიძე, გიორგი ჯაში.

გ ა მ ო ც ნ ო ბ ა ზ ე იყო აგებული შემდეგი თამაშები: თ ვ ა ლ ხ უ ჭ ი ნ ა გ ა მ ო ც ნ ო ბ ა . ამ თამაშის დროს ერთი თვალახვეული დაჯდება. მოთამაშეთაგან რომელიმე მას მხარზე დაარტყამს ხელს და მან უნდა გამოიცილოს, თუ ვინ დაარტყა, თუ გამოიცილო, მაშინ ადგილებს შეიცვლიან. საქართველოს სხვა კუთხეებში ამ თამაშს „ჭერიჭამიას“ ეძახიან. მსგავსი იყო თ ვ ა ლ დ ა ხ უ ჭ უ ლ ი კ უ კ უ მ ა ლ ო ბ ი ე , მხოლოდ იმ განსხვავებით, რომ ყველა მოთამაშე წრეში იდგა, თვალდახუჭული კი შუაში იყო რომელიმე მოთამაშე განოკიდოდა წრიდან. მიდიოდა თვალდახუჭულთან. დაარტყამდა მხარზე ხელს, მერე გაიქცეოდა და დადგებოდა ისევ თავის ადგილას. თუ თვალდახუჭული გაიგებდა, ვინ დაარტყა, მაშინ აქაც ადგილებს შეიცვლიდნენ. თ ვ ა ლ ხ უ ჭ ი ა ს სხვადასხვა სახელწოდებით ასახელებენ. ზოგი ჭ უ ტ უ მ ა ლ ო ბ ი ე ს ეძახის, ზოგი უ ტ უ მ ა ლ ო ბ ა ს ა ნ დ ი ნ დ ი ლ ო ბ ი ე ს . ეს საყოველთაოდ ცნობილი თამაში სრულდება ძველი წესისამებრ.

თამაშ ყ უ რ ყ უ მ ო ბ ი ა ს დროს სხვადასხვა ნივთებს დამალავდნენ ქულში. ერთ-ერთი ამოიღებდა რომელიმე ნივთს და იკითხავდა: „ამის პატრონმა რა ქნას? — უპასუხებდნენ და პატრონიც შეასრულებდა „ბრძანებას“.

ბ ე ჭ დ ო ბ ი ე . მოთამაშეები დაჯდებიან წრედ, ორი კი წრის შუაში. ამათგან, ერთი დამმალავია, მეორე, ამომჩენი. დამმალავი ვინმეს ჩაუდებს ბეჭედს, ამომჩემნმა კი უნდა გაიგოს, თუ ვის ჩაუდო.

ვ ი რ ო ბ ი ე ს დროს ორი „ვირი“ წინ დგას თვალეზარებულ-ლი, მათ უკან კი ორი „წამყვანი“, რომლებიც ადგილებს შეიცვლიან ხოლმე და ერთ-ერთი „ვირს“ ზურგზე ხელს მიაბჯენს. „ვირმა“ უნდა გამოიცილოს მისი სახელი. თუ გამოიცილო, მაშინ „ვირი“ შეაჯდება

„ზურგზე „წამყვანს“, თუ ვერა, მაშინ, „წამყვანი“ შეაჭდება „ვირს“ და წაიყვანს.

გონების სავარჯიშო იყო თამაში დამკაობა. დაბაზავდნენ კვლარატს გადამკვეთი ხაზებით და სამ-სამი განსხვავებული ფერის კენკების გათამაშებით ცდილობდნენ სამი ერთი ფერის კენკის ერთ ხაზზე მოხვედრას. ეს თამაში საქართველოს ბევრ კუთხეში დამოწმებულია სხვადასხვა სახელწოდებით.

ზემოთ ჩამოთვლილი გართობა-თამაშობის გარდა, ბავშვები უკვე მცირე ასაკიდან დასაქმებულები იყვნენ ოჯახში და თავიანთ მშობლებს ეხმარებოდნენ მათი სოფლისათვის დამახასიათებელ ამა თუ იმ დარგის საქმიანობაში. აქვე უნდა აღინიშნოს აგრეთვე ამ კუთხის განსაკუთრებული ლტოლვა სწავლა-განათლებისადმი. მაგ., 1900 წელს. გაზ. „ივერია“ (№ 49) აღნიშნავდა, რომ „... აქაურ (იგულისხმება ს. ხიდისთავი, ნ. ლ.) ხალხს კარგა ხანია შეუგნია თუ რა არის სწავლა-განათლება. ამიტომ ბავშვი, შეიქმნება თუ არა 6—7 წლისა, მაშინვე სკოლაში აძლევენ, რომ რაიმე ისტავლოს და კაი გამოვიდესო“. ამ მიზანს ცხოვრებაში ატარებდნენ კიდევაც და ამხანილებდნენ ყურადღებას ისეთ დარგებზე, რომელიც გურიაში განსაკუთრებით იყო ფეხმოკიდებული. ასეთები კი იყო მეთამბაქოეობა, მეაბრეშუმეობა, საფეიქრო საქმე, მებოსტნეობა და სხვა. ს. ხევის მცხოვრების სუქენი თეოფილეს ძე მამალაძის (67 წ.) ცნობით, მის ბავშვობაში, მის სოფელში ძალზე მისდევდნენ მეთამბაქოეობას და ბავშვებიც ეხმარებოდნენ მშობლებს ფოთლის თოკზე ასხმაში, აკემსვავში. იგივე გაიმეორა ს. ნაგომარის მცხოვრებმა შალვა რაფიელის ძე ანთიძემ (71 წ.) ამ დარგების პოპულარობა ჩანს იმდროინდელი პრესის ფურცლებიდანაც. მაგ., გაზ. „ივერია“¹⁰ საზოგადოებას აცნობდა, რომ ს. ჩიბათში დაარსდა ორკლასიანი სასოფლო სამინისტროს სასწავლებელი, სადაც ასწავლიან: „მეაბრეშუმეობას, მებოსტნეობას და სხვა. გაზეთი «Кавказ»-ი კი იუწყებოდა, რომ სოფ. დვებზუში... ამხანაგობამ გააშენა სახელოსნო, სადაც ორივე სქესის ბავშვები სპეციალისტების მეთვალყურეობის ქვეშ, უსასყიდლოდ შეისწავლიან მეაბრეშუმეობას და საფეიქრო საქმეს“¹¹. შემდეგ, წერილის ავტორი კარგი წამოწყებით გახარებული გამოთქვამს მსგავსი სახელოსნოს გახსნის სურვილს ლანჩხუთში, სადაც მეაბრეშუმეობას გაცილებით უფრო მეტი მისდევს, ვიდრე სხვაგან და საფეიქრო საქმეც პრიმიტიული წესებით განაგრძობს არსებობასო. ამავე

¹⁰ „ივერია“, № 167, 1897, აქაური სტუმარი.

¹¹ «Кавказ», 1899 (№ 158—191VI).

წელს „ივერია“ კიდეც ახალ ცნობას იძლეოდა. ძმათა შარაშიძეებს მოუვიდა ნებართვა გახსნან სოფელ ციხეს (ოზურგეთის მაზრა) ახალი ტიპის სამეურნეო ორკლასიანი სკოლა... ციხის სკოლა ხალხისათვის ადვილად ხელმისაწვდომი და ხალხური ხასიათის უნდა იქმნეს... დამაარსებელნი ჭეიქრობდნენ იქონიონ სკოლასთან კურსები, სადაც სოფლელებს შეეძლებათ უფასოდ მოისმინონ დარიგება ვენახის მოშენებისა, ბაღოსნობისა, მეფუტკრეობისა და სხვათა შესახებ... ბავშვების მიღება გაგრძელდება ენკენისთვის დამლევამდე (ნ. კ. „ივერია“, № 188, 1899 წ.).

ამათუიმ საქმიანობით დაკავებული ბავშვები, მუშაობის პროცესში ერთმანეთს ეჯიბრებოდნენ გამოცანების, ანდაზების თქმაში. ჩვენ აქ მოგვყავს მხოლოდ ნაწილი ჩაწერილი გამოცანებისა. ზოგ მათგანს ავტორი ჰყავს და ამიტომ აქვე აღვნიშნავთ მის გვარს, ზოგი კი ხალხურია. ნაწილი გამოცანებისა გადმოწერილია რვეულიდან „ზემოსურების სოფლის ისტორია“ (ინახება ჩოხატაურის მუზეუმში).

გ ა მ ო ც ა ნ ე ბ ი

ყველა მე შემომისხდება, როცა ზამთარი იწყება,
 შორბენს ხოლმე ფისო და ჩემს სიახლოვეს მიწვება

მთქ. ნ. თაეაძე

(ცეცხლი)

ერთი სტუმარი მესტუმრა, სახელად ჰქვია გაბრიელი, არც სული აქვს, არც
 ფეხი აქვს, არც თვალი აქვს არც ყური აქვს, არც თავი აქვს, არც სკამი აქვს
 დასაჯდომი

(ძილი)

მთქ. ივლ. ცინცაძე, ს. შუაგანახლება

ყველაზე ადრე ვწოთლდები, ყველაზე გვიან ვმწიფდები

(შეინდი)

(ეს საკუთარი გამოცანა პოეტ სევერიან ისიანს უთქვამს გიორგი ისაყის ძე სალუქ-
 გაძისათვის ჯარში ყოფნის დროს).

კარებამდე მივაცილებს შიგ არ შეგყვება

(კიბე)

ერთი რამე მაქვს, ორი თავი აქვს.

(მუთაქა)

თეთრკაპიანი ნაყავს, წითელიანი ურევს

(ენა და კბილი)

ხორცის შამფურზე რკინის მწვადია

(ბეჭელი)

ერთი რამე სულთერი მიაღება კლდესა,
 სასიკვდილოდ პირს დააღებს ეხვეწება ღმერთსა

(აბრეშუმის კია)

ისე ვიყავ მე, როგორც ხარ შენ,
ისე გაგხდი შენ, როგორც ვარ მე.

(ქათამი და კევრცხი).

გადმოვღებოდი გეჩვენებოდი, გესტუმრებოდი, რად არ მელოდი?
(ზამთარი)

(ავტორი, პელაგოგო ქუაყუა სალუქუაქე, 68 წლ, ს. უჩხუბით, მახარაძის
რაიონი.).

ერთი შავი კურო, ურქო, უყურო, ვეცა, არ ვეცა, რაფერ ვუყურო?
(ბურთი)

ენის გასატეხი.

ნორი ნანორალში, რიონი ნარიონალში
ეს ჩემი ქინძი, ქონდარი პიტნაწიწმატ ტარხუნდებოდა
მე თუ არ მეპირპილქინძქონდარტარხუნდებოდა
შენ რა გეპირპილქინძქონდარტარხუნდებოდა.
ყაზვინს ვიყავ რამისთვის
საყარყატოს ყვავნი ჰყვირდენ
ბაყაყები ყყინითა, საყაყაჩოდ ყვავილს მყიდენ
(ავტორი გიორგი სალუქუაქე) და სხვ.

ს ა თ ა მ ა შ ო ე ბ ი

გარდა მშვილდისარისა და შურდულისა ბავშვები იკეთებდნენ
ხ ე ლ თ ო ფ ე ლ ა ს თხიფსელასაგან ან დუღგულისაგან. ამ უკანას-
კნელიდან გულს ამოიღებდნენ, ერთი თავიდან ჩასტენიდნენ თხმე-
ლის კვირთხილას, ან ქალადის საცობს, მეორე თავიდანაც მეორე
კვირთხილას მოათავსებდნენ. მიაწვებოდნენ სპეციალური ჯოხით,
რომელსაც წვერზე დასველებული ჩვარი ჰქონდა დახვეული. მეორე
კვირთხილა პირველს მიაწვება ისეთი სიძლიერით, რომ გამოხდება
ტკაცუნის ხმა. ზოგჯერ ეჯობებოდნენ ხოლმე ერთმანეთს ამ კვირთ-
ხილას მიზანში გარტყამაშიაც.

ს ა შ ხ ა პ უ ნ ა ს ა ც აკეთებდნენ მცენარე დიდგულას მსხვილი
ტოტისაგან. დიდგულას მუხლისაგან გამოაგდებდნენ გულს მთლიანად.
ამ გულზე მოარგებდნენ წვრილ ხის დგუშს, რომელსაც ცალ
მხარეს სახელური ტარი ჰქონდა და წვრილ მხარეს კი ჰქონდა
დახვეული. წყლიანი ჰურტლიდან წყალს დგუშით ამოიღებდნენ და
ერთმანეთს წუწავდნენ.

ფ ი შ ტ ო ნ ა ს გამოჰკრიდნენ ხოლმე ტოტისაგან, მისცემდნენ
დამბაჩის ფორმას. ცალ მხარეს ამოჰკრილ ღმულში ჩადგამდნენ თო-
ფის განასროლ ვაზნას, რომელსაც ხეზე დაამაგრებდნენ თუნუქის
სალტეებით. ვაზნის შიგნით ჩაყრიდნენ თოფის წამალს, მოუკიდებ-

დნენ ცეცხლს და „ფიშტონა“ გავარდებოდა. ვინაიდან ასეთ გართობას ზოგჯერ უსიამოვნო შედეგები მოჰყვებოდა, პატარებს უკრძალავდნენ ხოლმე მას.

ს ა ბ ზ რ ი ა ლ ო თ ი კი უფრო პატარები (7—8 წლისანი) ერთობოდნენ. თხილის ან კაკლის ნედლ მარცვალს გახვრეტდნენ წინდის ჩხირით, ერთი მხრიდან ერთ ხერელს, მოპარდაპირე მხრიდან—ორს. შიგ გაუყრიდნენ ყაპის ორად ან ოთხად შეგრებხილ ძაფს, რომელსაც გაუკეთებდნენ ორთავე მხარეს ყულფს. მარცხენა ხელში დაიჭერდნენ მარცვლის ერთი მხრიდან გამომავალი ძაფის ყულფს, მარჯვენა ხელში კი მეორე ყულფს. მარცხენა ხელის გაჩერებისა და მარჯვენა ხელით საათის ისრის მიმართულებით რამდენიმე ჩატრიალებით, კაკლის ორთავე მხარეს მყოფი ძაფები შეიგრიხება. ორთავე ხელის ერთმანეთთან გარეთ წაღებით, თუ ერთმანეთისაკენ მიახლოვებით, თხილის მარცვალი დაიწყებს ტრიალს ხან საათის ისრის მოძრაობის თანახმად, ან საწინააღმდეგოდ და ამასობაში გამოსცემს ბზუილის ხმას.

ყველა ზემოაღნიშნული სათამაშოები საქართველოს სხვადასხვა კუთხეებში გავრცელებულია სხვადასხვა სახელწოდებით.

აკეთებდნენ აგრეთვე სამეურნეო დანიშნულების საგნებს: სათამაშო ურემს (ურემამ), ფარცხს და სხვა იარაღებს და პატარა ფართობზე ეწეოდნენ სამეურნეო სამუშაოების იმიტაციას. აგებდნენ სათამაშო წისქვილებს, პატარა ოლა-სახლებს და სხვა.

გოგონები კი ძირითადად ერთობოდნენ დედოფლებით, რომელსაც აკეთებდნენ ხისას, ნაჭრებისა, უმთავრესად კი ჩალის ღეროსაგან. თვალების მაგიერ ჩაუდგამდნენ წი-ლობიეს (იგი ხორბლის ოდენაა) ან ნახშირს. ტუჩებადაც ამ მასალას ხმარობდნენ. თმად აბრეშუმის ჰიის ნაწეწს ან სიმინდის ფუჩჩის უკეთებდნენ, უკანასკნელს ხმარობდნენ აგრეთვე ულვაშებად მამაკაც-დედოფალს გაკეთებინას. თავზე დაადებდნენ ხოლმე ან ნაჭრისაგან შეკერილს ან თიხისაგან გამოძერწილ ქულს. დედოფალს ხან ქორწილს უმართავდნენ, ხან დღეობას, ხან დაიტირებდნენ და სხვა. ყველა შემთხვევაში იმეორებდნენ უფროსებში ნანახ მოქმედებას. გოგონები თეთრი ბოლოკისაგან ან კეჟერის ხვატისაგან ხშირად აკეთებდნენ ძროხის ტიკინასაც.

როგორც ზემოთ აღვნიშნეთ, ბავშვები ჩიტებს მშვილდისრითა ხოცავდნენ, უფრო ხშირად კი იყენებდნენ ჩიტის დასაჭერ სხვადასხვა მახეებს: ს ხ ა პ ა, თ ა ვ კ ა ვ ს, ი რ ე ნ ჰ კ ა ს, ბ ა დ ი ს ჩ ა ნ თ ა ს (მისით სასიმინდეებში იჭერდნენ ბელურებს) და სხვას,

ნადირის დასაქვერად მოზრდილები ხმარობდნენ რკინისაგან გაკეთებულ გალიას ხუნდს, რაგვს.

ირენქკა შემდეგნაირად მზადდებოდა: თხილის წყნელს, მშვილდით მოლუნავდნენ, ირენქკას ერთი ბოლო გახვრეტილი იყო და შიგ გაყრილ პატარა ჯოხზე გადაკიდებული იყო ორფად გამოსკენილი ბაწარი. ჩიტის მოსატყუებლად მარცვალს დაყრიდნენ ჯოხთან ისეთ ადგილას, რომ ჩიტი ჯოხზე შესკუბებულყო. როგორც კი შემოჯდებოდა ჩიტი ჯოხზე, ბაწარში ფეხები ვახვლართებოდა და ამრიგად ცოცხლად ჩაუვარდებოდა ხელში მონადირეებს. ირენქკას აგებდნენ ჩიტებისათვის განსაკუთრებულ საყვარელ ხეებზე. ასეთები იყო: ხურმა, სურო და სხვა.

თ ა ვ კ ა ვ ა თ ი ჩიტების დაქვერა უფრო იოლი იყო, ამიტომ მას იყენებდნენ 7—8 წლის ასაკის ბავშვები. ამ გალიას აგებდნენ ნაღის ქვეშ და იჭერდნენ ისეთ ჩიტებს, როგორიცაა: თავშავა, სკვინჩა, ბელურა და სხვა. გურიაში ძალზე გავრცელებული იყო მიმინოთი ნადირობა და იგი საინტერესოდ აქვს აღწერილი ექვთიმე თაყაიშვილს თავის მოგონებებში¹². როგორც ექვთიმე თაყაიშვილი გადმოგვცემს, ს. ლეხოურს საუცხოვო ადგილები ჰქონია მიმინოს დასაქვერად, — და ამ სოფლებების საყვარელ გართობას წარმოადგენდა ჩიტ-ბატობა. სოფელში განთქმულები ყოფილან სიმონ ბებურიშვილი და თვით ექვთიმე თაყაიშვილი. საინტერესო ცნობას გვაწვდის აგრეთვე თაყაიშვილი კაპუეტ მიმინოს თაობაზე. დაწვრილებით გვიამბობს რა მიმინოს რთულ წვრთნაზე და მის „გაკაპუეტაბაზე“, აღნიშნავს, „მშვენიერი ბედაური ცხენი გადაუცვლიათ ამისთანა მიმინოშიო“. მიმინოზე ნადირობის პროცესი უფრო მოკლედ გვიამბო ს. ქვენობანის მცხოვრებმა სერგო ალექსის ძე ცხოიძემ (71 წ.), რომელიც ასევე განთქმული მონადირე ყოფილა თავის სოფელში და ახლაც მისდევს თავის საყვარელ საქმიანობას. ღაყო ჩიტს დაიჭერდნენ კალით მოწყობილ მახეში (კალია ჯოხზე იყო ჩამოცმული), ფეხზე ძაფს მოაბამდნენ და დაამაგრებდნენ ჯოხზე. თავის დასალწევად ჩიტი იწყებდა ფართხალს. ხის ტოტებისაგან (ნეშოსაგან) აშენებულ ქოხის ახლოს გაშლიდნენ თევზის საჭერი ბადის მსგავს (უფრო ღიდ თვლებიან) ბადეს, ქოხში დამალულები გამოსდებდნენ ჩიტიან ჯოხს, ამის შემყურე მიმინო ჩიტისაკენ გამოქანდებოდა და გაეხვეოდა ბადეში. შემდეგ თვალს აუხვევდნენ, დაისვამდნენ ხელზე, ლამესაც კი უთევდნენ. რაათ მიმინო გაწვრთნილიყო და გამოსადეგი ყო-

¹² ე ქ ვ თ ი მ ე თ ა ყ ა ი შ ვ ი ლ ი., რჩეული ნაშრ., ტომი I, გვ. 218—227.

ფილიყო მწყერის დასაქვრად. ეს ზღვობდა უფრო შექონდვამაზე (სექტემბერში). მიმინოთი ნადირობას მთელი გურიის მოსახლეობა მისდევდა. ქვენობანში კი, გარდა დასახლებული მთხრობელისა, განთქმულები იყვნენ: სერგო, აპოლონ კუტუბიძეები და ვლადიმერ ნანაძე.

გოგონები და ქალები ნადირობდნენ წვრილ ჩიტებზე, რაც უფრო ზამთრობით ხდებოდა, როცა დამშეული ჩიტები საზრდოს ეძებდნენ. საცეხველას, სადაც ღოშს ცეხავდნენ და რომელიც მხოლოდ ქალებს ეკუთვნოდა, ყველა კუჭრუტანას „დაგმანავდნენ“, მხოლოდ კარს დაუტოვებდნენ ღიას. ზემოდან, „საჩხინაეში“ ბაღეს აფენდნენ. როცა ჩიტი საცეხველაში დაყრილი „ნახორის“ აყენკვას დაიწყებდა, კარს მოკეტავდნენ, დამფრთხალი ჩიტები სინათლეს მიაშურებდნენ და ბაღეში მოჰყვებოდნენ¹³. გურიაში, მონადირეები ჩიტებზე ნადირობის წინ შესთხოვდნენ ნადირობის მფარველ ანგელოზს ივანე მახარობელს ხვავიან ნადირობას. ნანადირევის შინ წაღებისას, სამზადი სახლის კარებთან მონადირეს მეოჯახე ქალი მუქით ნაცარს შეაყრიდა და თან ეტყოდა: „კიდევ ამდენი, კიდევ ამდენი, შენი ავი თვალითა და ავი გულით შემხედვარეს თვალში ნაცარი, გულში ლახვარი, ივანე მახარობელი იყოს შენი მფარველი“!... ცივ წყალში დასველებულ ფრინველს მერე ცხელ ნაცარში ატრიალებენ და თან ამბობენ: „ასვარია, დასვარია, შენი ღედა, შენი მამა, შენი ძამიე, შენი დაიე, შენი ნახული, შენი უნახავი, შენი ნაცნობი, შენი უცნობი — ყველა აქანაი დასვარია“. შემდეგ ჩიტს გაპუტავდნენ და შეწვავდნენ¹⁴.

რაც შეეხება თევზაობას, ესეც არანაკლები საყვარელი გასართობი იყო მდინარეებითა და შენაკადებით მდიდარი კუთხის ბავშვებისათვის. როდესაც ექვთიმე ააყაიშვილი იგონებს ბავშობის წლებში თევზაობით გატაცების ამბებს — მოგვითხრობს, რომ „საფერისცვალოდ აჰის წყალსაცა და ჩოლოქსაც „დანაყავდნენ“ ხოლმე: მიწაზე მრავლად დაგროვილს შემოუსვლელი ნიგოზის ნაქს (წენგოს) ურტყამდნენ კეტებს, კარგა მაგრად სქექყავდნენ და ამგვარად ამზადებდნენ ეგრეთწოდებულ „სანაყს“. მას ყრიდნენ მდინარეში, წყალი იმღვრეოდა დიდ მანძილზე და ათრობდა თევზს, თვალს უბნელებდა. ჭვარიდან დაწყებული, ლეხოურს აჰისწყალის შენაკადი ერთი ტოტიც ჩამოუღიოდა. ამ ტოტს სათავეში გადახიზავდნენ ხოლმე, წყალი წყდებოდა, კალაპოტი ცარიელდებოდა და

¹³ ა. წულაძე, დასახ. ნაშრ. გვ. 71,

¹⁴ ა. წულაძე, დასახ. ნაშრ., გვ. 71.

კალმახებს იან ეპერდნენ, პირდაპირ ხელით კრეფდნენ, ვთევზაობდით ანკესითაც. ვიპერდით ბეერ ლორჯოს, კალმახი კი ანკესზე არ ეგებოდა, მასზე „ვხელაობდით“, ე. ი. ხელს ვყოფდით ქვების ქვეშ, „დარნებში“ და ისე ვიპერდით კალმახს. ჩვენში თევზაობდნენ კიდევ „სათხვეელით“ (სასროლი ბადე) და „ფაცარით“. ფაცარით (უფრო კალმახს იპერდნენ: აგუბებდნენ წყალს და წინ უღებდნენ ჩელტ¹⁵, წყალი ჩელტზე გადადიოდა და იწურებოდა, თევზი კი რჩებოდა ჩელტზე და ხელში უვარდებოდა მეთევზეს. ძალიან მისდევდნენ თევზაობას მდინარე სუფსაზე, ძიპითთან¹⁶).

ზამთრობით კი, გარდა ჩიტებზე ნადირობისა და სხვა საოჯახო საქმიანობისა, ერთობოდნენ თო ლ ა ბ უ რ თ ა ო ბ ი თ (თოვლის გუნდებ). ამ გუნდებს იყენებდნენ თამაშ ფირალობანასა და „ომობანას“ დროსაც. ამ თამაშების დროს აგებდნენ თოვლის ციხეს. შიგნით გაიყვანდნენ გვირაბს. ბრძოლა წარმოებდა ციხის „პატრონებსა“ და „მტრებს“ შორის, ყინულზე დასრიალდნენ სასრიალოთი (ციგით). ზოგჯერ, ციგის მაგივრობას სწევდა გადმობრუნებული მაგიდა, ფიცარი, ყავარი, ბელტი და სხვ.

რაც შეეხება რ ე ლ ი გ ი უ რ დ ლ ე ო ბ ე ბ შ ი ბავშვების მონაწილეობას, მათ განსაკუთრებით უხაროდათ ლამპრობა (მიგებების საღამო), რომელიც ძველი სტილით 2 თებერვალს მოდიოდა და მათ დღესასწაულად ითვლებოდა. ამ დღისათვის უფროსები ბაღს, ანწლის ღეროს ან სხვა რაიმე მცენარეს კანს ააცლიდნენ, გააშრობდნენ და ბავშვები ანთებულს გამოიტანდნენ, გაანათებდნენ მთელ არემარეს, აფრთხობდნენ ავ სულებს. იყო ლამპრის ლამპარზე დარტყმაც და შეჯიბრი, ხოლო, როცა ეზოში და შარაგზაზე დაანთებდნენ ცეცხლს და ზედ ახტებოდნენ, თან გაიძახოდნენ:

„ლამპრობა, ლამპრობა, მამალი მგელის გაპობა“. რაც დიდი უივილ-ხივილით ტარდებოდა. ძალიან უყვარდათ აგრეთვე ა ლ დ გ ო მ ა. ამ დროს სათამაშო მინდორზე იმართებოდა: ცეკვა-თამაში, ჰიდაობა, ჰაქუნობა, ბურთის თამაში, სხვადასხვა შეჯიბრებები. დიდინ-პატარინანად, როგორც წესი, ყველა ქანაობდა სიკორწილაზე, რომელიც საგანგებოდ კეთდებოდა სოფლის შუაგულში (საქანელაზე) იმ რწმენით, რომ მთელ წელიწადს არავის წელი არ ასტკენოდა. ზოგან, ბავშვებისათვის ცალკე კეთდებოდა ხოლმე სათამაშო მოედანი. ასეთი იყო მაგ., სოფელ მზიანში (ყოფილი ფიჩხისჯვარში, მახარაიის რაიონში). აქ გამოდიოდნენ ხოლმე ბავშვები აღდგომაზე

¹⁵ ე ქ ვ თ ი მ ე თ ა ყ ა ი შ ვ ი ლ ი, დასახ. ნაშრ., გვ. 227.

წითელი კვერცხებით და ეწეოდნენ „მტეხლობას“. გატეხილი კვერცხი რჩებოდა მომგებს. თამაშობდნენ კვერცხებით აგრეთვე „კვერცხის დადობიეს“. მოშორებით დადებდნენ კვერცხს და რიგრიგობით ესროდნენ მას საზღვრიდან. ვინც კვერცხს ნიშანში მოარტყამდა, კვერცხიც იმისი იყო. იმდროინდელ ცრუ რწმენით, „თუ ქალის კუთვნილი კვერცხი გატყდა, ეს ცუდ ნიშნად ითვლებოდა, ე. ი. იმ წელიწადს აბრეშუმის ჭიის ცუდი მოსავალი იქნებაო“¹⁶.

ლანჩხუთის რაიონის ს. ჯურუყვეთის მცხოვრების კოწიე გიორგის ძე სალუქვაძის გადმოცემით, „აღდგომის მოადგილეა პირველი მაისი. ამ დროს იცოდნენ „მასკობა“, იმართებოდა ცეკვა-თამაში“. ბავშვები ამ მხიარულ სანახაობის მეთვალყურეებად გამოდიოდნენ. როგორც ჩანს, აქ „ბერიკაობაა“ ნაგულისხმევი, რომელიც მართლაც ყველგან ძალზე მხიარულად მიმდინარეობდა.

როცა შობა ახლოვდებოდა, ყველა ოჯახში განსაკუთრებული სამზადისი იყო და, როგორც მოსალოდნელი იყო, პატარებიც თავისებურად იღებდნენ მონაწილეობას ასეთ დიდ დღესასწაულის, რაც შეიძლება, კარგად ჩატარებაში, შობას ახალი წელი მოჰყვებოდა, რომელიც ბავშვებისათვის კიდევ უფრო სახალისო იყო. ამ დროს ლუკუმფხეს ხიდან ან თხილიდან აკეთებდნენ ჩიჩილაკს. მასზე ჩამოაცმევდნენ სუროს ფოთლებს, კურკანტელის მარცვლებს, ვაშლს, მანდარინს, ჩამოჰკიდებდნენ წაირ-წაირ კამფეტებს. ჩიჩილაკი იდგა გობზე, რომელზედაც უხვად იყო დალაგებული საახალწლო საქმელი ღორის ყურთანად. ოჯახის მამა, რომელიც ჩიჩილაკს გაიტანდა გარეთ, მერე უკან მოადგებოდა სახლის კარებს და სთხოვდა რა დიასახლისის კარის გაღებას, გააბამდა მასთან გარკვეულ დილოგს. ჩიჩილაკი ნათლილებამდე იდგა, მერე გადაჰქონდათ მარანზე და მანამ იდგა, სანამ არ „ჩამოდნებოდა თითონ“. მისი დაწვა არ შეიძლებოდა.

აგუნას დროსაც, თავგამოდებით ურახუნებდნენ ბავშვები საწნახელს და თან გაიძახოდნენ: „ჩემს მამულში ყურძენიო, შენს მამულში ფურცელიო“.

როგორც ცნობილია, საქართველოს ყველა კუთხეში არსებობდა წვიმის „გამოწვევის“ სხვადასხვა წესები. გურიაშიც, სხვადასხვა ადგილას სხვადასხვაგვარ წეს-ჩვეულებას ასრულებდნენ. ბოლო დროს უფრო გავრცელებული იყო ხატის განბანვა წყალში. ძველად კი, როგორც ს. ზომლეთის მცხოვრებმა 66 წლის მატრონა ბეგლარის ასულ-

¹⁶ Т. Мамаладзе. Указ. раб., с. 50.

მა მახარაძე-წითლიძისამ გადმოგვცა, მას თავის ბაბუისაგან მოუსმენია. რომ სულ ძველად, გვალვის დროს დედოფალას ჩამოატარებდნენ ხოლმე კარდაკარ, საკმელს შეაგროვებდნენ, დედოფალას გაწუწუვდნენ, შემდეგ ერთ ოჯახში შეგროვდებოდნენ, იქეფებდნენ, დაილოცებოდნენ და მეორე დღეს გაწვიმდებოდაო. ამრიგად, როგორცა ჩანს, გურიაშიაც ძალზე ფეხმოკიდებული იყო საქართველოში ყველაზე უფრო გავრცელებული წესი წვიმის მოყვანისა. ეს გახლდათ „ლაზარობა“.

მართალია, თანამედროვე თამაშები საგანგებოდ არ შეგვისწავლია, მაგრამ განურჩევლად მდებარეობის (თუ არ ჩათვლით ძალზე მთაგორიან რელიეფს), თითქმის ყველგან, მთავარი ადგილი ფეხბურთს უკავია.

შ ა ს კ ვ ნ ა

ზემოთქმულიდან შეგვიძლია დავასკვნათ, რომ გურულ გართობა-თამაშებში მსგავსად საქართველოს სხვა კუთხეებისა, გარდა ყოფისა, სულიერი კულტურისა, ასახულია მცხოვრებთა ხასიათიც. თამაშთა გავლენა გამოიხატა ხასიათის ისეთი თვისებების განვითარებაში, როგორცაა მოქნილობა, გამბედაობა, გონებამახვილობა. ამას ემატებოდა ისტორიული ვითარებით გამოწვეული საპირობებაც საწვრთნელ ელემენტებზე აგებული თამაშთა დამკვიდრებისა. ამრიგად, შეიქმნა მთელი ციკლი ე. წ. „აქტიური თამაშებისა“, რომლებიც ჩვენ შევეცადეთ დაგვეყო თამაშთა ხასიათის მიხედვით, მაგ., საწვრთნელ ელემენტებზე აგებულ თამაშთა რიცხვს მიეკუთვნება: „კოდილე“, „ხიტირია“, „ფეხმუწიე“, „კლასობიე“, „კაკობიე“, „კენჭობიე“, „ჯოხობიე“, „დანობიე“, „წიკპარტი“, „ჩხირობიე“, „რეკატობიე“, „ვეზირობიე“, „თორმეტობა“, „ჯაფარიკი“ და სხვა. თვალსაზრისის უნარის გამომუშავებას ემსახურება მშვილდისრის და შურდულის სროლა, თამაშები: „ქვის დაყუდება“, „ზუკუტურია“, „პოკუჩი“, „ორმობია“, „ნიგვზობია“. სამონადირეო ხასიათის თამაშებს განეკუთვნება: „ბატობიე“, „ქორა-ბუდე“, „ნესვობიე“ და სხვა. ძალზე გავრცელებული იყო ცხენოსნობა და სხვადასხვაგვარი ბურთობა (განსაკუთრებით ლელობურთი, რომელიც დღესაც დიდი პოპულარობით სარგებლობს ამ კუთხეში.

გამოცნობაზე იყო აგებული თამაშები: „თვალსუქინა-გამოცნობა“, „ყარყუმობია“, „ბექლობიე“, „ვირობიე“ და სხვა, ხოლო გონე-

ბის სავარჯიშო იყო „დამკაობა“, გამოცანებით და ანდაზებით გართობა.

ბავშვები თვითონ იკეთებდნენ სათამაშოებს, მშვილდისარს, შურდულს, ხელთოფელას, საშხაპუნოს, ფიშტონას, საბზრიალას, დედოფალას (უმთავრესად ჩალის ლეროსაგან), სამეურნეო დანიშნულები: სხვადასხვა საგნებს, ჩიტის დასაქერ მახეებს, აგებდნენ სათამაშო წისქვილებს, პატარა ოდა-სახლებს და სხვა.

ეთნოგრაფიის განყოფილების ხის ფონდში დაცულია გურიიდან ჩამოტანილი შემდეგი სათამაშოები: ხელთოფა, საწყაპუნე, ბალანეს შესაქცევარი, ბზრიალა, ჩიტის მახე, ჩიჩილაკი, დედოფლის აკვანი, საგორავი ჯოხი და სხვა.

ბავშვები თავიანთ მშობლებს ეხმარებოდნენ მეთამბაქოებაში, ნებაბრეშუმეობაში, მებოსტნეობაში, სეფეჩრო საქმეში და თანსრულყოფილ ცოდნას ეუფლებოდნენ სხვადასხვა სოფლებში გახსნილ სპეციალურ სასწავლებლებში.

სხვადასხვა რელიგიურ დღეობების დროს მონაწილეობდნენ ზოგიერთ საწესო ქმედობაში.

რაც შეეხება თანამედროვე ყოფას, მას ცოტალა შემორჩა ძველი გართობა-თამაშებიდან, ხოლო მთავარი ადგილი ყველგან ფეხბურთმა დაიკავა.

Н. С. ГОГОБЕРИДЗЕ

НАРОДНЫЕ ИГРЫ-РАЗВЛЕЧЕНИЯ В ГУРИИ

Резюме

В играх и развлечениях детей Гурии, как и в других областях Грузии, отражаются различные моменты быта и характер населения. Систематические столкновения с соседними племенами вынуждало мужчин всегда быть на чеку, поэтому: создался целый цикл т. н. «активных игр», которые развивали в детях такие качества, как смелость, выносливость, остроумие и т. д. К играм, которые содержат элементы тренировки, относятся: «кодиле», «хлпиря», «пехмущие», игра в палочки, «торметаоба», «джапарики» и др. Для тренировки точности глазомера использовалось: стрельба из лука, метание камня из пращи, разные игры с камнями, с орехами, с альчиками и др. Встречаются игры, связанные с охотой.

Особое место занимало почти во всех деревнях игра с мячом. Дети сами делали себе игрушки и развлекались ими; также перенимали элементы того или иного домашнего промысла (например шелководство). Рассматриваются также вопросы участия Гурийских детей в религиозных ритуалах. Что касается современных игр, то мало осталось из старых игр, зато ведущее место занял футбол.

მიცვალებულის კულტი გურიაში

მიცვალებულის დაკრძალვისა და გლოვის წესების შესახებ გურიაში საგანგებო ეთნოგრაფიული გამოკვლევა არ დაწერილა.

XIX საუკუნის მიწურულში საქართველოში მიმდინარეობდა ერთგვარი ბრძოლა ძველი წარსულის გადმონაშთების წინააღმდეგ. ამ ბრძოლის მიზანი იყო როგორმე მძიმე საცხოვრის პირობებში ჩაეარდნო გლეხებისათვის ერთგვარი შეღავათის ძიება, რომ გლეხობას თავი დაეღწია გადმონაშთებთან და ცრუ რწმენებთან დაკავშირებული ხარჯებისათვის. ბრძოლა მიმდინარეობდა, პირველ რიგში, მიცვალებულის სახელთან დაკავშირებულ უმიზნო ხარჯების წინააღმდეგ. ამ მოძრაობამ, რომელიც ძირითადად მაშინდელი პრესის საშუალებით და ზეპირი აგიტაციით ხორციელდებოდა, თითქმის მთელი საქართველო მოიცვა. პრესაში გამოქვეყნებულ წერილებში, სადაც დაგმობილი იყო მანე ზედმეტი გადმონაშთური რიტუალები მოცემული იყო აგრეთვე რიტუალთა აღწერილობანი. ამ აღწერილობებმა გარკვეულად შემოინახა ზოგიერთი ეთნოგრაფიული ხასიათის მასალები, რომელსაც ჩვენი თემისათვის უაღრესად დიდი მნიშვნელობა აქვს.

ასეთად მიგვაჩნია 1899 წელს გაზეთ „ცნობის ფურცელში“ გამოქვეყნებული წერილი გურიაში წაბურვიანი ტირილის შესახებ¹. უფრო მოგვიანებით მიცვალებულის კულტის შესახებ საინტერესო მასალები გამოაქვეყნა აბ. წულაძემ წიგნში „ეთნოგრაფიული გურია“.

ჩვენს მიერ შეკრებილი ეთნოგრაფიული მასალები მოიცავს გურიის სამივე რაიონს. მოპოვებული მასალა კლასიფიცირებულ იქ-

¹ ტ. ა რ თ მ ე ლ ა ძ ე, წაბურვიანი ტირილი, „ცნობის ფურცელი“, 1899, № 872.

ნა გარდაცვალებიდან გლოვის წესებამდე რამდენიმე ეტაპად. ამის შესაბამისად გურიაში მიცვალებულის დაკრძალვისა და მისი გლოვის წესები შემდეგი თანმიმდევრობით წარმოგვიდგება: 1. გარდაცვალება, 2. შეცხადება და მეზობელ-ნათესაეების შეტყობინება, 3. ქელეხისათვის მზადება, 4. სამძიმარი და დატირება. 5. დაკრძალვა, ქელეხი, გლოვა და მიცვალებულის მოსაგონარი დღეები.

ძველად ოჯახისათვის ყველაზე დიდ უბედურებად ითვლებოდა მუშა მამაკაცის დაღუპვა.

სულთმობრძავი ადამიანის მდგომარეობის შესამსუბუქებლად და სხეულიდან სულის მალე გაყრის მიზნით, სცოდნიათ სხვადასხვა საშუალებების გამოყენება. თუ კაცი იტანჯებოდა, მას სახლის გარეთ გამოასვენებდნენ და რაიმე საშეურნეო იარაღს მოუდებდნენ გვერდში. ყველაზე მეტად ხარის ულლის მოდება სცოდნიათ. აპ. წულაძის ჩანაწერების მიხედვით, აგონიაში ჩავარდნილ ადამიანთან მღვდელს მიიყვანდნენ, „რომელიც საღმრთო წიგნიდან „სულთა ბრძოლისას“ წაიკითხავდა და ისიც შუამდგომლობდა ღვთის წინაშე ავადმყოფი ადრე გასცლოდა ამ წუთისოფელს. თუ მღვდლის ვედრება არ გასჭრიდა და „სული კიდევ არ ეყრებოდა ხორცს“, მაშინ მიიტანდნენ წირისათვის (ღომის საცხვების ნაწილი) და ავადმყოფის სასთუმალთან ტახტზე ან სახლის კედელზე მაგრად არახუნებდნენ“².

ადამიანის გარდაცვალებას ოჯახი პირველ რიგში მეზობლებს შეატყობინებდა, ამას შეცხადება ერქვა. შეცხადება სახლის აივნიდან უნდა მომხდარიყო, რომ ხმა მეზობლებს მისწვდომოდა. შეცხადებას მხოლოდ ქალები გამოხატავდნენ წივილ-კივილით. მამაკაცები კი შუბლზე ხელის გულის მირტყმით გამოდიოდნენ იმ ოთახიდან, სადაც ეს უბედურება დატრიალდა. შეცხადებას ზოგიერთ სოფელში გადაკრებლებსაც უწოდებდნენ. მეზობელი, რომელიც უბედურების მაუწყებელ ხმას გაიგებდა, თავისი მხრით კივილითვე ეხმაურებოდა და, ამდენად, სოფლის ერთ კუთხეში მომხდარი უბედურება რამდენიმე წუთში მთელი სოფლისათვის უკვე ცნობილი ხდებოდა. შეცხადება არ შეიძლებოდა, თუ ოჯახში სხვა მძიმე ავადმყოფი ან ეპიდემიური სენით დაავადებული იყო. აპ. წულაძის მიხედვით, ასეთ შემთხვევაში სცოდნიათ შეცხადების რამდენიმე თვით გადატანა. რამდენიმე ხნის წინათ გარდაცვლილს შეიცხადებდნენ და მის ტანსაცმელზე იტირებდნენ. ყოფილა შემთხვევა, შეცხადების დროს ორ-სამ მიცვალებულს ერთად დაიტირებდნენ ხოლმე.

² აპ. წულაძე, ეთნოგრაფიული გურია, თბ., გვ. 148.

მეზობლები დაზარალებულის ოჯახში მაშინვე მიდიოდნენ. შეცხადებული ოჯახის წევრები და მეზობლები ჯერ გარეთ მოიყრიდნენ თავს და იქ ტიროდნენ, თმებს იწეწდნენ და სახეს იკაწრავდნენ, შემდეგ კი სახლში შედიოდნენ და მოთქმა-ტირილი იქ გრძელდებოდა. მეზობლებიდან დამდენიმე ადამიანი გამოიყოფოდა, რომელნიც მიცვალებულს გაბანდნენ, ტანსაცმელს ჩააცმევდნენ, პირს აუკრავდნენ, ფეხებს შეუკრავდნენ, ხელებს გულზე დაუკრეფავდნენ და სახლის ცენტრში ტახტზე დაასვენებდნენ.

მეზობლები სამძიმრისათვის ჯგუფ-ჯგუფად მიდიოდნენ. სამჯიმარზე მისვლა გრძელდებოდა დაკრძალვამდე. დაკრძალვა ხდებოდა 3—4 დღის შემდეგ.

შეცხადების შედეგად მოსულ მეზობლებთან ოჯახის მესვეურები სახელდახელო თათბირს იწვევდნენ, თუ რა წესით უნდა მომხდარიყო დაკრძალვა. თათბირზე უნდა დათქმულიყო დაკრძალვის დღე, უნდა შეერჩიათ ქელეხის მოთადარიგეები, რომელთაგან გამოყოფდნენ მზარეულებს, მოსაპატიებელთა სიის შემდგენელთ. მესურსათეებს, მოზარეებს, მესაფლავეებს, ზეზე მდგომებს და სხვ.

გურუღთა რწმენით, კვირის დღეები ნაწილი წარმოა, ნაწილი კი უკუნი. მაგრამ უკუნი და წარმო გარკვეულ კავშირში იყო მთვარის ფაზებთან, დღეების ამგვარ ციკლურ სისტემას ყურადღება მიაქცია აბ. წულაძემ. მისი მონაცემებით, „კვირა დღე არც წარმო იყო და არც უკუნი. ახალ მთვარეზე ხუთშაბათი და შაბათი უკუნი იყო, წარმო კი ორშაბათი, სამშაბათი, ოთხშაბათი და პარასკევი. ძველ მთვარეზე საწინააღმდეგოდ: ხუთშაბათი და შაბათი—წარმო, დანარჩენი—უკუნი. ძველი მთვარე იანგარიშებოდა—ცხრომის შემდეგ 15 მთვარიდან. გურუღთების რწმენით, ზოგი საქმის გაკეთება შეიძლებოდა (და სასურველი იყო) უკუნზე, ზოგის—წარმოზე. მიცვალებული უნდა დამარხდეს უკუნზე—„უკუნითი უკუნისამდე“—იქნებოდა განსვენებული და, რაც მთავარია, ოჯახს „უკუნისამდე არ მოიკითხავდა“ და ოჯახის წევრი არ მოკვდებოდა“³.

წარმო და უკუნი დღეების ციკლს ანგარიშს უწევდნენ აგრეთვე ხის მოჭრის შემთხვევაში და სატანსაცმელედ ქსოვილის დაჭრის დროს. როგორც საქართველოს სხვა კუთხეებში შეკრებილი მასალიდანაც ირკვევა, მთვარის ფაზებს სასოფლო-სამეურნეო საქმიანობაში გარკვეული ყურადღებით ეკიდებოდნენ. ახალ მთვარეზე მოჭრილი ხე ჭიანჭებოდა, სამასალედ მას არ გამოიყენებდნენ. ასევე, ახალ

³ აბ. წულაძე, ეთნოგრაფიული გურია, თბ., გვ. 156.

მთვარეზე მიწას თესლს არ მიაბარებდნენ, ხალხური დაკვირვებით, თესლი ჩალპებოდა და არ აღმოცენდებოდა. უნდა აღინიშნოს, რომ ახალ მთვარეზე მართლაც ხდება ბიოლოგიური ხასიათის მთელი რიგი მოვლენები. მწერების და რგულის ჭიების გამოჩენკვა-გამოსვლა, რაც ხალხურ დაკვირვებას საფუძველმოკლებულად არ წარმოგვიდგენს. ჰქონდა თუ არა რაიმე მნიშვნელობა მიცვალებულის დაკრძალვის დღისათვის მთვარის ფაზებს, ამის თქმა ძნელია, თუმცა ამ ჭრილში მასალის კვლავ ძიება საჭირო საქმედ მიგვაჩნია.

ე. ი. როგორც აღვნიშნეთ, მიცვალებულის დაკრძალვის დღედ უკუნ დღეს აარჩევდნენ. თუ მიცვალებული წყალში იყო დამხრჩვალნი, მაშინ ორშაბათ დღეს უნდა დაემარხათ, გურიაში ორშაბათს „დამხრჩვალის დღესაც“ უწოდებდნენ⁴.

პარასკევი ქრისტეს ჭვარცმის დღედ არის მიჩნეული და ამ დღეს ლითონის იარაღით მიწას არ გაეკარებოდნენ. ამდენად, საფლავსაც ვერ გაჭრიდნენ. მიცვალებულის დღედ მაინც შაბათი ითვლებოდა. თუ ოჯახს არ უხერხდებოდა აჩემებულ დღეებში დასაფლავება, მაშინ მიმართავდნენ სამშაბათს, და ოთხშაბათ დღესაც კი დამარხავდნენ. გარდაცვალების დღიდანვე იწყებოდა ზრუნვა დაკრძალვის ორგანიზაციაზე. საამისოდ, როგორც ზემოთ ითქვა, საგანგებო პირები უნდა გამოეყოთ. უსახსრო და საწყალი ოჯახი თუ დაზარალდებოდა, მეზობელთაგან ერთი სოფელს ჩამოუვლიდა და შეატყობინებდა, ამა და ამ ოჯახს უნდა დავეხმართო. მოსახლეობა, ვისაც რითი შეეძლო, ეხმარებოდა — ზოგი ლობიოს მისცემდა, ზოგი ფულს, სიმინდს და სხვ. ამგვარი წესით დახმარება ოჯახს მისდიოდა საზღაურის და სამაგიეროს გარეშე.

იყო დაკრძალვის სხვა წესიც, რომელსაც „წაბურვიანი ტირილი“ ეწოდებოდა. სიტყვა წაბურვა გურიაში საყოველთაოდ არის გავრცელებული და შემწობის, შეწვენის მნიშვნელობით იხმარება. ქორწილში მიტანილ შესაწევარსაც წაბურვით მოიხსენიებენ. ტირილის ქვეშ კი იგულისხმება გარდაცვალებიდან დაკრძალვამდე დროის მონაკვეთი.

როგორც ეთნოგრაფიული მასალიდან ჩანს, „წაბურვიან ტირილს“ უმთავრესად უსახსრო ღარიბი კაცი მართავდა. მიცვალებულის პატრონი ადგენდა განცხადებას და უგზავნიდა ნათესავ-მეზობლებს. განცხადებაში აღნიშნული იყო, რომ გარდაიცვალა ესა და ეს კაცი და მისი შვილები ვაცხადებთ წაბურვით დასაფლავებასაო. რომ

⁴ აბ. წ უ ლ ა ძ ე, ეთნოგრაფიული გურია, თბ., გვ. 155.

წამბურველთა წინაშე ვალდებული რჩებიან განსვენებულის შვილები. აღნიშნული უნდა ყოფილიყო ვაჟების სახელები, ვინც წამბურველთ მომავალში სამაგიერო პატივს მიაგებდა.

ტ. ართმელაძეს „წაბურვიანი ტირილის“ გადამხდელის მიერ შედგენილი ტექსტი ასეთი შინაარსისა აქვს გადმოცემული: „გთხოვთ, მობრძანდეთ და დაგვანუგეშოთ“. იქვე იგი განმარტებას აძლევს, ეს ნიშნავს — „თავმომწონეთ მოდი, ე. ი. მხლებლები იყოლიე და კიდევაც წაბურეო, ე. ი. ფულით შემწეობაც აღმომიჩინეო“⁵. მისივე ცნობით, წინათ გლეხი თვითონ ერთი მიდიოდა სატირაღში, მაგრამ ბატონყმობის გადაეარდნის შემდეგ გლეხებმაც დაიწყეს ზარითა და მხლებლებით მიმოსვლა თავადაზნაურთა მიბაძვით⁶. ტ. ართმელაძეს ამ მოსაზრებაში ვერ დავეთანხმებით, რადგან გლეხობას ნათესავის ტირილში რანდენიმე კაცით მისვლა ბატონყმობის გადაეარდნამდეც სცოდნიათ. 1855 წელს გაზეთი „კავკაზი“ წერდა, რომ მიცვალებულის სახლიდან „გათხოვილი ქალი და ნათლული ვალდებული იყო მოზარე კაცებითა და კელაპტრით მისულიყო დამწუხრებულ ოჯახში, რომელთაც თან უნდა ხლებოდა ათი-თხუთმეტი ცხენოსანი კაცი და ქალი“⁷.

ტ. ართმელაძის ცნობით, „ზოგ ნათესავს ტირილში 28 კაცი მიჰყავდა, რომელნიც თავისი ცხენებით მიდიოდნენ, ამ 28 კაცს 2—3 მოსამსახურე მაინც დასჭირდებოდა, რომელიც მომსველელმა მასპინძელმა ან უნდა იქირაოს ან უნდა იმანდოს“⁸.

დამწუხრებული ოჯახის ნათესავეებს თან მიჰქონდათ ღვინო, ღომი და ლობიო.

როგორც წესი, მიცვალებული ზარით უნდა ეტირათ. ზარი როგორც აბ. წულაძე აღნიშნავს, წარმოადგენდა ტირილის აკომპონიმენტს, რომელსაც უტექსტოდ და უსიტყვოდ აყოლებდნენ მოტირაღლთა ტირილის დროს, ზარის მთქმელად სამ კაცზე ნაკლები არ უნდა ყოფილიყო, რომელთაგან ერთი დამწყები იყო, მეორე მოძახილი და მესამე ბანი⁹. ზარის მთქმელები ჩვეულებრივ კაცები იყვნენ; სულ ერთი იყო, ქალი იქნებოდა მიცვალებული თუ კაცი.

⁵ ტ. ართმელაძე, წაბურვიანი ტირილი, „ცნობის ფურცელი“, 1899, № 872.

⁶ ტ. ართმელაძე, წაბურვიანი ტირილი, „ცნობის ფურცელი“, 1899, № 872.

⁷ К а л а н д а р о в. «Погребальные обряды у гурийцев, «Кавказ», 1855, № 21.

⁸ აბ. წულაძე, ეთნოგრაფიული გურია, თბ., გვ. 157.

⁹ აბ. წულაძე, ეთნოგრაფიული გურია, თბ., გვ. 157.

როცა ნათესავი თავისი მოზარეებით მივიდოდა, ეს ოჯახისათვის დიდ პატივად ითვლებოდა. შეძლებული ოჯახი ორპირ მოზარეს დააყენებდა, ერთნი ეზოში იყვნენ მომზადებულნი და სამძიმრისათვის მოსულებს ეგებებოდნენ ჰიშქართან და სახლის კარამდე მოტირალს ზარის თქმით მიაცილებდნენ. სახლში შემოსულ სამძიმმარის მთქმელს ზარს შინ მიცვალებულის კუბოს უკან მდგომი მოზარეები აუბამდნენ ზარის ხმას. ზოგჯერ ეზოს მოზარეები მოტირალს ბოლომდე აცილებდნენ და კუბოსთან ზარს ეუბნებოდნენ. აპ. წულაძის დაკვირვებით, მოტირალსა და მოზარეებს შორის წინასწარაც ყოფილა შეთანხმება მაღალი ზარი ეთქვათ თუ დაბალი¹⁰.

გარდა მოზარეებისა, მიცვალებულის ოჯახი საპატიო პირთაგან აირჩევდა მიმგებლებს. მიმგებელთა მოვალეობას შეადგენდა სამძიმრისათვის მოსულთ ჰიშქართან მიგებებოდა, გვერდში ამოდგომოდა და ზოგჯერ ხელებიც გაეკავებინა, რომ დამწუხრებულს სახე არ დაეკაწრა და რაიმე ისეთი გადაჭარბებული არ ჩაედინა. მიმგებებელი თავაზიანი მოქმედებით უნდა მოქცეულიყო და მთელი დღის მანძილზე თავის მოვალეობა შეესრულებინა.

მიმგებებელსა და ეზოს მოზარეებს შეთანხმებულად უნდა ემოქმედათ, რომ სამძიმარ-დამტირებლად მოსულს თავისი მწუხარება სათანადოდ გაამოეხატა და ჰირისუფალთან პირნათლად გამოსულიყო.

ზოგიერთი თავმოწონე ნათესავი თავისი მოზარეებით და ხელის ჩამკიდებელი კაცებით მიდიოდა, მხლებელთა წაყვანა ამ რიტუალის შესრულებისათვის სათანადო მომზადებას მოითხოვდა. მხლებლები კარგად უნდა ყოფილიყვნენ გამოწყობილნი, სუფთად ჩაცმულნი და, თუ რაიმე გამოსაჩენი გააჩნდათ, ისიც უნდა წაეყოლებინათ: იარაღი, ორდენები, შედლები. ამას გარდა, დიდ პატივისცემად ითვლებოდა კელაპტრით მოსვლა.

კელაპტარს თვითონ ამზადებდნენ. იღებდნენ 1 მეტრის სიგრძის მკლავის სიშსხოს ისლის ღერებს, შემოაკრავდნენ სანთელში გალიფრულ მიტკალს. ზოგჯერ კელაპტარს შანდალში ჩარგულს წაიღებდნენ, ეზოში შესვლისას აანთებდნენ და მიცვალებულს თავთან დაუდგამდნენ ხოლმე.

ხშირად მიცვალებულის დატირების პატივისცემას ზარითა და კელაპტრების რაოდენობით განსაზღვრავდნენ ხოლმე.

¹⁰ აპ. წულაძე, ეთნოგრაფიული გურია, თბ., გვ. 157.

ზოგჯერ მისული მოზარეები არა მარტო თავის მოტირალს აუ-
ზამდნენ მხარს, ისინი ზარს ეტყოდნენ უშუალო ჰირისუფალსაც.
მოზარეთა ასეთი შენაცვლებითი მოქმედება ერთგვარ შეჭიბრად
იქცეოდა ხოლმე და დაკრძალვის რიტუალს სანახაობრივ მხარეს
აძლევდა.

როგორც აბ. წულაძე აღნიშნავს, ზარის თქმა ყველას არ შეე-
ლო. ზარის შესწავლა ძველად ეკლესიის კარზე სცოდნიათ. მიც-
ვალებულის გარდა, სხვაგან ზარის თქმა არ შეიძლებოდა. ზარის
მთქმელებს სოფელში დიდი პატივი ჰქონდათ. თუ ვინმეს გაყვე-
ბოდნენ ზარის სათქმელად, ამის ნაცვლად მათ ორი დღით დაეხმა-
რებოდნენ ოჯახში ზოგი ფულზე დადიოდა. მოზარეებს სათანადოდ
უნდა გამასპინძლებოდნენ. ჩვეულებრივ ქელების მენიუს თევზი,
ლობიო ან ზეთში მოხრაკული მაკარონი წარმოადგენდა. მოზარე-
ებს კარგად უნდა გამასპინძლებოდნენ, რომ მათ მიცვალებულის
ოჯახის მისამართით რაიმე აუგი არ ეთქვათ. ზარით ტირილი საერ-
თოდ ოჯახს იძიმე ტვირთად აწვებოდა, რადგან, ნათესავ-მოკეთეე-
ბის თავისი მოზარეებით მოსვლა ოჯახს დიდ ზარალს აყენებდა.

გასული საუკუნის 90-იანი წლებიდან საერთოდ დიდი კამ-
პანია გაჩაღდა. მიცვალებულის დაკრძალვასთან დაკავშირებულ
ხარჯების წინააღმდეგ. სულ მოკლე დროში პრესამ და სახევისთა-
ვობებში ზარით ტირილის წინააღმდეგ ჩატარებულმა ბძოლამ შე-
დეგი გამოიღო და მალე მოიშალა. ზარით ტირილის ნაცვლად დარ-
ჩა „თავისწინაით“, ტირილი, რომელიც ზარს გამოორიყხავდა.

„თავისწინაით“ ტირილი გულისხმობდა, რომ ნათესავი უშუა-
ლოდ უნდა მისულიყო მხლებლების გარეშე. დაზარალებულ ოჯახს
ეს გარკვეულ შედეგათს აძლევდა. სამძიმარზე მისულ მეზობლებს
მიმგებებლები არ შეხვდებოდა. მიმგებებელი დაკრძალვის დღეს
ხვდებოდა მხოლოდ ნათესავეებს.

მიმგებებლის მოვალეობას ისიც შეადგენდა, რომ სამძიმარზე
მისული გაეყვანა ოთახიდან, გაყოლოდა მწერალთან, რომელიც სა-
განგებო ადგილზე იჯდა და მიმსვლელთაგან „წასაბურავს“ ღებუ-
ლობდა. წასაბურავის მისაღებად ორი კაცი იყო გამოყოფილი, მიმღე-
ბი და მწერალი. სია, როგორც წესი საგანგებოდ დგებოდა. თავზე
ეწერა მიცვალებულის გვარი და სახელი, გარდაცვალების თარიღი,
შემდეგ კი იწერებოდა წამბურველთა სია თანხის ჩვენებით, სია, რო-
გორც წესი, ოჯახში ინახებოდა, ამ სიით სარგებლობდა შემდეგ ოჯა-
ხი და ვისაც რა ჰქონდა წაბურვილი, იმდენსავე გაიღებდა. ამიტომ
წასაბურავს გურიაში „სესხსა და ვალს“ უწოდებდნენ. წაბურვიანი

ტირილი 1905 წლიდან გადაგდებულ იქნა, მაგრამ შემდეგში მან სხვა ფორმებში ნახა თავისი გამოხატულება—გვირგვინების მიტანა, გვირგვინების ყიდვა-გაყიდვა და ბოლო დროისათვის წაბურვის სახელი გაქრა, თუმცა მოქმედება ძველებურად სრულდება.

ტ. ართმელაძის აზრით, წაბურვა ძველად სანოვაგით სცოდნიათ და „შესაწიერი“ რქმევია. დროთა ვითარებაში მდგომარეობის გაუმჯობესებასთან დაკავშირებით, თავმოძვრონეობის გამო ხალხმა შესაწირავის ეს ფორმა ე. ი. „შესაწიერი“ შეცვალა ფულის შეწევნით, რომელსაც „წასაბურავი“ უწოდა¹¹.

უნდა აღინიშნოს, რომ „წაბურვა“ იმ მნიშვნელობით, როგორც ეს გურიაში შემწევნობის გამომხატველ ტერმინად გვევლინება, ქართველ ლექსიკოგრაფს სულხან-საბა-ორბელიანს არა აქვს თავის ლექსიკონში შეტანილი. ამიტომ ჩვენ ამ ტერმინის სიძველის ამ გზით ძიების შესაძლებლობას ერთობ მოკლებული ვართ.

აბ. წულაძეს მიაჩნია, რომ სიტყვა წასაბურავი ძველი ქართულია და უნდა მომდინარეობდეს იმ პერიოდიდან, როცა მიცვალებულებს კუბოს ვარეშე მთლიანად ბურავდნენ მარტო სუდარით. ამრიგად, სუდარა ყოფილა წასაბურავი — სახისა და სხეულის დასაფარავი — და რაკი უწინდელი მიცვალებული მხოლოდ „წასაბურს“ ითხოვდა და მეტს არაფერს, ალბათ, ამ ფულად შესაწირისაც დაერქვა წასაბურავი, სუდარის შესაძენი დახმარება. მიცვალებულის პირისახის დანახვა ცოდვად ითვლებოდა, „ქამობას“ მოასწავებდა, „წაბურავაც“ ამიტომ იყო სავალდებულო¹².

წაბურვის შესატყვისია „დაბურვა“ და „ბურვა“. „ბურვილი“, საბას განმარტებით, დაფარებულს ნიშნავს. დაბურვასთან კი იგი მიუთითებს დაბადების ტექსტზე — გამოსვლას ერთ-ერთ თავზე, სადაც კიდობნის დაბურვაზეა ლაპარაკი¹³.

წაბურვის აბ. წულაძისეული გაგება სწორია. ადრე, როცა კუბოს ხმარება წესად არ იყო, ქართველი ტომების წინაპრები, როგორც ჩანს, მიცვალებულის შესაბურ საშუალებად ტილოს, შალის ქსოვილს და ტყავებს იყენებდნენ.

აღსანიშნავია, რომ ლეჩხუმში წაბურვის შესატყვისი ტერმინები „გადასაფენი“ და გადასაბურავი ყოფილა ხმარებაში¹⁴.

¹¹ გაზეთი „ცნობის ფურცელი“, 1899, № 872.

¹² აბ. წულაძე, ეთნოგრაფიული გურია, თბ., გვ. 176.

¹³ დაბადება, გამოსვლა, თავი შ., წიგნი ბ.—მოსესი.

¹⁴ მ. აღაჯიძე, ლეჩხუმური ზეპირსიტყვიერება, თბ., 1951, გვ. 132.

ასე, რომ წაბურვა-გადაბურვა, გადაფენა-დაბურვა მიცვალებულის დამარხვის წესის გამოხატულების აღმნიშვნელი ტერმინი გვიანი დროისათვის გამოხატავს სულ სხვა მოქმედებას, ე. ი. ფულით ან სანოვაგით დაზარალებული ოჯახისადმი შეწევნა-დახმარებას.

გურიაში, ჩვენი მასალების მიხედვით, დამოწმებულ იქნა დაკრძალვასთან დაკავშირებული ხის მოჭრის წესი. დაკრძალვის დღეს ოჯახის მეზობლები ეზოში ერთ რომელიმე ხეს მოჭრიდნენ. ზოგი მთხრობელის გადმოცემით, ისეთი ხე უნდა მოეჭრათ, რომელიც ყველაზე უფრო საყვარელი იყო. ზოგის თქმით, სულ ერთი იყო, ოღონდ ხე ყოფილიყო. მთხრობელთა დაკავშირებით, ხეს ჭრიან ან ზოგჯერ ძირფესვიანად იღებენ იმიტომ, რომ ის ხე მიცვალებულის სამოთხის ხედ გახდება.

ვახუშტი ბატონიშვილი „აღწერა სამეფოს საქართველოსა-ში“ როცა აფხაზთა ჩვეულებაზე წერს, აღნიშნული აქვს, რომ აფხაზები მიცვალებულებს კუბოთი შედგამდნენ ხოლმე ხეზე¹⁵. ჩვენი აზრით, შესაძლებელია ამ ჩვეულებას ადრე კოლხეთში საყოველთაო გავრცელება ჰქონდა და, როცა შეიძვალა ხეზე მიცვალებულის დასვენების წესი, შეიძლება მანინ დაიწყეს მისი წილი ხის მოჭრა. ქართველთა წარმოდგენით, ყოველ ადამიანს თავისი ბედის ვარსკვლავი აქვს. მისი სიკვდილის შემდეგ მისი ვარსკვლავიც ჭრება. ბავშვის დაბადებასთან დაკავშირებით ძველად მოქმედებდა წესი, რომ უნდა დაერგოთ ხე, ხოლო მისი გარდაცვალების შემდეგ მის ბედზე დარგული ხეც უნდა მოჭრილიყო. ტრადიცია ბავშვის დაბადებასთან დაკავშირებით ხის დარგვისა უფრო ადრე იქნა მივიწყებული, ხოლო ხის მოჭრის ჩვეულებამ გვიანობამდე შემოინახა თავი.

შემთხვევითი არ არის, რომ ხე ადამიანს გარკვეულად ცოცხალ ორეულად ჰქონდა წარმოდგენილი. ქართულ ხალხურ ზღაპრებში არაერთგან გვხვდება ადამიანს ხედ გადაქცევა, შემდეგ ხის ნაფოტიდან კვლავ ადამიანის გაცოცხლება და სხვ.

როგორც ჩანს, ძველი შეხედულების მიხედვით, ადამიანის სიცოცხლე ხის სიცოცხლესთან არის დაკავშირებული, ადვილი შესაძლებელია, რომ გურიაში ადამიანის გარდაცვალებასთან დაკავშირებით ხის მოჭრის ჩვეულებაში შემონახული იყოს უძველესი ტრადიცია.

¹⁵ ვ ა ხ უ შ ტ ი ბ ა ტ ო ნ ი შ ვ ი ლ ი, აღწერა სამეფოსა საქართველოსა, თბ., 1941, გვ. 172.

Н. А. КАДЖАЯ

КУЛЬТ УСОПШИХ В ГУРИИ

Резюме

В работе рассмотрены обряды, связанные с культом мертвых и ритуальные дни, описаны своеобразные обряды похорон, распространенные в Гурии и происшедшие в них изменения.

На основании собранных материалов выясняется, что в древние времена в Гурии не хоронили в гробах. Деревянные гробы стали изготовлять в Гурии во второй половине XIX в.

В Гурии были засвидетельствованы обычаи выкапывание дерева на имя покойника. По мнению автора живое дерево воспринималось двойником живого человека. Поэтому после смерти человека вырубали какое-нибудь одно дерево.

Выявленный материал о похоронах и траурных обрядах проанализирован с антирелигиозных позиций.

ხელოსნობის ზოგიერთი დარგი და მითევზეობა ბურიაში

მ ე კ უ რ კ ლ ე ო ბ ა. გურიაში კერამიკული წარმოების მიმდევარს მეკურკლე ეწოდება. მეკურკლეობას მხოლოდ ორ სოფელში მისდევდნენ, აცანასა და აკეთში. საკურკლე თიხები აკეთშია. აცანელებს თიხა აკეთიდან მიაქვთ. თიხის გამკლეებას აწარმოებენ სილით, რომელსაც საკმაოდ შორი მანძილიდან ეზიდებიან.

გურიაში დამზადებული კურკელი სადაა, მის მოსალამაზებლად ან გაუმტარობის მიზნით არ იყენებენ არც წერანაქს და არც ჭიქურს.

კურკლის სახეობებიდან ფართო გავრცელება ჰქონდა კურებს, საშაშხე დერგებს, ჭარიკებს (კოკა), ლიტრას (ლაგინა), ქოთნებს (დულუბა), ჯამებს, კეცებს (კელამიტა), სამკვეთოს და სხვ.

კურკელი მზადდებოდა დაბალ, ხელის მორგვზე. ხელის მორგვზე მზადდებოდა კურებიც. გურიაში დიდი ზომის კურებს არ აკეთებდნენ. მეკურკლეთა გადმოცემით, 5 ფუთიანზე ზევით გურიაში კური არ უმზადებიათ. უფრო დიდი ზომის კურები შემოჰქონდათ იმერეთიდან.

კური მორგვზე საფეხურებად შენდებოდა, მის შენებას იწყებდნენ ძირიდან. ძირიდან ორი მტკაველის სიმაღლეზე რომ ამოიყვანდნენ, ერთ დღეს შეასვენებდნენ. შესვენებისას შშენებარე ადგილზე კურს უტოვებდნენ სქელ სარტყელს, რომ შემდეგი შენების დროს თიხა კარგად გადაბმულიყო. შესვენების ადგილზე დატოვებულ სისქე კურს სარტყლად რჩებოდა.

გურიაში მეკურკლეებს, მსგავსად მეგრელი ხელოსნებისა, ძველად უკეთებიათ მცირე ზომის კურები, რომელსაც ახალი მიცვალებულების პატრონები იძენდნენ და საფლავთან ფლავდნენ ხოლმე. საფლავის კურში ღვინოს ასხამდნენ და მიცვალებულის მოსახსენებელ დღეებში ან რელიგიური ხასიათის დღეს სასაფლაოზევე იხარჯებოდა. ეს ჩვეულება, როგორც სამეგრელოში, ისე გურიაში საკმა-

ოდ ფეხმოკიდებული ყოფილა. გვიანი დროისათვის ეთნოგრაფიული მასალა სპორადულად დასტურდება, უფრო მეტად სამეგრელოში, ნაკლებად გურიაში. ეს ჩვეულება აღმოსავლეთ საქართველოშიც უნდა ყოფილიყო გავრცელებული.

სხვანაირად ძნელი ასახსნელია სასაფლაოებზე არსებული საოჯახო და საგვარიშვილო საზედაშე ქვევრები, რომლებშიაც შემოდგომით თავანკარა ღვინოს ასხამდნენ და შემდეგ მიცვალებულთა მოსაგონარ რელიგიურ დღესასწაულებზე იხარჯებოდა ხოლმე.

როგორც სამეგრელოში, ისე გურიაში საფლავთან ქვევრის დაფლვის ჩვეულებას შესაძლებელია იმის შემდეგ დაედო დასაბამი, როცა ქვევრში დაკრძალვის წესი იქნა უკუგდებული.

დასავლეთ საქართველოში საფლავებზე ახლაც ხშირად გვხვდება საფლავებთან დატოვებული სასმელები და სასმისები, იმ მიზნით თითქოს, რომ სასაფლაოზე მოსულმა კაცმა შენდობა უთხრას მიცვალებულს. ქართლში მიცვალებულს ბოთლით წყალს უდგამენ კუბოში. ამ რიტუალებში თუ წესში შემორჩენილი უნდა იყოს, ძველი ჩვეულების, ე. ი. როცა მიცვალებულს თავთან ჭურს უძაოხავდნენ, მისი ტრანსფორმირებული სახე. სამეგრელოში ოჯახის მამაკაცის სახელზე ეზოში საგანგებო ადგილზე ჩადგმული იყო მცირე ზომის ჭურები, რომლებშიც თავანკარა ღვინოს ინახავდნენ. თუ მამაკაცი გარდაიცვლებოდა, ვის სახელზედაც ქვევრი იყო დათქმული, მაშინ იმ ქვევრს იღებდნენ და მიჰქონდათ ადამიანისა და პირუტყვისათვის უხვედრ ადგილზე და იქ ამტკრევდნენ. ქართლსა და კახეთში ხატსალოცავების სახელზე ყველა ოჯახი ინახავდა ზედაშეს. ზოგიერთ სოფელში ზედაშეები უშუალოდ ეკლესიის კარზე იყო, ხოლო ზოგს საზედაშე ქვევრები სახლში გააჩნდა. თუ ოჯახი რაიმე მიზეზით ზედაშეს ვეღარ მიიტანდა ეკლესიის კარზე, მაშინ სახლიდან საზედაშე ქვევრი მიჰქონდა და ეკლესიის კარზე ტოვებდა. საოჯახო ზედაშეები გვიანდელი მოვლენაა. მისი აღრინდელი სახე ის უნდა ყოფილიყო, როცა ზედაშე ეკლესიის კარზე თავსდებოდა.

მართალია, მიცვალებულის საზედაშე ჭურებს სასოფლო ზედაშეებთან ნაკლები კავშირი აქვთ, მაგრამ მათი განხილვა ერთ ასპექტში უნდა ხდებოდეს, რადგან ეს წეს-ჩვეულებები მიცვალებულის კულტს უკავშირდება და ჭური ამ შემთხვევაში ამ რიტუალთა მატერიალური ატრიბუტის სახით გვევლინება.

გურიაში მეჭურჭლეთა ნახელავი არ გამოირჩევა მრავალფეროვნებით, ისე როგორც იმერეთსა და სამეგრელოში. ერთი შეხედვით აქაური მეჭურჭლეობა ღარიბულია და მარტივის შთაბეჭდილებას

ტოვებს, მაგრამ მეჭურჭლეთა ეს მცირე ნომენკლატურა მალალ დონეზეა დახვეწილი და დამუშავებული. არც ერთი ზედმეტი ნიუანსი არ შეინიშნება საღვინე დოქებში, ჭარიკებსა თუ საშაშხე დერგებში კერამიკული ჭურჭელი, რომელიც გურიაში მზადდებოდა, ადგილობრივი მეურნეობის ყველა სფეროს ემსახურებოდა. თუ რამდენად დახვეწილია თვითოეული კერამიკული ნაწარმი, ეს ჩანს თუნდაც სამკვეთლო ჭურჭლის მაგალითიდან. სამკვეთლო ჭურჭელი საღვინეს ფორმის დოქია, ტუჩი ისევე აქვს მოწყობილი როგორც საღვინეს. ხელი გვერდიდან აქვს მიძერწილი, ხოლო ზურგიდან მუცლის თავზე ამოჭრილი აქვს საკოვზე. ამოჭრილი ფანჯრიდან აგდებდნენ დვრიტას, ურედენენ კოვზით და უმატებდნენ შრატს. გვერდიდან მიძერწილი სახელურის საშუალებით ძოხერხებულად ხდებოდა სამკვეთლოს მოძრაობა, რძის ასაქოელი დვრიტის სითხის გადასხმა რძის ჭურჭელში (სურ. 1).




სურ. 1. კერამიკული ჭურჭელი

სამწუხაროდ, ეს უნიკალური სამკვეთლო ჭურჭელი იშვიათობად არის ქცეული და ხელისნებიც აღარ აკეთებენ. უნდა აღინიშნოს, რომ საქართველოს არც ერთ სხვა რაიონში მსგავსი ჭურჭელი არ მოიპოვება, მას მხოლოდ აკეთელი მეჭურჭლეები ამზადებდნენ.

საინტერესოა კერამიკული საღვინე დოქის ფორმები, რომლებიც მსხლის ფორმებს იმეორებენ. განსხვავებით საქარაველოს სხვა კუთხეებში გავრცელებული საღვინეებისა, სადაც მუცელი და ყელი მკვეთრად განიყოფება, გურულ საღვინე ჭურჭელში ეს შეუმჩნეველია, თითქოს მთლიანობაშია მოცემული. აქ თითქოს მწარე ხაზის ფორმებიდან უნდა იყოს ნასესხები ეს ფორმა, რომელიც საკმაოდ ჯართოდ იყო ხმარებული გურულ მეღვინეობაში.

ველზე მუშაობის დროს დამოწმდა საღვინე დოქების ორი სახეობა: მანიკა მცირე საღვინე და ფიჩხაური დიდი საღვინე დოქი, რომელშიც 5 ლიტრი ჩადიოდა (არჩილ ალექსანდრეს ძე ხუხუნაშვილი, 81 წლისა, სოფ. ზომლეთი, 1978 წ.). ფიჩხაურს, როგორც ჩანს, საწყაოდაც იყენებდნენ. 1808 წლის ნიხრში, რომელიც სოლომონ იმერეთის მეფის ბრძანებით მამია გურიელს შეუდგენია, კერამიკული ჭურჭელიც შეუფასებიათ. აქ ვკითხულობთ: „ექვსდოქიანი საწყავი 4 ფარა, ფიჩხაური 2 ფარა, დოქი 1 ფარა, ორი ლიტრი 1 ფარა, ღვინის ქვევრი 30 კოკიახი 4 ყურუში, 15 კოკიანი 2 ყურუში“¹. ამ ნიხრის მიხედვით, გურიაში ხმარებულ ჭურჭელს შორის გარკვეული კანონზომიერებაა დაცული. 6 დოქიანი საწყავის ფასი ორჯერ აღემატება ფიჩხაურის ფასს, ხოლო ერთი ფიჩხაურის ფასი ორჯერ აღემატება დოქის ფასს. აქედან გამომდინარე, ამ ჭურჭელს შორის სიღირებულება მსგავსი განსხვავება უნდა იყოს (სურ. 2).



სურ. 2 გურული კერამიკული ჭურჭლის ზოგიერთი სახეობანი

¹ Д. Б а к р а д з е Археологическое путешествие по Гурнии и Аджаре, СПб. 1878, с. 57.

გურიაში მექურჭლეობას ძირითადად კაცები მისდევდნენ. კერამიკული ნაწარმის ერთადერთი სახე კეცი იყო, რომელსაც ქალებიც ამზადებდნენ. ქალები მექურჭლე მამაკაცებს ეხმარებოდნენ თიხის დაზეღვასა და მასალის მიმარჯვებაში.

გამომწვარ-გამზადებული ჭურჭელი ცხენის ან ურმის ტკირით ბაზარზე გაჰქონდათ. გურული კერამიკული ჭურჭელი გურიაშივე იყიდებოდა.

სამეგრელოსა და იმერეთისაგან განსხვავებით, გურიაში ჭურჭლის დასამზადებლად მორგეს ბორბალი ეწოდება, ხოლო გამოსაწვავ ჭურას — თორნე. როგორც ჩანს, ჭურჭლის გამოსაწვავი ქერის ყველაზე ადრეული სახელი გურიაში შემონახა.

მეკრამიტეობა. გურიაში მეკრამიტეობის ხელობას დიდი ხნის ისტორია არა აქვს. ძველად საცხოვრებელი სახლები ყვერით ან ისლით იყო გადახურული. XIX საუკუნის მეორე ნახევარში ჯერ ქალაქებში დაიწყეს კრამიტით სახლების გადახურვა, ხოლო შემდეგ მან სოფლებშიც ფართოდ მოიკიდა ფეხი. კრამიტს ძირითადად პალატიანი სახლების გადასახურავად იყენებდნენ.

გურიაში მეკრამიტეობის სამ ცენტრს ასახელებენ: სუფსას, ჯურუყვეთს და აკეთს. კრამიტი ერთი სახისა კეთდებოდა „გულიანი“ — ღარიანი.

მეკრამიტეობა მძიმე სამუშაოა. გარდა იმისა, რომ მის მკეთებლობას დახელოვნება სჭირდება, იგი დაკავშირებულია თიხების გარკვეულ საბადოებთან. ჯურუყვეთელი მეკრამიტის (სევერიან ალმასხანის ოქ ჩავლეიშვილის 75 წლისა, 1978 წ.) გადმოცემით, საქართველოში საბჭოთა ხელისუფლების დაწყებამდე მეკრამიტეებს (ჯურუყვეთი) სცოდნიათ შეამზანაგებით მუშაობა. 5—10 კაცი შეთანხმდებოდნენ, მოთხრიდნენ მიწას, მოიტანდნენ შეამზადებდნენ, დაზეღავდნენ, ყალიბში მოჭრიდნენ, გააშრობდნენ და გამოწვავდნენ. შემოსავალს თანაბრად გაინაწილებდნენ.

საკრამიტე მიწის დაზეღვას აწარმოებდნენ ხის კოდში, რომელშიც მოწყობილი იყო ლერძზე დამაგრებული ფრთები. ლერძს მიმაგრებული ჰქონდა გრძელი ლატანი, რომელშიც გაბჟული ჰყავდათ ცხენი, ცხენის ძალის გამოყენებით მოძრაობაში მოდიოდა კოდში ჩადგმული ფრთებიანი ლერძი და მიმდინარეობდა თიხის დაზეღვა. თიხაში გასამკლევებლად მესამედს სილას ურევდნენ. დაზეღილი თიხა გადაჰქონდათ დაზგაზე, სადაც იღებდნენ გუნდებად, თიხის გუნ-

დას ყალიბში ჩადებდნენ და ასწორებდნენ ლაღას გადასმით. გადასწორებული კრამიტი გადაჰქონდათ ფორმაზე ე. ი. მოგლუეებულ ფიცარზე, რომელიც კრამიტს ლარის ფორმას აძლევდა. ამის შემდეგ ფორმაზე გადატანილი კრამიტი ხონჩით გაჰქონდათ საშრობში. გამოშრობას ერთი კვირა მაინც უნდოდა. ამის შემდეგ კრამიტი შეჰქონდათ ქურაში და იწყებოდა მისი გამოწვა.

გარდა კრამიტისა, ამავე პუნქტებში უკეთებიათ აგრეთვე აგურიც.


1930 წლიდან კრამიტის წარმოებას სოფელ ჭურუყვეთში ფართო ხასიათი მიეცა, მისი ორგანიზაციული მხარე სარეწაო კავშირს ევალებოდა, მაგრამ ეს კოლმეურნეობისთვის ხელსაყრელი არ იყო. კოლმეურნეობას მღუშახელი უტდებოდა, შემოსავალი კი მის დოვლათს არ ემატებოდა. ამ წინააღმდეგობებმა და იმანაც, რომ შიფერის სახით იაფი სახურავის მასალა გაჩნდა, კრამიტის კუსტარულმა წარმოებამ აზრი დაკარგა და გურიაში იგი შეწყდა. თუმცა უნდა აღინიშნოს, რომ ოდა-საცხოვრებელ ნაგებობებს კრამიტით გადახურვა უფრო მეტად ამშვენებს, ვიდრე სხვა რომელიმე მასალით.

ქვის დამუშავების წესები. ქვის საბადოების საუხვით გურია არ გამოირჩევა, მაგრამ არის რამდენიმე პუნქტი, სადაც ქვის დამუშავების ხელობას ადგილობრივი შორეული წარსულიდან მისდევდნენ. გურიაში ქვის ოსტატთა ნახელავი დღესაც მოწონებაშია და ამდენად, ხელოსნობის ეს დარგი ჯერ კიდევ ბოგინობს.

ქვის მოხელეობას მისდევდნენ სოფლებში: ამაღლებაში, ზომლეთში, ვანში და საჭამიასერში (სურ. 3).

ზომლეთელები და ვანელები ქვის ორი საბადოდან საშაჰკვრანიდან და კონცხოულადან სარგებლობდნენ. ზემო ამაღლება — საკეციადან. ქვის მოხელეებს ზოგადად მოწაკატეებს უწოდებდნენ. ქვის მოხელეობა შიგნით დაყოფილი იყო ცალკეული საგნების დამზადების კვალობაზე. ვანელები და ზემო ამაღლებელნი უმეტესად კეცებს ამზადებდნენ და მათ მეკეცეებს („მეკეციე კაცები“) უწოდებდნენ. ზომლეთელებს უმეტესად დოკონები — ბაჭები უთლიათ. ისინივე ამზადებდნენ ღომის ჩამურს, ბუხრის თავებს, გურიაში წისქვილის ძველი ქვებიდან აკეთებდნენ ხელწისქვილებსაც. საჭამიასერის სოფლებში დამოწმდა ქვის კოდიანი წისქვილი. ადგილობრივთა გადმოცემით, ქვის კოდები ადგილობრივ ყოფილა დამუშავებული. ქვის საბადოებიდან ქვის მოტეხვა, რასაც ადგილზე მოჭრასაც უწოდებდნენ, საკმაოდ ძნელ სამუშაოს წარმოადგენდა. მეწაკატეს უნდა სცოდნოდა კარგად ქვის მოსატეხი ხაზების მიმართულება.

წელოსანთა დაკვირვებით, ქვას აქვს საური. ქვის გადატეხვა ამ საურის მიმართულებით უნდა მოხდეს. იმის შესაბამისად თუ რა ზომისა და რა დანიშნულების მასალა უნდოდათ, ქვაზე ავლებდნენ ღარს. ღარის გასაველებად იყენებდნენ წვერიან წაქატს, ღარში თანამიმდევრობით რკინის სოლებს აწყობდნენ და თანამიმდევრულად სცემდნენ უროს.



სურ. 3. ქვის დასამუშავებელი იარაღები

ქვის მოსაჭრელად პალოების გარდა იყენებდნენ „ლაღუმსაც“. მოხრობელთა დაკვირვებით, ქვა გამოდიოდა მაგარიც და რბილიც. მაგარი ქვა უფრო ადვილი მოსატეხი, ხოლო რბილი ქვა უფრო ძნელი მოსატეხი იყო და მას უფრო მეტი პალოები სჭირდებოდა. თუ

ლალუმით უნდოდათ ქვის მოტეხა, მაშინ ქვაში ლომის საშუალებით ღრმად ჩადიდნენ. ქვის მტვერს კოვზით იღებდნენ და ფოსოს ასუფთავებდნენ. ამოსუფთავებულ ფოსოებში „ლალუმის წამალს“ ყრიდნენ, შემდეგ ლალუმის წამალს და ნავთს ერთიმეორეში მოწეიდნენ, იღებდნენ ისლის ღერს, რომელსაც შუაში ჩაჭრიდნენ, ლალუმის ცომს შიგ ჩააგლესავდნენ და შეკრავდნენ* ერთაწვერით მოათავსებდნენ ქვის ფოსოში, რომელშიც ლალუმი იყო ჩაყრილი, შემდეგ ისლს მისცემდნენ ცეცხლს და შორს გაიქცეოდნენ“.

მოტეხილი ქვა საბადოდან ფრჩხილებიანი ურბით გამოჰქონდათ. ადგილზე აკოპიტებდნენ და ზოგჯერ ადგილზევე ასუფთავებდნენ.



სურ 4. ქვის გეში (ქის თავი)

„მეკეციე კაცებს“ საკეცე დანიშნულებით მოჭრილი ქვა გაკოპიტებული მიჰქონდათ სახლში. კეცის გულის ამოღებას, ძირის და კიდების შემოსუფთავებას სახლში აწარმოებდნენ, საკეცე ქვას მოამრგვალებდნენ, რისთვისაც ძირითადად წაკატს ხმარობდნენ, შემდეგ ამავე იარაღით იწყებდნენ გულის ამოწაკატებას. გულის ამოსაღებად ორი სახის წაკატი იხმარებოდა „საქარი წაკატი“—

* იხ. რუხაძე, ხალხური აგრარულ კულტურა დასავლეთში, თბ., 1976, გვ. 28.

პირველი პირისათვის და „საღები წაკატი“ — მეორე პირისათვის. საღები წაკატით ხდებოდა გულის ძირითადი ფენის ამოჭრა. ამის შემდეგ კი იყენებდნენ პირთხელს. პირთხულით კეცის გულსა და კიდევებს მოასარკევებდნენ. ერთი ხელსანი — მეკეცე თუ მას მოჭრალი ქვა გააჩნდა, დღეში საშუალო ზომის (საშ. ზომის კეცის $d = 40$ სმ) 4—5 კეცს გააქეთებდა. კარგი ქვით დამზადებული კეცი 2 წლამდე ძლებდა. იმისათვის, რომ კეცი ძლიერი ცეცხლით არ გადახურებულიყო და არ დამწვარიყო, მას თეჯერაზე ახურებდნენ. ქვის კეცს თიხის კეცთან შედარებით მრავალ უპირატესობას აძლევდნენ.

გურიაში ქვის მთლელები განსაკუთრებით დიდი რაოდენობით ამზადებდნენ სასიმიინდე ნალიებისა და სახლის ბიჯგებს. სასიმიინდე ნალიისათვის გრძელი ქვა უნდა მოჭრილიყო, რომელიც მიწაში ჩასმის მერე საშუალო კაცის სიმაღლისა მაინც უნდა დარჩენილიყო.

განსაკუთრებული ყურადღებით ეკიდებოდნენ ბუხრისთავეების დამზადებას. შემდგომში, როცა გურიაში შუაეცეხლიანი სახლების ნაცვლად პალატიანი სახლები გაჩნდა, ბუხრისთავეებზე მოთხოვნილება გაიზარდა. პალატიანი სახლები ისეა აგებული, რომ რამდენი ოთახიცაა, იმდენი ბუხრის „ტაფა“ გააჩნია, ახალი სახლების ინტერიერში ბუხარი გამსაზღვრელ და ძირითად კომპონენტად დარჩა. ამიტომ, ისე როგორც ძველად შუა ეცეხლი, ისლით გადახურულ სახლში განსაზღვრავდა სახლის ინტერიერს, ახალ სახლებშიც ბუხარი წამყვან ელემენტად გვევლინება. აქედან გამომდინარე, დილა ყურადღება ექცევა ბუხრის მოპირკეთებასა და ბუხრის თავეების (თაღების) სილამაზეს.


ყ ა ვ რ ი ს გ ა მ ო ხ დ ა გურიაში ყავრის გამოხდას ძირითადად მისდევდნენ სუფსისა და გუბაზოულის ხეობის ზედა სოფლებში (ბასილეთის და ნაბელლავის თემებში).

ყავარს ხდიდნენ ნაძვისა და ფიჭვის ხისაგან, არა იშვიათად წითლის ხესაც იყენებდნენ.

საყავრე ხის შერჩევა სკოდნით როგორც ხის ექსპოზიციის მიხედვით, ისე უშუალოდ ხის ნაზარდი ხაზების მიმართულებაზე დავირკვებით. თუ ხე სწორტანიანი იყო და გვერდით ხეები ზრდის მიმართულებაში ხელს უშლიდნენ, ასეთი ხე საყავრედ გამოდგებოდა. ხეს თუ გვერდით სხვა ხეები ედგა, რომელიც სწორ ზრდაში უჩრდილავდა, და ეს უკანასკნელი მზის სხივების ძიებაში წვალობდა, მას ტანი შეიძლება სწორი ჰქონოდა, მაგრამ საზრდელი ხაზები მიგრებილ-მოგრებილი. ასეთი ხე საყავრედ არ გამოდგებოდა.

საყავრე ხეს სასინჯ ნაფოტს გამოაპობდნენ. ნაფოტის მიხედვით

არჩევდნენ სამი მიმართულების ხაზს — მარჯვენას, მარცხენას და სწორს. თუ ნაფოტს სწორი ხაზები გააჩნდა, ის კარგი საყავრე მასალის მანიშნებლად ითვლებოდა. თუ ხაზები მარცხენა მხრით იყო მიმართული, მაშინ ამ ხიდან ბევრი და უკეთესი ყავარი გამოიზღებოდა — ამგვარი ცნობა მოგვაწოდეს სოფ. ნაბელლავეში უშუალოდ მეყავრეებმა. მაგრამ სოფ. ზემო სურებში ყავრის მოხელე სოლომონ ბეზიშვილი საყავრედ ამჯობინებდა მარჯვენა მხარეზე მიმართულ ხაზებიან ხეს.



სურ. 5. ქვის საკოდი იარაღები

ეთნოგრაფ გ. გასიტაშვილს ბორჯომის ხეობის მეყავრეებთან ჩაწერილი მასალის მიხედვით, საყავრე ხეს მარცხნივ უნდა კჰონოდა მიმართულება². იქვე გ. გასიტაშვილი, ეყრდნობა რა თ. ჩიქოვანის აჭარულ მასალებს, აღნიშნავს, რომ აჭარლები ამჯობინებდნენ თუ ხეს ნაზარდის მიმართულება მარჯვნივ ექნებოდა³.

მთხრობელთა დაკვირვებით, ხე უნდა იყოს 15 „ვერშოკიანი“ მაინც. ხეს მოჭრიდნენ და 1,5 არშინიან მორებად დახერხავდნენ

² გ. გასიტაშვილი, ხის დამუშავების ხალხური წესები, თბ., 1962, გვ. 76.

³ იქვე.

(120 სმ), შორებს დაანათხლებდნენ. ნაოთხალს ერთი თავით სამართში-კალაპოტში ჩადგამდნენ. ყავრის დაშნით-დანით ნაოთხალს ნეკი თითის სისქეზე როკოტინას-კვეეოს ნელი ცემით პირს აუხსნიდნენ, თანდათან ტარით დანას ამოძრავებდნენ და დაბლა ეშვებოდნენ. ყავრის ფურცელი 3—8 „ვერშოკის“ სიფართისა იყო. ერთი ნაოთხალიდან 6—8 ფურცელი ყავარი ამოდიოდა.

ყავრის რაოდენობას საპალნით და ბელლით გამოხატავდნენ, ერთი საპალნე 100-ფურცელს გულისხმობდა, 5 საპალნე ერთ ბელელს შეადგენდა.

საპალნე ცხენის ერთ ტვირთს შეადგენდა. ყავრის ფურცლებს (ერთ ტვირთს) ორ კონად კრავდნენ, თითო კონაში 50 ფურცელი თავსდებოდა. კონები ერთიმეორეზე იყო გადაბმული და უნაგირზე გადაკიდებული.

ხელმარჩვე მეყავრე, თუ მას დამორილი მასალა გააჩნდა, დღეში ერთ ბელელს დახვედა. დახეულ ყავარს, რომ არ დაბრეცილიყო, საგანგებოდ აწყობდნენ, რასაც დაბელვლა ეწოდებოდა. ბელელში ყავარი სათვალავით ლავდებოდა ე. ი. 500 ცალი უნდა დაეწყყო. ბელელში ყავარი შრებოდა და სწორად დგებოდა.

მთხრობელთა გადმოცემით, სოფელ ნაბელლავს მეყავრეობის ნიადაგზე შერქმევია სახელი.

ყავარი იყიდებოდა, როგორც ადგილზე, ისე მეზობელ სოფლებში და ქალაქებში.


ყავრით ხურავდნენ, როგორც ოდა სახლებს, ისე ძველებურ „ქუხნა სახლებს“.

ყავარმა გარკვეულ ეტაპზე შეცვალა გურული სახლების ძირითადი სახურავი ისლი, ხოლო XIX ს. ისლი შეცვალა ჭერ ყავარმა, შემდეგ კი კრამიტმა.

მ ე თ ე ვ ზ ე ო ბ ა გ უ რ ი ა შ ი. მეთევზეობა დამხმარე მეურნეობის ერთი ისეთი დარგია, რომელსაც გურულთა ყოფაში დიდი ხნის ისტორია გააჩნია. გურია თავისი მდებარეობით თევზის მისაღვეარ უბანს წარმოადგენს. თხელი სანაპირო ზღვის ზოლი, ზღვაში ჩამდინარე მოზრდილი მდინარე სუფსა და ძრავალი მცირე მდინარე დიდძალ თევზს იზიდავდა. მდინარეთა მთის ზოლში დიდი რაოდენობით იყო კალმახი, ხოლო გავაკებაზე წვერა, კობრი, კეფალი, ქაშაყი, ჭაფალი, ზუთხი.

ზღვისპირა ზოლის ძველი მოსახლეობა მეთევზეობას ოდითგანვე მისდევდა. არქეოლოგმა ნ. ხოშტარიამ დიხა გუძუბას ნამოსახლარზე, რომელიც ნეოლითის შემდგომი ხანით თარიღდება, აღმოა-

აჩინა ბადის საწაფი ქვები⁴. ბადის საწაფად ქვების გამოყენების ფაქტი, სამეგრელოში არქანჯელო ლამბერტსაც დაუმოწმებია⁵.



სურ. 6. ხის კურკელი

თევზის, როგორც საკვები პროდუქტების სიუხვე ადგილობრივ მოსახლეობას ეკონომიკური თვალსაზრისით გარკვეულ შედეგათს აღწევდა. თევზის დასაჭერად მის მოსაპოვებლად იმთავითვე მრავალი საშუალება შემუშავებულა.

გურულები ფრინველებზე დაკვირვებით ადგენდნენ თევზის მოძრაობის მიმართულებას. მდინარის გასწვრივ წყლის იხვის-აკინის — მოძრაობით საზღვრავდნენ თევზის მოძრაობის მიმართულებას. ასევე ამავე ფრინველის ზღვის სანაპიროზე ფრენით გებულობდნენ, თუ სად მოიყარა თევზმა თავი. თევზის მოძრაობის დადგენას განსაკუთრებით მაშინ ეძლეოდა დიდი მნიშვნელობა, როცა თევზაობა წარმოებდა დიდი მასშტაბით. დიდი მასშტაბით თევზაობა კი მაშინ სკოდნიათ, როცა თევზაობა სახელმწიფო მნიშვნელობის დონეზე მიმდინარეობდა.

⁴ ნ. ხოშტარია, დიხა გუძუბა, კოლხეთის ძველი მოსახლეობა, საქ. მეცნ. აკად. შობბე, V, № 2, 1944, გვ. 211.

⁵ არქანჯელო ლამბერტი, სამეგრელოს აღწერა, თბ., 1938, გვ. 182.

სახელმწიფო მნიშვნელობის დონეზე თევზაობა ნიშნავდა, იმას, რომ გურული გლეხებისათვის თევზის ბეგარა მუდმივი ბეგარის სა-
ჩეს წარმოადგენდა⁶. ამიტომ მის გადასახდელად საჭირო იყო თევზის
მოპოვება-დაჭერა და სათანადო დამუშავებულის მირთმევა ბატონი-
სათვის.

* თევზჭერა მიმდინარეობდა ინდივიდუალური და კოლექტიური
გზით. კოლექტიური ხასიათის თევზჭერა უფრო ადრეულია. თევზჭე-
რის იარაღებიც ორი მიზნით იხმარებოდა. იყო ერთდროულად შრა-
ვალი თევზის დასაჭერი საშუალებანი (ბადე, გოდორი). თევზაობა
მიმდინარეობდა აგრეთვე სათევზაო იარაღებისა და საშუალებების
გარეშე, მოხელავებით.


გურიაში მეთევზეობასთან დაკავშირებით დადგენილი საშუა-
ლებებიდან უძველეს ფორმად მისაჩნევია თევზის ჭერა მდინარის
ტოტის გადაწურვით. მდინარის ტოტის გადასაწურად რამდენიმე
კაცი შეამხანაგდებოდა. შეამხანაგება წინასწარ სოფელშივე ხდებო-
და. შეამხანაგებულებს თან მიჰქონდათ: ბარი, თოხი, ნიჩაბი, ხელგო-
ბი, გოდორი ინთა და სხვ. გადასაწური მდინარის ტოტის სათავესთან
მიიტანდნენ მოკრილ ბელტს, ხის ფოთლოვან ტოტებს. ქვით ყორეს
გაავლებდნენ, ტოტებსა და ბელტს მიუგებდნენ და წყალს სხვა მი-
მართულებით გადაუგდებდნენ. ტოტის სათავეში ჩატარებული მუ-
შაობის შედეგად თევზი ფრთხებოდა და ბოლოს აწყდებოდა. იმისა-
თვის, რომ თევზი ბოლოდან არ გაპარულიყო ბოლოში რამდენიმე
კაცი იგზავნებოდა ბოლოს „გასაჩხოკად“ — გასალობად. მოსაწური
ტოტის ბოლოში ქვებით გადალობავდნენ, ფოთლოვან ხის ტოტებს
მიუგებდნენ და შუაში პირჩაბრუნებულ გადორს გაუგდებდნენ. გა-
დაწურულ ტოტში თევზს ხელით იჭერდნენ. დაჭერილ თევზს ბლის
კანისაგან დამზადებულ ინთაში აწყობდნენ. თევზაობის დამთავრების
შემდეგ გადაწურულ ტოტს თავსა და ბოლოს აუშვებდნენ და წყალს
ისევ შეუშვებდნენ.

დაჭერილ თევზს თანაბრად ინაწილებდნენ წილის ყრით. თევ-
ზაობის ეს ფორმა საქართველოს ყველა კუთხეში იყო გავრცელებუ-
ლი.

ბოლოობა ანუ ჭვილთით თევზაობა—ასე ეწოდება თევზაობის
ერთ-ერთ სახეობას. რომელიც ბარჯის—ჭვილთის საშუალებით მიმ-
დინარეობდა. ჭვილთით თევზაობა შედარებით რთულია და მეთევზე-
თა დიდ დახელოვნებას მოითხოვს. პირველ ყოვლისა, მეთევზემ უნ-

⁶ გ. ხ ა კ ა პ უ რ ი ძ ე, გურიის აქანყება 1841 წელს, თბ., 1933, გვ. 20.

და მიაკვლიოს დაბოლოებულ თევზს. თევზის დაბოლოება ძირითადად ზამთრის პერიოდში ხდება. მეთევზეთა დაკვირვებით, ზამთარში თევზები თავს ერთად იყრიან. სადაც ღრმა ადგილია, იქ ჩერდებიან, ან „ჯიკვის“ გვერდში „დაბოლოატლებიან“, „ჩაწოლილ თევ-



სურ. 7. სათევზაო კვილითი

ზებს სითბოთი ორთქლი ასდის“. დაბოლოებულ თევზის საქმენულად დილით ადრე მიდიოდნენ. დაწმენდილ წყალს აკვირდებოდნენ და, თუ თევზს შენიშნავდნენ, მაშინ ზემოდან „სამპოტიკე კვილთს“ ჩასცემდნენ. კვილთი-ბარჯი სამთითანია და წვერები ისრისფრთებით უბოლოვდება. როცა თევზს ბარჯს დასცემდნენ ისრისწვერიანი თითებიდან მერე თავს ადვილად ველარ დაიხსნიდა. ბარჯით ცალკეულადაც დადიოდნენ და ორ-სამი კაციც ერთად ამხანაგდებოდა ხოლმე. დაჭერილ თევზს თანაბრად ინაწილებდნენ.

გოდრი თევზობა. წინათ გურიში ხშირად თევზობდნენ გოდ-

რით. გოდორი იწნვოდა თხილის წნელისაგან. კონუსისებური ფორმისა, რომელსაც შიგნიდან მეორე ასეთი მცირე კონუსისებური ფორმის გოდორი ჰქონდა შექსოვილ-ჩაწნული. გოდორს უგებდნენ მდინარის დინების საპირისპიროდ „ნდორე“ ადგილებში. გოდორში შესული თევზი ადვილად ვერ აღწევდა თავს. გოდორს საღამოს უგებდნენ, მდინარეში ჩასობილ მარგილებზე აბამდნენ, დილით სიხჩავდნენ და თევზებს იღებდნენ. ამ ტიპის გოდორები (საქ. სახ. მუზეუმის კოლექცია № 19—47/30) საქართველოს ყველა კუთხეში იყო გავრცელებული და სხვადასხვა სახელს ატარებდა: პირშექცეული, კოკოზა, გოდორი და სხვ. როგორც სათევზაო იარაღი, ისე ამ

იარაღით თევზაობა ძველ საქართველოში ფართოდ ყოფილა გავრცელებული.

ს ა ლ ო ბ ი ბ ა დ ი თ თ ე ვ ზ ა ო ბ ა. გურიაში, ისე როგორც ზღვისპირა სხვა კუთხეებშიც სკოდნიათ მდინარეზე სალობი ბადით თევზაობა. თვით სიტყვა სალობი ნიშნავს, რომ მთლიანად მდინარის გადაღობვა ხდებოდა. საამისოდ საჭირო იყო არამარტო დიდი ზომის ბადე, არამედ მისთვის მოხერხებული ადგილის შერჩევა და სათანადოდ გამართვა. სალობი ბადის გასაწყობად მდინარეში მარგილებს ჩასვამდნენ. მარგილები ერთიმეორის გასწვრივ უნდა ჩაესხათ. მარგილებს შორის ბადეებზე გაიშვოდა ბადეები ხის რკალზე იყო მოქსოვილი. ბადეს ჰქონდა კონუსისებური ფორმა.

ბადეს დაბოლოებაზე ჰქონდა წვრილი კუშტული. აღნიშნული დეტალის გამო სალობ ბადეს კუშტულიან ბადესაც უწოდებდნენ. სალობი ბადით უმთავრესად ღამით იცოდნენ თევზაობა. ღამით თევზაობისათვის ამზადებდნენ „სამძირს“ სამძირი წარმოადგენდა ხის სამჯოხს სარს, რომელსაც ერთ თავში შეკრავდნენ. ბოლოები გაიდგმოდა და მას წყალში ჩადგამდნენ იმ ადგილზე, საცა სალობი ბადე იყო გაბმული. სამძირზე სინათლეს ანთებდნენ. მეთევზეთა დაკვირვებით „სინათლეზე თევზი მიდის და ბადეში ვარდება“. ამ საქმის მიყოლა ყველას არ შეეძლო და ამდენად იშვიათიც იყო. თუმცა ისტორიულ საბუთებში მესალობე და სალობი ბადე მოიხსენიება. საბუთებში არ ჩანს, მაგრამ უნდა ვივარაუდოთ, რომ მესალობე გლეხი თევზის დიდ ბეგარას იხდიდა. ეს ჩანს თუნდაც 1787 წლის საბუთიდან, ამ საბუთის მიხედვით მესალობე გლეხს „1 მარჩილის მეტი არა ეთხოვებოდა რა“⁷, იმ დროს, როცა ამავე მესალობე გლეხის თანამოძმე ტყვირელი ჩაგუნაეები იმის გარდა, რომ დაქერილი ზუთხის ნახევარს იხდიდნენ, ბეგარისა და სამსახურისაგან მაინც არა თავისუფლებდობდნენ⁸.

დ ი დ ბ ა დ ი თ თ ე ვ ზ ა ო ბ ა. საქართველოში საქმაოდ გავრცელებული სათევზაო საშუალებას წარმოადგენდა დიდბადით თევზაობა. გურიაში დიდბადეს იყენებდნენ ძირითადად სუფსის აუზში და ზღვის სანაპირო ზოლში. სუფსის აუზში მოქმედ დიდ ბადეს სიგრძე სუფსის ერთი ნაპირიდან მეორეზე გამწვდენი უნდა ჰქონოდა. სიგანე კი იმდენი, რომ მდინარის სიღრმეს დაწვდენოდა. დიდბადე ორფად იყო შედგენილი. პირველი წვრილთვლიანი ნაქსოვი

⁷ ს. კ ა კ ა ბ ა ძ ე დასაუღეთ საქართველოს საეკლესიო საბუთები, წ. II, თბ., 1921, გვ. 92.

⁸ იქვე.

იყო. მეორე მსბვილთვლიანი ბადეს გააჩნდა ორი გრძივი „ლარი“, ზედა და ქვედა. ქვედა ლარზე ტყვიის საწაფები ჰქონდა ასხმული. ზედა ლარზე კი ასხმული ყოფილა „ხაპები“, რომ ბადე მოქმედების დროს არ დაძირულიყო და ვერტიკალური მდგომარეობა შეენარჩუნებინა.

ბადეებს უმთავრესად მონასტერში „მოლოზნები“ ქსოვდნენ. ცალკეულ სოფლებში იყვნენ ბადეების მქსოველი ქალები. საერთოდ დასავლეთ საქართველოში ბადეებს ქალები ქსოვდნენ. ბადეების გაწყობა ხაპებით, ტყვიით, კუშტულის მიბმა და სხვა მამაკაცთა საქმეს წარმოადგენდა.

დიდბადის შექმნას მისი სიდიდის და, აქედან გამომდინარე, სიძვირის გამო, ერთი გლეხი ვერ ახერხებდა. ამიტომ 8—10 კაცი ერთად შეამხანაგდებოდა და ერთი „ფხარ“ ბადეს საზიაროდ გადააბამდნენ. დიდბადის ეს შემადგენელი ნაწილი „ერთი ფხარი“ ჩვენ მიერ ზემოთ დასახელებულ მამია გურიელის სინიხრო გარიგებაშიაც არის მოხსენებული და იგი 1 რუბსა და 1 ფარას ფასობდა⁹. ბადეების საზიაროდ გადაბმის შესახებ ვახტანგ VI-ის „დასტურლამალი“¹⁰ არის აღნიშნული¹⁰. როგორც ჩანს, დიდბადით თევზაობის ორგანიზაცია საქმაო სირთულეებთან იყო დაკავშირებული.

თევზაობისას დიდბადეს ერთი წვერით, რომელსაც 4—5 კაცი ეწეოდა, მდინარეში შეიტანდნენ. ამდენივე რჩებოდა მეორე წვერთან და იწყებდნენ მდინარის საპირისპირო მიმართულებით ბადის გაწევას. ბადეს თან უნდა მიჰყოლოდა ერთი მყვინთავი. მყვინთავის მოვალეობას შეადგენდა ქვებზე ან ხეებზე მოდებული ბადე დაეხსნა და ხელი შეეწყო ბადის ტარებაში. გარკვეული მანძილის გავლის შემდეგ ბადის ერთი წვერი უნდა ნაპირისაკენ წამოეღოთ და ბადე გამოეთრიათ ნაპირზე.

დიდბადეს სუფსაში განსაკუთრებით „თევზის კაკლობის“ დროს იყენებდნენ, რომელსაც „ტობობას“ უწოდებდნენ. მთხრობლის გადმოცემით, „ტობობა მარტის თვიდან იწყებოდა, ეს კაკლობა თევზისა, თევზი ლელეებს ეძებს; სადაც ლელეა იქ შეძრობა, მიდის ახლა შით. თევზი ამ დროს ყვირის და ქვებს ეშხაფუნება, რომ კაკალა დაჟაროს. ხანდინან ძალზე ბევრი შემოდის. აქ ერთი გადაუდგამს ბადეს. სხვები ხანდახან ოციც კია, იჭირავს ხელით, ზოგი ბადით დახდება. თევზს ამ დროს სქელი კანი აქვს და არა სხლტება. დაქვრა აღვილია“.

⁹ იქვე.

¹⁰ ვ ა ხ ტ ა ნ გ VI, დასტურლამალი, თბ., 1884, გვ. 23.

საინტერესოა გურიაში გამოყენებული ტერმინი ტობობა. იგი თევზთ კაკლობას ნიშნავს. სულხან საბას ლექსიკონის მიხედვით თევზთა პეპლობა ყოფილა ტულაობა.

გურიაში თევზის დასაქვრი საშუალებებიდან აღსანიშნავია აგრეთვე სასროლი ბადით და ფარონი ბადით თევზაობა. სასროლი ბადით ერთი კაციც წავიდოდა სათევზაოდ. ფარონი ბადით თევზაობას კი ორი კაცი სჭირდებოდა. ფარონი ბადე სიგანეში 1—1,5 მეტრი იყო, სიგრძით კი 2—3 მეტრი. მას ორი კაცი ატარებდა და მდინარის საპირისპირო მიმართულებით მოუსვამდნენ ხოლმე.

თევზის დასაქვრად ხმარობდნენ ანკესებს. იცოდნენ გაბმულა ანკესებით თევზაობა და იცოდნენ ცალი ანკესით თევზაობა. ცალა ანკესით ღელეებზე და მდინარის სანაპიროზე თევზაობდნენ. გაბმულ ანკესებს ზღვაში და დიდი მდინარის მორევეებში იყენებდნენ. ზღვაზე მოთევზავეთა ამხანაგობები ჩვენი მასალებით ვერსად დავადასტურეთ, განსაკუთრებით არჩევდნენ მდინარეთა ან მდინარის ტოტების შესაყარ ადგილებს, სადაც ლამაზობით ჩასადგმელი ბადით თევზაობდნენ. ჩასადგმელ ბადეს გამობმული ჰქონდა საცნაური ძაფი. რომელიც ხელზე ჰქონდა მეთევზეს გამობმული. ამ ძაფის საშუალებით იგებდნენ ბადეში თევზის შესვლას.

თევზისჭერა არ შეიძლებოდა მაისში, ივნისში და ივლისში. დაჭერილ თევზს, თუ იგი დიდი რაოდენობით იყო, გაფატრავდნენ. მარილს დააყრიდნენ და გობზე აჩერებდნენ სამი დღის მანძილზე. სამი დღის შემდეგ დაკიდებდნენ გასაშრობად. ასე დამარილებულ-გაშროალი თევზი საოჯახო მოთხოვნილებისათვის ინახებოდა.

თევზს გურიაში სათანადო ადგილი ეკავა არა მარტო საკვებ რაციონში, არამედ რელიგიური ხასიათის რიტუალებში. შემთხვევით არ გვეჩვენება, რომ თევზი, როგორც ნაყოფიერებისა და გამრავლების სიმბოლო, გარკვეულ მონაწილეობას ღებულობდა ახალწლის რიტუალში. სახელდობრ, გურიაში არაეთვზის დამოწმდა ახალწლის დღეს ჰურის თავზე კალმახის დაკვლის წესი.

ცოცხალი თევზით ახალი წლის მიკვლევა ოჯახისადმი ნაყოფიერების და გამრავლების სიმბოლოს წარმოადგენდა.

Т. В. ДЖАЛАБАДЗЕ

НЕКОТОРЫЕ ОТРАСЛИ РЕМЕСЛЕННОГО ПРОИЗВОДСТВА И РЫБОЛОВСТВО В ГУРИИ

Резюме

В работе изучены: керамическое производство, обработка камня, изготовление дранних кровлей и способы рыболовства в Гурии. Автором усатновлено, что в Гурии изготавливали керамическую посуду в основном в селениях Акети, Ацана и Супса. Выявлены ритуальные кувшины для хранения вина «Зедаше», которые открывались в поминальные дни.

Дается описание способы изготовления черепицы и кирпича. В работе также представлены материалы об обработке камня. В Гурии из камня изготавливали разные предметы: ручные мельницы, подпорки для жилых домов и зернохранилище, каменные сковородки для печения хлеба—мчади и др.

Описываются разные способы рыболовства, рыболовные орудия, ритуалы, связанные с культом рыбы и дана богатая терминология.

Автором выявлен один из древнейших ритуалов, который выполняли в день Нового года. Гурийцы закалывали форель над винным кувшином в знак плодородия и обилия в наступающем году. Рыбьи кости и изображение рыб служили фетишами от дурного глаза.

დემონოლოგიის საკითხისათვის საქართველოში*

დემონოლოგიის საკითხს გადამწყვეტი მნიშვნელობა ენიჭებოდა როგორც ქრისტიანულ, ისე წინაქრისტიანულ რელიგიებში (ანტიკური ქვეყნები, ეგვიპტე, მცირე აზია...).

ორფიკების სწავლებით, სულის ცოდვა მისი პირადი თვითგამორკვევაა. ის ასულია მიწისა და ვარსკვლავიანი ცისა. კაცობრიობა არ განირჩევა ტიტანებისაგან, რომელთა ფერფლიდანაც ის წარმოიშვა¹. „ტიტანები არიან მრავალტანჯული ხალხის საწყისი და პირველწყარო“ (Orphi hymn., XXXVII,4)². ორფიკული დოგმატით, ცოდვილი, დამნაშავე წინაპრები ერთდროულად ტიტანებიც არიან და! მემკვიდრეობით განაგრძობენ ტიტანების ღმერთთან ბრძოლას. მხოლოდ დიონისური ღმერთთაყვანისმცემლობით, რომლის იდეა ესაა იდეა სიკვდილ-სიცოცხლის იგივეობისა, ამცირებენ ისინი თავიანთ პირველშობილ ცოდვას³. „უეჭველია—შენიშნავს ვ. ივანოვი—ტიტანები ხტონური ძალებია ქალური მატერიალური პირველსაწყისისა (მიწის დედისა)⁴“.

„განსხვავებულად უნდა იყვნენ თაყვანცემული ღმერთები“ ამბობს მაცნე ესქილეს ტრაგედიაში „ავამემნონი“ (სტ. 637): ის—განაგრძობს ვ. ივანოვი—გულისხმობს შერევის აკრძალვას ცის ბინადართა მიმართ აღვლენილი ლოცვა-დიდებისას, ასეთსავესთან, მიწის წიაღში მყოფთადმი მიმართულთან. ის, რაც განეკუთვნება მიწისქვეშეთის ძალთა სფეროს და საიქიოს საზღვრის მიღმა სულებს,

* რეცენზენტები—ისტ. მეცნ. კანდიდატები: ა. სოხაძე, მ. ჩართოლანი, ირ. სურგულაძე.

¹ В. Иванов. Дниос и прадниосийство, Баку, 1923. с. 175, 177.

² იქვე, გვ. 176.

³ იქვე, გვ. 175, 177.

⁴ იქვე, გვ. 178.

არის რაღაც არაწმინდა (*miasma, miaron*) ოლიმპისადმი განკუთვნილ წეს-ჩვეულებათა წრეში⁶. პომეროსის სკოლა ეძიებდა მასების ბნელი დემონოლოგიისათვის დაეპირისპირებინა ნათელი სისტემა ჰარმონიულად მოწყობილი ოლიმპისა.

ქრისტიანობა ფარულად ითვისებდა ანტიკური წეს-ჩვეულებისა და სარწმუნოებრივი სწავლების ურიცხვ ელემენტებს თავისი დოგმატური და ლიტურგიული მოძღვრებისათვის. მათ შორის დემონოლოგიის საკითხსაც, უფრო ზუსტად: ტიტანოდემონოლოგიის საკითხსაც. ბერძნული *daimon* ორთიკებთან და პითაგორელებთან ნიშნავდა მფარველ სულს⁷, ქრისტიანებთან—ბოროტ სულს.

ამრიგად, ტიტანურ-დემონური ბუნების ამოსავალი ხტონური და ღამისეული არსია. ის, რაც ტიტანურია წარმართულში, დემონურია ქრისტიანულში.

შუასაუკუნეების ქრისტიანულ ქვეყნებში ინკვიზაციის მიერ ცეცხლზე დაწვა უმთავრესად ქალებს ემუქრებოდა⁸. ქართველი ხალხის რწმენა-წარმოდგენებშიც მანვე, დემონური ძალის მთავარ მატარებელია ქალური ბუნება. მისი უმაღლესი განსახიერებაა კუდიანების უფროსი როკაპი, რომელიც საზარელი მოხუცი ქალის სახით არის წარმოდგენილი. ხალხი ავ ქალს როკაპს ეძახის — „როკაპი ავი ქალია“⁹.

აღსანიშნავია, რომ საქართველოში კუდიანებზე არსებობდა იხეთივე წარმოდგენები, როგორც გავრცელებული იყო შუა საუკუნეებისა და უფრო მოგვიანო ხანის ევროპის ქრისტიანულ ქვეყნებში. ეკლესიის მამების განცხადებიდან ჩანს, რომ არსებული შეხედულების მიხედვით, კუდიანობასა და ჯადოქრობას ვნება მოჰქონდა, პირველ ყოვლისა, საქონლისა და ყანებისათვის; შეეძლო სეტყვის გამოწვევა და სხვ⁹. გურულებში არსებული წარმოდგენითაც, კუდიანების ღამეს, რომელიც 1 ენკენისთვეს (სექტემბერი) იყო ძვ. სტ. (აღსანიშნავია, რომ კუდიანების დღეობა და მცხეთობა ძვ. სტ. 1 სექ-

⁶ იქვე, 187, აგრეთვე 189.

⁷ Дж. Томсон. Исследования по истории древнегреческого общества, М., 1958, с. 338—339.

⁸ М. М. Шейнман, Вера в дьявола в истории религии, М. 1977, стр. 36, 49, 50.

⁹ ჩოხატაურის რ-ნი, 1978 წ. სოფ. ძირი განახლება, ნათელა ირაკლის ასული ელენტი—დოლიძე, გამოთხოვილი სოფ. სამებოდან 50. წლისა; იხ. თ. სახოკია, ეთნოგრაფიული ნაწერები, თბ., 1956 წ. გვ. 19.

⁹ М. М. Шейнман, დასახ. ნაშრ., გვ. 49, 50, 52.

ტემბერს, ე. წ. დადგომას მოდის...), კუდიანები „ჭაჭვეთში“ მოიყრიდნენ თავს, წარსდგებოდნენ როკაპის წინაშე და მოახსენებდნენ, თუ ვის რა გაუფუჭეს. „ჭაჭვეთში“ წასვლის წინ კუდიანები ყველაფერს გააფუჭებდნენ, რასაც თავლის სანთელი არ ექნებოდა მიწებებული. ამიტომ ყველაფერს სანთლით შებეჭავდნენ. ბავშვები უანებს შემოუვლიდნენ, სანთელს მიაწებებდნენ და იძახდნენ: „შენი სვი და შენი კამე, ჩემსას ჯვარი დამიწერე, ჰაუ, კუდიანებო“¹⁰. „შებეჭავდნენ ყანებს, სახლს, ნალიას... ყურის ძირში შეიბეჭავდნენ თავს“¹¹.

ასეთი წარმოდგენა ციდან ჩამოტანილი არ იყო. ეს იყო ღვთის-შეტყველთა კომენტარებებით წარმოდგენილი წარმართული რწმენა-წარმოდგენებისა და წეს-ჩვეულებების ჩემინისცენცია. გამოაზიხილი ქრისტიანულ სარწმუნოებაში.

უნებურად გვაგონდება სევანების წარმოდგენა მიცვალებულთა სულებზე, რომლებსაც შეუძლიათ სევანის ოჯახს მიწის მოსავალი გაუდიდონ, საქონელი გაუმრავლონ და ა. შ. ან, პირიქით, მოუსაკლიანობა დაუმკვიდრონ, საქონელი ამოუწყვიტონ და ა. შ.... სიკვდილიანობით დასცენ და გაანადგურონ. მიცვალებულის კულტში მოცემული ეს ფალიური ელემენტი, როგორც ვ. ბარდაველიძე წერს, დაკავშირებულია ნაყოფიერების იდეასთან, რომელიც მოიცავს ბუნების ძალების კვდომა-აღდგომის, მცენარეული და ცხოველური სამყაროს ნაყოფიერების იდეას¹².

როკაპის ადგილსამყოფელად მიჩნეულია მიუვალი კლდეები, ზღვისპირას მდებარე ქვეყანა, რომელსაც გურულები ჭაჭვეთს უწოდებენ. არავენ იცის, სად მდებარეობს ის¹³ (შდრ. მესეფენიე ზღვის მხრიდან მოდიან).

ჩოხატაურის რ-ის სოფ. ზემო სურებში (უბანი ანუ გორი ციცი-ზოური) 108 წლის აკვილინა ილარიონის ასული თევზაძე-ჭულაყიძისაგან (გამოთხოვილი შუა სურებიდან) ჩავიწერეთ სრულიად განსხვავებული გადმოცემა როკაპის ადგილსამყოფელის შესახებ.

¹⁰ ჩოხატაურის მუზეუმში დაცული სოფ. ქვენობნის ისტორია (ხელნაწერი).

¹¹ ჩოხატაურის რ-ნი, სოფ. ხიდისთავი, სონია ესეს ასული ვაჩიშვილი—კალანდაძე, გამოთხოვილი სოფ. ბეკლეთიდან, 80 წლისა.

¹² ვ. ბ ა რ დ ა ვ ე ლ ი ძ ე, ქართული (სევანური) საწესო გრაფიკული ხელოვნების ნიმუშები, თბ., 1953, გვ. 60.

¹³ Т. М а м а л а д з е. Народные обычаи и поверья гурнийцев, СМОМПК, 17, отд. П, Т., 1893, с. 63.

„ერთი ოჯახი იყო. ღამე ვილაც შეეჩვია. სხვენზე ქვებს უწყობდა და ესროდა. მერე მიხტენ, რომ მათი გოგო იყო. ეს გოგო ეიყვანეს, დაანთეს ნაგულეს ცეცხლი, კვიმი (ყვამლი) დააყენეს და ზედფენებით დაჰკიდეს ეს გოგო — კვიმი თვალბში შეუვიდოდა. ეკითხებიან, რაი გასწავლა და სა, ვინ გასწავლაო. გოგო გამოტყდა: ერთი დედაბერი იყო, კულიანი, იმან მასწავლაო. აი ამბავი რო მოხდა, შეიკრიბა ხალხი. სამი თოფიანი კაცი წავიდა ამ დედაბერთან, მაგრამ არ წამოყვა. მერე ექვსი კაცი წავიდა და წამოიყვანეს. აი გოგომ თქვა: რო დაღამდებოდა და ფეხის ბანას რო შეუდგებოდნენ, რაცხა ამიყვანდა ზეითო — სხვენზე. კულიანი დედაბერი (თავისი) კერიის ქვეშ მოუსობდა ხელს და საცხა ერთად მიდიოდნენ. იანეულში (სოველო) რო შევედით ფრენა-ფრენით, გავალეთ საქათმის კარი და წამევიყვანეთო (ქათამი?). სულ პირველად ამ კულიანმა წისქვილში ნახა აი გოგო და მოუფუჩქა თავი, კატას რომ ბალანი აქვს, იმფერი ბალანი მოუქცია თავზე. მერე ხალხმა უთხრა ამ კულიანს, რავარც ქონდა ბალანი, ისევე გოუხადეო. სახლში ვიზამო. არაო, აქვე გოუკეთეო. მერე გოუსწორა ბალანი. კულიანს, როცა ვინმეს მოკულიანება უნდა, თმას მოუფუჩქავს.

კულიანებს ზარე ქონდნენ. იმ ზარს რომ დაკრავდა, ყველა შეიყრიდა თავს. როკაპი იყო იმ კულიანების უფროსი. როკაპი საცა დოუსახელებდა, იქინა შეიყრიდნენ თავს. როკაპი იმფერი გლახა შესახედავი იყო! იტყვიან, როკაპის ძვალივით რავა არ იხარშებო. ვიტყვით ახლა, მაგ., ხორცი თუ არ იხარშება და აგვიანდება მოხარშვა, ვიტყვით მაშინ, როკაპის ძვალივით რავა არ იხარშებო. აქვენ თურმე ქვაი ერთი, გამოქვაბული, და შით ინახება როკაპი. ცეცხლი არ უნთია, ისეა, საპაიჭიოს სერზე არის ის ქვაი, კლიტე აღენა ზედ, კაი დიდი კლიტე და ამბობენ, როკაპია შით მომწყვდეულიო. იმ ქვას უძახიან ხვარმადის ქვას. ამ როკაპმა კივილი იცოდაო, გამეისნოდა ხმაიო, მაგრამ ეხლა დიდი ხანია არ ისმის. კლიტე ახატია ზედ. მართლა კი არ უბია. დიდი, უშველებელი ქვაი არის, გზაზეა“ (აკვილინა ჭანსალი შესახედაობისაა, კარგად აზროვნებს და მეტყველებს. „ბაბუე იყო ჩემი 120 წლის, დაამთავრა და მოკვდა მაშინ“, — თქვა მან).

საინტერესო პარალელია: როკაპს გამოქვაბულში ცეცხლი არ უნთია და მაცილ-ეშმაკებთან მებრძოლ ღვთაება პირქუშსაც ხევსურები უცეცხლო ანგელოზად იხსენიებენ¹⁴. ჰინკეულს ცეცხლისა ეში-

¹⁴ ს. მ ა კ ა ლ ა თ ი ა, ხევსურეთი, ტფ., 1935, გვ. 239.

ნია¹⁵, უფრო ზუსტად — დაწვია. ღამით სახლში შესაღწევი გზაც მისთვის ჩამკრალი ბუხარია. ამიტომაც დაღვდნენ ეშმაკეულს. აღსანიშნავია, რომ გურიაში კუდიანების გამოცდა იმავე წესით ხდებოდა, როგორც აღნიშნულია პოლონეთში 1775 წლამდე, და რომელიც ტარდებოდა 1543 წლის წესდების მიხედვით¹⁶. სოფ. ბუკისციხელი ილია დავითის ძე სიხარულიძე, 84 წლისა, გვიყვება:

„ბაბუაჩემის გადმოცემით, მის დროს ხალხში გავრცელებული იყო ხმა, რომ სოფელში არიან ავი სულები, კუდიანები და, რომ საჭიროა მათი გამოცნობა და დაშანთვა, რათა ყველამ იცოდეს, რომელია. ამისათვის შემჩნეულ ხალხს მოუყრიდნენ თავს სუფსის ნაპირზე. ხიდან ცეცხლი იყო დანთებული. იქ გურის ტბაა. ტბას იმიტომ ეძახიან, რომ მდორედ მიდის წყალი და შემომრგვალებულია. აქ იყო მთავარი ხალხისაგან შექმნილი კომისია. თითო-თითოს გეიყვანდნენ ხილზე, გააძრობდნენ და გადაადგებდნენ წყალში. თუ დაძირავდა, მაშინ არ იყო მათზე და თავისუფლდებოდა. თუ არ დაძირავდა, მაშინ ის იყო კუდიანი¹⁷ და დაშანთავდნენ.

ზოგიერთ ადამიანში არის ენერგია და მოქმედებს შენზე. მაგ., წეხარბე შენ. ერთი კუდიანი იყო, ბავშვს ჭიპზე ზელი დაადო და გაშავდა ის ადგილი. კუდიანი ქალიც შეიძლებოდა ყოფილიყო და კაციც. კუდიანების უფროსია როკაპი. მიუვალ მთებში და ტყეებშია“.

ჩოხატაურის მუზეუმში დაცულ სოფ. ქვენობნის ისტორიაში შესულია ამბავი ერთი საწყალი მოხუცი დედაკაცისა, რომელსაც კუდიანობა შესწამეს და გახურებული ვირის ნალით დადაღეს უკანა ნაწილზე და შუბლზე. მასზე ამბობდნენ. „ღამით მგელზე შეჭდება და ქაჭვეთში მიდის როკაპთანო. თავის შვილიშვილს... ღამით ენას ამოართმევს, დაამუნჯებს და შემდეგ ისევ ჩაუღვაესო“ (გვ. 35).

მგელი¹⁸ და ტურა კუდიანებისათვის განკუთვნილი ცხოველებია. დას. საქართველოში კუდიანობას ტურაობას ეძახიან, კუდიან ქალს კი ტურა-ქალს. „მამის სოფელში კუდიანობას ტურაობას ეძახდნენ, შამევიდოდა ეს კუდიანი, ამეიყვანდა ბავშვს აკვნიდან

¹⁵ ს. მ ა კ ა ლ ა თ ი ა, სამეგრელოს ისტორია და ეთნოგრაფია, თბ., 1941. : გვ. 337.

¹⁶ М. М. Шейнман, დასახ. ნაშრ., გვ. 53.

¹⁷ მსგავსადვე. ცდიდნენ სამეგრელოში, იხ. თ. სა ხ ო კ ი ა, დასახ. ნაშრ. : გვ. 21.

¹⁸ იქვე, გვ. 18, 19.

და ძირს აგორებდა. მერე მამამ დალადრა, პირი დაუღაღრა, როცა ზუხრიდან ჩამოდიოდა¹⁹.

მგელი არის სვანური²⁰ და, როგორც ჩანს, აგრეთვე გურული ლამპრობის მნიშვნელოვანი პერსონაჟი. გურიაში არის ასეთი თქმა: „ლამპრობა, ლამპრობა, მამალი მგელის შუა გაპობა“²¹.

გურულთა გადმოცემით, ლამპრობა ანუ ე. წ. ჟირყლილობა (1--2 თებერვალი) მიცვალებულებისათვის ეწყობა: „ორ თებერვალს ლამპრობა იყო, მირქმა (1 თებერვალი)—მიგებებას (2 თებერვალი) სულ გაანათებდნენ ყველაფერს. მიცვალებულები ვისაც ყავს, მადლიაო. ნენა მეტყოდა: აანთე, აანთე, მადლიაო ნენაო, განათდებაო. ძველიზა და ახალი მიცვალებულებიზა კეთდებოდა, უფრო ძველებიზა. ლოცულობდნენ, ჩენი მიცვალებულები აკურთხოს ღმერთმაო. ამ დღეს მიცვალებულები მოდიან და რომ ნახავენ განათებულს, გაუხარდებათო. მოვლიან, მიათვალ-მოათვალიერებენ ყველაფერს. კარგად იყო დახვეტილი, დალაგებული. ჩემი დედა დეიკავებდა საზღის წინ, სუფთა ადგილზე ლამპარს...“²²

„ჟირყლილობა მიცვალებულის საკურთხია. ვისაც არ გაუკეთებენ, ის მიცვალებული იტყვის, ბნელში ვარო“²³. „მისაა მათო, კვდრის დღეიაო“²⁴. „ჟირყლილი ახლაც იციან. ნაძვის ანთებულა კვარები ეკავათ ხელში კუდიანების წინააღმდეგ...“²⁵.

სვანურ ლამპრობაში ლამპრისა და მიცვალებულის სულის სიმბოლური კავშირის მაუწყებელია ის ფაქტი, რომ დღეობა ღიმპა-

¹⁹ სოფ. შუა განახლება, იულინა მიხეილის ასული მეიშვილი—მოთოშია, გამოთხოვილი სამტრედიის რ-ნის სოფ. ხუნჭულოურიდან, 77 წლისა; სამეგრელოსა (1965 და 74 წწ.) და იმერეთის (1971, 72, 73 წწ.) ეთნოგრაფიული მასალები. ღვთაება ტურას სახით იხ. Реальный словарь классических древностей... Anubis, Avoubis.

²⁰ В. В. Бардавелдзе. Древнейшие религиозные верования и обрядовое графическое искусство грузинских племен, Тб., 1957, с. 47. 48.

²¹ ისტორიის მეცნ. კანდ. გ. კვიციანი.

²² ჩოხატაურის რ-ის სოფ. ზომლეთი, კესარია სიკოს ასული გელაძე—კვაქანტრიაძე, გამოთხოვილი სოფ. დაბლა აკეთიდან, 80 წლისა. ლამპრობის შესახებ იხ. ა. წულაძე, ეთნოგრაფიული გურია, თბ., 1971, გვ. 120; ივ. ჯავახიშვილი, ქართველი ერის ისტორია, წ. I, თბ., 1960, გვ. 57.

²³ ჩოხატაურის რ-ნი სოფ. ძირი განახლება, ნინა კაპიტონის ასული თევზაძე—ლოლიძე, გამოთხოვილი სოფ. ვანიდან, 75 წლისა.

²⁴ ჩოხატაურის რ-ნი, სოფ. ხიდისთავი, სონია ესეს ასული ვაჩიშვილი—კალანდაძე, გამოთხოვილი ს. ბოლოეთიდან, 80 წლისა.

²⁵ სოფ. ბუკისციხის მასალები.

რიელისათვის (ხორციელის კვირა) ლამპრების დამზადება აუცი-
ლებლად მიცვალებულთა დღეობა ლიფანალის პირველ დღეს უნდა
მომხდარიყო.²⁶ ლამპარი სიმბოლოა სულისა. რომაელები სატურნს
ადამიანის მაგიერ მსხვერპლად ჩირაღდნებს სწირავდნენ. იყო ლამ-
პრების ღმერთი დიონისე.²⁷ გურული და სვანური ლამპრობა აერ-
თიანებს წარმოდგენებს მიცვალებულის სულზე, ცეცხლზე და მგელ-
ზე. მგელთან ერთად ამ წრეში ექცევა წარმოდგენა კუდიანებზე²⁸.
ყველა ამ წარმოდგენას კი გარკვეული წესითა და რიგით წარმართავს
ყოვლისმომცველი იდეა ნაყოფიერებისა, ბუნების აღმძვრელი ძა-
ლისა, რომელიც ასე თვალნათლივ ვლინდება გაზაფხულზე. ლამ-
პრობა, როგორც გაზაფხულის დღესასწაული (გურიაში „ძველი
კაცები გაზაფხულის მაგიერ გალამპრობას ხმარობდნენ“²⁹), შეი-
ძლება შევადაროთ ლუპერკალიებს, მწყემსებისა და ფარათა დამცველი
ღვთაებების დღესასწაულს, რომელიც 15 თებერვალს იმართებოდა
ძველ რომში და აღინიშნებოდა გამანაყოფიერებელი ცემით³⁰. როგორც
გურული და სვანური ლამპრობა, ისე ეს დღესასწაულიც მგელთან
არის დაკავშირებული: „ლუპერკუს“—ლათ. *lupus* მგელი და *ar-*
ceo—კავაყებ, არ ვუშვებ³¹ (შდრ. სვანური თხერობ, ლითხარ ანდა
თხერემი ლამპრობ³²). აღსანიშნავია მეორე მნიშვნელოვანი მომენ-
ტიც: სვანური მიცვალებულთა დღეობის სახელწოდების ლიფანალის
ტერმინოლოგიური მსგავსება ლათინურ *lūpānīa*-თან—საროსკიპო
სახლი (სიტყვიდან *lūpa*—1) ძუ მგელი; 2) მეძაიე)³³. მსგავსებაა
აგრეთვე ძველბერძნულ *λῦραια*—ცხიმის წასმა, განაყოფიერება;
λῦραια გადატანა, მოთმინებით ატანა; *λῦραι* დორ. *λῦραι*(*υ*)-*η*-სვე-
და, ნალველი, მწუხარება³⁴. რაც შეეხება რომაელების ლემურიებს
(*Lemūres*, იგივე *Larvae*), რომელსაც ვ. ბარდაველიძე უდარებს

²⁶ ვ. ბ ა რ დ ა ვ ე ლ ი ძ ე, სვანურ დღეობათა კალენდარი I ა... მსე, VI, 1953, გვ. 248.

²⁷ იხ. აგრეთვე ანთებული სანთლებით „სულების დაწევის“ წესი, რომელსაც სოფლის ახალგაზრდობა ასრულებდა; იქვე, გვ. 288, 289. В. И в а н о в, და-სახ. ნაშრ., გვ. 102.

²⁸ შდრ. ცეცხლის დღეობები. მწვანე მგლის ძმობა., Дж. Ф р е з е р. Золотая ветвь, в. IV, г., с. 157.

²⁹ ვ. კ ო ტ ე ტ ი შ ვ ი ლ ი, რჩეული ნაწერები, თბ., 1967, გვ. 300.

³⁰ Реальный словарь... Faunus.

³¹ იქვე, აგრეთვე Б. С. Э. II изд., т. 25. Луперкалии.

³² ვ. ბ ა რ დ ა ვ ე ლ ი ძ ე, ქართული (სვანური) საწესო... გვ. 47, 48.

³³ ს ი მ. ყ ა უ ხ ჩ ი შ ვ ი ლ ი, ლათინურ-ქართული ლექსიკონი, თბ., 1961 წ.; Латинско-русский словарь, сост. А. М. Малинин, М., 1961 г.

³⁴ Древнегреческо-русский словарь, т. I, М., 1958 г., შდრ. ქვარტლ-ანი ქონით გამურვა ლიფანალში.

ლიფანალს³⁵, ლემურიები იყო მხოლოდ ნაწილი მიცვალებულთა ისეთი დიდი კულტისა, როგორც იყო ლარების—Lares—კულტი³⁶.

ორგიული ელემენტი უცხო არ იყო მიცვალებულის კულტისათვის საქართველოში³⁷. ამიტომ, ამ თვალსაზრისით, საინტერესოა სახელწოდება როკაპი. ეს სიტყვა შესაძლოა მიღებული იყოს სპარსული „როსპიკი (როსკიპ—„ურიდოთ მეძავი“, საბა)³⁸—საგან (აქცენტის ალებით საღვთო პროსტიტუციაზე). „ნათვალევის“ შელოცვის ერთ-ერთ ვარიანტში სიტყვა „როსკიპი“ იხმარება „როკაპის“ მნიშვნელობით: „...შამევიდა ერთი ევა როსკიპი ქალი, შვიდ თვარეს შექმნილი, შაფათ დღეს დაბადებული, გამითვალყვა ქსელი ჩემი... რაც სულიერმა ავი თვალით და ყურით შეხედა...“³⁹ ეს „ავი თვალით“ შემხედვარი ქალი როკაპია, რადგან ხალხი ავ ქალს როკაპს ეძახის (იხ. წინ). შელოცვის სხვა ვარიანტში მას სცელის „ქარი ქარავანი“ ან „ერთი ქალი“⁴⁰. აღსანიშნავია, რომ მესხეთში ალის ქალს ალის ქარსაც უწოდებენ. ეფთვემე მთაწმინდელის „სახელის დებან“-ში როკაპი არ იხსენიება ისეთ წარმართულ ღვთაებებს შორის, როგორც არიან დიოსნი, აპოლონი, არტემის (არტემიდას ეაყური წყვილი), ბოზი, გაცი, ბაღაგონი, არმაზი, დიონისე⁴¹. მიწის ქალღმერთის ერთ-ერთი ასპექტი ნადირობის ღვთაებაა (დალი, არტემიდა), ხოლო ამავე ქალღმერთის ყველაზე ბნელ ასპექტს განასახიერებს როკაპის ბუნების ღვთაება.

საინტერესოა, რომ დამარცვლით წინა-უკმო წაკითხვით იკითხება ზოგიერთი ორი სხვადასხვა ღვთაების სახელიც: Δρειαμῆς; (от др-εμῆς) და Δημητῆρ, Diana და Anailis, Ἀναΐης (Анастид).⁴² შესაძლოა აქ საქმე გვექონდეს საკრალური ხასიათის კრიპტოგრაფიასთან, ღვთაების სახელის დაფარვასთან⁴³, ა სახელის შეცვლა-შებრუ-

³⁵ ვ. ბ ა რ დ ა ვ ე ლ ი ძ ე, ... ლიფანალი... მსე, VI, 1953, გვ. 243, 244.

³⁶ Реальный словарь... по Любкеру... Lares, Larvae.

³⁷ ვ. ბ ა რ დ ა ვ ე ლ ი ძ ე, ქართული (სვანური).. 1953 წ. გვ. 61, 62, 92, 93.

³⁸ ვ. ა ნ დ რ ო ნ ი კ ა შ ვ ი ლ ი, ნარკვევები ირანულ-ქართული ენობრივი ურთიერთობიდან, I, თბ., 1966, გვ. 366.

³⁹ ა. შ უ ლ ა ძ ე, დასახ. ნაშრ., გვ. 116.

⁴⁰ ჩოხატაურის მუზეუმში დაცული ფოლკლორული მასალები, სოფ. ნაბელაღი, სოფ. სამება (გვ. 19).

⁴¹ VI შოფლოო კრების კანონების ქართული თარგმანი. გამ. ა. ხახანაშვილი-სა, გვ. 113. იხ. ივ. ჭავჭავაძე, ქართველი ერის ისტორია, წ. I, 1960, გვ. 86, 87.

⁴² Реальный словарь... по Любкеру...

⁴³ Дж. Ф р е з е р. Золотая ветвь, в. II, .. с. 105.

ნებასთან ერთი ასპექტიდან მეორე ასპექტში გადანაცვლების გამო⁴⁴, ანდა ანაბეჭდთან.

როკაპის ქვის (გამოქვაბულის) სახელწოდებას „ხვარმადის ქვა“ საბასთან ეიბნება სიტყვა „ხუარაზმი... ბანოვანი გამგებელა...“⁴⁵ ხუარაზმი — ხუარმაზი — ხუარმადი — ხვარმადი.

საერთოდ ქვები, მათ შორის ასეთი ქვაბულები მიჩნეულია კინკეულის, ეშმაკეულის⁴⁶ სამყოფელად. სოფ. ფარცხმის ტერიტორიაზე არის დიდი ქვა, წოდებული „კინკეს ქვა“-დ. ამ ქვას აქვს პატარა დარბაზი, საიდანაც თითქოს გამოდიოდნენ კინკები. „სოფ. „გოგოლეს-უბანში არის „კინკეს ქვა“ — ვკითხულობთ ჩოხატაურის მუზეუმში დაცულ ტოპონიმიკურ მასალებში. ესაა დიდვაკის დასავლეთ კალთაზე (ფლატეზე) მკვეთრად ამოწეული, უზარმაზარი ქვა, რომლის ცენტრალური ნაწილი ნაპრაღის გაჩენის შედეგად ამოვარდნილა და ამ გზით გაჩენილა ოთახის ოდენა ქვაბული, რომლის იატაკი უართე და პორიზონტალურია, ხოლო ქერი წინ წამოწეული და დამრეცე, წვიმის დროს კარგი საყუდარია. ალბათ ამიტომ შეარქვეს მას კინკეს ქვა“⁴⁷. კინკებზე სამყოფელია აგრეთვე ლელები და უფსკრული ადგილები მაგ. სოფ. ნაბელლავის გზაზე, საქათმაილ წოდებულ ადგილზე. იქ დალაკებისა ეშინოდათ, რადგან იქ კინკები ქვებს ისვრიანო. საფ. ძირი განახლებაში არის „კინკეს ლელე“, რომელშიც, გადმოცემით, კინკები ბანაობენ და თამაშობენ, წყალს უტყაპუნებენა.

კინკებზე აქ გავრცელებულია ისეთივე წარმოდგენები, როგორიც ჩერეთსა და სამეგრელოში. ამბობენ, კინკა მრავალნაირია და ყველანაირად შეიძლება მოგალანდოს თავიო (სოფ. ნაბელლავეში ერთ-ერთი მთხრობლის მამას ის ცეცხლივით თვალებიანი, ექვსი თვის თეთრი კვიციის სახით მოლანდებია გვიმრიანში). ის შეიძლება იყოს რაღაც ბობოლი — მწერი, ან რაღაც პატარა ცხოველი, მაგ., ერთგვარი თაგვი, რომელიც საბალახოდ გაშვებულ ცხენს ისე უწინის და უბსკენის ძუა-ფაფარს, რომ ადამიანი ვერ გამოსხნის. წარმოიდგინება მაიმუნის მაგვარად და მის ოდენად. ზოგან აღქაქს ექახიან. ადამიანმა რომ „მეიკაკიოს“ ზურგზე კინკა, ვერ ზიდავსო, მან რომ „მოგიკაკიოს“ მხარზე, გაგაფრენსო საღლაც⁴⁸.

⁴⁴ В. И в а н о в, დასახ. ნაშრ., с. 179. 180.

⁴⁵ ს უ ლ ხ ა ნ - ს ა ბ ა ო რ ბ ე ლ ი ა ნ ი, დასახ. ნაშრ.

⁴⁶ შ. ნ ა დ ა რ ა ი ა, წვიმის პატარა ღვთაებები—კინკები და მესლენი, კრ. სამეგრელო (მასალები სამეგრელოს ეთნოგ. შესწავლისათვის), 1979. გვ. 132—147.

⁴⁷ რვ. 8. № 20, 24, გვ. 4, 16. მთხრობელი სარდიონ სიხარულიძე.

⁴⁸ ს. შუა განახლება, სარდიონ ეპოქანეს ძე ჯობლაძე. 85 წ. (მასწავლებელი); ოქლინა მიხეილის ასული მეიშვილი—მოთოშია, 77 წლისა; ს. ძირი განახლება,

„ქინკები მე მინახავს — ყველა სოფ. სურბელი 108 წლის აკვილინა (იხ. წინ). ჩემი ბუღუები (მომნათვლელები) მყავდნენ ორნი, ცოლ-ქმარი. იმ კაცმა თქვა, კორკიმელი მქონდა ძირადო და აღარ ება იმაზეო. იქვე რალაც სხვაფერი ფეხის კვალი იყო. მოალ მე აქა და საქონელს მოვდენი. ასე, ღრუბლიანი დღეია და წვიმიანი. რომ მევედი იმ ადგილას, კორკიმელთან, წყალია იქა და რაცხა მომებოდიანა ზურგში. შემეშინა ნემეტარი და მოვიფარ და მოვიკივი. ნუ გეშინია აკვილინე, მეც შენი აფხანიკი ვარ და მუალ შენთანო (ქინკა ეუბნება). მოსახლის ეზოში რომ მევედი და ძალმა დეიყუფა, მომშორდა. ქინკა დაბალი ქალი იყო, დაბალნული. თმაი მისხელე. შავი, შავი თმით შებალნული. შემილოცენ მერე და სამი დღის მერე ამევიდგი ენა. ქინკობა მარტში და აპრილში შუამდე იყო. მერე ჩაცვივოდა წყალში და წეიღებდა წყალი. წყალიდგან ამოდის. ქინკობის დღეებს ვუძახდით, დღეს არ დევილაშებდით, დალაშებამდე მევიდოდით. ქინკას ფეხის ქუსლები წინ აქვს და თითები უკან აქვს მოქცეული. ქინკობის თვეში რომ დეიბადებოდა ბავშვი, იმას მეტად ელტვისო და ამიტომ უფრო გიორგის დაარქმევდნენ — ეშმაკის ფეხზეა ბავშვი გაჩენილი და უშველისო წმ. გიორგი“.

სოფ. ჯვარცხმაში არის ადგილი ოსკოჯური. წინათ აქ თითქოს ქინკები ცხოვრობდნენ. აქ ამოდოდა ბალახი „ოქროსყურა“, რომელსაც ვითომ ისინი ჰმადნენ. ამიტომ, შემდგომში, გადმოცემით, ბალახსაც და ადგილსაც ოსკოჯური უწოდესო⁴⁹.

საინტერესოა ერთი უცნაური დამთხვევა: ჩოხატაურის მუზეუმში ინახება დიდი, თვალური ქვა, ხელის გასაყრელი ნახვრეტით. გადმოცემით, საფ. ჯაპანაში მცხოვრებ ვინმე ჯიჯავო ჯიჯავაძეს ამ ქვისათვის გაუყრია მკლავი და რამდენიმეჯერ შემოუტარებია თავისი ქოხისათვის⁵⁰. იმავე დროს სამეგრელოში ასახელებენ ვინმე ჯიჯავას, რომელსაც თითქოს მესეფის დატოვებული თეთრი ძაღლი ყოლია⁵¹.

ზონდი ივანეს ძე დოლიძე, 63 წლის; ს. ბუკისციხე, ნინა გიგლოს ასული მამალაძე-სიხარულიძე, 70 წლისა; ს. ნაბელაძე, ნადია ივანეს ასული გიორგაძე—ქორიძე, 66 წლის; ს. შუა ფარცხა, ნაუმი ეფრემის-ძე ბარამიძე, 75 წლის და სხვ. იხ. აგრეთვე, ნ. დ უ მ ბ ა ძ ე, ქინკები, გაზ. ლიტერატურული საქართველო, 1978, 20 ოქტ., № 43, გვ. 3.

⁴⁹ ტოპონიმის მასალები, რვ. 2, გვ. 11.

⁵⁰ ს. შუა განახლების ეთნოგრაფიული დღიურები.

⁵¹ მ. ა. ნ ა დ ა რ ა ი ა, დასახ. ნაშრ., გვ. 132.

სამეგრელოში გრძნეულების დღეებად მიჩნეულია კვირის სა-
ნი დღე: სამშაბათი, ხუთშაბათი და შაბათი. ეს იყო ლოცვა-შელოც-
ვის დღეები, რომლებსაც უწოდებენ „გეკულა“-ს (გეკულა ღამე —
წმინდა ღამეა, უბრალო ღამე არაა. ორშაბათს 12 საათს რომ გა-
დავა, სამშაბათის 12 საათამდე გეკულაა). სხვა დღეს შელოცვას ძა-
ლა არ ექნებოდა⁵². გურიაში ახალ მთვარეზე ხუთშაბათი და შაბა-
თი უკუნ დღედ ითვლებოდა. დანარჩენი — წარმოდ. ძველ მთვარე-
ზე პირიქით—ხუთშაბათი და შაბათი — წარმო, დანარჩენი —
უკუნი (კვირისა და პარასკევის გამოკლებით). ძველი მთვარის უკუ-
ნი (ორშაბათი, სამშაბათი...) მიაჩნდათ გამძლეობისა და ხანგრძლი-
ვობის ნიშნად⁵³.

რას ნიშნავს ან საღაფრია წარმოშობის სიტყვაა „გეკულა“ (იტყვიან:
„გეკულა-რე“)? მეგრულში ამ სიტყვის მნიშვნელობა გაურკვევე-
ლია. ლათინურში მას ფონეტიკურად შეესატყვისება *seculo*—საუ-
კუნე (ასწლეული), *seculare*—ძველთაგან არსებული⁵⁴. ლათინური
seculo-ს მნიშვნელობას შეესაბამება ძველბერძნული სიტყვის ეკა-
ტონის *ἐκάτον, οἱ, αἱ, τὰ indecl*-ასი, ასეული-ს მნიშვნელობა⁵⁵.
ბერძნული თვე ჰეკატომბაიონი, რომელიც უდრის იელისა—გვისტოს,
აღნიშნავს იმას, რაც „ასი ხარი“ ღირს⁵⁶. ჰეკატომბა კი ნიშნავს
მსხვერპლშეწირვას „ასი ხარისაგან“⁵⁷. „ეკატონ“-ის და „ჰეკატე“-ს
(*ἑκάτη*, ღორ. *ἑκάτα*)⁵⁸საერთო ფუძეა „*κατ*“. ძველბერძნული
κατά (τά) აღნიშნავს მოძრაობას ზემოდან ქვემოთ. წინდებული
κατα აღნიშნავს მოძრაობას ქვემოთ, უკუ, დასრულებას...⁵⁹ (ზღრ.
რუსული *катиться, спускаться. ho kato Zeus*—მიწისქვეშა ზეესი⁶⁰,

⁵² შალენჯიხის (1965 წ.) და გეგეკორის (1974 წ.) რუბის ეთნოგრაფიული მასალები.

⁵³ ა. შ უ ლ ა ძ ე, დასახ. ნაშრ., გვ. 122, 155, 156.

⁵⁴ ს ი მ. ყ ა უ ხ ი შ ვ ი ლ ი, ლათინურ-ქართული ლექსიკონი, თბ., 1961; *Русско-Итальянский словарь*, М., 1953 (მადლობას მოვახსენებ ისტ. მეცნ. დოქტ. ბ.ნ აკ. სოხაძეს ამ სიტყვის მითითებისათვის).

⁵⁵ *Древнегреческо-русский словарь*, т. I, М., 1958 г.

⁵⁶ პ ლ უ ტ ა რ ქ ე, პარალელური ბიოგრაფიები, I, თბ., 1957., გვ. 309, შენ. 13 და გვ. 296, შენ. 92.

⁵⁷ *Древнегреческо-русский словарь*, т. I.

⁵⁸ იქვე.

⁵⁹ იქვე.

⁶⁰ В. И в а н о в, დასახ. ნაშრ., გვ. 179, 180.

საბასთან მითითებულია „ბეკატა“⁶¹. საინტერესოა აგრეთვე ბალახეულის დასახლებანი: კატაბალახა ანუ კატაპარია, კატაბარდა და ა. შ.⁶².

ამრიგად, მეგრული „გეკულა“-ს იგივე ლათინური *seculo*-ს მნიშვნელობას სავსებით შეესაბამება გურულთა „უკუნი დღის“ მნიშვნელობა. სიტყვა „უკუნი“ აღნიშნავს ასსაც-სა-უკუ-ნე ანუ ას-წლეული, მარადიულსაც—უკუნითი-უკუნისამდე და ძლიერ ბნელსაც—უკუნეთა. წინდებული უკუ კი საწინააღმდეგო, უკუ მოძრაობას. სრული ანუ ძველა მთვარას უკუნი იანგარაშებოდა 15-ის მთვარიდან. ეს ის მთვარეა, რომელაც ითვლებოდა სამსახოვანი კოლხური ქალღმერთის ჰეკატეს მთვარედ⁶³, ჯადოსნური ბალახეულის მკოდნე ღვთაების⁶⁴. (ამ ღვთაების სახელთან დაკავშირებით საინტერესოა როგორც სიტყვა „კატა“-თი დაწყებული ბალახეულის დასახელებები, ასევე კატაზე არსებული რწმენა-წარმოდგენები⁶⁵, ხოლო სახელწოდება „კარატი“-სათვის (ხეცსურთა ხატი)⁶⁶ საინტერესოა სახელი კრატეია. კრატეიჲს $\alpha\rho\alpha\zeta\acute{\alpha}$: რომლითაც ჰომეროსი. მოიხსენიებს ჰეკატეს⁶⁷).

დემონურ ღვთაებათა რიცხვს განეკუთვნებიან „ბატონები“ (ყვავილი, წითელა...)⁶⁸). ბატონები უძველესი ავადმყოფობებია⁶⁹. ისტორიული ხანგრძლივობა განაპირობებდა ამ ღვთაებების ერთიანი და დასრულებული სახის ფორმირებასა და მათი ამოსავალი ნიშნების სიძველეს. ყვავილებს, მათ შორის განსაკუთრებით იასა და ვარდს, დიდი ადგილი ეკავათ ბატონების კულტში. მათი ემბლე-

⁶¹ სულხან-საბა ორბელიანი, თხზ. ტ. IV¹, 1956. სიტყვა „კატა“.

⁶² ქართული ენის განმარტებითი ლექსიკონი, ტ. IV, თბ., 1955 წ.

⁶³ Д ж. Т о м с о н. Исследования по истории древнегреческого общества, М., 1958, с. 227.

⁶⁴ აკ. უ რ უ შ ა ძ ე, ძველი კოლხეთი არგონაუტების თქმულებაში, თბ., 1954, გვ. 66, 67, 98, 398.

⁶⁵ თ. ს ა ხ ო კ ი ა, დასახ. ნაშრ., გვ. 18; გ. თ ე დ ო რ ა ძ ე (ექიმო), ხუთაწელი ფშავ-ხევსურეთში, ტფ. 1930, გვ. 201; ა. ო ჩ ი ა უ რ ი, თქმულებები ხევსურულ ღვთაებათა და ღვთისშვილთა შესახებ, 1938, ისტორიის ინსტ. ეთნ. განყ-ის აქიეთი, ხელნაწ. M¹, 15, გვ. 105, 107, 160.

⁶⁶ ი. ვ. ქ ა ვ ა ხ ი შ ვ ი ლ ი, დასახ. ნაშრ. გვ. 96—98.

⁶⁷ აკ. უ რ უ შ ა ძ ე, დასახ. ნაშრ., ტექსტები, გვ. 249.

⁶⁸ თ. ს ა ხ ო კ ი ა, დასახ. ნაშრ., გვ. 21.

⁶⁹ В. В. Б а р д а в е л и д з е. Древнейшие.. გვ. 81, 85. ბატონები, მათთან დაკავშირებული რწმენა-წარმოდგენები და წეს-ჩვეულებები დეტალურად აქვს შესწავლილი, აღწერილი და გამოკვლეული მთელი საქართველოს მასშტაბით ვ. ბარდაველიძეს. მის მიერეუა გამოკვლენილი ბატონების დიდი დედის ნანას სა-

მა ყვავილია, რაზედაც მიუთითებს როგორც დიდი ბატონების სახელწოდება „ყვავილბატონები“, ასევე მათი გამონაყარის წოდება „ყვავილებად“. „ბატონებმა გაზაფხულზე იციან ჰოსელა. ბატონები იარებიანო, ლამო მოვო. დედამ ლეინასა, რომ გაანათა ეზოში და მეორე დღეს გამოუბრძანდა ბაღებს. სიზმარში ყვავილს მოგიტანს და გაცნობებს იმით“⁷¹. „ბატონები არ ამობრძანდება და არ ჩაბრძანდება, თუ არ მოუბოდრიშე და ყვავილების თაივული არ მიართვი. ისე არ ამოიფოთლება“⁷².

ყვავილები, მათ შორის ია და ვარდი, ქვესკნელის სამეფოს ინსიგნიები⁷³. იითა და ვარდით მოხების ცერემონიალი მიუთითებს ბატონების მიწისქვეშეთურ ბუნებაზე. ამასვე უნდა მოწმობდნენ მათი სხვა თავისებურებანიც, როგორცაა მათი დამოკიდებულება სიტყვისადმი „ძალი“, ერთვარი ტაბუ ამ სახელზე⁷⁴; მათი ლამეულა ხასიათი⁷⁵, მათთვის მისართმევი, თხის სისხლით საესე ჯამი⁷⁶...

ლენინგრადის რელიგიისა და ათეიზმის მუზეუმში (ყაზანის ტაძარი), შესასვლელიდან ხელმარჯვნივ გამოფენილია ძალისთავიანი წმ. ქრისტეფორეს ხატი, XVI საუკ., წარწერით, რომ ეს წმინდანი ითვლებოდა გადამდებ სნეულებათაგან მფარველად. წმინდანს შუბა უჭირავს, ხელში. სახე, თმები და მანტია წითელი ფერისაა. იქვე, მიყოლებით, მეორე ხატია XIX საუკ., წარწერით: ცსენისთავიანი წმ. ქრისტეფორე⁷⁷.

პოეტები ჰეკატეს წარმოსახვდნენ სამი თავით: ცხენის, ძალის და ლომის და მას ძალებს სწირავდნენ⁷⁸ ჰეკატეს უძველეს წარმოსახვასთან საოცარ მსგავსებას პოულობს ხევესურთა ასტრალურ ლეთა-

ხე (იხ. იქვე, 78—93). ბატონები ჩვენ გვიანტერესებს როგორც დემონური ლეთაბები. ამასთან დაკავშირებით იხ. ა. ლეკიაშვილი სვანური ქალბაბარის ბუნებოსათვის ივ. ჯავახიშვილის დაბადების 100 წლისთავისადმი მიძღვნილი სიაუბილო კრებული, გამომცემლობა „მეცნიერება“, თბილისი, 1976, გვ. 458—462.

⁷⁰ В. В. Бардавелидзе, იქვე, გვ. 85.

⁷¹ სოფ. ზემო სურების ეთნოგრაფიული.

⁷² სოფ. ძირი განახლების ეთნოგრაფიული.

⁷³ ვ. კოტეტიშვილი, დასახ. ნაშრ., გვ. 324; ა. იოსელიანი, ნარკვევები კოლხეთის ისტორიიდან, თბ., 1973, გვ. 233.

⁷⁴ თ. სახოკია, დასახ. ნაშრ., გვ. 33, 34.

⁷⁵ იქვე, გვ. 35.

⁷⁶ მივლინება ლენინგრადში 1968 წ.

⁷⁷ ვ. ბარდაველიძე, დასახ. ნაშრ. გვ. 24

⁷⁸ Реальный словарь.. «Несѣте».

ებათა დამხმარე სულების შესახებ არსებული წარმოდგენა. აქაც⁷⁹ და იქაც—მითში⁸⁰ გველები და ძაღლები (მწვეარნი) წარმოდგენილია ღვთაების თანმხლებ და დამხმარე სულებად. მიწისქვეშა ღამის ქალღმერთის Nyx ანუ Styx-ის ასულები ერიჩიებიც ბერძნებს წარმოდგენილი ყავდათ გველებდახვეულ მწვევრებად ხელებში ჩირაღდნებით⁸¹. ე. ი. გველის და ძაღლის სახე, ჩირაღდანთან ერთად, როგორც მოუცილებელი ნიშანი, ყოველთვის თან ახლავს ღამის, მთვარისა და წიაღისეულ სიღრმეთა ღვთაებას. ამ სამ ნიშანთაგან ძაღლის სახე დამახასიათებელი ჩანს ბატონებისათვის.

ელევისინის დემეტრეს კულტში პერსეფონეს მოტაცების მითის უძველეს ელემენტს წარმოადგენს ყვავილების მისტიკური შეგროვება, რაც ეყრდნობა ბალახეულის მაგიას, რომელიც სამიწათმოქმედოზე აღრინდელია. მიცვალებულთა მბრძანებელი პერსეფონეს იტაცებს გაზაფხულის ყვავილების შეგროვების დროს, როდესაც ქალიშვილი ნარგიზს წაეტანება⁸² (შდრ. ბატონების ალვის ხეს „ტოტები აქვს ნარგიზისო“⁸³). ე. ი. მიცვალებულთა ბრძანებელს პერსეფონე იმ სახის სიკვდილით მიჰყავს, როგორც მიჰყავდათ ყვავილბატონებს.. ამ სახის სიკვდილის სიმბოლური გამოსახულება ანუ ემბლემა კი ყვავილია. მეგრელის რწმენით „ბატონების“ სული კაცს კი არ ჰკლავს, არამედ თავის სამეფოში მიჰყავს, როგორც ყმა და მონა“⁸⁴. ეს სამეფო საიქიოა. თუ რანდენად საკრალური მნიშვნელობისა უნდა ყოფილიყო ამ სახის სიკვდილი, ეს ჩანს მთხრობლის სიტყვებიდანაც: „ბატონებით გარდაცვლილზე არ იცოდნენ თქმა მოკვდაო. იტყოდნენ: ბატონებმა მიიღოვო. არც ყვავილბატონებზე და არც წითელბატონებზე არ იტყოდნენ მოკვდაო. ყვავილბატონებიანს ღამით ასაფლავებდნენ, არ იტირებდნენ. წითელბატონებით გარდაცვლილი იმ შემთხვევაში შეიძლებოდა ეტირათ, თუ ოჯახს მეორე ბატონებიანი ბავშვი არ ეწვა სახლში. თუ ბატონებიანი სხვაც ყავდათ, მაშინ ტირილი ეწყინებათო“⁸⁵.

⁷⁹ ვ. ბ ა რ დ ა ვ ე ლ ი ძ ე, დასახ. ნაშრ., გვ. 29, 30.

⁸⁰ Аполлоний Родосский. Аргонавтика, пер. Гр. Церетели, Тб., 1964, п. III. 1210 и 1215, с. 199.

⁸¹ В. Иванов, დასახ. ნაშრ., გვ. 22, 23, 51.

⁸² Дж. Томсон, დასახ. ნაშრ., გვ. 231.

⁸³ ე. კ ო ტ ე ტ ი შ ვ ი ლ ი, ხალხური პოეზია, თბ., 1961, გვ. 27.

⁸⁴ თ. ს ა ხ ო კ ი ა, დასახ. ნაშრ., გვ. 132. ეს საკითხი უნდა უკავშირდებოდეს მონების საკითხს რომაული ღამის კულტში. იხ. Е. М. Штаерман. Из истории фамильного культа в древнем Риме, М., 1964 г.

⁸⁵ ჩოხატაურის რ-ნი, სოფ. ნაბელავეი, ნაღა ივანეს ასული გორგაძე-ქორაძე, გამოთხოვილი სოფ. ერკეთიდან, 66 წლის.

ბატონებით გარდაცვლილს შიშვლად ასაფლავებდნენ⁸⁶. სიშიშ-
ვლე დემონურ ღვთაებათა ერთ-ერთი ნიშან-თვისებაა⁸⁷. ნოქალაქე-
ველი ქრისტიანე კოკიას თქმით, ბატონებს ტიტველი უნდა ეცეკვაო,
უკანა ტანი ტიტველი უნდა უჩვენო, გეხხარდებათ“-ო. 'შიშველია
ჰინკეული, წყლის ქალი, ალი და სხვ. შიშველია ბატონების დედაც.
მისი სახლის დედაბოძი ბატონებმობდილია თვალებით არის მოკე-
დილი⁸⁸. ამ ნიშნის მიხედვით, მისი უშუალო პარალელია ამირანის
მამის თვალის მომტაცებელი დევი⁸⁹, ანდა დევის დამპარმავებელი
ჯადოქარი დედაბერი⁹⁰, თვალს, როგორც მხედველობის ორგანოს,
ადამიანი შეიგრძნობდა როგორც მთავარ ეპიცენტრს ადამიანში მო-
ცემული ენერჯის გამოსხივებისას, რომელსაც შეიძლებოდა ჰქო-
ნებოდა კეთილი ან მავნე ზემოქმედება. „თვალის ქრის“ ასეთ გა-
გებას უკავშირდება გახვრეტილი ქვების გამოყენება. ეს ფეტიშები,
როგორც აკ სოხაძე შენიშნავს, განსაკუთრებული არქაულობით ხა-
სიათდება⁹¹.

ამრიგად, ბატონების სხვა ნიშნებს შორის თვალს ცენტრალური
ადგილი უკავია. ყვავილბატონები და თვალი სინონიმებია: თუ გუ-
რიაში ბატონების დღედ ყველიერის ორშაბათი ითვლებოდა („იგი
დღეი ყვავილ-ბატონებს ეკუთვნისო“⁹²), სამეგრელოში თეთრ ანუ
ყველიერის ორშაბათს („თუთაშხა ბედნიერ“) თვალზე ლოცვა —
„თოლიშ ხვამა“ — სრულდებოდა⁹³. საფიქრებელია, რომ თვალზე
არსებული ლოცვა-შელოცვები განეკუთვნებოდა ბატონების ღვთაე-
ბების უფლებების სფეროს, შედიოდა მათს კომპეტენციაში. ამი-
ტომაც შედიოდა „ბატონების ხონჩაში“ მრავალი პატარა ბურთულა
კვერი⁹⁴, სწორედ ისეთები, როგორებიც კვთდებოდა „თოლიშ ხვა-
მა“-სათვის: „მრგვალ კვერს გაეაკეთებდით ყველიანს, ათს, და მოე-

⁸⁶ თ. ს ა ხ ო კ ი ა, დასახ. ნაშრ., გვ. 132. კავშირი ჩანს მოტირალთა ნა-
წილობრივ გაშიშვლების წესთან დატირების ზოგადირიტუალიდან; იქვე, გვ. 123;
ტ. მ ა მ ა ლ ა ძ ე, დასახ. ნაშრ., გვ. 80.

⁸⁷ Критика иудейской религии, М., 1962, с. 43.

⁸⁸ ვ. ბ ა რ დ ა ვ ე ლ ი ძ ე, დასახ., ნაშრ., გვ. 79.

⁸⁹ მის. ჩიქოვანი, ამირანის თქმულება, თბ., 1961, გვ. 47, 48.

⁹⁰ მის. ჩ ი ქ ო ვ ა ნ ი, ქართული ხალხური ზღაპრები ტ. I, თბ., 1938, გვ.
101.

⁹¹ ა. ს ო ხ ა ძ ე, რელიგიური გადმონათობები... რელიგიის ისტორიისა და
ათეიზმის საკითხები საქართველოში, კრ., ნ. I, თბ., 1968, გვ. 7.

⁹² ა. შ უ ლ ა ძ ე, დასახ. ნაშრ., გვ. 119.

⁹³ გეგეპკორის რ-ნი, სალხინო, სოფ. ვახა, 1974, პართენ ივანეს ძე კეკუტია
74 წლის.

⁹⁴ ვ. ბ ა რ დ ა ვ ე ლ ი ძ ე, დასახ. ნაშრ., გვ. 91, ტბ., VIII, სურ. II.

ხარშავდით. სულზე ორ-ორს. მთავარი კაცი ილოცავდა“⁹⁵. ერთ-ერთი მთხრობლის თქმით, ასეთი საბატონებო კვერები მიწისაგან ეთდებოდა: „ბატონების ხონჩას გზაჯვარედინზე“⁹⁶, სამპოტიკა გზაზე დებდნენ... აქვე აიღებდნენ მიწას, გააკეთებდნენ პატარა ბურთით კვერებს, რამდენიც უნდოდათ, იმდენს, მხოლოდ სამზე ნაკლები არ უნდა ყოფილიყო... შვიდ სოფელს შევეფინენით, კაციც არ დაგვიწვევია, ჩიტიც არ აგვიფრენია“⁹⁷. საფიქრებელია, რომ თვალი, როგორც ღვთაების სიმბოლო, თავის საწყისში გველთან იყოს დაკავშირებული, რომელიც ნატკრის თვალის სახით ფლობს მხედველობის მისტკიურ პირველწყაროს. იგივე გველი—გველუშაში ემტერება და ულაპაჯო მზეს-მანათობელ ცის თვალს, როგორც კუთვნილ სიმბოლოს...

ბატონებს (გარდა ყვავილისა) ძირითადად ბავშვობის ასაკში იხდიდნენ, რასაც არსებითად უნდა განეპირობებინა ბატონების ღვთაების ხასიათი. მათი მობრძანება ემთხვეოდა აღრეულ გზათგზულზე ბუნების პირველ გამოღვიძებას და აღინიშნებოდა მისი პირველი მანარობლის იის გამოჩენით. ყვავიბატონებით გამოწვეული „ნაყვავილარი“ (არსებობდა აზრი, რომ თუ აღამიანს სადმე ჭრილობა ჰქონდა, ის ყვავილბატონებს ვერ გადაურჩებოდაო)⁹⁸ ატარებდა რალაც ზებუნებრივი ინიციაციის ხასიათს და შესაძლოა მასვე შეექმნა პირველი წარმოდგენა ტატუირებაზე. როგორც ისეთ მაგიურ საშუალებებზე. რომელიც დაიცავდა ბოროტი სულებისაგან⁹⁹.

ამ მხრივ საინტერესო ჩანს „ბატონების ხონჩაში“ შემავალი „ბატონების სათამაშო ბურთი“¹⁰⁰. ბურთი იყო პერსეფონეს მისტერიისა და განდობის ძველბერძნული ცერემონიალის მნიშვნელოვანი საგანი. სპარტაული ბურთების ბრძოლა შედიოდა ბიჭების განდობის წესთა რიცხვში. ათენა პალადასადმი მიძღვნილი ე. წ. არეფორიის ცერემონია, რომელშიც შედიოდა ბურთით თამაში, დაკავშირებული იყო გველის კულტთან¹⁰¹, ე. ი. ატარებდა ხთონიურ ხასიათს და ა. შ. ამ თვალსაზრისით საინტერესო უნდა იყოს კაბუტობის

⁹⁵ იხ. სქ. 85.

⁹⁶ „აემა სულემა“ ჟორდინა გზებზე იციან სიარული.“ ჟ. რ უ ხ ა ძ ე, ხალხური აგრიკულტურა ... თბ., 1976, გვ. 163, სქ. 14.

⁹⁷ სოფ. ქვენობანი, ნინა ისიდორეს ასული ჯიშაშვილი—ცხოძე, ტყიბულიდან, 58 წლის.

⁹⁸ ჩოხატაურის რ-ნი სოფ. შუა განახლება, სარდონ ეპიტანეს ძე ჯიბლაძე 58 წლის მასწავლებელი.

⁹⁹ ბ. ც. ზ. ივ. პ. რ. 42. I Татуировка.

¹⁰⁰ ე. ბ ა რ დ ა ვ ე ლ ი ძ ე, დასახ. ნაშრ., გვ. 91, 93; ტაბ. VIII, რახ. 11.

¹⁰¹ Дж. Томсон, დასახ. ნაშრ., გვ. 231, 218.

შერთის თამაშობანი, რომლებიც აღდგომის მიჯნებში იმართებოდა გურიაში¹⁰² და ასაკის საზომიც იყო, როგორც მაგ. ქაქუნობია¹⁰³.

ბატონები შვიდნია, „შვიდნი ძმანი, შვიდნი, დანი“¹⁰⁴. ბატონებით დაავადებისას აღინიშნებოდა სამი სტადია: სანამ ბატონები მსუბუქი ფორმით ვლინდებოდა, მას სხვადასხვა დამცველ საშუალებას—ფაქიზი მოვლა, იის წყალი. წითელი ფერი და სხვ.—და, საერთოდ, „მორიდებას“ აკმარდნენ. მაგრამ გართულების შემთხვევაში გადადიოდნენ „მობოდიშებაზე“, რომელიც გაცილებით უფრო მისტიკური ხასიათისა იყო და ნაკლები დოზით შეიცავდა რაციონალურს, ვიდრე პირველი ნაწილი, რადგან გართულებული ფორმის მკურნალობის ნაკლები ან თითქმის არაავითარი საშუალება არ იყო ცნობილი. ეს ვითარება აღნიშნული აქვს ვ. ბარდაველიძესაც, რომელიც წერს, რომ როდესაც ამოიწურებოდა დაცვის ყველა რაციონალური საშუალებანი, მოსახლეობა იხსენებდა „ბატონების“ კულტთან დაკავშირებულ ოდითგანდელ წეს-ჩვეულებებს¹⁰⁵. მესამე, ბოლო ნაწილი იყო ე. წ. „ბატონების გადალოცვა“.

ბატონების მეორე სტადია „მობოდიშება“ აღინიშნებოდა წითლებში ჩაცმული ცხრა სხვადასხვა გვარის ქალის საბოდიშო ვედრება-გართობით (მხოლოდ ერთმა მთხრობელმა თქვა, „ჩემზე თხუთმეტმა ქალმა დეიჩოქა“—ო¹⁰⁶). „შავათ რომ გადააფენს, მაშინ უნდა მეტანია, გამჯავრებელია. ცხრაი გვარის ქალის მოწვევა იცოდნენ. ცხრაი სხვადასხვა გვარის ქალის ფორთხვა იციან“. „დღუძახეთ ცხრაი სხვადასხვა გვარის ქალს. სულ წითლებში მორთული მოვიდნენ“¹⁰⁷. „მივედი მკითხავთან. შავები ეცვა. ჩახედული ქალი იყო. სიზმარი რომ ვუთხარი, იკივლა. შეყარა ცხრაი გვარის ქალი...“¹⁰⁸ „გუშლამ ბატონებით კვდებოდა ბალანა. მევიდა ბებიეი მისი. შევულოცე იეი და მივეცი. კარგო ბატონებო, შენი მუხლის ჭირიმე, ნუ წაართუმ ამ ბალანას, დღუტოვე! ბატონებს მამიდის შეხვერწება უყვართ. რომ გამჯავრდება დიდი ბატონები და წითელა, მერე ის შა-

¹⁰² ტ. მ ა მ ა ლ ა ძ ე, დასახ. ნაშრ., გვ. 51—59 და ა. წ უ ლ ა ძ ე, დასახ. ნაშრ., გვ. 86—95.

¹⁰³ ა. წ უ ლ ა ძ ე, დასახ. ნაშრ., გვ. 95.

¹⁰⁴ ვ. კ ო ტ ე ტ ი შ ვ ი ლ ი, ხალხური პოეზია, გვ. 26, 27, 326.

¹⁰⁵ ვ. ბ ა რ დ ა ვ ე ლ ი ძ ე, დასახ. ნაშრ., გვ. 85.

¹⁰⁶ ჩოხატაურის რ-ნი, სოფ. ძირი განახლების ეთნოგრაფიული დღური.

¹⁰⁷ სოფ. ნ ა ბ ე ლ ა ვ ი ს 1978 წლის ეთნოგრ. მასალები.

¹⁰⁸ ს ო ფ. ბ უ კ ი ს ც ი ხ ე, ნინა გიგილოს ასული შამალაძე-სიხარულიაძე,

ვია, გაშიება იცის. მტერს იგი. მერე ვეღარ გაშეიარს. ცხრა სხვა-
დასხვა გვარის ქალს მოვიწვევთ, კაცებსაც გუურევთ, ვინც ლოცვა
ი. იცის. ერთ ბალანას ბატონები ქონდენ. რო წუუბძანდა, გაწყობი-
ლი სტოლი, კამფეტები, წითლად შეღებილი ცოცხალი ქუქული გა-
დააბრძანეს. სადმე ტყეში უნდა გადაბრძანება. ყველა ბატონებზე
კაია ქალის რძეი, ცხენის რძეი, ჯორის რძეი. ასმევენ. ბატონებს ნე-
მეტარი დაბალზე უმღერდენ¹⁰⁹.

ბატონების მთელი რიტუალი ერთხელ კიდევ მოწმობს იმას,
რომ რელიგია არის გარესამყაროს საგანთა და მოვლენათა და ადა-
მიანის შინაგან სამყაროსთან მათი უხილავი კავშირების აღქმისა და
შემეცნების თავისებური ფორმა. რომ ყოველი რელიგიური მოვლე-
ნის არსებით მიზანს შეადგენს ადამიანის ფიზიკური არსებობისა და
მისი ფსიქიკური სამყაროს დაცვა. რაც უფრო ნაკლებია. ნაკლებადაა
ცნობილი გარკვეული ვითარებისას საამისო რაციონალური საშუალებ-
ბანი, მით უფრო დიდია ზებუნებრივისადმი რწმენის წილი, მით უფ-
რო მისტიკურია მასთან დაკავშირებული რელიგიური მოვლენა. ამი-
ტომაც არის, რომ მისტიკა თავის აპოგეუმს აღწევს მოკვდავი და
მკვდრეთით აღმდგომი ღმერთის ამბავში, ანუ, უბრალოდ რომ ით-
ქვას, იმ ქვეყნად სიცოცხლის განგრძობის ამბავში, რომლის მიღწე-
ვის რეალური საშუალება რეალურ გარემოში არ არსებობს და ადა-
მიანის მისწრაფება იფარგლება მხოლოდ ფსიქიკის სფეროთი, რო-
მელშიც ისახება ირეალურის შესაძლებლობა.

„მობოდრების“ ზემოაღწერილი ცერემონია წარმოადგენს განწ-
მენდის თავისებურ აქტს, რომლის წამყვანი იდეა ცხრა რიცხვის
მისტიკაში მდგომარეობს. ცხრა და ზემოაღწერილი შვიდი (ბატო-
ნები შვიდნია), როგორც ზერეალური, წმინდა რიცხვების დაპირის-
პირება გვხვდება შელოცვებშიც: „ცხრა ხატი, ცხრა ანგელოზი...“
„მეუფეო გადმუშუვი ცხრა კლიტული...“ „მოვიდა ქარი ქარავანი,
შვიდისა მთვარესა შექმნილი, შაბათ დღეს დაბადებული...“¹¹⁰ ანდა.
„შვიდი საიდუმლო“, „შვიდი ლოცვა“, „შვიდეული (შვიდი მღვდ-
ლის წირვა)“, საეტლოს საწირავი ცხრა მტრედი ან ცხრა ცოცხალ
თევზი¹¹¹ და ა. შ. შვიდი რიცხვი გამოდის მეტწილად მავნე და ბნე-
ლი, ძლიერი ძალის სიმბოლოდ, ცხრა კი მისგან განმწმენდ დამფარ-
ველ რიცხვად.

¹⁰⁹ სოფ. ზემო სურების 1978 წლის ეთნოგრ. დღიური.

¹¹⁰ ჩოხატაურის მუზეუმში დაცული ფოლკლორული მასალები. სოფ.-ბი: ბუკ-
ნარი (გვ. 8), ნაბელდავი, სამება (გვ.-ბი: 19, 20, 21); ა. შ. უ. ლ. ა. ძ. ე. დასახ. ნაშრ.
გვ. 116.

¹¹¹ ა. შ. უ. ლ. ა. ძ. ე. დასახ. ნაშრ., გვ. 141, 181.

ძველი აღმოსავლეთისა თუ ანტიკური სამყაროს რელიგიებში შვიდი რიცხვი ფიგურირებს როგორც ღვთაების, ბუნების ძალთა და ასტრალური მოვლენის სიმბოლო. მიეწერება, შესაბამისად, კარგი ან ცუდი მნიშვნელობა¹¹². დამახასიათებელი ჩანს ქართველი ხალხის უძველესი რელიგიური აზროვნებისათვისაც...

ცხრა ჩვეულებრივი თუ ცხრა დიადი (კოსმიური) წელი იყო სასაჯელის ანუ განწმენდის ის ვადა, რომლის განმავლობაშიც ოლიმპიელნი, რომლებიც დაარღვევდნენ დიდი ქალღმერთის სტიქსის უფლებებს, სტიქსით ფიცს, იმყოფებოდნენ სიკვდილის მდგომარეობაში. ცხრა სრული წელი იყო ადამიანის ხორცის ჭამის აკრძალვის ვადა მგლის კვლავ ადამიანად გახდომის ძველ-ბერძნულ ლიკეის მისტერიაში¹¹³ და სხვ.

დაბოლოს, კვირის დღეთა სახელებიდან შაბათი სამწერლობო ქართულში იწოდება კრონოსის დღედ, მეგრულში და ქანურში — საბატონი, სვანურში — საფტინ¹¹⁴. ეს სახელწოდება კომენტარს არ საჭიროებს, რომ მასში „ბატონების“ სახელწოდების დღე დავინახოთ. საფიქრებელია, რომ ეს ღვთაებები, განასახიერებდნენ რა ღვთაებათა შვიდეულს, მსგავსად შაბათისა (ორშაბათი, სამშაბათი...¹¹⁵) შეადგენდნენ კვირის დღეთა შვიდეულის სისტემას. მეშვიდე ცაზე ზყოფი კრონოსი დასაბამს აძლევდა კვირის დღეთა გარკვეულ სისტემას იმ გაგებით, რომ კვირის ყოველი დღის სახელობის ღვთაება ეკუთვნოდა ტიტანთა გვარეულობას, რომლის უფროსი წარმომადგენელი კრონოსი იყო¹¹⁶.

¹¹² Д. ж. Томсон. Первые философы; М., 1959, с. 79—81; Г. Вилклер. Вавилонская культура, с. 78—86; В. Иванов, დასახ. ნაშრ., გვ. 172, 173, 174; ე. კოტეტიშვილი, დასახ. ნაშრ., გვ. 325; К. Тацит, т. II, 1969; с. 191. Белявский В. А. Вавилон легендарный и Вавилон исторический, М., 1971, с. 163.

¹¹³ В. Иванов, დასახ. ნაშრ., გვ. 8, 9, 19.

¹¹⁴ ივ. ჭავჭავიძევილი, დასახ. ნაშრ., გვ. 124.

¹¹⁵ შდრ. Sibitti-ს, ბაბილონელთა მიწიქვეშა სამყაროს სულების შედეგულს. Л. Я. Штернберг. Античный культ Бдиэцецов при свете этнографии, П., 1916, с. 133.

¹¹⁶ Реальный словарь... по Любкеру, Titanes, Zeus, Кронос.

К ВОПРОСУ ДЕМОНОЛОГИИ В ГРУЗИИ

Резюме

Вопрос демонологии имеет определенное значение в деле изучения аграрного культа. Если олицетворением обобщенной идеи жизни, т. е. творителем бессмертной жизни, является божественная сила, противоположной ей силой, творящей смерть, является демоническая сила, создательница акта мученичества, через которую проходит умирающий и вновь воскресающий бог.

Главный носитель демонической силы — женская природа. Ее наивысшее олицетворение — глава колдунь — Рокапи. Названное место, где пребывает Рокапи, по новому варианту, записанному в дер. Земо Суреби, т. н. «камень Хвармады», сближается со словом Хуаразми — «Хуаразми — правительница над женщинами» (Сѣба). Само слово Рокапи должно происходить от персидского слова «Роспик» (Роскин) — открыто предающаяся блуду.

Гурийский и сванский праздник «Лампроба», т. е. сванский праздник волков, объединяет представления об огне, духе мертвого и волке, с ним связываются представления и о колдуньях и о главе Рокапи. Все эти представления определенным порядком направляет всеобъемлющая идея плодородия.

Значение мингрельского слова «гекула» (гекула-ре), производное от латинского *seculo* (век, столетие), соответствует значению грузинского слова «куни», «куни дге». Им же соответствует значение греческого слова *ἑκάτον* (сто, столетие). С луной «полной укуни» сходятся колхидской богини.

Эмблема божеств детских заразных болезней (корь, оспа...), т. н. «Господ», цветок. Эта эмблема берет свое начало с травной магии. Оспенная татуировка в виде бугров или пустул, т. н. «цветов», носит характер естественной инициации. С этой точки зрения вызывает интерес «игральный мяч господ» в связи с игрой в мяч мальчиков в Гурии, так как игры в мяч входили в число посвященных обрядов.

Господа демонические божества. Роль цветов, в особенности фиалки и розы в их культе, наряду с другими данными, указывает на их тонический характер.

Грузинское название дня недели, субботы — «Сабатони» — означает то, что этот день предназначался божествам «Батонеби», т. е. «Господам», которые возможно и составляли семерочную систему дней недели.

სარჩევი

რედაქტორისაგან	3
გ. ჯალაბაძე, ძველი და ახალი სამეურნეო კულტურები გურიაში	9
Г. В. Джагабадзе. Старые и новые хозяйственные культуры в Гурии. Резюме	37
თ. გელაძე, კოლექტიური შრომის ფორმები გურიაში	39
Т. Ш. Геладзе. Коллективные формы труда в Гурии. Резюме	53
მ. მაკალათია, მესაქონლეობასთან დაკავშირებული რწმენა-წარმოდგენები გურიაში	55
М. Н. Макалатия. Религиозные верования и обряды связаны со скотоводством в Гурии. Резюме	76
ც. ბეზარაშვილი, ქალის ტანსაცმელი გურიაში	78
Ц. И. Безарашвили. Женская одежда в Гурии. Резюме	109
ლ. მოლოდინი, ლებვის ხალხური წესები გურიაში	112
Л. Н. Молодин. Народные способы крашения в Гурии. Резюме	129
ბ. დოღობერიძე, ხალხური გართობა-თამაშობანი გურიაში	131
Н. С. Гогоберидзе. Народные игры-развлечения в Гурии. Резюме	153
ბ. ქაჯაია, მიცვალებულის კულტი გურიაში	155
Н. А. Каджая. Культ усопших в Гурии. Резюме	164
გ. ჯალაბაძე, ხელნაწობის ზოგიერთი დარგი და მეთევზეობა გურიაში	165
Г. В. Джагабадзе. Некоторые отрасли ремесленного производства и рыболовство в Гурии. Резюме	182
მ. ნადარაია, დემონოლოგიის საკითხისათვის საქართველოში	183
М. А. Надарая. К вопросу демонологии в Гурии. Резюме	202

МАТЕРИАЛЫ ДЛЯ ЭТНОГРАФИЧЕСКОГО ИЗУЧЕНИЯ ГУРИИ

(на грузинском языке)

დაიბეჭდა საქართველოს სსრ მეცნიერებათა აკადემიის
სარედაქციო-საგამომცემლო საბჭოს დადგენილებით

რეცენზენტები: ისტორიულ მეცნიერებათა კანდიდატები: გ. გასი-
ტაშვილი, მ. ჩართოლანი, ა. სოსაძე

ИБ 1152

1 3 1 1 1 1

რედაქტორი გ. ქალაბაძე
გამომცემლობის რედაქტორი ი. გაჩეჩილაძე
ტექნორედაქტორი ც. ქაშუშაძე
მხატვარი ა. დუშაბაძე
კორექტორი ლ. ჭიჭია

გადაეცა წარმოებას 17.3.1980; ხელმოწერილია დასაბეჭდად 19.2.1981;
ქალაქის ზომა 60×90¹/₁₆; ქალაქი № 1; ნაბეჭდი თაბახი 12,8;
საარტიცხო-საგამომცემლო თაბახი 9,9;

უე 01030;

ტირაჟი 2000;

შეკვეთა № 1202;

ფასი 1 მან. 20 კაპ.

გამომცემლობა „მეცნიერება“, თბილისი, 380060, კუტუზოვის ქ., 19
Издательство «Мецниერება», Тбилиси, 380060, ул. Кутузова, 19

საქ. სსრ. მეცნ. აკადემიის სტამბა, თბილისი, 380060, კუტუზოვის ქ., 19
Типография АН Груз. ССР, Тбилиси, 380060, ул. Кутузова, 19